

宿雨清幾句

荆陽晨帝城

聖年人樂業

境上踏歌行



# 全唐詩

## 二十

中华古典精华文库

# 全唐 诗

(第二十部)

## 第七百二十一卷

### 卷 721\_1【赠唐山人】

李洞

垂须长似发，七十色如鬃。醉眼青天小，吟情太华低。  
千年松绕屋，半夜雨连溪。邛蜀路无限，往来琴独携。

### 卷 721\_2【送云卿上人游安南（一作送僧游南海）】

李洞

春往海南边，秋闻半夜蝉。鲸吞洗钵水，犀触点灯船。  
岛屿分诸国，星河共一天。长安却回日，松偃旧房前。

### 卷 721\_3【郑补阙山居】

李洞

高节谏垣客，白云居静坊。马饥餐落叶，鹤病晒残阳。

野雾昏朝烛，溪笺惹御香。相招倚蒲壁，论句夜何长。

卷 721\_4【送曹郎中南归，时南中用军】

李洞

桂水净和天，南归似谪仙。系绦轻象笏，买布接蛮船。  
海气蒸鞦软，江风激箭偏。罢郎吟乱里，帝远岂知贤。

卷 721\_5【锦江陪兵部郑侍郎话诗著棋（一作和兵部永崇侍郎句筵茶席）】

李洞

落叶溅吟身，会棋云外人。海枯搜不尽，天定著长新。  
月上分题遍，钟残布子匀。忘餐二绝境，取意铸陶钧。

卷 721\_6【中秋月】

李洞

四十五秋宵，月分千里毫。冷沉中岳短，光溢太行高。  
不寐清人眼，移栖湿鹤毛。露华台上别，吟望十年劳。

卷 721\_7【送沈光赴福幕（一作送福州从事）】

李洞

泉齐岭鸟飞，雨熟荔枝肥。南斗看应近，北人来恐稀。  
潮浮廉使宴，珠照岛僧归。幕下逢迁拜，何官着茜衣。

卷 721\_8【鄠郊山舍题赵处士林亭】

李洞

圭峰秋后叠，乱叶落寒墟。四五百竿竹，二三千卷书。  
云深猿拾栗，雨霁蚁缘蔬。只隔门前水，如同万里余。

卷 721\_9【赋得送贾岛谪长江】

李洞

敲驴吟雪月，谪出国西门。行傍长江影，愁深汨水魂。  
筇携过竹寺，琴典在花村。饥拾山松子，谁知贾傅孙。

卷 721\_10【河阳道中】

李洞

冲风仍蹶冻，提辔手频呵。得事应须早，愁人不在多。  
雪田平入塞，烟郭曲随河。翻忆江涛里，船中睡盖蓑。

卷 721\_11【送知己赴濮州】

李洞

中路行僧谒，邮亭话海涛。剑摇林狖落，旗闪岳禽高。  
苔长空州狱，花开梦省曹。濮阳流政化，一半布风骚。

卷 721\_12【送行脚僧】

李洞

瓶枕绕腰垂，出门何所之。毳衣沾雨重，棕笠看山欹。  
夜观入枯树，野眠逢断碑。邻房母泪下，相课别离词。

卷 721\_13【龙州送人赴举】

李洞

献策赴招携，行宫积翠西。挈囊秋卷重，转栈晚峰齐。  
踏月趋金阙，拂云看御题。飞鸣岂回顾，独鹤困江泥。

卷 721\_14【送安抚从兄（一作口）夷偶中丞】

李洞

奉诏向军前，朱袍映雪鲜。河桥吹角冻，岳月卷旗圆。  
僧救焚经火，人修著钓船。六州安抚后，万户解衣眠。

卷 721\_15【送远上人】

李洞

海岳两无边，去来都偶然。齿因吟后冷，心向静中圆。  
虫网花间井，鸿鸣雨后天。叶书归旧寺，应附载钟船。

卷 721\_16【宿凤翔天柱寺穷易玄上人房】

李洞

天柱暮相逢，吟思天柱峰。墨研青露月，茶吸白云钟。  
卧语身粘藓，行禅顶拂松。探玄为一决，明日去临邛。

卷 721\_17【下第送张霞归覲江南】

李洞

此道背于时，携归一轴诗。树沈孤鸟远，风逆蹇驴迟。  
草入吟房坏，潮冲钓石移。恐伤欢覲意，半路摘愁髭。

卷 721\_18【送人之天台】

李洞

行李一枝藤，云边晓扣冰。丹经如不谬，白发亦何能。  
浅井仙人境，明珠海客灯。乃知真隐者，笑就汉廷征。

卷 721\_19【维摩畅林居（一作题维摩畅上人房）】

李洞

诸方游几腊，五夏五峰销。越讲迎骑象，蕃斋忤射雕。  
冷筇和雪倚，朽栎带云烧。从此西林老，瞥然三万朝。

卷 721\_20【送张乔下第归宣州】

李洞

诗道世难通，归宁楚浪中。早程残岳月，夜泊隔淮钟。  
一镜随双鬓，全家老半峰。无成来往过，折尽谢亭松。

卷 721\_21【送卢（一作唐）郎中赴金州】

李洞

云明天岭高，刺郡辍仙曹。危栈窥猿顶，公庭扫鹤毛。  
出军青壁罅，话道白眉毫。远集歌谣客，州前泊几艘。

卷 721\_22【江干即事】

李洞

病卧四更后，愁闻报早衙。隔关沈水鸟，侵郭噪园鸦。  
吏瘦餐溪柏，身羸凭海槎。满朝吟五字，应不老烟霞。

卷 721\_23【寄贺郑常侍】

李洞

山亦怀恩地，高禽尽下飞。吏穿霞片望，僧扫月棱归。  
省拜墀烟近，林居玉漏微。曾令驻锡话，聊用慰攀依。

卷 721\_24【登楼】

李洞

川上值楼开，寒山四面来。竹吹人语远，峰碍鸟飞回。  
生死别离陌，朝昏云雨堆。谁知独立意，溅泪落莓苔。

卷 721\_25【赠禅友】

李洞

散花留内殿，宫女梦谈禅。树杪开楼锁，云中认岳莲。  
溪声过长耳，筇节出羸肩。飞句相招宿，多逢有月天。

卷 721\_26【早春友人访别南归】

李洞

南归来取别，穷巷坐青苔。一盏薄醪酒，数枝零落梅。  
潮生楚驿闭，星在越楼开。明日望君处，前临风月台。

卷 721\_27【题云际寺】

李洞

开门风雪顶，上彻困飞禽。猿戏青冥里，人行紫阁阴。  
腊泉冰下出，夜磬月中寻。尽欲居岩室，如何不住心。

卷 721\_28 【山寺老僧】

李洞

云际众僧里，独攒眉似愁。护茶高夏腊，爇火老春秋。  
海浪南曾病，河冰北苦游。归来诸弟子，白遍后生头。

卷 721\_29 【同僧宿道者院】

李洞

携文过水宿，拂席四廊尘。坠果敲楼瓦，高萤映鹤身。  
点灯吹叶火，谈佛悟山人。尽有栖霞志，好谋三教邻。

卷 721\_30 【古柏】

李洞

手植知何代，年齐偃盖松。结根生别树，吹子落邻峰。  
古干经龙嗅，高烟过雁冲。可佳繁叶尽，声不碍秋钟。

卷 721\_31 【赠王凤二山人】

李洞

山兄望鹤信，山弟听乌占。养药同开鼎，休棋各枕衾。  
相逢九江底，共到五峰尖。愿许为三友，羞将白发搴。

卷 721\_32 【避地冬夜与二三禅侣吟集茅斋】

李洞

四海通禅客，搜吟会草亭。拈髭孤烛白，闭目众山青。  
松挂敲冰杖，垆温注月瓶。独愁悬旧旆，笏冷立残星。

卷 721\_33 【赠道微禅师】

李洞

铜瓶涩泻水，出磧蹶莲屋。猛虎降低鼠，盘雕望小蝇。  
通禅五天日，照祖几朝灯。短发归林白，何妨剃未能。

卷 721\_34【吊草堂禅师】

李洞

杖屨疑师在，房关四壁蛩蛩。贮瓶经腊水，响塔隔山钟。  
乳鸽沿苔井，斋猿散雪峰。如何不见性，倚遍寺前松。

卷 721\_35【宿长安苏雍主簿厅】

李洞

县对数峰云，官清主簿贫。听更池上鹤，伴值岳阳人。  
井锁煎茶水，厅关捣药尘。往来多屣步，同舍即诸邻。

卷 721\_36【秋宿润州刘处士江亭】

李洞

北梦风吹断，江边处士亭。吟生万井月，见尽一天星。  
浪静鱼冲锁，窗高鹤听经。东西渺无际，世界半沧溟。

卷 721\_37【秋日曲江书事】

李洞

门摇枯苇影，落日共鸥归。园近鹿来熟，江寒人到稀。  
片云穿塔过，枯叶入城飞。翻怕宾鸿至，无才动礼闈。

卷 721\_38【秋宿经（一作荆）上人房】

李洞

江房无叶落，松影带山高。满寺中秋月，孤窗入夜涛。  
旧真悬石壁，衰发落铜刀。卧听晓耕者，与师知苦劳。

卷 721\_39【冬日题觉公牛头兰若】

李洞

天寒高木静，一磬隔川闻。鼎水看山汲，台香扫雪焚。  
鹤归惟认刹，僧步不离云。石室开禅后，轮珠谢圣君。

卷 721\_40【送皇甫校书自蜀下峡，归覲襄阳】

李洞

蜀道波不竭，巢乌出浪痕。松阴盖巫峡，雨色彻荆门。  
宿寺青山尽，归林彩服翻。苦吟怀冻馁，为吊浩然魂。

卷 721\_41【题西明寺攻文僧林复上人房】

李洞

谁寄湘南信，阴窗砚起津。烧痕碑入集，海角寺留真。  
楼憩长空鸟，钟惊半阙人。御沟圆月会，似在草堂身。

卷 721\_42【寄翠微无可上人（一作无学禅师）】

李洞

远近众心归，居然占翠微。展经猿识字，听法虎知非。  
泉注城池梦，霞生侍卫衣。玄机不可学，何似总无机。

卷 721\_43【喜鸾公自蜀归】

李洞

禁院对生台，寻师到绿槐。寺高猿看讲，钟动鸟知斋。  
扫石月盈帚，滤泉花满筛。归来逢圣节，吟步上尧阶。

卷 721\_44【题新安国寺】

李洞

佛亦遇艰难，重兴叠废坛。偃松枝旧折，画竹粉新干。  
开讲宫娃听，抛生禁鸟餐。钟声入帝梦，天竺化长安。

卷 721\_45【蕃寇侵逼，南归道中】

李洞

云州三万骑，南走疾飞鹰。回碛星低雁，孤城月伴僧。  
敲关通汉节，倾府守河冰。无处论边事，归溪夜结罾。

卷 721\_46【送东宫贾正字之蜀】

李洞

南朝献晋史，东蜀瞰巴楼。长栈怀宫树，疏峰露剑州。  
半空飞雪化，一道白云流。若次江边邑，宗诗为遍搜。

卷 721\_47【吊侯圭常侍】

李洞

我重君能赋，君褒我解诗。三堂一拜遇，四海两心知。  
影挂僧挑烛，名传鹤拂碑。涪江吊孤冢，片月下峨眉。

卷 721\_48【颜上人房（一作题西明自觉上人房）】

李洞

御沟临岸行，远岫见云生。松下度三伏，磬中销五更。  
雨淋经阁白，日闪剃刀明。海畔终须去，烧灯老国清。

## 卷七百二十二

### 卷 722\_1【题薛少府庄】

李洞

何须凿井饮，门占古溪居。寂寞苔床卧，寒虚玉柄书。  
有期登白阁，又得赏红蕖。清浅蒲根水，时看鹭啄鱼。

### 卷 722\_2【寄太白隐者】

李洞

开辟已来雪，为山长欠春。高遮辞磧雁，寒噤入川人。  
栈阁交冰柱，耕樵隔日轮。此中栖息者，不识两京尘。

### 卷 722\_3【秋宿青龙禅阁】

李洞

前山不可望，暮色渐沉规。日转须弥北，蟾来渤海西。

风铃乱僧语，霜柝欠猿啼。阁外千家月，分明见里迷。

卷 722\_4【登圭峰旧隐寄荐福栖白上人】

李洞

返照塔轮边，残霖滴几悬。夜寒吟病甚，秋健讲声圆。  
粟穗干灯焰，苔根浊水泉。西峰埋藓石，秋月即师禅。

卷 722\_5【将之蜀别友人】

李洞

嘉陵雨色青，澹别酌参苓。到蜀高诸岳，窥天合四溟。  
书来应隔雪，梦觉已无星。若遇多吟友，何妨勘竺经。

卷 722\_6【吊膳曹从叔郎中】

李洞

华省支残俸，寒蔬办祭稀。安坟对白阁，买石折朱衣。  
蜀客弹琴哭，江鸥入宅飞。帆吹佳句远，不独遍王畿。

卷 722\_7【乱后龙州送郑郎中兼寄郑侍御】

李洞

待车登叠嶂，经乱集鸰原。省坏兰终洁，台寒柏有根。  
县清江入峡，楼静雪连村。莫隐匡山社，机云受晋恩。

卷 722\_8【段秀才溪居送从弟游泾陇】

李洞

抱疾寒溪卧，因循草木青。相留开夏蜜，辞去见秋萤。  
朔雪痕侵雍，边烽焰照泾。烟沈陇山色，西望涕交零。

卷 722\_9【题刘相公光德里新构茅亭】

李洞

野色迷亭晓，龙墀待押班。带涎移海木，兼雪写湖山。  
月白吟床冷，河清直印闲。唐封三万里，人偃翠微间。

卷 722\_10【江峡寇乱寄怀吟僧】

李洞

半锡探寒流，别师猿鹤洲。二三更后雨，四十字边秋。  
立塞吟霞石，敲鼙看雪楼。扶亲何处隐，惊梦入嵩丘。

卷 722\_11【贺昭国从叔员外转本曹郎中】

李洞

苔砌塔阴浓，朝回尚叫蛩。粟征山县欠，官转水曹重。  
灯照楼中雨，书求海上峰。诗家无骤显，一一古人踪。

卷 722\_12【赠宋校书】

李洞

曾伴元戎猎，寒来梦北军。闲身不计日，病鹤放归林。  
石上铺棋势，船中赌酒分。长言买天姥，高卧谢人群。

卷 722\_13【越公上人洛中归寄南孟家兄弟】

李洞

洛下因归去，关西忆二龙。笠漫河岸雪，衣着虢城钟。  
睡鸭浮寒水，樵人出远峰。何当化闾俗，护取草堂松。

卷 722\_14【龙州送裴秀才】

李洞

违拜旆旗前，松阴路半千。楼冲高雪会，驿闭乱云眠。  
榜挂临江省，名题赴宅筵。人求新蜀赋，应贵浣花笺。

卷 722\_15【题慈恩友人房】

李洞

贾生耽此寺，胜事入诗多。鹤宿星千树，僧归烧一坡。  
塔棱垂雪水，江色映茶锅。长久堪栖息，休言忆镜波。

卷 722\_16【寄窦禅山薛秀才】

李洞

窦岭吟招隐，新诗满集贤。白衫春絮暖，红纸夏云鲜。  
琴缠江丝细，棋分海石圆。因知醉公子，虚写世人传。

卷 722\_17【西蜀与崔先生话东洛旧游】

李洞

王屋峭难名，三刀梦四更。日升当地缺，星尽未天明。  
度雪云林湿，穿松角韵清。崔家开锦浪，忆着水窗声。

卷 722\_18【上昭国水部从叔郎中】

李洞

极南极北游，东泛复西流。行匝中华地，魂销四海秋。  
题诗在琼府，附舶出青州。不遇一公子，弹琴吊古丘。

卷 722\_19【题玉芝赵尊师院】

李洞

晓起磬房前，真经诵百篇。漱流星入齿，照镜石差肩。  
静闭街西观，存思海上仙。闲听说五岳，穷遍一根莲。

卷 722\_20【送卢少府之任巩洛】

李洞

从知东甸尉，铨注似恩除。带土移嵩术，和泉送尹鱼。  
印床寒鹭宿，壁记醉僧书。堂下诸昆在，无妨候起居。

卷 722\_21【送人归颿河中】

李洞

青门冢前别，道路武关西。有寺云连石，无僧叶满溪。  
河长随鸟尽，山远与人齐。颿省波涛县，寒窗响曙鸡。

卷 722\_22 【锦城秋寄怀弘播上人】

李洞

极顶云兼冻，孤城露洗初。共辞嵩少雪，久绝贝多书。  
远照雁行细，寒条狄挂虚。分泉煎月色，忆就茗林居。

卷 722\_23 【圭峰溪居寄怀韦曲曹秀才】

李洞

南北飞山雪，万片寄相思。东西曲流水，千声泻别离。  
巴猿学导引，陇鸟解吟诗。翻羨家林赏，世人那得知。

卷 722\_24 【送舍弟之山南】

李洞

南山入谷游，去彻山南州。下马云未尽，听猿星正稠。  
印茶泉绕石，封国角吹楼。远宦有何兴，贫兄无计留。

卷 722\_25 【题南鉴公山房】

李洞

竹房开处峭，迥挂半山灯。石磬敲来穴，不知何代僧。  
讲归双袖雪，禅起一盂冰。唯说黄桑屐，当时着秣陵。

卷 722\_26 【送知己】

李洞

郡清官舍冷，枕席溅山泉。药气来人外，灯光到鹤边。  
梦秦书印斗，思越画渔船。掷笏南归去，波涛路几千。

卷 722\_27 【送人赴职湘潭】

李洞

南征虽赴辟，其奈负高科。水合湘潭住，山分越国多。  
梅花雪共下，文相和。白发陪官宴，红旗影里歌。

卷 722\_28 【过野叟居】

李洞

野人居止处，竹色与山光。留客羞蔬饭，洒泉开草堂。  
雨余松子落，风过朮苗香。尽日无炎暑，眠君青石床。

卷 722\_29 【吊郑宾客】

李洞

朝行丧名节，岳色惨天风。待漏秋吟断，焚香夜直空。  
骨寒依垄草，家尽逐边鸿。一吊知音后，归来碎峰桐。

卷 722\_30 【送从叔书记山阴隐居】

李洞

山顶绝茅居，云泉绕枕虚。烧移僧影瘦，风展鹭行疏。  
卷箔清江月，敲松紫阁书。由来簪组贵，不信教猿锄。

卷 722\_31【避暑庄严禅院】

李洞

定里无烦热，吟中达性情。入林逢客话，上塔接僧行。  
八水皆知味，诸翁尽得名。常论冰井近，莫便厌浮生。

卷 722\_32【寄清演】

李洞

忽闻清演病，可料苦吟身。不见近诗久，徒言华发新。  
别来山已破，住处月为邻。几绕庭前树，于今四十春。

卷 722\_33【迁村居二首】

李洞

移居入村宇，树阙见城隍。云水虽堪画，恩私不可忘。  
猿涎滴鹤掌，麈尾拂僧床。弃逐随樵牧，何由报稻粱。

歌乐听常稀，茅亭静掩扉。槎来垂钓次，月落问安归。  
远客传烧研，幽禽看衲衣。眼前无俗事，松雨蜀山辉。

卷 722\_34【出山睹春榜】

李洞

未老鬓毛焦，心归向石桥。指霞辞二纪，吟雪遇三朝。  
连席频登相，分廊尚祝尧。回眸旧行侣，免使负嵩樵。

卷 722\_35【贾岛墓】

李洞

一第人皆得，先生岂不销。位卑终蜀士，诗绝占唐朝。  
旅葬新坟小，魂归故国遥。我来因奠洒，立石用为标。

卷 722\_36【观水墨障子】

李洞

若非神助笔，砚水恐藏龙。研尽一寸墨，扫成千仞峰。  
壁根堆乱石，床罅插枯松。岳麓穿因鼠，湘江绽为蛩。  
挂衣岚气湿，梦枕浪头舂。只为少颜色，时人著意慵。

卷 722\_37【对棋】

李洞

小槛明高雪，幽人斗智棋。日斜抛作劫，月午蹙成迟。  
倚杖湘僧算，翘松野鹤窥。侧楸敲醒睡，片石夹吟诗。  
雨点奁中渍，灯花局上吹。秋涛寒竹寺，此兴谢公知。

卷 722\_38【题竹溪禅院】

李洞

溪边山一色，水拥竹千竿。鸟触翠微湿，人居酷暑寒。  
风摇瓶影碎，沙陷履痕端。爽极青崖树，平流绿峡滩。  
闲来披衲数，涨后卷经看。三境通禅寂，嚣尘染著难。

卷 722\_39【投献吏部张侍郎十韵】

李洞

苔染马蹄青，何曾似在城。不于僧院宿，多傍御沟行。  
隐岫侵巴叠，租田带渭平。肩囊寻省寺，袖轴遍公卿。  
梦入连涛郡，书来积雪营。泪随边雁堕，魂逐夜蝉惊。  
发愤巡江塔，无眠数县更。玄都一病客，兴善几回莺。

贡艺披沙细，酬恩戴岳轻。心期公子念，滴酒在雕楹。

卷 722\_40【终南山二十韵】

李洞

关内平田窄，东西截杳冥。雨侵诸县黑，云破九门青。  
暂看犹无暇，长栖信有灵。古苔秋渍斗，积雾夜昏萤。  
怒恐撞天漏，深疑隐地形。盘根连北岳，转影落南溟。  
穷穴何山出，遮蛮上国宁。残阳高照蜀，败叶远浮泾。  
鬪竹烟岚冻，偷湫雨雹腥。闲房僧灌顶，浴涧鹤遗翎。  
梯滑危缘索，云深静唱经。放泉惊鹿睡，闻磬得人醒。  
踏著神仙宅，敲开洞府扃。棋残秦士局，字缺晋公铭。  
一谷势当午，孤峰耸起丁。远平丹凤阙，冷射五侯厅。  
万丈冰声折，千寻树影停。望中仙岛动，行处月轮馨。  
叠石移临砌，研胶泼上屏。明时献君寿，不假老人星。

卷 722\_41【秋日同觉公上人眺慈恩塔六韵】

李洞

九级耸莲宫，晴登袖拂虹。房廊窥井底，世界出笼中。  
照牖三山火，吹铃八极风。细闻槎客语，遥辨海鱼冲。  
禁静声连北，江寒影在东。谒师开秘锁，尘日闭虚空。

卷 722\_42 【感知上刑部郑侍郎】

李洞

寄掩白云司，蜀都高卧时。邻僧照寒竹，宿鸟动秋池。  
帝诵嘉莲表，人吟宝剑诗。石渠流月断，画角截江吹。  
闲出黄金勒，前飞白鹭鸂。公心外国说，重望两朝推。  
静藓斜圭影，孤窗响锡枝。兴幽松雪见，心苦砚冰知。  
缘杖虫声切，过门马足迟。漏残终卷读，日下大名垂。  
平碛容雕上，仙山许狻窥。数联金口出，死免愧丘为。

卷 722\_43 【叙事寄荐福栖白（一作听白公话旧）】

李洞

险倚石屏风，秋涛梦越中。前朝吟会散，故国讲流终。  
北地闻巴狄，南山见碛鸿。楼高惊雨阔，木落觉城空。  
兔满期姚监，蝉稀别楚公。净瓶光照客，拄杖朽生虫。  
平地塔千尺，半空灯一笼。祝尧谈几句，旋泻海涛东。

卷 722\_44 【送龙州田使君旧诗家】

李洞

御札轸西陲，龙州出牧时。度关云作雪，挂栈水成澌。

剑淬号猿岸，弓悬宿鹤枝。江灯混星斗，山木乱枪旗。  
锁库休秤药，开楼又见诗。无心陪宴集，吟苦忆京师。

卷 722\_45【和知己赴任华州】

李洞

东门罢相郡，此拜动京华。落日开宵印，初灯见早麻。  
鹤身红旆拂，仙掌白云遮。塞色侵三县，河声聒两衙。  
松根醒客酒，莲座隐僧家。一道帆飞直，中筵岳影斜。  
书名寻雪石，澄鼎露金沙。锁合眠关吏，杯寒啄庙鸦。  
分台话嵩洛，赛雨恋烟霞。树谷期招隐，吟诗煮柏茶。

卷 722\_46【题咸阳楼】

李洞

晚亚古城门，凭高黯客魂。塞侵秦旧国，河浸汉荒村。  
客路随书烬，人家带水痕。猎频虚冢穴，耕苦露松根。  
墙外峰粘汉，冰中日晃原。断碑移作砌，广第灌成园。  
北马疑眠碛，南人忆钓湓。桥闲野鹿过，街静禁鸦翻。  
滩鼓城隍动，云冲太白昏。标衣多吕裔，荷锺或刘孙。  
吊问难知主，登攀强滴樽。不能扶壮势，冠剑惜乾坤。

卷 722\_47【赠兴善彻公上人】

李洞

师资怀剑外，徒步管街东。九里山横烧，三条木落风。  
古池曾看鹤，新塔未吟虫。夜久龙髯冷，年多麈尾空。  
心宗本无碍，问学岂难同。

卷 722\_48【龙池春草】

李洞

龙池清禁里，芳草傍池春。旋长方遮岸，全生不染尘。  
和风轻动色，湛露静流津。浅得承天步，深疑绕御轮。  
鱼寻倒影没，花带湿光新。肯学长河畔，绵绵思远人。

卷 722\_49【秋宿梓州牛头寺】

李洞

月去檐三尺，川云入寺楼。灵山顿离众，列宿不多稠。  
篆字焚初缺，翻经诵若流。窗闲二江冷，帘卷半空秋。  
诏散松梢别，棋终竹节收。静增双阙念，高并五翁游。  
鹤梦生红日，云闲锁梓州。望空工部眼，搔乱广文头。

石室僧调马，银河客问牛。晓楼归下界，大地一浮沤。

卷 722\_50【送韦太尉自坤维除广陵】

李洞

全蜀拜扬州，征东辍武侯。直来万里月，旁到五峰秋。  
幢冷遮高雪，旗闲卓乱流。谢朝明主喜，登省旧寮愁。  
隔海城通舶，连河市响楼。千官倚元老，虚梦法云游。

## 卷七百二十三

### 卷 723\_1【赠曹郎中崇贤所居】

李洞

闲坊宅枕穿宫水，听水分衾盖蜀缯。药杵声中捣残梦，  
茶铛影里煮孤灯。荆曹树荫千年井，华岳楼开万仞冰。  
诗句变风官渐紧，夜涛春断海边藤。

### 卷 723\_2【赠昭应沈少府】

李洞

行宫接县判云泉，袍色虽青骨且仙。鄠杜忆过梨栗墅，  
潇湘曾棹雪霜天。华山僧别留茶鼎，渭水人来锁钓船。  
东送西迎终几考，新诗觅得两三联。

卷 723\_3【上司司空员外】

李洞

禅心高卧似疏慵，诗客经过不厌重。藤杖几携量碛雪，  
玉鞭曾把数嵩峰。夜眠古巷当城月，秋直清曹入省钟。  
禹凿故山归未得，河声暗老两三松。

卷 723\_4【叙旧游寄栖白】

李洞

老着重袍坐石房，竺经休讲白眉长。省冲鼉没投江岛，  
曾看鱼飞倚海樯。晓炙冻盂原日气，夜挑莲碗禁灯光。  
吟诗五岭寻无可，倏忽如今四十霜。

卷 723\_5【哭栖白供奉】

李洞

闻说孤窗坐化时，白沙萝雨滴空池。吟诗堂里秋关影，  
礼佛灯前夜照碑。贺雪已成金殿梦，看涛终负石桥期。  
逢山对月还惆怅，争得无言似祖师。

卷 723\_6【赠入内供奉僧】

李洞

内殿谈经惬帝怀，沃州归隐计全乖。数条雀尾来南海，  
一道蝉声噪御街。石枕纹含山里叶，铜瓶口塞井中柴。  
因逢夏日西明讲，不觉宫人拔凤钗。

卷 723\_7【感恩书事寄上集义司徒相公】

李洞

积雪峰西遇奖称，半家寒骨起沟塍。镇时贤相回人镜，  
报德慈亲点佛灯。授钺已闻诸国静，坐筹重见大河澄。  
功居第一图烟阁，依旧终南满杜陵。

卷 723\_8【赠永崇李将军充襄阳制置使】

李洞

拜官门外发辉光，宿卫阴符注几行。行处近天龙尾滑，  
猎时陪帝马鬃香。九城王气生旗队，万里寒风入箭疮。  
从此浩然声价歇，武中还有李襄阳。

卷 723\_9【寄淮海惠泽上人】

李洞

海涛痕满旧征衣，长忆初程宿翠微。竹里桥鸣知马过，  
塔中灯露见鸿飞。眉毫别后应盈尺，岩木居来定几围。  
他日愿师容一榻，煎茶扫地学忘机。

卷 723\_10【春日隐居官舍感怀】

李洞

风吹烧烬杂汀沙，还似青溪旧寄家。入户竹生床下叶，  
隔窗莲谢镜中花。苔房毳客论三学，雪岭巢禽看两衙。  
销得人间无限事，江亭月白诵南华。

卷 723\_11【春日即事寄一二知己】

李洞

浴马池西一带泉，开门景物似樊川。朱衣映水人归县，  
白羽遗泥鹤上天。索米夜烧风折木，无车春养雪藏鞭。  
缙绅处士知章句，忍使孤窗枕泪眠。

卷 723\_12【废寺闲居寄怀一二罢举知己（一作省归郎）】

李洞

病居废庙冷吟烟，无力争飞类病蝉。槐省老郎蒙主弃，  
月陂孤客望谁怜。税房兼得调猿石，租地仍分浴鹤泉。  
处世堪惊又堪愧，一坡山色不论钱。

卷 723\_13【题尼大德院】

李洞

云鬓早岁断金刀，戒律曾持五百条。台上灯红莲叶密，  
眉间毫白黛痕销。绣成佛国银为地，画出王城雪覆桥。  
清净高楼松桧寺，世雄翻愧自低腰。

卷 723\_14【怀张乔张霞】

李洞

西风吹雨叶还飘，忆我同袍隔海涛。江塔眺山青入佛，  
边城履雪白连雕。身离世界归天竺，影挂虚空度石桥。  
应念无成独流转，懒磨铜片鬓毛焦。

卷 723\_15【赠徐山人】

李洞

徐生何代降坤维，曾伴园公采紫芝。瓦砾变黄忧世换，  
髭须放白怕人疑。山房古竹粗于树，海岛灵童寿等龟。  
知叹有唐三百载，光阴未抵一先棋。

卷 723\_16【寄南岳僧】

李洞

新秋日后晒书天，白日当松影却圆。五字句求方寸佛，  
一条街擘两行蝉。不曾著事于机内，长合教山在眼前。  
花落侑公房外石，调猿弄虎叹无缘。

卷 723\_17【华山】

李洞

碧山长冻地长秋，日夕泉源聒华州。万户烟侵关令宅，  
四时云在使君楼。风驱雷电临河震，鹤引神仙出月游。  
峰顶高眠灵药熟，自无霜雪上人头。

卷 723\_18【和曹监春晴见寄】

李洞

竺庙邻钟震晓鸦，春阴盖石似仙家。兰台架列排书目，  
顾渚香浮瀹茗花。胶溜石松粘鹤氅，泉离冰井熨僧牙。  
功成名著扁舟去，愁睹前题罩碧纱。

卷 723\_19【赠三惠大师】

李洞

枫猿峽角别多时，二教兼修内学师。药树影中频缀偈，  
莲峰朵下几窥棋。游归笋长齐童子，病起巢成露鹤儿。  
诏落五天开夏讲，两街人竞礼长眉。

卷 723\_20【送醉画王处士】

李洞

几年乘兴住南吴，狂醉兰舟夜落湖。别后鹤毛描转细，  
近来牛角饮还粗。同餐夏果山何处，共钓秋涛石在无。  
关下相逢怪予老，篇章役思绕寰区。

卷 723\_21 【闻杜鹃】

李洞

万古潇湘波上云，化为流血杜鹃身。长疑啄破青山色，  
只恐啼穿白日轮。花落玄宗回蜀道，雨收工部宿江津。  
声声犹得到君耳，不见千秋一甌尘。

卷 723\_22 【赋得送轩辕先生归罗浮山】

李洞

旧山归隐浪摇青，绿鬓山童一帙经。诗帖布帆猿鸟看，  
药煎金鼎鬼神听。洞深头上聆仙语，船静鼻中闻海腥。  
此处先生应不住，吾君南望漫劳形。

卷 723\_23 【送包处士】

李洞

秋思枕月卧潇湘，寄宿慈恩竹里房。性急却于棋上慢，  
身闲未免药中忙。休抛手网惊龙睡，曾挂头巾拂鸟行。  
闻说石门君旧隐，寒峰溅瀑坏书堂。

卷 723\_24【赠庞炼师（女人）】

李洞

家住涪江汉语娇，一声歌戛玉楼箫。睡融春日柔金缕，  
妆发秋霞战翠翘。两脸酒醺红杏妒，半胸酥嫩白云饶。  
若能携手随仙令，皎皎银河渡鹊桥。

卷 723\_25【送友罢举赴边职】

李洞

出剡篇章入洛文，无人细读叹俱焚。莫辞秉笏随红旆，  
便好携家住白云。过水象浮蛮境见，隔江猿叫汉州闻。  
高谈阔略陈从事，盟誓边庭壮我军。

卷 723\_26【病猿】

李洞

瘦缠金锁惹朱楼，一别巫山树几秋。寒想蜀门清露滴，  
暖怀湘岸白云流。罢抛檐果沉僧井，休拗崖冰溅客舟。  
啼过三声应有泪，画堂深不彻王侯。

卷 723\_27【毙驴】

李洞

蹇驴秋毙瘞荒田，忍把敲吟旧竹鞭。三尺焦桐背残月，  
一条藜杖卓寒烟。通吴白浪宽围国，倚蜀青山峭入天。  
如画海门支肘望，阿谁家卖钓鱼船。

卷 723\_28【宿叶公棋阁】

李洞

带风棋阁竹相敲，局莹无尘拂树梢。日到长天征未断，  
钟来岳顶劫须抛。挑灯雪客栖寒店，供茗溪僧爇废巢。  
因悟修身试贪教，不须焚火向三茅。

卷 723\_29【送郤先辈归觐华阴】

李洞

桂枝博得凤栖枝，欢觐家僮舞翠微。僧向瀑泉声里贺，  
鸟穿仙掌指间飞。休停砚笔吟荒庙，永别灯笼赴锁闱。  
骚雅近来颓丧甚，送君傍觉有光辉。

卷 723\_30【赠可上人】

李洞

寺门和鹤倚香杉，月吐秋光到思嚙。将法传来穿泐漭，  
把诗吟去入嵌岩。模糊书卷烟岚滴，狼藉衣裳瀑布绒。  
不断清风牙底嚼，无因内殿得名衔。

卷 723\_31【东川高仆射】

李洞

油幢影里拜清风，十里貔貅一片雄。三印锁开霜满地，  
四门关定月当空。泉浮山叶人家过，诏惹垆香鸟道通。  
新起画楼携客上，弦歌筵内海榴红。

卷 723\_32【宿成都松溪院】

李洞

松持节操溪澄性，一炷烟岚压寺隅。翡翠鸟飞人不见，  
琉璃瓶贮水疑无。夜闻子落真山雨，晓汲波圆入画图。  
尘拥蜀城抽锁后，此中犹梦在江湖。

卷 723\_33【吊曹监】

李洞

宅上愁云吹不散，桂林诗骨葬云根。满楼山色供邻里，  
一洞松声付子孙。甘露施衣封泪点，秘书取集印苔痕。  
吟魂醉魄归何处，御水呜呜夜绕门。

卷 723\_34【赠长安毕郎中】

李洞

高门寒沼水连云，鹭识朱衣傍主人。地肺半边晴带雪，  
天街一面静无尘。朝回座客酬琴价，衙退留僧写鹤真。  
从此几迁为计相，蓬莱三刻奏东巡。

卷 723\_35【寄东蜀幕中友】

李洞

官亭池碧海榴殷，遥想清才倚画栏。柳絮涨天笼地暖，  
角声经雨透云寒。晓侵台座香烟湿，夜草军书蜡炬干。  
为话门人吟太苦，风摧兰秀一枝残。

卷 723\_36【曲江渔父】

李洞

儿孙闲弄雪霜髯，浪飏南山影入檐。卧稳篷舟龟作枕，  
病来茅舍网为帘。值春游子怜菹滑，通蜀行人说鲙甜。  
数尺寒丝一竿竹，岂知浮世有猜嫌。

卷 723\_37【和刘驾博士赠庄严律禅师】

李洞

人言紫绶有光辉，不二心观似草衣。尘劫自营还自坏，  
禅门无住亦无归。松根穴蚁通山远，塔顶巢禽见海微。  
每话南游偏起念，五峰波上入船扉。

卷 723\_38【智新上人话旧】

李洞

蟋蟀灯前话旧游，师经几夏我经秋。金陵市合月光里，  
甘露门开峰朵头。晴眺远帆飞入海，夜禅阴火吐当楼。  
相看未得东归去，满壁寒涛泻白鸥。

卷 723\_39【和淮南太尉留题凤州王氏别业】

李洞

清秋看长鹭雏成，说向湘僧亦动情。节屋折将松上影，  
印龕移锁月中声。野人陪赏增诗价，太尉因居著谷名。  
闲想此中遗胜事，宿斋吟绕凤池行。

卷 723\_40【乙酉岁自蜀随计趁试不及】

李洞

客卧涪江蘸月厅，知音唤起进趋生。寒梅折后方离蜀，  
腊月圆前未到京。风卷坏亭羸仆病，雪糊危栈蹇驴行。  
文昌一试应关分，岂校褒斜两日程。

卷 723\_41【龙州韦郎中先梦六赤，后因打叶子以诗上】

李洞

红蜡香烟扑画楹，梅花落尽庾楼清。光辉圆魄衔山冷，  
彩镂方牙着腕轻。宝帖牵来狮子镇，金盆引出凤凰倾。  
微黄喜兆庄周梦，六赤重新掷印成。

卷 723\_42【和寿中丞伤猿】

李洞

遗挂朱栏锁半寻，清声难买恨黄金。悬崖接果今何在，  
浅井窥星影已沉。归宅叶铺曾睡石，入朝灯照旧啼林。  
小山罢绕随湘客，高树休升对岳禽。天竺省怜伤倍切，  
亲知宽和思难任。相门恩重无由报，竟托仙郎日夜吟。

卷 723\_43【上灵州令狐相公（一作赠高仆射自安西赴阙。  
一作赠功臣）】

李洞

征蛮破虏汉功臣，提剑归来万里身。  
笑倚凌烟金柱看，形容憔悴老于真。

卷 723\_44【寓言】

李洞

三千宫女露蛾眉，笑煮黄金日月迟。  
麟凤隔云攀不及，空山惆怅夕阳时。

卷 723\_45【客亭对月】

李洞

游子离魂陇上花，风飘浪卷绕天涯。  
一年十二度圆月，十一回圆不在家。

卷 723\_46【宿鄠郊赠罗处士】

李洞

川静星高栋已枯，南山落石水声粗。  
白云钓客窗中宿，卧数嵩峰听五湖。

卷 723\_47【有寄】

李洞

爱酒耽棋田处士，弹琴咏史贾先生。  
御沟临岸有云石，不见鹤来何处行。

卷 723\_48【送三藏归西天国】

李洞

十万里程多少碛，沙中弹舌授降龙。  
五天到日应头白，月落长安半夜钟。

卷 723\_49【金陵怀古】

李洞

古来无此战争功，日日戈船卷海风。  
一遇灵鳌开睡眼，六朝灰尽九江空。

卷 723\_50【长安县厅】

李洞

主人寂寞客屯邅，愁绝终南满案前。  
乞取中庭藤五尺，为君高劂扣青天。

卷 723\_51 【题晰上人贾岛诗卷】

李洞

贾生诗卷惠休装，百叶莲花万里香。  
供得半年吟不足，长须字字顶司仓。

卷 723\_52 【送僧清演归山】

李洞

毛褐斜肩背负经，晓思吟入窦山青。  
峰前野水横官道，踏着秋天三四星。

卷 723\_53 【赠僧】

李洞

不羨王公与贵人，唯将云鹤自相亲。  
闲来石上观流水，欲洗禅衣未有尘。

卷 723\_54【题学公院池莲】

李洞

竹引山泉玉瓷池，栽莲莫怪藕生丝。  
如何不似麻衣客，坐对秋风待一枝。

卷 723\_55【山居喜友人见访】

李洞

入云晴劄茯苓还，日暮逢迎木石间。  
看待诗人无别物，半潭秋水一房山。

卷 723\_56【秋宿长安韦主簿厅】

李洞

水木清凉夜直厅，愁人楼上唱寒更。  
坐劳同步帘前月，鼠动床头印锁声。

卷 723\_57【冬忆友人】

李洞

吟上山前数竹枝，叶翻似雪落霏霏。  
枕前明月谁动影，睡里惊来不觉归。

卷 723\_58【怀圭峰影林泉】

李洞

吾家旧物贾生传，入内遥分锡杖泉。  
鹤去帝移宫女散，更堪呜咽过楼前。

卷 723\_59【赠青龙印禅师】

李洞

雨涩秋刀剃雪时，庵前曾礼草堂师。  
居人昨日相过说，鹤已生孙竹满池。

卷 723\_60 【戏赠侯常侍】

李洞

葛洪卷与江淹赋，名动天边傲石居。  
两蜀词人多载后，同君讳却马相如。

卷 723\_61 【绣岭宫词】

李洞

春日迟迟春草绿，野棠开尽飘香玉。  
绣岭宫前鹤发翁，犹唱开元太平曲。

卷 723\_62 【中秋月（一作寥凝诗）】

李洞

九十日秋色，今秋已半分。孤光吞列宿，四面绝微云。  
众木排疏影，寒流叠细纹。遥遥望丹桂，心绪更纷纷。

卷 723\_63【宿书僧（一作记）院】

李洞

夜水笔前澄，时推外学能。书成百个字，庭转几遭灯。  
寄墨大坛吏，分笺蜀国僧。为题江寺塔，牌挂入云层。

卷 723\_64【雪】

李洞

迢迢来极塞，连阙谓风吹。禅客呵金锡，征人擘冻旗。  
细填虫穴满，重压鹤巢欹。有影晴飘野，无声夜落池。  
正繁秦甸暖，渐厚楚宫饥。冻挹分泉涩，光凝二阁痴。  
踏遗兰署迹，听起石门思。用表丰年瑞，无令扫玉墀。

卷 723\_65【述怀二十韵献覃怀相公】

李洞

帝梦求良弼，生申属圣明。青云县器业，白日贯忠贞。  
霭霭随春动，忻忻共物荣。静宜浮竟息，坐觉好风生。  
万国闻应跃，千门望尽倾。瑞含杨柳色，气变管弦声。  
百辟寻知度，三阶正有程。鲁儒规蕴藉，周诰美和平。

碧水遗幽抱，朱丝寄远情。风流秦印绶，仪表汉公卿。  
忠谏期登用，回邪自震惊。云开长剑倚，路绝一峰横。  
九野方无事，沧溟本不争。国将身共计，心与众为城。  
早晚中条下，红尘一顾清。南潭容伴鹤，西笑忽迁莺。  
折树恩难报，怀仁命甚轻。二年犹困辱，百口望经营。  
未在英侯选，空劳短羽征。知音初相国，从此免长鸣。

卷 723\_66【岁暮自广江至新兴往复中题峡山寺】

李洞

薄暮缘西峡，停桡一访僧。鹭巢行卧柳，猿饮倒垂藤。  
水曲岩千叠，云深树百层。山风寒殿磬，溪雨夜船灯。  
滩涨危槎没，泉冲怪石崩。中台一襟泪，岁杪别良朋。

卷 723\_67【冬日送凉州刺史】

李洞

宠饯西门外，双旌出汉陵。未辞金殿日，已梦雪山灯。  
地远终峰尽，天寒朔气凝。新年行已到，旧典听难胜。  
吏扫盘雕影，人遮散马乘。移军驼驮角，下寨掾河冰。  
猎近昆仑兽，吟招碛石僧。重输右藏实，方见左车能。  
兵聚边风急，城宽夜月澄。连营烟火岭，望诏几回登。

卷 723\_68 【过贾浪仙旧地】

李洞

鹤外唐来有谪星，长江东注冷沧溟。境搜松雪仙人岛，  
吟歇林泉主簿厅。片月已能临榜黑，遥天何益抱坟青。  
年年谁不登高第，未胜骑驴入画屏。

卷 723\_69 【句】

李洞

公道此时如不得，昭陵恸哭一生休。

## 卷七百二十四

### 卷 724\_1 【酬友生早秋】

唐求

彤云将欲罢，蝉柳响如秋。雾散九霄近，日程三伏愁。  
残阳宿雨霁，高浪碎沙沓。祛足余旬后，分襟任自由。

### 卷 724\_2 【晓发】

唐求

旅馆候天曙，整车趋远程。几处晓钟断，半桥残月明。  
沙上鸟犹在，渡头人未行。去去古时道，马嘶三两声。

### 卷 724\_3 【客行】

唐求

上山下山去，千里万里愁。树色野桥暝，雨声孤馆秋。

· 全唐诗 ·

---

南北眼前道，东西江畔舟。世人重金玉，无金徒远游。

卷 724\_4【题郑处士隐居】

唐求

不信最清旷，及来愁已空。数点石泉雨，一溪霜叶风。  
业在有山处，道成无事中。酌尽一尊酒，病夫颜亦红。

卷 724\_5【古寺】

唐求

路傍古时寺，寥落藏金容。破塔有寒草，坏楼无晓钟。  
乱纸失经偈，断碑分篆踪。日暮月光吐，绕门千树松。

卷 724\_6【赠著上人】

唐求

掩门江上住，尽日更无为。古木坐禅处，残星鸣磬时。  
水浇冰滴滴，珠数落累累。自有闲行伴，青藤杖一枝。

卷 724\_7【马嵬感事】

唐求

冷气生深殿，狼星渡远关。九城鼙鼓内，千骑道途间。  
凤髻随秋草，鸾舆入暮山。恨多留不得，悲泪满龙颜。

卷 724\_8【赠行如上人】

唐求

不知名利苦，念佛老岷峨。衲补云千片，香烧印一窠。  
恋山人事少，怜客道心多。日日斋钟后，高悬滤水罗。

卷 724\_9【送友人归邛州】

唐求

鹤鸣山下去，满筐荷瑶琨。放马荒田草，看碑古寺门。  
渐寒沙上雨，欲暝水边村。莫忘分襟处，梅花扑酒尊。

卷 724\_10【和舒上人山居即事】

唐求

败叶填溪路，残阳过野亭。仍弹一滴水，更读两张经。  
暝鸟烟中见，寒钟竹里听。不多山下去，人世尽膻腥。

卷 724\_11【发邛州寄友人】

唐求

茫茫驱一马，自叹又何之。出郭见山处，待船逢雨时。  
晓鸡鸣野店，寒叶堕秋枝。寂寞前程去，闲吟欲共谁。

卷 724\_12【舟行夜泊夔州】

唐求

维舟镜面中，迥对白盐峰。夜静沙堤月，天寒水寺钟。  
故园何日到，旧友几时逢。欲作还家梦，青山一万重。

卷 724\_13【山东兰若遇静公夜归】

唐求

松门一径微，苔滑往来稀。半夜闻钟后，浑身带雪归。  
问寒僧接杖，辨语犬衔衣。又是安禅去，呼童闭竹扉。

卷 724\_14【边将】

唐求

三千护塞儿，独自滞边陲。老向二毛见，秋从一叶知。  
地寒乡思苦，天暮角声悲。却被交亲笑，封侯未有期。

卷 724\_15【秋寄 江舒公】

唐求

故人何处望，秋色满江滨。入水溪虫乱，过桥山路分。  
鹤归松上月，僧入竹间云。莫惜中宵磬，从教梦里闻。

卷 724\_16【题杨山人隐居】

唐求

深山道者家，门户带烟霞。绿缀沿岩草，红飘落水花。  
半庭栽小树，一径扫平沙。往往溪边坐，持竿到日斜。

卷 724\_17【夜上隐居寺】

唐求

寻师拟学空，空住虎溪东。千里照山月，一枝惊鹤风。  
年如流去水，山似转来蓬。尽日都无事，安禅石窟中。

卷 724\_18【友人见访不值因寄】

唐求

门户寒江近，篱墙野树深。晚风摇竹影，斜日转山阴。  
砌觉披秋草，床惊倒古琴。更闻邻舍说，一只鹤来寻。

卷 724\_19【涂次偶作】

唐求

岁月客中销，崎岖力自招。问人寻野寺，牵马渡危桥。  
为雨疑天晚，因山觉路遥。前程何处是，一望又迢迢。

卷 724\_20【送友人江行之庐山肄业】

唐求

蜀国初开棹，庐峰拟拾萤。兽皮裁褥暖，莲叶制衣馨。  
楚水秋来碧，巫山雨后青。莫教衔凤诏，三度到中庭。

卷 724\_21【山居偶作】

唐求

趋名逐利身，终日走风尘。还到水边宅，却为山下人。  
僧教开竹户，客许戴纱巾。且喜琴书在，苏生未厌贫。

卷 724\_22 【赠道者】

唐求

披霞戴鹿胎，岁月不能催。饭把琪花煮，衣将藕叶裁。  
鹤从归日养，松是小时栽。往往樵人见，溪边洗药来。

卷 724\_23 【邛州水亭夜宴送顾非熊之官】

唐求

寂寞邛城夜，寒塘对庾楼。蜀关蝉已噪，秦树叶应秋。  
道路连天远，笙歌到晓愁。不堪分袂后，残月正如钩。

卷 724\_24 【题青城山范贤观】

唐求

数里缘山不厌难，为寻真诀问黄冠。苔铺翠点仙桥滑，  
松织香梢古道寒。昼傍绿畦薺嫩玉，夜开红灶撚新丹。  
钟声已断泉声在，风动茅花月满坛。

卷 724\_25【送僧讲罢归山】

唐求

休将如意辩真空，吹尽天花任晓风。共看玉蟾三皎洁，  
独悬金锡一玲珑。岩间松桂秋烟白，江上楼台晚日红。  
依旧曹溪念经处，野泉声在草堂东。

卷 724\_26【题友人寓居】

唐求

寓居无不在天涯，莫恨秦关道路赊。缭绕城边山是蜀，  
弯环门外水名巴。黄头卷席宾初散，白鼻嘶风日欲斜。  
何处一声金磬发，古松南畔有僧家。

卷 724\_27【伤张玖秀才】

唐求

铜梁剑阁几区区，十上探珠不见珠。卞玉影沈沙草暗，  
骅骝声断陇城孤。入关词客秋怀友，出户孀妻晓望夫。  
吴水楚山千万里，旅魂归到故乡无。

卷 724\_28【题李少府别业】

唐求

寻得仙家不姓梅，马嘶人语出尘埃。竹和庭上春烟动，  
花带溪头晓露开。绕岸白云终日在，傍松黄鹤有时来。  
何年亦作围棋伴，一到松间醉一回。

卷 724\_29【赠楚公】

唐求

曾闻半偈雪山中，贝叶翻时理尽通。般若恒添持戒力，  
落叉谁算念经功。云间晓月应难染，海上虚舟自信风。  
长说满庭花色好，一枝红是一枝空。

卷 724\_30【赠王山人】

唐求

红藤一柱脚常轻，日日缘溪入谷行。山下有家身未老，  
灶前无火药初成。经秋少见闲人说，带雨多闻野鹤鸣。  
知到蓬莱难再访，问何方法得长生。

卷 724\_31【庭竹】

唐求

月笼翠叶秋承露，风亚繁梢暝扫烟。  
知道雪霜终不变，永留寒色在庭前。

卷 724\_32【题常乐寺】

唐求

桂冷香闻十里间，殿台浑不似人寰。  
日斜回首江头望，一片晴云落后山。

卷 724\_33【题（一作送）刘炼师归山】

唐求

风急云轻鹤背寒，洞天谁道却归难。  
千山万水瀛洲路，何处烟飞是醮坛。

卷 724\_34 【酬舒公见寄】

唐求

无客不言云外见，为文长遣世间知。  
一声松径寒吟后，正是前山雪下时。

卷 724\_35 【巫山下作】

唐求

细腰宫尽旧城摧，神女归山更不来。  
唯有楚江斜日里，至今犹自绕阳台。

卷 724\_36 【句】

唐求

恰似有龙深处卧，被人惊起黑云生。

## 卷七百二十五

### 卷 725\_1【书怀】

于邺

长安多路岐，西去欲何依。浮世只如此，旧山长忆归。  
自离京国久，应已故人稀。好与孤云住，孤云无是非。

### 卷 725\_2【书情】

于邺

负郭有田在，年年长废耕。欲磨秋镜净，恐见白头生。  
未作一旬别，已过千里程。不知书与剑，十载两无成。

### 卷 725\_3【涂中作（一作出门）】

于邺

西南千里程，处处有车声。若使地无利，始应人不营。

天涯犹马到，石迹尚尘生。如此未曾息，蜀山终冀平。

卷 725\_4【春过函谷关】

于邺

几度作游客，客行长苦辛。愁看函谷路，老尽布衣人。  
岁远关犹固，时移草亦春。何当名利息，遣此绝征轮。

卷 725\_5【褒中即事】

于邺

风吹残雨歇，云去有烟霞。南浦足游女，绿蘋应发花。  
远钟当半夜，明月入千家。不作故乡梦，始知京洛赊。

卷 725\_6【岁暮还家】

于邺

东西流不驻，白日与车轮。残雪半成水，微风应欲春。  
几经他国岁，已减故乡人。回首长安道，十年空苦辛。

卷 725\_7【还家】

于邺

为客忆归舍，归来还寂寥。壮时看欲过，白首固非遥。  
独酌几回醉，此愁终不销。犹残鸡与犬，驱去住山椒。

卷 725\_8【题华山麻处士所居（一本无所居二字）】

于邺

贵贱各扰扰，皆逢朝市间。到此马无迹，始知君独闲。  
冰破听敷水，雪晴看华山。西风寂寥地，唯我坐忘还。

卷 725\_9【天南怀（一作忆）故人】

于邺

独行千里尘，轧轧转征轮。一别已多日，总看成老人。  
洞庭雪不下，故国草应春。三月烟波暖，南风生绿蘋。

卷 725\_10【路傍草】

于邺

春至始青青，香车碾已平。不知山下处，来向路傍生。  
每岁有人在，何时无马行。应随尘与土，吹满洛阳城。

卷 725\_11【秋夕闻雁】

于邺

星汉欲沈尽，谁家砧未休。忽闻凉雁至，如报杜陵秋。  
千树又黄叶，几人新白头。洞庭今夜客，一半却登舟。

卷 725\_12【洛中有怀】

于邺

潺潺伊洛河，寂寞少恩波。銮驾久不幸，洛阳春草多。

卷 725\_13【送魏山韦处士（一作送田处士西游）】

于邺

阴阴亭际间，相顾惨离颜。一片云飞去，嵯峨空魏山。

卷 725\_14【白樱桃】

于邺

王母阶前种几株，水晶帘内看如无。  
只应汉武金盘上，泻得珊珊白露珠。

卷 725\_15【白樱树】

于邺

记得花开雪满枝，和蜂和蝶带花移。  
如今花落游蜂去，空作主人惆怅诗。

卷 725\_16 【下第不胜其忿题路左佛庙】

于邺

雀儿未逐鸢风高，下视鹰鹞意气豪。  
自谓能生千里足，黄昏依旧委蓬蒿。

卷 725\_17 【感怀（一作感情）】

于邺

东风吹草色，空使客蹉跎。不设太平险，更应游子多。  
几伤行处泪，一曲醉中歌。尽向青门外，东随渭水波。

卷 725\_18 【游中梁山】

于邺

僻地好泉石，何人曾陆沈。不知青嶂外，更有白云深。  
因此见乔木，几回思旧林。殷勤猿与鸟，唯我独何心。

卷 725\_19【寻山】

于邺

到此绝车轮，萋萋草树春。青山如有利，白石亦成尘。  
水阔应无路，松深不见人。如知巢与许，千载迹犹新。

卷 725\_20【宿江口】

于邺

南渡人来绝，喧喧雁满沙。自生江上月，长有客思家。  
半夜下霜岸，北风吹荻花。自惊归梦断，不得到天涯。

卷 725\_21【秋夜达萧关】

于邺

扰扰浮梁路，人忙月自闲。去年为塞客，今夜宿萧关。  
辞国几经岁，望乡空见山。不知江叶下，又作布衣还。

卷 725\_22 【斜谷道】

于邺

乱峰连叠嶂，千里绿峨峨。蜀国路如此，游人车亦过。  
远烟当驿敛，骤雨逐风多。独忆紫芝叟，临风歌旧歌。

卷 725\_23 【过百牢关贻舟中者】

于邺

蜀国少平地，方思京洛间。远为千里客，来度百牢关。  
帆影清江水，铃声碧草山。不因名与利，尔我各应闲。

卷 725\_24 【客中览镜】

于邺

何当开此镜，即见发如丝。白日急于水，少年能几时。  
每逢芳草处，长返故园迟。所以多为客，蹉跎欲怨谁。

卷 725\_25 【长安逢隐者】

于邺

征车千里至，碾遍六街尘。向此有营地，忽逢无事人。  
昔时颜未改，浮世路多新。且脱衣沽酒，终南山欲春。

卷 725\_26 【与僧话（一作语）旧】

于邺

草堂前有山，一见一相宽。处世贵僧静，青松因岁寒。  
他山逢旧侣，尽日话长安。所以闲行迹，千回绕药栏。

卷 725\_27 【赠王道士】

于邺

日日市朝路，何时无苦辛。不随丹灶客，终作白头人。  
浮世度千载，桃源方一春。归来华表上，应笑北邙尘。

卷 725\_28【匣中琴】

于邺

世人无正心，虫网匣中琴。何以经时废，非为娱耳音。  
独令高韵在，谁感隙尘深。应是南风曲，声声不合今。

卷 725\_29【友人亭松】

于邺

俯仰不能去，如逢旧友同。曾因春雪散，见在华山中。  
何处有明月，访君听远风。相将归未得，各占石岩东。

卷 725\_30【过洛阳城】

于邺

古来利与名，俱在洛阳城。九陌鼓初起，万车轮已行。  
周秦时几变，伊洛水犹清。二月中桥路，鸟啼春草生。

卷 725\_31【客中月（一作望月）】

于邺

离家凡几宵，一望一寥寥。新魄又将满，故乡应渐遥。  
独临彭蠡水，远忆洛阳桥。更有乘舟客，凄然亦驻桡。

卷 725\_32【王将军宅夜听歌】

于邺

朱槛满明月，美人歌落梅。忽惊尘起处，疑有凤飞来。  
一曲听初彻，几年愁暂开。东南正云雨，不得见阳台。

卷 725\_33【长信（一作春）宫】

于邺

莫问古宫名，古宫空有城。惟应东去水，不改旧时声。

· 全唐诗 ·

---

卷 725\_34【高楼】

于邺

远天明月出，照此谁家楼。上有罗衣裳，凉风吹不休。

## 卷七百二十六

卷 726\_1【和三乡诗（会昌时有女子题诗三乡驿，和者十人）】

陆贞洞

惆怅残花怨暮春，孤鸾舞镜倍伤神。  
清词好个干人事，疑是文姬第二身。

卷 726\_2【和三乡诗】

刘谷

兰蕙芬香见玉姿，路傍花笑景迟迟。  
苕萝山下无穷意，并在三乡惜别时。

卷 726\_3【和三乡诗】

王祝

女几山前岚气低，佳人留恨此中题。

不知云雨归何处，空使王孙见即迷。

卷 726\_4【和三乡诗】

王涤

浣纱游女出关东，旧迹新词一梦中。  
槐陌柳亭何限事，年年回首向春风。

卷 726\_5【和三乡诗】

韦冰

来时欢笑去时哀，家国迢迢向越台。  
待写百年幽思尽，故宫流水莫相催。

卷 726\_6【和三乡诗】

李昌邺

红粉萧娘手自题，分明幽怨发云闺。  
不应更学文君去，泣向残花归剡溪。

卷 726\_7 【和三乡诗】

王硕

无姓无名越水滨，芳词空怨路傍人。  
莫教才子偏惆怅，宋玉东家是旧邻。

卷 726\_8 【和三乡诗】

李缙

会稽王谢两风流，王子沉沦谢女愁。  
归思若随文字在，路傍空为感千秋。

卷 726\_9 【和三乡诗】

张绮

洛川依旧好风光，莲帐无因见女郎。  
云雨散来音信断，此生遗恨寄三乡。

卷 726\_10【和三乡诗】

高衢

南北千山与万山，轩车谁不思乡关。  
独留芳翰悲前迹，陌上恐伤桃李颜。

卷 726\_11【复睹三乡题处留赠】

贾驰

壁古字未灭，声长响不绝。蕙质本如云，松心应耐雪。  
耿耿离幽谷，悠悠望瓯越。杞妇哭夫时，城崩无此说。

卷 726\_12【秋入关】

贾驰

河上微风来，关头树初湿。今朝关城吏，又见孤客入。  
上国谁与期，西来徒自急。

卷 726\_13【咏手二首】

赵光远

妆成皓腕洗凝脂，背接红巾掬水时。薄雾袖中拈玉笋，  
斜阳屏上撚青丝。唤人急拍临前槛，摘杏高搯近曲池。  
好是琵琶弦畔见，细圆无节玉参差。

撚玉搓琼软复圆，绿窗谁见上琴弦。慢笼彩笔闲书字，  
斜指瑶阶笑打钱。炉面试香添麝炷，舌头轻点贴金钿。  
象床珍簟宫棋处，拈定文楸占角边。

卷 726\_14【题妓莱儿壁（一作题北里妓人壁）】

赵光远

鱼钥兽环斜掩门，萋萋芳草忆王孙。醉凭青琐窥韩寿，  
闲掷金梭恼谢鲲。不夜珠光连玉匣，辟寒钗影落瑶尊。  
欲知肠断相思处，役尽江淹别后魂。

卷 726\_15【题兴化高田院桥亭】

郑良士

到此溪亭上，浮生始觉非。野僧还惜别，游客亦忘归。

月满千岩静，风清一磬微。何时脱尘役，杖履愿相依。

卷 726\_16【游九鲤湖】

郑良士

仄径倾崖不可通，湖岚林霭共溟蒙。九溪瀑影飞花外，  
万树春声细雨中。覆石云闲丹灶冷，采芝人去洞门空。  
我来不乞邯郸梦，取醉聊乘郑国风。

卷 726\_17【寄富洋院禅者】

郑良士

画破青山路一条，走鞭飞盖去何遥。碍天岩树春先冷，  
锁院溪云昼不销。雪上茗芽因客煮，海南沈屑为斋烧。  
谁能学得空门士，冷却心灰守寂寥。

卷 726\_18【赠翁承赞漆林书堂诗】

萧项

轺车故国世应稀，昔日书堂二纪归。手植松筠同茂盛，  
身荣金紫倍光辉。入门邻里喧迎接，列坐儿童见等威。

· 全唐诗 ·

---

却对芸窗勤苦处，举头全是锦为衣。

## 卷七百二十七

### 卷 727\_1【喜韩少府见访】

胡令能

忽闻梅福来相访，笑著荷衣出草堂。  
儿童不惯见车马，走入芦花深处藏。

### 卷 727\_2【观郑州崔郎中诸妓绣样（一本题作咏绣障）】

胡令能

日暮堂前花蕊娇，争拈小笔上床描。  
绣成安向春园里，引得黄莺下柳条。

### 卷 727\_3【小儿垂钓】

胡令能

蓬头稚子学垂纶，侧坐莓苔草映身。

路人借问遥招手，怕得鱼惊不应人。

卷 727\_4【王昭君】

胡令能

胡风似剑镞人骨，汉月如钩钓胃肠。  
魂梦不知身在路，夜来犹自到昭阳。

卷 727\_5【望夫石】

严郾

何代提戈去不还，独留形影白云间。肌肤销尽雪霜色，  
罗绮点成苔藓斑。江燕不能传远信，野花空解妒愁颜。  
近来岂少征人妇，笑采蘼芜上北山。

卷 727\_6【赋百舌鸟】

严郾

此禽轻巧少同伦，我听长疑舌满身。星未没河先报晓，  
柳犹粘雪便迎春。频嫌海燕巢难定，却讶林莺语不真。  
莫倚春风便多事，玉楼还有晏眠人。

卷 727\_7【永州陪郑太守登舟夜宴，席上各赋诗】

蒋肱

江头朱绂间青衿，岂是仙舟不可寻。谁敢强登徐稚榻，  
自怜还学谢安吟。月凝兰棹轻风起，妓劝金罍尽醉斟。  
剪尽蜡红人未觉，归时城郭晓烟深。

卷 727\_8【寄远】

张迥

锦字凭谁达，闲庭草又枯。夜长灯影灭，天远雁声孤。  
蝉鬓凋将尽，虬髯白也无。几回愁不语，因看朔方图。

卷 727\_9【春草凝露】

张友正

苍苍芳草色，含露对青春。已赖阳和长，仍惭润泽频。  
日临残未滴，风度欲成津。蕙叶垂偏重，兰丛洗转新。  
将行愁裊径，欲采畏濡身。独爱池塘畔，清华远袭人。

卷 727\_10【锦带佩吴钩】

张友正

带剑谁家子，春朝紫陌游。结边霞聚锦，悬处月随钩。  
彩缕回文出，雄芒练影浮。叶依花里艳，霜向锔中秋。  
的皪宜骢马，斓斒映绮裘。应须待报国，一刎月支头。

卷 727\_11【山中卧病寄卢郎中】

伍唐珪

十年耕钓水云间，住僻家贫少往还。一径绿苔凝晓露，  
满头白发对青山。野僧采药来医病，樵客携觞为解颜。  
空恋旧时恩奖地，无因匍匐出柴关。

卷 727\_12【寒食日献郡守】

伍唐珪

入门堪笑复堪怜，三径苔荒一钓船。  
惭愧四邻教断火，不知厨里久无烟。

卷 727\_13【上苏使君】

伍唐珪

江西昔日推韩注，袁水今朝数赵祥。  
纵使文翁能待客，终栽桃李不成行。

卷 727\_14【赠妓人王福娘】

孙棨

彩翠仙衣红玉肤，轻盈年在破瓜初。霞杯醉劝刘郎赌，  
云髻慵邀阿母梳。不怕寒侵缘带宝，每忧风举倩持裾。  
谩图西子晨妆样，西子元来未得如。

卷 727\_15【题妓王福娘墙】

孙棨

移壁回窗费几朝，指环偷解博红椒。  
无端斗草输邻女，更被拈将玉步摇。

寒绣衣裳饷阿娇，新团香兽不禁烧。  
东邻起样裙腰阔，剩蹙黄金线几条。

试共卿卿语笑初，画堂连遣侍儿呼。  
寒肌不耐金如意，白獭为膏郎有无。

卷 727\_16【戏李文远】

孙棨

引君来访洞中仙，新月如眉拂户前。  
领取嫦娥攀取桂，便从陵谷一时迁。

卷 727\_17【题刘泰娘舍】

孙棨

寻常凡木最轻樗，今日寻樗桂不如。  
汉高新破咸阳后，英俊奔波遂吃虚。

卷 727\_18【戏张道人不饮酒】

颜荛

言自云山访我来，每闻奇秘觉叨陪。  
吾师不饮人间酒，应待流霞即举杯。

卷 727\_19【句】

颜荛

爽籁尽成鸣凤曲，游人多是弄珠仙。

卷 727\_20【秋醉歌】

张为

金风飒已起，还是招渔翁。携酒天姥岑，自弹峰阳桐。  
脱却登山履，赤脚翘青筇。泉声扫残暑，猿臂攀长松。  
翠微泛樽绿，苔藓分烟红。造化处术内，相对数壶空。  
醉眠岭上草，不觉夜露浓。一梦到天晓，始觉一醉中。  
皎然梦中路，直到瀛洲东。初平把我臂，相与骑白龙。  
三留对上帝，玉楼十二重。上帝赐我酒，送我敲金钟。  
宝阁香敛苒，琪树寒玲珑。动叶如笙篁，音律相怡融。  
珍重此一醉，百骸出天地。长如此梦魂，永谢名与利。

卷 727\_21【谢别毛仙翁】

张为

羸形感神药，削骨生丰肌。兰炷飘灵烟，妖怪立诛夷。

· 全唐诗 ·

---

重睹日月光，何报父母慈。黄河浊衮衮，别泪流渐渐。  
黄河清有时，别泪无收期。

卷 727\_22【渔阳将军】

张为

霜髭拥颌对穷秋，著白貂裘独上楼。  
向北望星提剑立，一生长为国家忧。

卷 727\_23【句】

张为

到处即闭户，逢君方展眉。

卷 727\_24【岑公岩】

马冉

南溪有仙涧，咫尺非人间。泠泠松风下，日暮空苍山。

卷 727\_25【诸暨五泄山】

周镛

路入苍烟九过溪，九穿岩曲到招提。天分五溜寒倾北，  
地秀诸峰翠插西。凿径破崖来木杪，驾泉鸣竹落猿题。  
当年老默无消息，犹有词堂一杖藜。

卷 727\_26【赠罗隐】

刘赞

人皆言子屈，独我谓君非。明主既难谒，青山何不归。  
年虚侵雪鬓，尘枉污麻衣。自古逃名者，至今名岂微。

卷 727\_27【句】

刘赞

絮花飞起雪漫漫，长得宫娥带笑看。

卷 727\_28【洛阳道】

任翻

憧憧洛阳道，坐下生春草。行者岂无家，无人在家老。  
鸡鸣前结束，争去恐不早。百年路傍尽，白日车中晓。  
求富江海狭，取贵山岳小。二端立在途，奔走无由了。

卷 727\_29【春晴】

任翻

楚国多春雨，柴门喜晚晴。幽人临水坐，好鸟隔花鸣。  
野色临空阔，江流接海平。门前到溪路，今夜月分明。

卷 727\_30【秋晚郊居】

任翻

远声霜后树，秋色水边村。野径无来客，寒风自动门。  
海山藏日影，江月落潮痕。惆怅高飞晚，年年别故园。

卷 727\_31 【秋晚途次】

任翻

秋色满行路，此时心不闲。孤贫游上国，少壮有衰颜。  
众鸟已归树，旅人犹过山。萧条远林外，风急水潺潺。

卷 727\_32 【葛仙井】

任翻

古井碧沈沈，分明见百寻。味甘传邑内，脉冷应山心。  
圆入月轮净，直涵峰影深。自从仙去后，汲引到如今。

卷 727\_33 【桐柏观】

任翻

飘飘云外者，暂宿聚仙堂。半夜人无语，中宵月送凉。  
鹤归高树静，萤过小池光。不得多时住，门开是事忙。

卷 727\_34 【冬暮野寺】

任翻

江东寒近腊，野寺水天昏。无酒可销夜，随僧早闭门。  
照墙灯影短，著瓦雪声繁。飘泊仍千里，清吟欲断魂。

卷 727\_35 【赠济禅师】

任翻

碧峰秋寺内，禅客已无情。半顶发根白，一生心地清。  
竹房侵月静，石径到门平。山下尘嚣路，终年誓不行。

卷 727\_36 【经堕泪碑】

任翻

羊公传化地，千古事空存。碑已无文字，人犹敬子孙。  
岷山长闭恨，汉水自流恩。数处烟岚色，分明是泪痕。

卷 727\_37【长安冬夜书事】

任翻

忧来长不寐，往事重思量。清渭几年客，故衣今夜霜。  
春风谁识面，水国但牵肠。十二门车马，昏明各自忙。

卷 727\_38【越江渔父】

任翻

借问钓鱼者，持竿多少年。眼明汀岛畔，头白子孙前。  
棹入花时浪，灯留雨夜船。越江深见底，谁识此心坚。

卷 727\_39【哭友人】

任翻

逢著南州史，江边哭问君。送终时有雪，归葬处无云。  
官库惟留剑，邻僧共结坟。儿孙未成立，谁与集遗文。

卷 727\_40【送李衡】

任翻

羁栖亲故少，远别惜清才。天畔出相送，路长知未回。  
欲销今日恨，强把异乡杯。君去南堂后，应无客到来。

卷 727\_41【宫怨】

任翻

泪干红落脸，心尽白垂头。自此方知怨，从来岂信愁。

卷 727\_42【惜花】

任翻

无语与花别，细看枝上红。明年又相见，还恐是愁中。

卷 727\_43【宿巾子山禅寺】

任翻

绝顶新秋生夜凉，鹤翻松露滴衣裳。

前峰月映半江水，僧在翠微开竹房。

卷 727\_44【再游巾子山寺】

任翻

灵江江上帙峰寺，三十年来两度登。  
野鹤尚巢松树遍，竹房不见旧时僧。

卷 727\_45【三游巾子山寺感述】

任翻

清秋绝顶竹房开，松鹤何年去不回。  
惟有前峰明月在，夜深犹过半江来。

卷 727\_46【画山水图答大愚】

荆浩

恣意纵横扫，峰峦次第成。笔尖寒树瘦，墨淡野云轻。  
岩石喷泉窄，山根到水平。禅房时一展，兼称苦空情。

卷 727\_47 【宿顾城二首（顾城在范县东）】

张直

绿草展青裯，樾影连春树。茅屋八九家，农器六七具。  
主人有好怀，掬衣留我住。春酒新泼醅，香美连糟滤。  
一醉卧花阴，明朝送君去。

醉卧夜将半，土底闻鸡啼。惊骇问主人，为我剖荒迷。  
武汤东伐韦，固君含悲凄。神夺悔悟魄，幻化为石鸡。  
形骸仅盈寸，咿喔若啁蛄。吾村耕耘叟，多获于锄犁。

卷 727\_48 【题桃源僧】

陈光

桃源有僧舍，跬步异人天。花乱似无主，鹤鸣疑有仙。  
轩廊明野色，松桧湿春烟。定拟辞尘境，依师过晚年。

## 卷七百二十八

### 卷 728\_1【吟叙】

周昙

历代兴亡亿万心，圣人观古贵知今。  
古今成败无多事，月殿花台幸一吟。

### 卷 728\_2【闲吟】

周昙

考摭妍媸用破心，剪裁千古献当今。  
闲吟不是闲吟事，事有闲思闲要吟。

### 卷 728\_3【唐虞门·唐尧】

周昙

袞氛不起瑞烟轻，端拱垂衣日月明。  
传事四方无外役，茅茨深处土阶平。

卷 728\_4【唐虞门·虞舜】

周昙

进善惩奸立帝功，功成揖让益温恭。  
满朝卿士多元凯，为黜兜苗与四凶。

卷 728\_5【唐虞门·舜妃】

周昙

苍梧一望隔重云，帝子悲寻不记春。  
何事泪痕偏在竹，贞姿应念节高人。

卷 728\_6【唐虞门·再吟】

周昙

潇湘何代泣幽魂，骨化重泉志尚存。  
若道地中休下泪，不应新竹有啼痕。

卷 728\_7【三代门·夏禹】

周昙

尧违天孽赖询谟，顿免洪波浸碧虚。  
海内生灵微伯禹，尽应随浪化为鱼。

卷 728\_8【三代门·再吟】

周昙

万古龙门一旦开，无成甘死作黄能。  
司空定有匡尧术，九载之前何处来。

卷 728\_9【三代门·太康】

周昙

师保何人为琢磨，安知父祖苦辛多。  
酒酣禽色方为乐，讵肯闲听五子歌。

卷 728\_10【三代门·后稷】

周昙

人惟邦本本由农，旷古谁高后稷功。  
百谷且繁三曜在，牲牢郊祀信无穷。

卷 728\_11【三代门·文王】

周昙

昭然明德报天休，禘祭惟馨胜杀牛。  
二老五侯何所许，不归商受尽归周。

卷 728\_12【三代门·武王】

周昙

文王寝膳武王随，内竖言安色始怡。  
七载岂堪囚羑里，一夫为报亦何疑。

卷 728\_13【三代门·太公】

周昙

昌猎关西纣猎东，纣怜崇虎弃非熊。  
危邦自谓多麟凤，肯把王纲取钓翁。

卷 728\_14【三代门·再吟】

周昙

东邻不事事西邻，御物卑和物自亲。  
天下言知天下者，兆人无主属贤人。

卷 728\_15【三代门·又吟】

周昙

千妖万态逞妍姿，破国亡家更是谁。  
匡政必能除苟媚，去邪当断勿狐疑。

卷 728\_16【三代门·子牙妻】

周昙

陵柏无心竹变秋，不能同戚拟同休。  
岁寒焉在空垂涕，覆水如何欲再收。

卷 728\_17【三代门·周公】

周昙

文武传芳百代基，几多贤哲守成规。  
仍闻吐握延儒素，犹恐民疵未尽知。

卷 728\_18【三代门·夷齐】

周昙

让国由衷义亦乖，不知天命匹夫才。  
将除暴虐诚能阻，何异崎岖助纣来。

卷 728\_19【三代门·管蔡】

周昙

伊商胡越尚同图，管蔡如何有异谋。  
不念祖宗危社稷，强于仁圣遣行诛。

卷 728\_20【三代门·成王】

周昙

成王有过伯禽笞，圣惠能新日自奇。  
王道既成何所感，越裳呈瑞凤来仪。

卷 728\_21【三代门·幽王】

周昙

狼烟篝火为边尘，烽候那宜悦妇人。  
厚德未闻闻厚色，不亡家国幸亡身。

卷 728\_22【三代门·平王】

周昙

犬戎西集杀幽王，邦土何由不便亡。  
宜臼东来年更远，川流难绝信源长。

卷 728\_23【春秋战国门·祭足】

周昙

吴鲁燕韩岂别宗，曾无外御但相攻。  
当时周郑谁为相，交质将何服远戎。

卷 728\_24【春秋战国门·再吟】

周昙

周室衰微不共匡，干戈终日互争强。  
诸侯若解尊天子，列国何因次第亡。

卷 728\_25【春秋战国门·隐公】

周昙

今古难堤是小人，苟希荣宠任相亲。  
陈谋不信怀忧惧，反间须防却害身。

卷 728\_26【春秋战国门·庄公】

周昙

齐甲强临力有余，鲁庄为战念区区。  
鱼丽三鼓微曹刿，肉食安能暇远谋。

卷 728\_27【春秋战国门·哀公】

周昙

贤为邻用国忧危，庙算无非委艳奇。  
两叶翠娥春乍展，一毛须去不难吹。

卷 728\_28【春秋战国门·再吟】

周昙

好龙天为降真龙，及见真龙瘁厥躬。  
接下不勤徒好士，叶公何异鲁哀公。

卷 728\_29【春秋战国门·平公】

周昙

鸿鹄轻腾万里高，何殊朝野得贤豪。  
能知翼戴穹苍力，不是蒙茸腹背毛。

卷 728\_30【春秋战国门·文公】

周昙

灭虢吞虞未息兵，柔秦败楚霸威成。  
文公徒欲三强服，分晋元来是六卿。

卷 728\_31【春秋战国门·景公】

周昙

觉病当宜早问师，病深难疗恨难追。  
晋侯徒有秦医缓，疾在膏肓救已迟。

卷 728\_32【春秋战国门·卫灵公】

周昙

子鱼无隐欲源清，死不忘忠感卫灵。  
伯玉既亲知德润，残桃休吃悟兰馨。

卷 728\_33【春秋战国门·陈灵公】

周昙

谁与陈君嫁祸来，孔宁行父夏姬媒。  
灵公徒认徵舒面，至死何曾识祸胎。

卷 728\_34【春秋战国门·陈蔡君】

周昙

楚聘宣尼欲道光，是时陈蔡畏邻强。  
庸谋但解遮贤路，不解迎贤谋自昌。

卷 728\_35【春秋战国门·楚惠王】

周昙

芹中遇蛭强为吞，不欲缘微有害人。  
何事免成心腹疾，皇天惟德是相亲。

卷 728\_36【春秋战国门·楚怀王】

周昙

不听陈轸信张仪，六里商於果见欺。  
既舍黔中西换得，又令生去益堪悲。

卷 728\_37【春秋战国门·再吟】

周昙

不得商於又失齐，楚怀方寸一何迷。  
明知秦是虎狼国，更忍车轮独向西。

卷 728\_38【春秋战国门·韩惠王】

周昙

韩惠开渠止暴秦，营田万顷饱秦人。  
何殊般肉供羸兽，兽壮安知不害身。

卷 728\_39【春秋战国门·顷襄王】

周昙

秦陷荆王死不还，只缘偏听子兰言。  
顷襄还信子兰语，忍使江鱼葬屈原。

卷 728\_40【春秋战国门·武公】

周昙

猛兽来兵只为文，岂宜凉德拟图尊。  
君看豹彩蒙麋质，人取无难必不存。

卷 728\_41【春秋战国门·华元】

周昙

未知军法忌偏颇，徒解于思腹漫皤。  
昔日羊斟曾不预，今朝为政事如何。

卷 728\_42【春秋战国门·臧孙】

周昙

诸孟憎吾似犬豕，贤臧哭孟倍伤情。  
季孙爱我如甘疾，疾足亡身药故宁。

卷 728\_43【春秋战国门·公叔】

周昙

吴起南奔魏国荒，必听公叔失贤良。  
无谋纵欲离安邑，可免河沟徙大梁。

卷 728\_44【春秋战国门·庄辛】

周昙

庄辛正谏谓妖词，兵及鄢陵始悔思。  
见兔必能知顾犬，亡羊补栈未为迟。

卷 728\_45【春秋战国门·孙臆】

周昙

曾嫌胜己害贤人，钻火明知速自焚。  
断足尔能行不足，逢君谁肯不酬君。

卷 728\_46【春秋战国门·灵辄】

周昙

失水枯鳞得再生，翳桑无地谢深情。  
朱轮未染酬恩血，公子何由见赤诚。

卷 728\_47【春秋战国门·郭开】

周昙

秦袭邯郸岁月深，何人沾赠郭开金。  
廉颇还国李牧在，安得赵王为尔擒。

卷 728\_48【春秋战国门·乐羊】

周昙

杯羹忍啜得非忠，巧佞胡为惑主聪。  
盈筐谤书能寝默，中山不是乐羊功。

卷 728\_49【春秋战国门·虞卿】

周昙

割地求和国必危，安知坚守绝来思。  
年年来伐年年割，割尽邯郸何所之。

卷 728\_50【春秋战国门·豫让】

周昙

门客家臣义莫俦，漆身吞炭不能休。  
中行智伯思何异，国土终期国土酬。

卷 728\_51【春秋战国门·毛遂】

周昙

不识囊中颖脱锥，功成方信有英奇。  
平原门下三千客，得力何曾是素知。

卷 728\_52【春秋战国门·再吟】

周昙

定获英奇不在多，然须设网遍山河。  
禽虽一目罗中得，岂可空张一目罗。

卷 728\_53【春秋战国门·田文】

周昙

下客常才不足珍，谁为狗盗脱强秦。  
秦关若待鸡鸣出，笑杀临淄土偶人。

卷 728\_54【春秋战国门·再吟】

周昙

门下三千各自矜，频弹剑客独无能。  
田文不厌无能客，三窟全身果有凭。

卷 728\_55【春秋战国门·冯讷】

周昙

兔窟穿成主再兴，  
辈流狐伏敢骄矜。  
冯讷不是无能者，  
要试君心欲展能。

卷 728\_56【春秋战国门·章子】

周昙

在家能子必能臣，  
齐将功成以孝闻。  
改葬义无欺死父，  
临戎安肯背生君。

卷 728\_57【春秋战国门·卞和】

周昙

磷磷谁为惑温温，  
至宝凡姿甚易分。  
自是时人多贵耳，  
目无明鉴使俱焚。

卷 728\_58【春秋战国门·季札】

周昙

吹毛霜刃过千金，生许徐君死挂林。  
宝剑徒称无价宝，行心更贵不欺心。

卷 728\_59【春秋战国门·孙武】

周昙

理国无难似理兵，兵家法令贵遵行。  
行刑不避君王宠，一笑随刀八阵成。

卷 728\_60【春秋战国门·夫差】

周昙

信听谗言疾不除，忠臣须杀竟何如。  
会稽既雪夫差死，泉下胡颜见子胥。

卷 728\_61【春秋战国门·少孺】

周昙

宝贵亲仁与善邻，邻兵何要互相臻。  
螳螂定是遭黄雀，黄雀须防挟弹人。

卷 728\_62【春秋战国门·苏厉】

周昙

百步穿杨箭不移，养由堪教听弘规。  
身隆业著未知退，勿遣功名一旦隳。

卷 728\_63【春秋战国门·鬻拳】

周昙

鬻拳强谏惧威刑，退省怀惭不顾生。  
双刖忍行留痛恨，惟君适足见忠诚。

卷 728\_64【春秋战国门·荆轲】

周昙

反刃相酬是匹夫，安知突骑驾群胡。  
有心为报怀权略，可在於期与地图。

卷 728\_65【春秋战国门·再吟】

周昙

几尺如霜利不群，恩仇未报反亡身。  
诚哉利器全由用，可惜吹毛不得人。

卷 728\_66【春秋战国门·陈轸】

周昙

丹青徒有逞喧哗，有足由来不是蛇。  
杀将破军为柱国，君今官极更何加。

卷 728\_67【春秋战国门·田饶】

周昙

厨抛败肉士怀饥，仓烂余粮客未炊。  
临难欲行求死士，将何恩信致扶危。

卷 728\_68【春秋战国门·鲍叔】

周昙

忠臣祝寿吐嘉词，鲍叔临轩酒一卮。  
安不忘危臣所愿，愿思危困必无危。

卷 728\_69【春秋战国门·晏婴】

周昙

正人徒以刃相危，贪利忘忠死不为。  
麋鹿命悬当有处，驱车何必用奔驰。

卷 728\_70【春秋战国门·再吟】

周昙

下泽逢蛇盖是常，还如山上见豺狼。  
国中有怪非蛇兽，不用贤能是不祥。

卷 728\_71【春秋战国门·又吟】

周昙

马毙厩人欲就刑，百年临尽一言生。  
赖逢贤相能匡救，仍免吾君播恶声。

卷 728\_72【春秋战国门·叔向】

周昙

重禄存家不敢言，小臣忧祸亦如然。  
明开谏诤能无罪，只此宜为理国先。

卷 728\_73【春秋战国门·师旷】

周昙

老能劝学照余生，似夜随灯到处明。  
往行前言如不见，暗中无烛若为行。

卷 728\_74【春秋战国门·智伯】

周昙

三国连兵敌就擒，晋阳城下碧波深。  
风涛撼处看沈赵，舟楫不从翻自沈。

卷 728\_75【春秋战国门·再吟】

周昙

攻城来下惜先分，一旦家邦属四邻。  
徒逞威强称智伯，不知权变是愚人。

卷 728\_76【春秋战国门·襄子】

周昙

君子常闻不迫危，城崩何用急重围。  
叛亡能退修文德，果见中牟以义归。

卷 728\_77【春秋战国门·杨回】

周昙

三逐乡闾五去君，莫知何地可容身。  
杨回不是逢英鉴，白首无成一旅人。

卷 728\_78【春秋战国门·颜回】

周昙

陋巷箪瓢困有年，是时端木饫腥膻。  
宣尼行教何形迹，不肯分甘救子渊。

卷 728\_79【春秋战国门·子贡】

周昙

救鲁亡吴事可伤，谁令利口说田常。  
吴亡必定由端木，鲁亦宜其运不长。

卷 728\_80【春秋战国门·再吟】

周昙

一言能使定安危，安己危人是所宜。  
仁义不思垂教化，背恩亡德岂儒为。

卷 728\_81【春秋战国门·郑相】

周昙

郑相清贤慎有余，好鱼鱼至竟何如。  
退鱼留得终身禄，禄在何忧不得鱼。

卷 728\_82【春秋战国门·子产】

周昙

为政何门是化源，宽仁高下保安全。  
如嫌水德人多狎，拯溺宜将猛济宽。

卷 728\_83【春秋战国门·管仲】

周昙

美酒浓馨客要沽，门深谁敢强提壶。  
苟非贤主询贤士，肯信沽人畏子獯。

卷 728\_84【春秋战国门·再吟】

周昙

社鼠穿墙巧庇身，何由攻灌若为熏。  
能知窟穴依形势，不听谗邪是圣君。

卷 728\_85【春秋战国门·范蠡】

周昙

西子能令转嫁吴，会稽知尔啄姑苏。  
迹高尘外功成处，一叶翩翩在五湖。

卷 728\_86【春秋战国门·屈原】

周昙

满朝皆醉不容醒，众浊如何拟独清。  
江上流人真浪死，谁知浸润误深诚。

卷 728\_87【春秋战国门·黄歇】

周昙

春申随质若王图，为主轻生大丈夫。  
女子异心安足听，功成何更用阴谋。

卷 728\_88【春秋战国门·王后】

周昙

连环要解解非难，忽碎瑶阶一旦间。  
两国相持兵不解，会应俱碎似连环。

卷 728\_89【春秋战国门·樊姬】

周昙

侧影频移未退朝，喜逢贤相日从高。  
当时不有樊姬问，令尹何由进叔敖。

卷 728\_90【春秋战国门·齐桓公】

周昙

三往何劳万乘君，五来方见一微臣。  
微臣傲爵能轻主，霸主如何敢傲人。

卷 728\_91【春秋战国门·中山君】

周昙

敌临烹子一何庸，激怒来军速自攻。  
结怨岂思围不解，愚谋多以杀为雄。

卷 728\_92【春秋战国门·赵简子】

周昙

简子雄心蓄霸机，贤愚聊欲试诸儿。  
假言藏宝非真宝，不是生知焉得知。

卷 728\_93【春秋战国门·再吟】

周昙

谔谔能昌唯唯亡，亦由匡正得贤良。  
一从忠说无周舍，吾过何人为短长。

卷 728\_94【春秋战国门·赵宣子】

周昙

门人曾不有提弥，连噉呀呀孰敢支。  
临难若教无苟免，乱朝争那以獒为。

卷 728\_95【春秋战国门·韩昭侯】

周昙

去年秦伐我宜阳，今岁天灾旱且荒。  
对此不思人力困，楼门何可更高张。

卷 728\_96【春秋战国门·魏文侯】

周昙

冒雨如何固出畋，虑乖群约失乾乾。  
文侯不是贪禽者，示信将为教化先。

卷 728\_97【春秋战国门·郤成子】

周昙

陈乐无欢璧在隅，宰臣怀智有微谟。  
苟非成子当明哲，谁是仁人可托孤。

卷 728\_98【春秋战国门·秦武阳】

周昙

卅岁徒闻有壮名，及令为副误荆卿。  
是时环柱能相副，谁谓燕囚事不成。

卷 728\_99【春秋战国门·田子方】

周昙

太子无嫌礼乐亏，愿听贫富与安危。  
贱贫骄物贫终在，富贵骄人贵必隳。

卷 728\_100【春秋战国门·淳于髡】

周昙

穰穰何祷手何赍，一呷村浆与只鸡。  
以少求多诚可笑，还如轻币欲全齐。

卷 728\_101【春秋战国门·再吟】

周昙

戏问将何对所耽，滑稽无骨是常谭。  
昔时王者皆通四，近见君王只好三。

卷 728\_102【春秋战国门·再吟】

周昙

曲突徙薪不谓贤，焦头烂额飧盘筵。  
时人多是轻先见，不独田家国亦然。

卷 728\_103【春秋战国门·田子奇】

周昙

少年为吏虑非循，一骑奔追委使臣。  
使者不追何所对，车中缘见白头人。

卷 728\_104【春秋战国门·百里奚】

周昙

船骥由来是股肱，在虞虞灭在秦兴。  
裁量何异刀将尺，只系用之能不能。

卷 728\_105【春秋战国门·孙叔敖】

周昙

童稚逢蛇叹不祥，虑悲来者为埋藏。  
是知阳报由阴施，天爵昭然契日彰。

卷 728\_106【春秋战国门·鲁仲连】

周昙

昔进烧牛发战机，夜奔惊火走燕师。  
今来跃马怀骄惰，十万如无一撮时。

卷 728\_107【春秋战国门·宋子罕】

周昙

子怜温润欲归仁，吾贵坚廉是宝身。  
自有不贪身内宝，玉人徒献外来珍。

卷 728\_108【春秋战国门·宫之奇】

周昙

虞虢相依自保安，谋臣吞度不为难。  
贪怜璧马迷香饵，肯信之奇谕齿寒。

卷 728\_109 【春秋战国门·王孙满】

周昙

九牧金熔物像成，辞昏去乱祚休明。  
兴亡在德不在鼎，楚子何劳问重轻。

卷 728\_110 【春秋战国门·颜叔子】

周昙

夜雨邻娃告屋倾，一宵从寄念悲惊。  
诚知独处从烧烛，君子行心要自明。

卷 728\_111 【春秋战国门·张孟谭】

周昙

强兵四合国将危，赖有谋臣为发挥。  
城内蒿铜诚自有，无谋谁解见玄机。

卷 728\_112【春秋战国门·公子无忌】

周昙

按剑临笼震咄呼，鹄甘泉戮伏鸩辜。  
能怜钝拙诛豪俊，悯弱摧强真丈夫。

卷 728\_113【春秋战国门·再吟】

周昙

赵解重围魏再昌，信陵贤德日馨芳。  
昏蒙愚主听谗说，公子云亡国亦亡。

卷 728\_114【春秋战国门·侯嬴朱亥】

周昙

屠肆监门一贱微，信陵交结国人非。  
当时不是二君计，匹马那能解赵围。

卷 728\_115【春秋战国门·再吟】

周昙

走敌存亡义有余，全由雄勇与英谋。  
但如公子能交结，朱亥侯嬴何代无。

## 卷七百二十九

### 卷 729\_1【秦门·胡亥】

周昙

鹿马何难辨是非，宁劳卜筮问安危。  
权臣为乱多如此，亡国时君不自知。

### 卷 729\_2【秦门·再吟】

周昙

盗贼纵横主恶闻，遂为流矢犯君轩。  
怪言何不早言者，若使早言还不存。

### 卷 729\_3【秦门·赵高】

周昙

赵高胡亥速天诛，率土兴兵怨毒痛。

· 全唐诗 ·

---

丰沛见机群小吏，功成儿戏亦何殊。

卷 729\_4【秦门·陈涉】

周昙

秦法烦苛霸业隳，一夫攘臂万夫随。  
王侯无种英雄志，燕雀喧喧安得知。

卷 729\_5【秦门·项籍】

周昙

九垓垂定弃谋臣，一阵无功便杀身。  
壮士诚知轻性命，不思辜负八千人。

卷 729\_6【秦门·范增】

周昙

智士宁为暗主谋，范公曾不读兵书。  
平生心力为谁尽，一事无成空背疽。

卷 729\_7【前汉门·高祖】

周昙

爱子从烹报主时，安知强啜不含悲。  
太公悬命临刀几，忍取杯羹欲为谁。

卷 729\_8【前汉门·再吟】

周昙

北伐匈奴事可悲，当时将相是其谁。  
君臣束手平城里，三十万兵能忍饥。

卷 729\_9【前汉门·周苛纪信】

周昙

为主坚能不顾身，赴汤蹈火见忠臣。  
后来邦国论心义，谁是君王出热人。

卷 729\_10【前汉门·酈侯】

周昙

共怪酈侯第一功，咸称得地合先封。  
韩生不是萧君荐，猎犬何人为指踪。

卷 729\_11【前汉门·曲逆侯】

周昙

社肉分平未足奇，须观大用展无私。  
一朝如得宰天下，必使还如宰社时。

卷 729\_12【前汉门·薛公】

周昙

黥布称兵孰敢当，薛公三计为斟量。  
上中良策知非用，南取长沙是死乡。

卷 729\_13【前汉门·条侯】

周昙

上将风戈赏罚明，矛鋌严闭亚夫营。  
人君却禀将军令，按辔垂鞭为缓行。

卷 729\_14【前汉门·平津侯】

周昙

儒素逢时得自媒，忽从徒步列公台。  
北辰如不延吾辈，东阁何由逐汝开。

卷 729\_15【前汉门·博陆侯】

周昙

栋梁徒自保坚贞，毁穴难防雀鼠争。  
不是主人知诈伪，如何柱石免欹倾。

卷 729\_16【前汉门·夏贺良】

周昙

汉代中微亦再昌，忠臣忧国冀修禳。  
赤精符讖诚非妄，枉杀无辜夏贺良。

卷 729\_17【前汉门·王莽】

周昙

权归诸吕牝鸡鸣，殷鉴昭然讵可轻。  
新室不因崇外戚，水中安敢寄生营。

卷 729\_18【前汉门·再吟】

周昙

重赋严刑作祸胎，岂知由此乱离媒。  
家传揖让亦难济，况是身从倾篡来。

卷 729\_19【前汉门·又吟】

周昙

铜马朱眉满四方，总缘居摄乱天常。  
因君多少布衣士，不是公卿即帝王。

卷 729\_20【前汉门·毛延寿】

周昙

不拔金钗赂汉臣，徒嗟玉艳委胡尘。  
能知货贿移妍丑，岂独丹青画美人。

卷 729\_21【前汉门·刘圣公】

周昙

不纳良谋刘縯言，胡为衔璧向崇宣。  
伤哉乱帝途穷处，何必当时谮福先。

卷 729\_22【前汉门·樊崇徐宣】

周昙

庸中佼佼铁铮铮，百万长驱入帝京。  
首事纵隳三善在，归仁何虑不全生。

卷 729\_23【前汉门·僭号公孙述】

周昙

剑蜀金汤孰敢争，子阳才业匪雄英。  
方知在德不在险，危栈何曾阻汉兵。

卷 729\_24【后汉门·光武】

周昙

成败非儒孰可量，儒生何指指萧王。  
萧王得众能宽裕，吴汉归来帝业昌。

卷 729\_25【后汉门·明帝】

周昙

朝臣咸佞孰知非，张佚公忠语独奇。  
博士一言除太傅，谥为明帝信其宜。

卷 729\_26【后汉门·桓帝】

周昙

能嫌跋扈斩梁王，宁便荣枯信段张。  
襄楷忠言谁佞惑，忍教奸祸起萧墙。

卷 729\_27【后汉门·灵帝】

周昙

榜悬金价鬻官荣，千万为公五百卿。  
公瑾孔明穷退者，安知高卧遇雄英。

卷 729\_28【后汉门·废帝】

周昙

乱兵如猬走王师，社稷颠危孰为持。  
夜逐萤光寻道路，汉家天子步归时。

卷 729\_29【后汉门·献帝】

周昙

只为曹侯数贵人，普天黔首尽黄巾。  
汉灵早听侍中谏，安得献生称不辰。

卷 729\_30【后汉门·再吟】

周昙

咸怨刑科有党偏，耕夫无不事戎旃。  
是时老幼饥号处，一斛黄禾五百千。

卷 729\_31【后汉门·子密】

周昙

子密封侯岂所宜，能高德义必无为。  
当时若缚还彭氏，率土何忧不自归。

卷 729\_32【后汉门·羊续】

周昙

鱼悬洁白振清风，禄散亲宾岁自穷。  
单席寒厅惭使者，葛衣何以至三公。

卷 729\_33【后汉门·杨震】

周昙

为国推贤匪惠私，十金为报遽相危。  
无言暗室何人见，咫尺斯须已四知。

卷 729\_34【后汉门·赵孝】

周昙

绿林清旦正朝饥，岂计行人瘦与肥。  
为感在原哀叫切，鹧鸪休报听双飞。

卷 729\_35【后汉门·马后】

周昙

粗衣闲寂阅群书，荐达嫔妃广帝居。  
再实伤根嫌贵宠，惠慈劳悴育皇储。

卷 729\_36【后汉门·魏博妻】

周昙

萝挂青松是所依，松凋萝更改何枝。  
操刀必割腕可断，磐石徒坚心不移。

卷 729\_37【后汉门·曹娥】

周昙

心摧目断哭江濱，窺浪無踪日又昏。  
不入重泉尋水底，此生安得見沈魂。

卷 729\_38【后汉门·周都妻】

周昙

綠水雙鴛一已沈，皇天更欲配何禽。  
不將血涕隨霜刃，誰見朱殷未死心。

卷 729\_39【后汉门·鲍宣妻】

周昙

君惡奢華意不歡，一言從儉亦何難。  
但能和樂同琴瑟，未必恩情在綺紈。

卷 729\_40【后汉门·吕母】

周昙

狱无良吏雪无由，处处戈鋌自执仇。  
吕母衔冤穷老妇，亦能为帅复私讎。

卷 729\_41【三国门·蜀先主】

周昙

豫州军败信途穷，徐庶推能荐卧龙。  
不是卑词三访谒，谁令玄德主巴邛。

卷 729\_42【三国门·再吟】

周昙

一家区宇忽三分，龌龊车书曷足论。  
定有伊姜为佐辅，忍教鸿雁各乾坤。

卷 729\_43【三国门·后主】

周昙

万峰如剑戟前来，危阁横空信险哉。  
对此玄休长叹息，方知刘禅是庸才。

卷 729\_44【三国门·吴后主】

周昙

吴宫季主恣骄奢，移尽江南百媚花。  
一旦狂风江上起，花随风散落谁家。

卷 729\_45【三国门·王表】

周昙

王表闻声莫见身，吴中敬事甚君亲。  
是知邦国将亡灭，不听人臣听鬼神。

卷 729\_46【三国门·鲁肃】

周昙

轻财重义见英奇，圣主贤臣是所依。  
公瑾窘饥求子敬，一言才起数船归。

卷 729\_47【晋门·晋武帝】

周昙

汉贪金帛鬻公卿，财贍羸军冀国宁。  
晋武鬻官私室富，是知犹不及桓灵。

卷 729\_48【晋门·再吟】

周昙

君人为理在安民，论道求贤德自新。  
经国远图无所问，何曾言指一何神。

卷 729\_49【晋门·惠帝】

周昙

蛙鸣堪笑问官私，更劝饥人食肉糜。  
蒙昧万机犹妇女，寇戎安得不纷披。

卷 729\_50【晋门·贾后】

周昙

贾后甘为废戮人，齐王还杀赵王伦。  
一从天下无真主，瓜割中原四百春。

卷 729\_51【晋门·怀帝】

周昙

蕃汉戈矛遍九垓，两京簪绂走黄埃。  
刘聪大会平阳日，遣帝行觞事可哀。

卷 729\_52【晋门·愍帝】

周昙

耕牛吃尽大田荒，二两黄金余斗粮。  
御粥又闻无麩屑，不降胡虏奈饥肠。

卷 729\_53【晋门·郭钦】

周昙

谁疑忠谏郭钦言，不逐戎夷出塞垣。  
晋室既无明圣主，果为胡虏乱中原。

卷 729\_54【晋门·王夷甫】

周昙

六合谁为辅弼臣，八风昏处尽胡尘。  
是知济弱扶倾术，不属高谈虚论人。

卷 729\_55【晋门·王茂弘】

周昙

韩魏荆扬日岂堪，胡风看欲过江南。  
中原一片生灵血，谁秉王纲色不惭。

卷 729\_56【晋门·吴隐之】

周昙

闻说贪泉近郁林，隐之今日得深斟。  
徒言滴水能穿石，其那坚贞匪石心。

卷 729\_57【晋门·再吟】

周昙

贪泉何处是泉源，只在灵台一点间。  
必也心源元自有，此泉何必在江山。

卷 729\_58【六朝门·前赵刘聪】

周昙

戎羯谁令识善言，刑将不舍遽能原。  
垂成却罢凤仪殿，仍改逍遥纳谏园。

卷 729\_59【六朝门·前凉张轨】

周昙

官从主簿至专征，谁遣凉王破赵名。  
益信用贤由拔擢，穰苴不是将家生。

卷 729\_60【六朝门·后魏武帝】

周昙

太武南征似卷蓬，徐阳兖蔡杀皆空。  
从来吊伐宁如此，千里无烟血草红。

卷 729\_61【六朝门·三废帝】

周昙

明庄节闵并罹殃，命在朱高二悖王。  
已叹一年三易换，更嗟殴辱下东廊。

卷 729\_62【六朝门·苻坚】

周昙

百万南征几马归，叛亡如猬亦何悲。  
宾擒敌国诸戎主，更遣权兵过在谁。

卷 729\_63【六朝门·再吟】

周昙

空知勇锐不知兵，困兽孤军未可轻。  
安有长驱百余万，身驰几旅欲先征。

卷 729\_64【六朝门·又吟】

周昙

水影星光怪异多，不思修德事干戈。  
无谋拒谏仍轻敌，国破身擒将奈何。

卷 729\_65【六朝门·宋武帝】

周昙

栖栖老楚未遭时，债主凭陵似迫危。  
人杰既为王谧识，刁逵诛斩独何悲。

卷 729\_66【六朝门·二废帝】

周昙

肆意荒狂杀不辜，方嗟废帝又苍梧。  
自言威震为英武，肯虑湘东与玉夫。

卷 729\_67【六朝门·齐废帝东昏侯】

周昙

定策谁扶捕鼠儿，不忧萧衍畏潘妃。  
长围既合刀临项，犹惜金钱对落晖。

卷 729\_68【六朝门·梁武帝】

周昙

梁武年高厌六龙，繁华声色尽归空。  
不求贤德追尧舜，翻作忧囚一病翁。

卷 729\_69【六朝门·再吟】

周昙

兴亡何故遽环回，汤纣身为事可哀。  
莫是自长嫌胜己，蔽贤犹执匹夫才。

卷 729\_70【六朝门·简文帝】

周昙

救兵方至强抽军，与贼开城是简文。  
曲项琵琶催酒处，不图为乐向谁云。

卷 729\_71【六朝门·元帝】

周昙

木栅江城困魏军，王褒横议遏谋臣。  
宾降未免俱为戮，一死安能谢益仁。

卷 729\_72【六朝门·谢举】

周昙

叛奴逃数岂堪留，忠节曾无肯到头。  
朱异早能同远见，青衫宁假帝登楼。

卷 729\_73【六朝门·朱异】

周昙

徒览儒书不学兵，彦和虚得不廉名。  
四郊多垒犹相罪，国破将何谢太清。

卷 729\_74【六朝门·傅昭】

周昙

为政残苛兽亦饥，除饥机在养疲羸。  
人能善政兽何暴，焉用劳人以楹为。

卷 729\_75【六朝门·宣帝】

周昙

宣帝骄奢恣所为，后宫升降略无时。  
乘危自有妻公在，安许鸾凰是尉迟。

卷 729\_76【六朝门·李集】

周昙

忠谏能坚信正臣，三沈三屈竟何云。  
每沈良久方能语，及语还呼桀纣君。

卷 729\_77【隋门·隋文帝】

周昙

孤儿寡妇忍同欺，辅政刚教篡夺为。  
矫诏必能疏昉译，直臣诚合重颜仪。

卷 729\_78【隋门·独孤后】

周昙

腹生奚强有亲疏，怜者为贤弃者愚。  
储贰不遭谗构死，隋亡宁便在江都。

卷 729\_79【隋门·炀帝】

周昙

拒谏劳兵作祸基，穷奢极武向戎夷。  
兆人疲弊不堪命，天下嗷嗷新主资。

卷 729\_80【隋门·贺若弼】

周昙

破敌将军意气豪，请除倾国斩妖娆。  
红绡忍染娇春雪，瞪目看行切玉刀。

## 卷七百三十

### 卷 730\_1【上清辞五首】

李九龄

入海浮生汗漫秋，紫皇高宴五云楼。  
霓裳曲罢天风起，吹散仙香满十洲。

楼锁彤霞地绝尘，碧桃花发九天春。  
东皇近日慵游宴，闲煞瑶池五色麟。

上清仙路有丹梯，影响行人到即迷。  
不会无端个渔父，阿谁教入武陵溪。

本来方朔是真仙，偶别丹台未得还。  
何事玉皇消息晚，忍教憔悴向人间。

新拜天官上玉都，紫皇亲授五灵符。  
群仙个个来相问，人世风光似此无。

卷 730\_2【读三国志】

李九龄

有国由来在得贤，莫言兴废是循环。  
武侯星落周瑜死，平蜀降吴似等闲。

卷 730\_3【山舍南溪小桃花】

李九龄

一树繁英夺眼红，开时先合占东风。  
可怜地僻无人赏，抛掷深山乱木中。

卷 730\_4【春行遇雨】

李九龄

夹路轻风撼柳条，雨侵春态动无憀。  
采香陌上谁家女，湿损钗头翡翠翘。

卷 730\_5 【登楼寄远】

李九龄

满城春色花如雪，极目烟光月似钩。  
总是动人乡思处，更堪容易上高楼。

卷 730\_6 【望思台】

李九龄

汉武年高慢帝图，任人曾不问贤愚。  
直饶四老依前出，消得江充宠佞无。

卷 730\_7 【山舍偶题】

李九龄

门掩松萝一径深，偶携藜杖出前林。  
谁知尽日看山坐，万古兴亡总在心。

卷 730\_8 【荆溪夜泊】

李九龄

点点渔灯照浪清，水烟疏碧月胧明。  
小滩惊起鸳鸯处，一双采莲船过声。

卷 730\_9 【旅舍卧病】

李九龄

家隔西秦无远信，身随东洛度流年。  
病来旅馆谁相问，牢落闲庭一树蝉。

卷 730\_10 【登昭福寺楼】

李九龄

旅怀秋兴正无涯，独倚危楼四望赊。  
谷变陵迁何处问，满川空有旧烟霞。

卷 730\_11 【代边将】

李九龄

雪冻阴河半夜风，战回狂虏血漂红。  
据鞍遥指长安路，须刻麟台第一功。

卷 730\_12 【夜与张舒话别】

李九龄

愁听南楼角又吹，晓鸡啼后更分离。  
如何销得凄凉思，更劝灯前酒一卮。

卷 730\_13 【寒梅词】

李九龄

霜梅先拆岭头枝，万卉千花冻不知。  
留得和羹滋味在，任他风雪苦相欺。

卷 730\_14 【题灵泉寺】

李九龄

入谷先生一阵香，异花奇木簇禅堂。  
可怜门外高低路，万毂千蹄日日忙。

卷 730\_15 【宿张正字别业】

李九龄

茅屋萧寥烟暗后，松窗寂历月明初。  
此时谁念孤吟客，唯有黄公一帙书。

卷 730\_16 【鹤】

李九龄

天上瑶池覆五云，玉麟金凤好为群。  
不须更饮人间水，直是清流也汗君。

卷 730\_17【过相思谷】

李九龄

悠悠信马春山曲，芳草和烟铺嫩绿。  
正被离愁著莫人，那堪更过相思谷。

卷 730\_18【写庄子】

李九龄

圣泽安排当散地，贤侯优贷借新居。  
闲中亦有闲生计，写得南华一部书。

卷 730\_19【山中寄友人】

李九龄

乱云堆里结茅庐，已共红尘迹渐疏。  
莫问野人生计事，窗前流水枕前书。

卷七百三十一

卷 731\_1【津亭】

胡宿

津亭欲阕戒棠舟，五两风来不暂留。西北浮云连魏阙，  
东南初日满秦楼。层城渺渺人伤别，芳草萋萋客倦游。  
平乐旧欢收不得，更凭飞梦到瀛洲。

卷 731\_2【古别】

胡宿

长道何年祖轂休，风帆不断岳阳楼。佳人挟瑟漳河晓，  
壮士悲歌易水秋。九帐青油徒自负，百壶芳醕岂消忧。  
至今长乐坡前水，不啻秦人怨陇头。

卷 731\_3【塞上】

胡宿

汉家神箭定天山，烟火相望万里间。契利请盟金匕酒，

· 全唐诗 ·

---

将军归卧玉门关。云沈老上妖氛断，雪照回中探骑闲。  
五饵已行王道胜，绝无刁斗至阗颜。

卷 731\_4【寄昭潭王中立】

胡宿

高弦一弄武陵深，六幕天空万里心。吴苑歌骊成久别，  
楚峰回雁好归音。十千美酒花期隔，三百枯棋弈思沈。  
莫上孤城频送目，浮云西北是家林。

卷 731\_5【雪】

胡宿

屏翳驱云结夜阴，素花飘坠恶氛沈。色欺曹国麻衣浅，  
寒入荆王翠被深。天上明河银作水，海中仙树玉为林。  
日高独拥鹓裘卧，谁乞长安取酒金。

卷 731\_6【冲虚观】

胡宿

五粒青松护翠苔，石门岑寂断纤埃。水浮花片知仙路，

· 全唐诗 ·

---

风递鸾声认啸台。桐井晓寒千乳敛，茗园春嫩一旗开。  
驰烟未勒山亭字，可是英灵许再来。

卷 731\_7【淮南发运赵邢州被诏归阙】

胡宿

天台封诏紫泥馨，马首前瞻北斗城。人在函关先望气，  
帝于京兆最知名。一区东第趋晨近，数刻西厢接昼荣。  
正是两宫裁化日，百金双璧拜虞卿。

卷 731\_8【天街晓望】

胡宿

长乐才闻一叩钟，百官初谒未央宫。金波穆穆沙堤月，  
玉树琤琤上苑风。香重椒兰横结雾，气寒龙虎远浮空。  
嗟余索米无人问，行避霜台御史骢。

卷 731\_9【淮南王】

胡宿

贪铸金钱盗写符，何曾七国戒前车。长生不待炉中药，

鸿宝谁收篋里书。碧井床空天影在，小山人去桂丛疏。  
云中鸡犬无消息，麦秀渐渐遍故墟。

卷 731\_10【赵宗道归辇下】

胡宿

沿牒相逢楚水湄，竹林文酒此攀嵇。半毡未暖还伤别，  
一臂初交叉解携。江浦呕哑风送橹，河桥勃窣柳垂堤。  
明年四月秦关到，洗眼扬州看马蹄。

卷 731\_11【忆荐福寺牡丹】

胡宿

十日春风隔翠岑，只应繁朵自成阴。樽前可要人颓玉，  
树底遥知地侧金。花界三千春渺渺，铜槃十二夜沈沈。  
雕槃分萼何由得，空作西州拥鼻吟。

卷 731\_12【次韵和朱况雨中之什】

胡宿

苍野迷云黯不归，远风吹雨入岩扉。石床润极琴丝缓，

· 全唐诗 ·

---

水阁寒多酒力微。夕梦将成还滴滴，春心欲断正霏霏。  
忧花惜月长如此，争得东阳病骨肥。

卷 731\_13【感旧】

胡宿

千里青云未致身，马蹄空踏几年尘。曾迷玉洞花光老，  
欲过金城柳眼新。粉壁已沈题凤字，酒垆犹记姓黄人。  
坞中横笛偏多感，一涕阑干白角巾。

卷 731\_14【城南】

胡宿

昨夜轻阴结夕霏，城南十里有香泥。初闻山鸟惊新哢，  
遥见林花识旧蹊。荡桨远从芳草渡，垫巾还傍绿杨堤。  
罗敷正苦桑蚕事，惆怅南来五马蹄。

卷 731\_15【早夏】

胡宿

井辖投多思不禁，密垂珠箔昼沈沈。睡惊燕语频移枕，

· 全唐诗 ·

---

病起蛛丝半在琴。雨径乱花埋宿艳，月轩修竹转凉阴。  
一春酒费知多少，探尽囊中换赋金。

卷 731\_16【侯家】

胡宿

洞户春迟漏箭长，短辕初返雒阳傍。彩云按曲青岑醴，  
沈水薰衣白璧堂。前槛兰苕依玉树，后园桐叶护银床。  
宴残红烛长庚烂，还促朝珂谒未央。

卷 731\_17【函谷关】

胡宿

天开函谷壮关中，万古惊尘向此空。望气竟能知老子，  
弃繻何不识终童。谩持白马先生论，未抵鸣鸡下客功。  
符命已归如掌地，一丸曾误隗王东。

卷 731\_18【残花】

胡宿

雨压残红一夜凋，晓来帘外正飘摇。数枝翠叶空相对，

· 全唐诗 ·

---

万片香魂不可招。长乐梦回春寂寂，武陵人去水迢迢。  
愁将玉笛传遗恨，苦被芳风透绮寮。

卷 731\_19【次韵徐爽见寄】

胡宿

五两青丝帝渥深，平时可敢叹英沈。侏儒自是长三尺，  
辘轳都来直数金。寂寞死灰人丧偶，婆娑生意树交阴。  
年来想见琼枝色，久梦蘼蘼到竹林。

卷 731\_20【华清宫】

杜常

行尽江南数十程，晓星残月入华清。  
朝元阁上西风急，都入长杨作雨声。

卷 731\_21【题文川村居】

滕白

种茶岩接红霞坞，灌稻泉生白石根。  
皤腹老翁眉似雪，海棠花下戏儿孙。

卷 731\_22 【燕】

滕白

短羽新来别海阳，真珠高卷语雕梁。  
佳人未必全听尔，正把金针绣凤凰。

卷 731\_23 【题严君观】

王岳

寒云古木罩星台，凡骨仙踪信可哀。  
二十年前曾此到，一千年内未归来。

卷 731\_24 【山中有所思】

王岳

零零夜雨渍愁根，触物伤离好断魂。  
莫怪杜鹃飞去尽，紫微花里有啼猿。

卷 731\_25 【燕】

王昶

一巢功绩破春光，絮落花残两翅狂。  
月树风枝不栖去，强来言语泥雕梁。

卷 731\_26 【贫女】

王昶

难把菱花照素颜，试临春水插花看。  
木兰船上游春子，笑把荆钗下远滩。

卷 731\_27 【杪春寄友人】

王昶

何处相逢万事忙，卓家楼上百淘香。  
明朝渐近山僧寺，更为残花醉一场。

卷 731\_28【回旧山】

王昶

瘦家楼上谢家池，处处风烟少旧知。  
明日落花谁共醉，野溪猿鸟恨归迟。

## 卷七百三十二

卷 732\_1 【感巫州芥菜（力士谪黔中，道至巫州，地多芥而人不食，因感之，作诗寄意）】

高力士

两京作斤卖，五溪无人采。夷夏虽有殊，气味都不改。

卷 732\_2 【句】

高力士

烟熏眼落膜，瘴染面朱虞。

卷 732\_3 【使至灊山（《神异录》：明皇尝梦游灊岳，遣越宾妃之）】

王越宾

碧坞烟霞昼未开，游人到处尽裴回。

凭谁借问岩前叟，曾托吾皇一梦来。

卷 732\_4【和武相公中秋夜西蜀锦楼望月得清字】

王良会

德星摇此夜，珥耳满重城。杳霭烟氛色，飘飘砧杵声。  
令行秋气爽，乐感素风轻。共赏千年圣，长歌四海清。

卷 732\_5【星回节游避风台与清平官赋（南诏以十二月十六日为星回节。《唐书》：南诏官曰清平者，犹（南）唐之宰相）】

南诏骠信

避风善阐台，极目见藤越。悲哉古与今，依然烟与月。  
自我居震旦，翊卫类夔契。伊昔颈皇运，艰难仰忠烈。  
不觉岁云暮，感极星回节。元昶同一心，子孙堪贻厥。

卷 732\_6【星回节避风台骠信命赋】

赵叔达

法驾避星回，波罗毗勇猜。河润冰难合，地暖梅先开。  
下令俚柔洽，献酬弄栋来。愿将不才质，千载侍游台。

卷 732\_7【途中诗】

杨奇鲲

雨中山色洗还青。海鸥聚处窗前见，林猿啼时枕上听。  
此际自然无限趣，王程不敢暂留停。

卷 732\_8【听妓洞云歌】

布燮

嵇叔夜，鼓琴饮酒无闲暇。若使当时闻此歌，  
抛掷广陵都不藉。刘伯伦，虚生浪死过青春。  
一饮一硕犹自醉，无人为尔卜深尘。

卷 732\_9【思乡作】

布燮

泸北行人绝，云南信未还。庭前花不扫，门外柳谁攀。  
久销银烛，愁多减玉颜。悬心秋夜月，万里照关山。

卷 732\_10【衔命还国作】

朝衡

衔命将辞国，非才忝侍臣。天中恋明主，海外忆慈亲。  
伏奏违金阙，駢骖去玉津。蓬莱乡路远，若木故园林。  
西望怀恩日，东归感义辰。平生一宝剑，留赠结交人。

卷 732\_11【绣袈裟衣缘（明皇时，长屋尝造千袈裟，绣偈于衣缘，来施中华。真公因泛海至彼国传法焉）】

长屋

山川异域，风月同天。寄诸佛子，共结来缘。

卷 732\_12【愤怨诗】

王巨仁

于公恸哭三年旱，邹衍含愁五月霜。  
今我幽愁还似古，皇天无语但苍苍。

卷 732\_13【立木海上刻诗】

李赞华

小山压大山，大山全无力。羞见故乡人，从此投外国。

卷 732\_14【戏语】

成辅端

秦地城池二百年，何期如此贱田园。  
一顷麦苗硕伍米，三间堂屋二千钱。

卷 732\_15【万寿寺歌词】

张隐

位乖變理致伤残，四面墙匡不忍看。  
正是花时堪下泪，相公何必更追欢。

卷 732\_16【迎孙刺史】

朱元

昔日郎君今刺史，朱元依旧守朱门。  
今朝竹马诸童子，尽是当时竹马孙。

卷 732\_17【临刑诗（璠不知书，时以为鬼代作）】

陈璠

积玉堆金官又崇，祸来倏忽变成空。  
五年荣贵今何在，不异南柯一梦中。

卷 732\_18【诗】

捧剑仆

青鸟衔葡萄，飞上金井栏。美人恐惊去，不敢卷帘看。

卷 732\_19【题牡丹】

捧剑仆

一种芳菲出后庭，却输桃李得佳名。  
谁能为向天人说，从此移根近太清。

卷 732\_20【将窜留诗】

捧剑仆

珍重郭四郎，临行不得别。晓漏动离心，轻车冒残雪。  
欲出主人门，零涕暗呜咽。万里隔关山，一心思汉月。

## 卷七百三十三

### 卷 733\_1【淮阳感怀】

李密

金风荡初节，玉露凋晚林。此夕穷涂士，郁陶伤寸心。  
野平葭苇合，村荒藜藿深。眺听良多感，徙倚独沾襟。  
沾襟何所为，怅然怀古意。秦俗犹未平，汉道将何冀。  
樊哙市井徒，萧何刀笔吏。一朝时运会，千古传名谥。  
寄言世上雄，虚生真可愧。

### 卷 733\_2【南隐游泉山】

孔德绍

名山狎招隐，俗外远相求。还如倒景望，忽似阆风游。  
临崖俯大壑，披雾仰飞流。岁积松方偃，年深椿欲秋。  
野花开石镜，云叶掩山楼。何须问方士，此处即瀛洲。

卷 733\_3 【行经太华】

孔德绍

纷吾世网暇，灵岳展幽寻。寥廓风尘远，杳冥川谷深。  
山昏五里雾，日落二华阴。疏峰起莲叶，危塞隐桃林。  
何必东都外，此处可抽簪。

卷 733\_4 【夜宿荒村】

孔德绍

绵绵夕漏深，客恨转伤心。抚弦无人听，对酒时独斟。  
故乡万里绝，穷愁百虑侵。秋草思边马，绕枝惊夜禽。  
风度谷余响，月斜山半阴。劳歌欲叙意，终是白头吟。

卷 733\_5 【王泽岭遭洪水】

孔德绍

地籁风声急，天津云色愁。悠然万顷满，俄尔百川浮。  
还似金堤溢，翻如碧海流。惊涛遥起鹭，回岸不分牛。  
徒知怀赵景，终是倦阳侯。木梗诚无托，芦灰岂暇求。  
思得乘槎便，萧然河汉游。

卷 733\_6 【登白马山护明寺】

孔德绍

名岳标形胜，危峰远郁纡。成象建环极，大壮阐规模。  
层台耸灵鹫，高殿迓阳乌。暂同游阆苑，还类入仙都。  
三休开碧岭，万户洞金铺。摄心罄前礼，访道挹中虚。  
遥瞻尽地轴，长望极天隅。白云起梁栋，丹霞映栢庐。  
露花疑濯锦，泉月似沉珠。今日桃源客，相雇失归涂。

卷 733\_7 【送舍利宿定普岩】

孔德绍

仁祠表虚旷，祇园展肃恭。栖息翠微岭，登顿白云峰。  
映流看夜月，临峰听晓钟。润芳十步草，崖阴百丈松。  
萧然遥路绝，无复市朝踪。

卷 733\_8 【观太常奏新乐】

孔德绍

大君膺宝历，出豫表功成。钧天金石响，洞庭弦管清。  
八音动繁会，九变叶希声。和云留睿赏，熏风悦圣情。

盛烈光韶濩，易俗迈咸英。窃吹良无取，率舞抃群生。

卷 733\_9【赋得涉江采芙蓉】

孔德绍

莲舟泛锦碛，极目眺江干。沿流渡楫易，逆浪取花难。  
有雾疑川广，无风见水宽。朝来采摘倦，讵得久盘桓。

卷 733\_10【赋得华亭鹤】

孔德绍

华亭失侣鹤，乘轩宠遂终。三山凌苦雾，千里激悲风。  
心危白露下，声断彩弦中。何言斯物变，翻覆似辽东。

卷 733\_11【送蔡君知入蜀二首】

孔德绍

金陵已去国，铜梁忽背飞。失路远相送，他乡何日归。  
灵关九折险，蜀道二星遥。乘槎若有便，希泛广陵潮。

卷 733\_12 【落叶（一作孔绍安诗）】

孔德绍

早秋惊叶落，飘零似客心。翻飞未肯下，犹言惜故林。

卷 733\_13 【句】

孔德绍

谁分菱花影，还看蓬鬓秋。

卷 733\_14 【临刑诗】

郑珣

幻生还幻灭，大幻莫过身。安心自有处，求人无有人。

卷 733\_15 【和谒孔子庙（一作李百药诗）】

刘斌

性与虽天纵，主世乃无由。何言泰山毁，空惊逝水流。

及门思往烈，入室想前修。寂寞荒阶暮，摧残古木秋。  
遗风暖如此，聊以慰蒸求。

卷 733\_16 【和许给事伤牛尚书】

刘斌

名臣不世出，百工之所求。况乃非常器，遭逢兴运秋。  
符彩照千里，铨衡综九流。经纶资百物，樽俎寄皇猷。  
韶濩倾复理，典礼紊还修。虽贞栋梁任，兼好艺文游。  
伫闻和鼎实，行当奉介丘。高衢翻税驾，阅水遽迁舟。  
传呼更何日，曳履闻无由。归魂藐修路，征棹舫邗沟。  
林薄长风惨，江上寒云愁。夜台终不曙，遗芳徒自留。

卷 733\_17 【送刘散员同赋陈思王诗，得好鸟鸣高枝】

刘斌

春林已自好，时鸟复和鸣。枝交难奋翼，谷静易流声。  
间关才得性，矰缴遽相惊。安知背飞远，拂雾独晨征。

卷 733\_18【咏山】

刘斌

灵山峙千仞，蔽日且嵯峨。紫盖云阴远，香炉烟气多。  
石梁高鸟路，瀑水近天河。欲知闻道里，别自有仙歌。

卷 733\_19【登楼望月二首】

刘辟

圆月当新霁，高楼见最明。素波流粉壁，丹桂拂飞甍。  
下瞰千门静，旁观万象生。梧桐窗下影，乌鹊槛前声。  
啸逸刘琨兴，吟资庾亮情。游人莫登眺，迢递故乡程。

皎洁三秋月，巍峨百丈楼。下分征客路，上有美人愁。  
帐卷芙蓉带，帘褰玳瑁钩。倚窗情渺渺，凭槛思悠悠。  
未得金波转，俄成玉箸流。不堪三五夕，夫婿在边州。

卷 733\_20【题菊花】

黄巢

飒飒西风满院栽，蕊寒香冷蝶难来。

他年我若为青帝，报与桃花一处开。

卷 733\_21【不第后赋菊】

黄巢

待到秋来九月八，我花开后百花杀。  
冲天香阵透长安，满城尽带黄金甲。

卷 733\_22【自题像（陶毅《五代乱离纪》云：巢败后为僧，依张全义于洛阳。曾绘像题诗，人见像，识其为巢云）】

黄巢

记得当年草上飞，铁衣著尽著僧衣。  
天津桥上无人识，独倚栏干看落晖。

## 卷七百三十四

### 卷 734\_1【柳】

罗绍威

妆点青春更有谁，青春常许占先知。亚夫营畔风轻处，  
元亮门前日暖时。花密宛如飘六出，叶繁何惜借双眉。  
交情别绪论多少，好向仁人赠一枝。

### 卷 734\_2【白菊（一作罗隐诗）】

罗绍威

虽被风霜竞欲催，皎然颜色不低摧。已疑素手能妆出，  
又似金钱未染来。香散自宜飘渌酒，叶交仍得荫苍苔。  
寻思闭户中宵见，应认寒窗雪一堆。

卷 734\_3【句】

罗绍威

楼前澹澹云头日，帘外萧萧雨脚风。

卷 734\_4【清明登奉先城楼】

罗衮

年来年去只艰危，春半尧山草尚衰。四海清平耆旧见，  
五陵寒食小臣悲。烟销井邑隈楼槛，雪满川原泥酒卮。  
拭尽贾生无限泪，一行归雁远参差。

卷 734\_5【清明赤水寺居】

罗衮

榆火轻烟处处新，旋从闲望到诸邻。浮生浮世只多事，  
野水野花娱病身。浊酒不禁云外景，碧峰犹冷寺前春。  
蓑衣毳衲诚吾党，自结村园一社贫。

卷 734\_6 【赠罗隐】

罗衮

平日时风好涕流，逸书虽盛一名休。寰区叹屈瞻天问，  
夷貊闻诗过海求。向夕便思青琐拜，近年寻伴赤松游。  
何当世祖从人望，早以公台命卓侯。

卷 734\_7 【哭赵州和尚二首】

王镕

师离 水动王侯，心印光潜麈尾收。碧落雾霾松岭月，  
沧溟浪覆济人舟。一灯乍灭波旬喜，双眼重昏道侣愁。  
纵是了然云外客，每瞻瓶几泪还流。

佛日西倾祖印隳，珠沈丹沼月沈辉。影敷丈室炉烟惨，  
风起禅堂松韵微。只履乍来留化迹，五天何处又逢归。  
解空弟子绝悲喜，犹自潜然对雪帏。

卷 734\_8 【答同年李昉见赠次韵】

邓洵美

词场几度让长鞭，又向清朝贺九迁。品秩虽然殊此日，

· 全唐诗 ·

---

岁寒终不改当年。驰名早已超三院，侍直仍忻步八砖。  
今日相逢翻自愧，闲吟对酒倍潸然。

卷 734\_9【除夜长安作（一作李景诗）】

李京

长安朔风起，穷巷掩双扉。新岁明朝是，故乡何路归。  
鬓丝饶镜色，隙雪夺灯辉。却羨秦州雁，逢春尽北飞。

卷 734\_10【登岭望】

许鼎

淼淼三江水，悠悠五岭关。雁飞犹不度，人去若为还。

卷 734\_11【崕岭四望】

许鼎

汉家仙仗在咸阳，洛水东流出建章。  
野老至今犹望幸，离宫秋树独苍苍。

卷 734\_12【官左拾遗归隐作】

王易简

汨没朝班愧不才，谁能低折向尘埃。  
青山得去且归去，官职有来还自来。

卷 734\_13【悼杨氏妓琴弦】

朱褒

魂归寥廓魄归泉，只住人间十五年。  
昨日施僧裙带上，断肠犹系琵琶弦。

卷 734\_14【公子行】

黄损

春草绿绵绵，骄骖骤暖烟。微风飘乐韵，半日醉花边。  
打鹊抛金盏，招人举玉鞭。田翁与蚕妇，平地看神仙。

卷 734\_15【读史】

黄损

逐鹿走红尘，炎炎火德新。家肥生孝子，国霸有余臣。  
帝道云龙合，民心草木春。须知烟阁上，一半老儒真。

卷 734\_16【出山吟】

黄损

来书初出白云扃，乍蹶秋风马走轻。远近留连分岳色，  
别离呜咽乱泉声。休将巢许争喧杂，自共伊皋论太平。  
昨夜细看云色里，进贤星座甚分明。

卷 734\_17【书壁】

黄损

一别人间岁月多，归来人事已销磨。  
惟有门前鉴池水，春风不改旧时波。

卷 734\_18【句】

黄损

机关才运动，胜败便相随。  
忽遇南迁客，若为西入心。  
往来三岛近，活计一囊空。  
三通明主诏，一片白云心。  
扫地待明月，踏花迎野僧。  
水谿彭泽阔，山忆武陵深。  
金铎冷光风宛转，锦袍红润雨霏微。  
高齐日月方为道，动合乾坤始是心。  
傍水野禽通体白，竹盘山果半边红。  
而今世上多离别，莫向相思树下啼。

卷 734\_19【梁郊祀乐章·庆肃】

张袞

笱豆簠簋，黍稷非馨。懿兹彝器，厥德惟明。  
金石匏革，以和以平。由此无疆，期乎永宁。

卷 734\_20【梁郊祀乐章·庆熙】

张袞

哲后躬享，旨酒斯陈。王恭无斲，严祀惟寅。  
皇祖以配，大孝以振。宜锡景福，永休下民。

卷 734\_21【梁郊祀乐章·庆隆】

张袞

恭祀上帝，于国之阳。爵醴是荷，鸿基永昌。

卷 734\_22【梁郊祀乐章·庆融】

张袞

道和气兮袞氤氲，宣皇规兮彰圣神。  
服遐裔兮敷质文，格苗扈兮息烟尘。

卷 734\_23【梁郊祀乐章·庆休】

张袞

大业来四夷，仁风和万国。白日体无私，皇天辅有德。  
七旬罪已服，六月师方克。伟哉帝道隆，终始常作则。

卷 734\_24【梁郊祀乐章·庆和】

张袞

烟燎升，礼容彻。诚感达，人神悦。  
灵贶彰，圣情结。玉座寂，金炉歇。

卷 734\_25【梁郊祀乐章·庆和】

赵光逢

就阳位，升圜丘。佩双玉，御大裘。  
膺天命，拥神休。万灵感，百禄遒。

秉黄钺，建朱旗。震八表，清二仪。  
帝业显，王道夷。受景命，启皇基。

开九门，怀百神。通肸蚩，接氤氲。  
明粢荐，广乐陈。奠嘉璧，燎芳薪。

膺宝图，执左契。德应天，圣飨帝。  
荐表衷，荷灵惠。寿万年，祚百世。

惟德动天，有感必通。秉兹一德，禋于六宗。  
钦奠宝命，恭肃礼容。来顾来享，永穆皇风。

天惟佑德，辟乃奉天。交感斯在，昭事罔愆。  
岁功已就，王道无偏。于焉报本，是用告虔。

卷 734\_26【梁郊祀乐章·庆顺】

赵光逢

圣皇戾止，天步舒迟。乾乾睿相，穆穆皇仪。

· 全唐诗 ·

---

进退必肃，陟降是祗。六变克协，万灵协随。

卷 734\_27【梁郊祀乐章·庆平】

赵光逢

天命降鉴，帝德惟馨。享祀不忒，礼容孔明。  
奠璧布币，荐纯献精。神祐以答，敷锡永宁。

## 卷七百三十五

### 卷 735\_1 【宫词百首】

#### 和凝

紫燎光销大驾归，御楼初见赭黄衣。  
千声鼓定将宣赦，竿上金鸡翅欲飞。

北阙晴分五凤楼，嵩山秀色护神州。  
洛河自契千年运，更拟波中出九畴。

中兴殿上晓光融，一炷天香舞瑞风。  
百辟虔心齐稽首，卷帘遥见御衣红。

日和风暖御楼时，万姓齐瞻八彩眉。  
瑞气祥烟笼细仗，阁门宣赦四方知。

凤吹鸾歌晓日明，丰年观稼出神京。  
封人争献南山寿，五色云中御辇平。

圣主临轩待晓时，穿花宫漏正迟迟。  
鸡人一唱乾坤晓，百辟分班俨羽仪。

· 全唐诗 ·

---

朦胧西月照池亭，初夜椒房掩画屏。  
宫女相呼有何事，上楼同看老人星。

红泥椒殿缀珠珰，帐蹙金龙窳地长。  
红兽慢然天色暖，凤炉时复爇沈香。

九重楼殿簇丹青，高柳含烟覆井亭。  
宫内不知今日几，自来阶下数尧蓂。

寝殿香浓玉漏严，云随凉月下西南。  
帐前宫女低声道，主上还应梦傅岩。

绕殿钩阑压玉阶，内人轻语凭葱苔。  
皆言明主垂衣理，不假朱云傍槛来。

颯颯冰面莹池心，风刮瑶阶腊雪深。  
怪得宫中无兽炭，步摇钗是辟寒金。

兰殿春融自艳笙，玉颜风透象纱明。  
金簧如语莺声滑，可使云和独得名。

兰烛时将凤髓添，寒星遥映夜光帘。  
龙楼露著鸳鸯瓦，谁近螭头掷玉签。

玉蕊莲池春水平，小鱼双并锦鳞行。  
内中知是黄河样，九曲今年彻底清。

· 全唐诗 ·

---

真珠帘外静无尘，耿耿凉天景象新。  
金殿夜深银烛晃，宫嫔来奏月重轮。

鱼犀月掌夜通头，自著盘莺锦臂鞲。  
多把沈檀配龙麝，宫中掌浸十香油。

香云双飏玉蝉轻，侍从君王苑里行。  
嘉瑞忽逢连理木，一时跪拜贺文明。

金鸾双立紫檀槽，暖殿无风韵自高。  
含笑试弹红蕊调，君王宣赐酪樱桃。

斑簟如霞可殿铺，更开新进瑞莲图。  
谁人筑损珊瑚架，子细看时认沥苏。

金盆初晓洗纤纤，银鸭香焦特地添。  
出户忽看春雪下，六宫齐卷水晶帘。

暖金盘里点酥山，拟望君王子细看。  
更向眉中分晓黛，岩边染出碧琅玕。

云母屏前绣柱衣，龙床闲卷谏书帏。  
黄金槛外螭头活，日照红兰露未晞。

楼西残月尚胧明，中禁鸡人报晓声。  
清旦司天台进状，夜来晴霁泰阶平。

· 全唐诗 ·

---

纤辔摩轩响佩环，银台门外集鸳鸯。  
三钟五鼓祥烟敛，日照仙人捧露盘。

司膳厨中也禁烟，春宫相对画秋千。  
清明节日颁新火，蜡炬星飞下九天。

宫木交芳色尽深，和风轻舞早莺吟。  
侍臣不异东方朔，应喜仙桃满禁林。

贡橘香匀麻糍容，星光初满小金笼。  
近臣押赐诸王宅，拜了方开敕字封。

献寿朝元欲偃戈，航深梯险竞骈罗。  
若论万国来朝日，比并涂山更较多。

艳阳风景簇神州，杏蕊桃心照凤楼。  
遥望青青河畔草，几多归马与休牛。

銮舆观稼晚方归，日月旗中见御衣。  
万姓焚香惟顶礼，瑞云随伞入宫闱。

宫庭皆应紫微垣，壮丽宸居显至尊。  
赤子颙颙瞻父母，已将仁德比乾坤。

三农皆已辟田畴，又见金门出土牛。  
块雨条风符圣化，嘉禾看却报新秋。

· 全唐诗 ·

---

进食门前水陆陈，大官斋洁贡时新。  
明君宵旰分甘处，便索金盘赐重臣。

层台金碧惹红霞，仙掌亭亭对月华。  
昨夜盘中甘露满，婕妤争去奏官家。

水殿垂帘冷色凝，一床珍簟展春冰。  
才人侍立持团扇，金缕双龙贴碧藤。

香鸭烟轻蕙水沈，云鬟闲坠凤犀簪。  
珠帘半卷开花雨，又见芭蕉展半心。

莺锦蝉罗撒麝脐，狻猊轻喷瑞烟迷。  
红酥点得香山小，卷上珠帘日未西。

锦褥花明满殿铺，宫娥分坐学樗蒲。  
欲教官马冲关过，咒愿纤纤早擲卢。

小楼花簇钿山低，金雉双来蹋马齐。  
夸向傍人能彩戏，朝来赢得鹭鸶犀。

红鬃白马嫩龙飞，天厩供来入紫微。  
遥见玉阶嘶不已，应缘认得赭黄衣。

班定千牛立受宣，佩刀搢笏凤墀前。  
一声不坐祥云合，鸳鹭依行拜两边。

· 全唐诗 ·

---

三殿香浓晓色来，祥鸾威凤待门开。  
锵金佩玉趋丹陛，总是和羹作砺才。

两番供奉打球时，鸾凤分厢锦绣衣。  
虎骤龙腾宫殿响，骅骝争趁一星飞。

凤池冰泮岸莎匀，柳眼花心雪里新。  
都是九重和暖地，东风先报禁园春。

紫气氤氲满帝都，映楼明月锁金铺。  
银泥殿里嫌红烛，教近龙床著火珠。

地衣初展瑞霞融，绣帽金铃舞舜风。  
吹竹弹丝珠殿响，坠仙双降五云中。

锦策匀铺寒玉齐，星锤高运日通犀。  
铿金曲罢春冰碎，跪拜君王粉面低。

珠帘静卷水亭凉，玉蕊风飘小槛香。  
几处按歌齐入破，双双雏燕出宫墙。

宫娥解袂艳阳时，鹳舸兰桡满凤池。  
春水如蓝垂柳醉，和风无力袅金丝。

白玉阶前菊蕊香，金杯仙酝赏重阳。  
层台云集梨园乐，献寿声声祝万康。

· 全唐诗 ·

---

天籁吟风社燕归，渚莲香老碧苔肥。  
夜来霜坠梧桐叶，诸殿平明进御衣。

炉爇香檀兽炭痴，真珠帘外雪花飞。  
六宫进酒尧眉寿，舞凤盘龙满御衣。

云行风静早秋天，竞绕盆池蹋采莲。  
罨画披袍从窳地，更寻宫柳看鸣蝉。

阑珊星斗缀珠光，七夕宫嫔乞巧忙。  
总上穿针楼上去，竞看银汉洒琼浆。

宝瑟凄锵夜漏余，玉阶闲坐对蟾蜍。  
秋光寂历银河转，已见宫花露滴疏。

春风金袅万年枝，簇白团红烂熳时。  
宫女竞思游御苑，大家齐奏圣人知。

乾文初见泰阶平，日月常遵阁道行。  
昨夜仰观垂象正，拱辰星宿转分明。

锵锵济济赴延英，渐近重瞳目转明。  
君圣臣贤鱼水契，鸿基须贺永清平。

天厩骖駉集嫩龙，雪光相照晓嘶风。  
昂头步步金鞍稳，掌扇花前御路中。

· 全唐诗 ·

---

金吾细仗俨威仪，圣旨凝旒对远夷。  
晓日曈曈瞻玉案，丁冬环珮满彤墀。

正旦垂旒御八方，蛮夷无不奉梯航。  
群臣舞蹈称觞处，雷动山呼万岁长。

圣主躬耕在籍田，公卿环卫待丰年。  
五风十雨余粮在，金殿惟闻奏舜弦。

圣日垂科委所司，英才咸喜遇明时。  
春官进榜莺离谷，月殿香残桂魄枝。

天街香满瑞云生，红伞凝空景日明。  
先遣五坊排猎骑，为民除害出神京。

内宴初开锦绣攒，教坊齐奏万年欢。  
箫韶响亮春云合，日照尧阶舞瑞鸾。

视草词臣直玉堂，对来新赐锦袍香。  
班资最在云霄上，长是先迎日月光。

玉殿朦胧散晓光，金龙高喷九天香。  
掖鞭声定初开扇，百辟齐呼万岁长。

五色卿云覆九重，香烟高舞御炉中。  
含元殿里行仁德，四海车书已混同。

· 全唐诗 ·

---

欲封丹诏紫泥香，朱篆龙文御印光。  
汗涣丝纶出丹禁，便从天上凤衔将。

越溪姝丽入深宫，俭素皆持马后风。  
尽道君王修圣德，不劳辞辇与当熊。

早梅初向雪中明，风惹奇香粉蕊轻。  
谁道落花堪醜面，竞来枝上采繁英。

暖殿奇香馥绮罗，窗间初学绣金鹅。  
才经冬至阳生后，今日工夫一线多。

金井澄泉玉液香，琉璃深殿自清凉。  
温汤头进瓜初熟，后至宫嫔未得尝。

绣闼雕甍列锦闺，珍奇惟待凤凰栖。  
杏梁烜赫晴霞展，时见空虚坠燕泥。

龙凤金鞍软玉鞭，雪花光照锦连乾。  
驾头直指西郊去，晓日寒生讲武天。

夏云楼上定风盘，雀跃猿跳总不难。  
要对君王逞轻捷，御楼时拟上鸡竿。

停稳春衫窄地长，通天犀带缀金章。  
近臣衔命离丹禁，高捧恩波洒万方。

· 全唐诗 ·

---

垂黎玉押春帘卷，不夜珠楼晓鉴开。  
袍裤宫人走迎驾，东风吹送御香来。

金吾勘契自通官，楼上初闻唱刻闲。  
金殿香高初唤仗，数行鸳鹭各趋班。

螺髻凝香晓黛浓，水精鸂鶒颭轻风。  
金钗斜戴宜春胜，万岁千秋绕鬓红。

缕金团扇对纤絺，正是深宫捧日时。  
要对君王说幽意，低头佯念婕妤诗。

结金冠子学梳蝉，碾玉蜻蜓缀鬓偏。  
寝殿垂帘悄无事，试香闲立御炉前。

金马词臣夜受宣，授毫交直八花砖。  
白麻草了初呈进，称旨丝纶下九天。

平明光政便门开，已见忠臣早入来。  
自是枢机符造化，大罗天上曜三台。

红罗窗里绣偏慵，鞞袖闲隈碧玉笼。  
兰殿春晴鹦鹉睡，结条钗颭落花风。

晓光初入右银台，鸳鹭分班启沃来。  
如水如鱼何际会，尽言金鼎得盐梅。

· 全唐诗 ·

---

立名金马近尧阶，尽是家传八斗才。  
麻尾尚犹龙字湿，便从天上凤衔来。

狻猊镇角舞筵张，鸾凤花分十六行。  
轻动玉纤歌遍慢，时时偷眼看君王。

边藩 宴贺休征，细仗初排舜日明。  
坐定两军呈百戏，乐臣低折贺升平。

碧罗冠子簇香莲，结胜双衔利市钱。  
花下贪忙寻百草，不知遗却蹙金蝉。

兰省初除傅粉郎，静端霜简入鸳行。  
明庭转制浑无事，朝下空余鸡舌香。

采访宁遗草泽人，诏搜无不降蒲轮。  
集贤殿里开炉冶，待把黄金铸重臣。

红玉纤纤捧暖笙，绛唇呼吸引春莺。  
霓裳曲罢君王笑，宜近前来与改名。

绣额朱门插艾人，羞将角黍近香唇。  
平明朝下夸宣赐，五色香丝系臂新。

芙蓉冠子水精簪，闲对君王理玉琴。  
鸂鶒颈莺唇胜仙子，步虚声细象窗深。

· 全唐诗 ·

---

金马门开侍从归，御香犹惹赐来衣。  
晓光满院金鱼冷，红药花擎宿露飞。

便殿朝回卸玉簪，竞来芳槛摘花心。  
风和难捉花中蝶，却向窗间弄绣针。

君王朝下未梳头，长晕残眉侍鉴楼。  
扼臂交光红玉软，起来重拟理箜篌。

九重天上实难知，空遣微臣役梦思。  
葵藿一心期捧日，强搜狂斐拟宫词。

卷 735\_2【渔父歌】

和凝

白芷汀寒立鹭鸶，蘋风轻剪浪花时。  
烟幂幂，日迟迟，香引芙蓉惹钓丝。

卷 735\_3【杨柳枝】

和凝

软碧摇烟似送人，映花时把翠眉嚬。  
青青自是风流主，慢贴金丝待洛神。

· 全唐诗 ·

---

瑟瑟罗裙金缕腰，黛眉隈破未重描。  
醉来咬损新花子，拽住仙郎尽放娇。

鹊桥初就咽银河，今夜仙郎自姓和。  
不是昔年攀桂树，岂能月里索姮娥。

卷 735\_4【解红歌】

和凝

百戏罢，五音清，解红一曲新教成。  
两个瑶池小仙子，此时夺却柘枝名。

卷 735\_5【题鹰猎兔画】

和凝

虽是丹青物，沈吟亦可伤。君夸鹰眼疾，我悯兔心忙。  
岂动骚人兴，惟增猎客狂。皎绡百余尺，争及制衣裳。

卷 735\_6【醴泉院】

和凝

万山岚霭簇洋城，数处禅斋尽有名。古柏八株堆翠色，

· 全唐诗 ·

---

灵泉一派逗寒声。暂游颇爱闲滋味，久住翻嫌俗性情。  
珍重支公每相勉，我于儒行也修行。

卷 735\_7【兴势观】

和凝

山名兴势镇梁洋，俨有真风福此方。瘦柏握盘笼殿紫，  
灵泉澄洁浸花香。暂游颇爱闲人少，久住翻嫌白日忙。  
只向五千文字内，愿成金骨住仙乡。

卷 735\_8【洋川】

和凝

华夷图上见洋川，知在青山绿水边。  
官闲最好游僧舍，江近应须买钓船。

卷 735\_9【句】

和凝

先生自舞琴。

· 全唐诗 ·

---

波上人如潘玉儿，掌中花似赵飞燕。

## 卷七百三十六

### 卷 736\_1【从蜀后主幸秦川上梓潼山】

王仁裕

彩仗拂寒烟，鸣驺在半天。黄云生马足，白日下松巅。  
盛德安疲俗，仁风扇极边。前程问成纪，此去尚三千。

### 卷 736\_2【和蜀后主题剑门】

王仁裕

孟阳曾有语，刊在白云棱。李杜常挨托，孙刘亦恃凭。  
庸才安可守，上德始堪矜。暗指长天路，浓峦蔽几层。

### 卷 736\_3【荆南席上咏胡琴妓二首（一作奉使荆南高从诲筵上听弹胡琴）】

王仁裕

红妆齐抱紫檀槽，一抹朱弦四十条。湘水凌波慚鼓瑟，

· 全唐诗 ·

---

秦楼明月罢吹箫。寒敲白玉声偏婉，暖逼黄莺语自娇。  
丹禁旧臣来侧耳，骨清神爽似闻韶。

玉纤挑落折冰声，散入秋空韵转清。二五指中句塞雁，  
十三弦上啭春莺。谱从陶室偷将妙，曲向秦楼写得成。  
无限细腰宫里女，就中偏惬楚王情。

卷 736\_4【题麦积山天堂】

王仁裕

蹶尽悬空万仞梯，等闲身共白云齐。檐前下视群山小，  
堂上平分落日低。绝顶路危人少到，古岩松健鹤频栖。  
天边为要留名姓，拂石殷勤身自题。

卷 736\_5【题斗山观】

王仁裕

霞衣欲举醉陶陶，不觉全家住绛霄。拔宅只知鸡犬在，  
上天谁信路岐遥。三清辽廓抛尘梦，八景云烟事早朝。  
为有故林苍柏健，露华凉叶锁金飙。

卷 736\_6 【题孤云绝顶淮阴祠】

王仁裕

一握寒天古木深，路人犹说汉淮阴。孤云不掩兴亡策，  
两角曾悬去住心。不是冕旒轻布素，岂劳丞相远追寻。  
当时若放还西楚，尺寸中华未可侵。

卷 736\_7 【和韩昭从驾过白卫岭】

王仁裕

龙旆飘飘指极边，到时犹更二三千。登高晓蹋巉岩石，  
冒冷朝冲断续烟。自学汉皇开土宇，不同周穆好神仙。  
秦民莫遣无恩及，大散关东别有天。

卷 736\_8 【贺王溥入相】

王仁裕

一战文场拔赵旗，便调金鼎佐无为。白麻骤降恩何极，  
黄发初闻喜可知。跋敕案前人到少，筑沙堤上马归迟。  
立班始得遥相见，亲洽争如未贵时。

卷 736\_9【与诸门生春日会饮繁台赋】

王仁裕

柳阴如雾絮成堆，又引门生饮古台。淑景即随风雨去，  
芳樽宜命管弦开。谩夸列鼎鸣钟贵，宁免朝乌夜兔催。  
烂醉也须诗一首，不能空放马头回。

卷 736\_10【示诸门生】

王仁裕

二百一十四门生，春风初长羽毛成。掷金换得天边桂，  
凿壁偷将榜上名。何幸不才逢圣世，偶将疏网罩群英。  
衰翁渐老儿孙小，异日知谁略有情。

卷 736\_11【过平戎谷吊胡翊】

王仁裕

立马荒郊满目愁，伊人何罪死林丘。风号古木悲长在，  
雨湿寒莎泪暗流。莫道文章为众嫉，只应轻薄是身雠。  
不缘魂寄孤山下，此地堪名鹦鹉洲。

卷 736\_12【奉诏赋剑州途中鸛兽】

王仁裕

剑牙钉舌血毛腥，窥算劳心岂暂停。不与大朝除患难，  
惟余当路食生灵。从将户口资嚙口，未委三丁税几丁。  
今日帝王亲出狩，白云岩下好藏形。

卷 736\_13【放猿】

王仁裕

放尔丁宁复故林，旧来行处好追寻。月明巫峡堪怜静，  
路隔巴山莫厌深。栖宿免劳青嶂梦，跻攀应惬白云心。  
三秋果熟松梢健，任抱高枝彻晓吟。

卷 736\_14【遇放猿再作】

王仁裕

幡冢祠前汉水滨，饮猿连臂下嶙峋。渐来子细窥行客，  
认得依稀是野宾。月宿纵劳羁绁梦，松餐非复稻粱身。  
数声肠断和云叫，识是前时旧主人。

· 全唐诗 ·

---

卷 736\_15【句】

王仁裕

铁锁寨门扃白日，大张旗帜插青天。

## 卷七百三十七

### 卷 737\_1【天道】

冯道

穷达皆由命，何劳发叹声。但知行好事，莫要问前程。  
冬去冰须泮，春来草自生。请君观此理，天道甚分明。

### 卷 737\_2【偶作】

冯道

莫为危时便怆神，前程往往有期因。须知海岳归明主，  
未必乾坤陷吉人。道德几时曾去世，舟车何处不通津。  
但教方寸无诸恶，狼虎丛中也立身。

### 卷 737\_3【北使还京作（诗凡五章，今仅存其一）】

冯道

去年今日奉皇华，只为朝廷不为家。殿上一杯天子泣，

· 全唐诗 ·

---

门前双节国人嗟。龙荒冬往时时雪，兔苑春归处处花。  
上下一行如骨肉，几人身死掩风沙。

卷 737\_4【赠窦十】

冯道

燕山窦十郎，教子有义方。灵椿一株老，丹桂五枝芳。

卷 737\_5【放鱼书所钥户】

冯道

高却垣墙钥却门，监丞从此罢垂纶。  
池中鱼鳖应相贺，从此方知有主人。

卷 737\_6【句】

冯道

朝披四袄专藏手，夜覆三衾怕露头。

牛头偏得赐，象笏更容持。

· 全唐诗 ·

---

已落地花方遣扫，未经霜草莫教锄。

视草北来唐学士，拥旄西去汉将军。

卷 737\_7【后唐宗庙乐舞辞】

卢文纪

仁君御宇，寰海谧清。运符武德，道协文明。  
九成式叙，百度惟成。金门积庆，玉叶传荣。

卷 737\_8【后唐宗庙乐舞辞】

崔居俭

艰难王业，返正皇唐。先天再造，却日重光。  
汉绍世祖，夏资少康。功成德茂，率祀无疆。

卷 737\_9【春社从李昉乞酒】

李涛

社公今日没心情，为乞治聋酒一瓶。  
恼乱玉堂将欲遍，依稀巡到第三厅。

卷 737\_10【句】

李涛

溪声长在耳，山色不离门。

扫地树留影，拂床琴有声。

一言寤主宁复听，三谏不从归去来。

卷 737\_11【灵溪老松歌】

卢士衡

灵溪古观坛西角，千尺鳞皴栋梁朴。横出一枝戛楼阁，  
直上一枝扫寥廓。白石苍苔拥根脚，月明风撼寒光落。  
有时风雨晦暝摆，撼若黑龙之腾跃。合生于象外峰峦，  
枉滞乎人间山岳。安得巨灵受请托，拔向青桂白榆边。

卷 737\_12【游灵溪观】

卢士衡

云藏宝殿风尘外，粉壁松轩入看初。话久仙童颜色老，

· 全唐诗 ·

---

病来玄鹤羽毛疏。樵翁接引导红术，道士留连说紫书。  
不为壮心降未得，便堪从此玩清虚。

卷 737\_13【寄天台道友】

卢士衡

相思遥指玉霄峰，怅望江山阻万重。会隔晓窗闻法鼓，  
几同寒榻听疏钟。别来知子长餐柏，吟处将谁对倚松。  
且住人间行圣教，莫思天路便登龙。

卷 737\_14【花落】

卢士衡

迎风啸未已，和雨落穀穀。千枝与万枝，不如一竿竹。

卷 737\_15【钟陵铁柱】

卢士衡

千年埋没竟何为，变化宜将万物齐。  
安得风胡借方便，铸成神剑斩鲸鲵。

卷 737\_16 【僧房听雨】

卢士衡

古寺松轩雨声别，寒窗听久诗魔发。  
记得年前在赤城，石楼梦觉三更雪。

卷 737\_17 【题牡丹】

卢士衡

万叶红绡剪尽春，丹青任写不如真。  
风光九十无多日，难惜尊前折赠人。

卷 737\_18 【祖龙词】

熊皦

平吞六国更何求，童女童男问十洲。  
沧海不回应怅望，始知徐福解风流。

卷 737\_19【谪居海上】

熊皦

家临泾水隔秦川，来往关河路八千。  
堪恨此身何处老，始皇桥畔又经年。

卷 737\_20【冬日原居酬光上人见访】

熊皎

吾道丧已久，吾师何此来。门无尘事闭，卷有国风开。  
野迥霜先白，庭荒叶自堆。寒暄吟罢后，犹喜话天台。

卷 737\_21【早梅】

熊皎

江南近腊时，已亚雪中枝。一夜欲开尽，百花犹未知。  
人情皆共惜，天意欲教迟。莫讶无浓艳，芳筵正好吹。

卷 737\_22 【怀三茅道友】

熊皎

尘事何年解客嘲，十年容易到三茅。长思碧洞云窗下，  
曾借黄庭雪夜抄。丹桂有心凭至论，五峰无信问深交。  
杏坛仙侣应相笑，只为浮名未肯抛。

卷 737\_23 【赠胥尊师】

熊皎

绿发童颜羽服轻，天台王屋几经行。云程去速因风起，  
酒债还迟待药成。房闭十洲烟浪阔，篆开三洞鬼神惊。  
他年华表重归日，却恐桑田已变更。

卷 737\_24 【句】

熊皎

山前犹见月，陌上未逢人。

果熟秋先落，禽寒夜未栖。

· 全唐诗 ·

---

深逢野草皆为药，静见樵人恐是仙。

厌听啼鸟梦醒后，慵扫落花春尽时。

废土有人耕不畏，古厅无讼醉何妨。

卷 737\_25【塞上】

赵延寿

黄沙风卷半空抛，云动阴山雪满郊。探水人回移帐就，  
射雕箭落著弓抄。鸟逢霜果饥还啄，马渡冰河渴自跑。  
占得高原肥草地，夜深生火折林梢。

卷 737\_26【棋】

高辇

野客围棋坐，耆颐向暮秋。不言如守默，设计似平雠。  
决胜虽关勇，防危亦合忧。看他终一局，白却少年头。

卷 737\_27【句】

高攀

飘飘送下遥天雪，飒飒吹干旅舍烟。

卷 737\_28【与李专美】

韩昭裔

昭裔登庸汝未登，凤池鸡树冷如冰。  
何如且作宣徽使，免被人呼粥饭僧。

卷 737\_29【题龙窝洞】

张仁溥

折花携酒看龙窝，镂玉长旌俊彦过。  
他日各为云外客，碧纱笼却又如何。

卷 737\_30 【留题座主和凝旧阁】

李瀚

座主登庸归凤阙，门生批诏立鳌头。  
玉堂旧阁多珍玩，可作西斋润笔不？

卷 737\_31 【题家园】

杨昭俭

池莲憔悴无颜色，园竹低垂减翠阴。  
园竹池莲莫惆怅，相看恰似主人心。

卷 737\_32 【书从事厅屏上】

刘坦

金殿试回新折桂，将军留辟向江城。  
思量一醉犹难得，辜负扬州管记名。

卷 737\_33【题施璘画竹图】

韦遵

枯箨危根缴石头，千竿交映近清流。  
堪珍仲宝穷幽笔，留得荆湘一片秋。

## 卷七百三十八

### 卷 738\_1【陪游凤凰台献诗】

宋齐丘

嵯峨压洪泉，峩峩撑碧落。宜哉秦始皇，不驱亦不凿。  
上有布政台，八顾背城郭。山蹙龙虎健，水黑螭蜃作。  
白虹欲吞人，赤骥相搏爆。画栋泥金碧，石路盘纆埒。  
倒挂哭月猿，危立思天鹤。凿池养蛟龙，栽桐栖鸞鷟。  
梁间燕教雏，石罅蛇悬壳。养花如养贤，去草如去恶。  
日晚严城鼓，风来萧寺铎。扫地驱尘埃，剪蒿除鸟雀。  
金桃带叶摘，绿李和衣嚼。贞竹无盛衰，媚柳先摇落。  
尘飞景阳井，草合临春阁。芙蓉如佳人，回首似调谑。  
当轩有直道，无人肯驻脚。夜半鼠窸窣，天阴鬼敲啄。  
松孤不易立，石丑难安著。自怜啄木鸟，去蠹终不错。  
晚风吹梧桐，树头鸣曝曝。峨峨江令石，青苔何淡薄。  
不话兴亡事，举首思眇邈。吁哉未到此，褊劣同尺蠖。  
笼鹤羨凫毛，猛虎爱蜗角。一日贤太守，与我观囊籥。  
往往独自语，天帝相唯诺。风云偶不来，寰宇销一略。  
我欲烹长鲸，四海为鼎镬。我欲取大鹏，天地为赠缴。  
安得生羽翰，雄飞上寥廓。

卷 738\_21 【赠仰山慧度禅师】

宋齐丘

初闻如自解，及见胜初闻。两鬓堆残雪，一身披断云。  
道应齐古佛，高不揖吾君。稽首清凉月，萧然万象分。

卷 738\_22 【陪华林园试小妓羯鼓】

宋齐丘

切断牙床镂紫金，最宜平稳玉槽深。因逢淑景开佳宴，  
为出花奴奏雅音。掌底轻璫孤鹊噪，枝头干快乱蝉吟。  
开元天子曾如此，今日将军好用心。

卷 738\_23 【句】

宋齐丘

大似贤臣扶社稷，遇明则见暗还藏。

卷 738\_24【早朝】

冯延巳

铜壶滴漏初昼，高阁鸡鸣半空。催启五门金锁，  
犹垂三殿帘栊。阶前御柳摇绿，仗下宫花散红。  
鸳瓦数行晓日，鸾旗百尺春风。侍臣踏舞重拜，  
圣寿南山永同。

卷 738\_25【句】

冯延巳

青楼阿监应相笑，书记登坛又却回。

卷 738\_26【感怀诗二章（奉使中原署馆壁）】

韩熙载

仆本江北人，今作江南客。再去江北游，举目无相识。  
金风吹我寒，秋月为谁白？不如归去来，江南有人忆。

未到故乡时，将为故乡好。及至亲得归，争如身不到。  
目前相识无一人，出入空伤我怀抱。风雨萧萧旅馆秋，

归来窗下和衣倒。梦中忽到江南路，寻得花边旧居处。  
桃脸蛾眉笑出门，争向前头拥将去。

卷 738\_27【溧水无相寺赠僧】

韩熙载

无相景幽远，山屏四面开。凭师领鹤去，待我挂冠来。  
药为依时采，松宜绕舍栽。林泉自多兴，不是效刘雷。

卷 738\_28【书歌妓泥金带】

韩熙载

风柳摇摇无定枝，阳台云雨梦中归。  
他年蓬岛音尘断，留取尊前旧舞衣。

卷 738\_29【送徐铉流舒州】

韩熙载

昔年凄断此江湄，风满征帆泪满衣。  
今日重怜鹧鸪羽，不堪波上又分飞。

卷 738\_30【句】

韩熙载

几人平地上，看我半天中。

卷 738\_31【登祝融峰】

李徵古

欲上祝融峰，先登古石桥。凿开巖嶮处，取路到丹霄。

卷 738\_32【七岁吟】

潘佑

朝游沧海东，暮归何太速。只因骑折白龙腰，  
谪向人间三十六。

卷 738\_33【送许处士坚往茅山】

潘佑

天坛云似雪，玉洞水如琴。白云与流水，千载清人心。

君携布囊去，路长风满林。一入华阳洞，千秋那可寻。

卷 738\_34【送人往宣城】

潘佑

江畔送行人，千山生暮氛。谢安团扇上，为画敬亭云。

卷 738\_35【失题】

潘佑

谁家旧宅春无主，深院帘垂杏花雨。  
香飞绿琐人未归，巢燕承尘默无语。

卷 738\_36【句】

潘佑

劝君此醉直须欢，明朝又是花狼藉。

卷 738\_37【寄孟宾于】

李昉

初携书剑别湘潭，金榜标名第十三。昔日声名喧洛下，  
近来诗价满江南。长为邑令情终屈，纵处曹郎志未甘。  
莫学冯唐便休去，明君晚事未为惭。

卷 738\_38【送孟宾于】

马致恭

曾闻洛下缀神仙，火树南栖几十年。白首自忻丹桂在，  
诗名已得四方传。行随秋渚将归雁，吟傍梅花欲雪天。  
今日还家莫惆怅，不同初上渡头船。

卷 738\_39【奉和圣制元日大雪登楼】

张义方

恰当岁月纷纷落，天宝瑶花助物华。自古最先标瑞牒，  
有谁轻拟比杨花。密飘粉署光同冷，静压青松势欲斜。  
岂但小臣添兴咏，狂歌醉舞一家家。

## 卷七百三十九

### 卷 739\_1【中酒寄刘行军】

李建勋

甚矣频频醉，神昏体亦虚。肺伤徒问药，发落不盈梳。  
恋寝嫌明室，修生愧道书。西峰老僧语，相劝合何如。

### 卷 739\_2【白雁】

李建勋

东溪一白雁，毛羽何皎洁。薄暮浴清波，斜阳共明灭。  
差池失群久，幽独依人切。旅食赖菰蒲，单栖怯霜雪。  
边风昨夜起，顾影空哀咽。不及墙上乌，相将绕双阙。

### 卷 739\_3【早春寄怀】

李建勋

家山归未得，又是看春过。老觉光阴速，闲悲世路多。

风和吹岸柳，雪尽见庭莎。欲向东溪醉，狂眠一放歌。

卷 739\_4【春日东山正堂作】

李建勋

身闲赢得出，天气渐暄和。蜀马登山稳，南朝古寺多。  
早花微弄色，新酒欲生波。从此唯行乐，闲愁奈我何。

卷 739\_5【春日小园晨看兼招同舍】

李建勋

最有杏花繁，枝枝若手抟。须知一春促，莫厌百回看。  
鸟啭风潜息，蜂迟露未干。可容排饮否，兼折赠头冠。

卷 739\_6【惜花寄孙员外（一本缺孙字）】

李建勋

朝始一枝开，暮复一枝落。只恐雨淋漓，又见春萧索。  
侵晨结驷携酒徒，寻芳踏尽长安衢。思量少壮不自乐，  
他日白头空叹吁。

卷 739\_7 【春日病中】

李建勋

才得归闲去，还教病卧频。无由全胜意，终是负青春。  
绿柳渐拂地，黄莺如唤人。方为医者劝，断酒已经旬。

卷 739\_8 【殴妓】

李建勋

自为专房甚，匆匆有所伤。当时心已悔，彻夜手犹香。  
恨枕堆云髻，啼襟搵月黄。起来犹忍恶，剪破绣鸳鸯。

卷 739\_9 【踏青樽前】

李建勋

期君速行乐，不要旋还家。永日虽无雨，东风自落花。  
诗毫粘酒淡，歌袖向人斜。薄暮忘归路，垂杨噪乱鸦。

卷 739\_10【正月晦日】

李建勋

莫倦寻春去，都无百日游。更堪正月过，已是一分休。  
泉暖声才出，云寒势未收。晚来重作雪，翻为杏花愁。

卷 739\_11【惜花】

李建勋

白发今如此，红芳莫更催。预愁多日谢，翻怕十分开。  
点滴无时雨，荒凉满地苔。闲阶一杯酒，惟待故人来。

卷 739\_12【金谷园落花（一本缺谷字）】

李建勋

愁见清明后，纷纷盖地红。惜看难过日，自落不因风。  
蝶散余香在，莺啼半树空。堪悲一尊酒，从此似西东。

卷 739\_13 【柳花寄宋明府（一作寄人）】

李建勋

每爱江城里，青春向尽时。一回新雨歇，是处好风吹。  
破石黏虫网，高楼扑酒旗。遥知陶令宅，五树正离披。

卷 739\_14 【送人】

李建勋

相见未逾月，堪悲远别离。非君谁顾我，万里又南之。  
雨逼清明日，花阴杜宇时。愁看挂帆处，鸥鸟共迟迟。

卷 739\_15 【闲游】

李建勋

携酒复携觞，朝朝一似忙。马谙频到路，僧借旧眠床。  
道胜他图薄，身闲白日长。扁舟动归思，高处见沧浪。

卷 739\_16【柏梁隔句韵诗】

李建勋

不喜长亭柳，枝枝拟送君。惟怜北窗下，树树解留人。  
圆缺都如月，东西只似云。愁看离席散，归盖动行尘。

卷 739\_17【赠赵学士】

李建勋

常钦赵夫子，远作五侯宾。见面到今日，操心如古人。  
醉同华席少，吟访野僧频。寂寂长河畔，荒斋与庙邻。

卷 739\_18【春阴】

李建勋

老雨不肯休，东风势还作。未放草蒙茸，已遣花萧索。  
浮生何苦劳，触事妨行乐。寄语达生人，须知酒胜药。

卷 739\_19【春日金谷园（一本缺谷字）】

李建勋

火急召亲宾，欢游莫厌频。日长徒似岁，花过即非春。  
晚雨来何定，东风自不匀。须知三个月，不是负芳晨。

卷 739\_20【夏日酬祥松二公见访】

李建勋

多谢空门客，时时出草堂。从容非有约，淡薄不相忘。  
池映春篁老，檐垂夏果香。西峰正清霁，自与拂吟床。

卷 739\_21【怀赠操禅师】

李建勋

尝忆曹溪子，龕居面碧嵩。杉松新夏后，雨雹夜禅中。  
道匪因经悟，心能向物空。秋来得音信，又在剡山东。

卷 739\_22 【闲居秋思呈祥松二公】

李建勋

秋光虽即好，客思转悠哉。去国身将老，流年雁又来。  
叶红堆晚径，菊冷藉空罍。不得师相访，难将道自开。

卷 739\_23 【赋得冬日青溪草堂四十字】

李建勋

莫道无幽致，常来到日西。地虽当北阙，天与设东溪。  
疏苇寒多折，惊凫去不齐。坐中皆作者，长爱觅分题。

卷 739\_24 【溪斋】

李建勋

水木绕吾庐，褰帘晚槛虚。衰条寒露鹊，幽果落惊鱼。  
爱酒贫还甚，趋时老更疏。乖慵自有素，不是忽簪裾。

卷 739\_25【留题爱敬寺】

李建勋

野性竟未改，何以居朝廷。空为百官首，但爱千峰青。  
南风新雨后，与客携觞行。斜阳惜归去，万壑啼鸟声。

卷 739\_26【小园】

李建勋

小园吾所好，栽植忘劳形。晚果经秋赤，寒蔬近社青。  
竹萝荒引蔓，土井浅生萍。更欲从人劝，凭高置草亭。

卷 739\_27【宿山房】

李建勋

石窗灯欲尽，松槛月还明。就枕浑无睡，披衣却出行。  
岩高泉乱滴，林动鸟时惊。倏忽山钟曙，喧喧仆马声。

卷 739\_28【金陵所居青溪草堂闲兴】

李建勋

窗外皆连水，杉松欲作林。自怜趋竞地，独有爱闲心。  
素壁题看遍，危冠醉不簪。江僧暮相访，帘卷见秋岑。

卷 739\_29【阙下偶书寄孙员外】

李建勋

长安驱驰地，贵贱共悠悠。白日谁相促，劳生自不休。  
凤翔双阙晓，蝉噪六街秋。独有南宫客，时来话钓舟。

卷 739\_30【寄魏郎中】

李建勋

碌碌但随群，蒿兰任不分。未尝矜有道，求遇向吾君。  
逸驾秋寻寺，长歌醉望云。高斋纸屏古，尘暗北山文。

卷 739\_31 【病中书怀寄王二十六】

李建勋

落叶满山州，闲眠病未瘳。窗阴连竹枕，药气染茶瓯。  
路匪人遮去，官须自觅休。焉宜更羸老，扶杖作公侯。

卷 739\_32 【采菊】

李建勋

簇簇竞相鲜，一枝开几番。味甘资麴蘖，香好胜兰荪。  
古道风摇远，荒篱露压繁。盈筐时采得，服饵近知门。

卷 739\_33 【送王郎中之官吉水】

李建勋

南望庐陵郡，山连五岭长。吾君怜远俗，从事辍名郎。  
移户多无土，春蚕不满筐。惟应劳赞画，溪峒况强梁。

卷 739\_34【孤雁】

李建勋

欲食不敢食，合栖犹未栖。闻风亦惊过，避缴恨飞低。  
水阔缘湘困，云寒过碛迷。悲鸣感人意，不见夜乌啼。

卷 739\_35【赠送致仕郎中】

李建勋

鹤立瘦棱棱，髭长白似银。衣冠皆古制，气貌异常人。  
听雪添诗思，看山滞酒巡。西峰重归路，唯许野僧亲。

卷 739\_36【宿友人山居寄司徒相公】

李建勋

雨雪正霏霏，令人不忆归。地炉僧坐暖，山柝火声肥。  
隔纸烘茶蕊，移铛剥芋衣。知君在霄汉，此兴得还稀。

郢客相寻夜，荒庭雪洒篙。虚堂看向曙，吟坐共忘劳。  
溪冻声全减，灯寒焰不高。他人莫相笑，未易会吾曹。

卷 739\_37【感故府二首】

李建勋

戚戚复戚戚，期怀安可释。百年金石心，中路生死隔。  
新坟应草合，旧地空苔色。白日灯荧荧，凝尘满几席。

悒悒复悒悒，思君安可及。永日在阶前，披衣随风立。  
高楼暮角断，远树寒鸦集。惆怅几行书，遗踪墨犹湿。

卷 739\_38【田家三首】

李建勋

毕岁知无事，兵销复旧丁。竹门桑径狭，春日稻畦青。  
犬吠隈篱落，鸡飞上碓程。归田起口思，蛙叫草冥冥。

不识城中路，熙熙乐有年。木槩擎社酒，瓦鼓送神钱。  
霜落牛归屋，禾收雀满田。遥陂过秋水，闲阁钓鱼船。

长爱田家事，时时欲一过。垣篱皆树槿，厅院亦堆禾。  
病果因风落，寒蔬向日多。遥闻数声笛，牛晚下前坡。

卷 739\_39【新竹】

李建勋

袅袅薰风软，娟娟湛露光。参差仙子仗，迢迢羽林枪。  
迥去侵花地，斜来破藓墙。箨干犹抱翠，粉膩若涂装。  
径曲茎难数，阴疏叶未长。懒嫌吟客倚，甘畏夏虫伤。  
映水如争立，当轩自著行。北亭尊酒兴，还为此君狂。

卷 739\_40【归燕词】

李建勋

羽翼势虽微，云霄亦可期。飞翻自有路，鸿鹄莫相嗤。  
待侣临书幌，寻泥傍藻池。冲人穿柳径，捕蝶绕花枝。  
广厦来应遍，深宫去不疑。雕梁声上下，烟浦影参差。  
旧地人潜换，新巢雀谩窥。双双暮归处，疏雨满江湄。

卷 739\_41【题魏坛二首】

李建勋

不遇至真传道要，曾看真诰亦何为。旧碑经乱沈荒涧，  
灵篆因耕出故基。蛙黾自喧浇药井，牛羊闲过放生池。

萧条夕景空坛畔，朽桧枝斜绿蔓垂。

一寻遗迹到仙乡，云鹤沈沈思渺茫。丹井岁深生草木，  
芝田春废卧牛羊。雨淋残画摧荒壁，鼠引饥蛇落坏梁。  
薄暮欲归仍伫立，菖蒲风起水泱泱。

卷 739\_42 【东楼看雪】

李建勋

一上高楼醉复醒，日西江雪更冥冥。化风吹火全无气，  
平望惟松少露青。腊内不妨南地少，夜长应得小窗听。  
因思旧隐匡庐日，闲看杉桧掩石扃。

卷 739\_43 【落花】

李建勋

惜花无计又花残，独绕芳丛不忍看。暖艳动随莺翅落，  
冷香愁杂燕泥干。绿珠倚槛魂初散，巫峡归云梦又阑。  
忍把一尊重命乐，送春招客亦何欢。

卷 739\_44 【春雪】

李建勋

南国春寒朔气回，霏霏还阻百花开。全移暖律何方去，  
似误新莺昨日来。平野旋销难蔽草，远林高缀却遮梅。  
不知金勒谁家子，只待晴明赏帝台。

卷 739\_45 【重戏和春雪寄沈员外】

李建勋

谁道江南要雪难，半春犹得倚楼看。却遮迟日偷莺暖，  
密洒西风借鹤寒。散漫不容梨艳去，轻明应笑玉华干。  
和来琼什虽无敌，且是侬家比兴残。

卷 739\_46 【春日尊前示从事】

李建勋

州中案牍鱼鳞密，界上军书竹节稠。眼底好花浑似雪，  
瓮头春酒漫如油。东君不为留迟日，清镜唯知促白头。  
最觉此春无气味，不如庭草解忘忧。

卷 739\_47【尊前】

李建勋

官为将相复何求，世路多端早合休。渐老更知春可惜，  
正欢唯怕客难留。雨催草色还依旧，晴放花枝始自由。  
莫厌百壶相劝倒，免教无事结闲愁。

卷 739\_48【蔷薇二首】

李建勋

万蕊争开照槛光，诗家何物可相方。锦江风撼云霞碎，  
仙子衣飘黼黻香。裊露早英浓压架，背人狂蔓暗穿墙。  
彩笺蛮榼旬休日，欲召亲宾看一场。

拂檐拖地对前墀，蝶影蜂声烂熳时。万倍馨香胜玉蕊，  
一生颜色笑西施。忘归醉客临高架，恃宠佳人索好枝。  
将并舞腰谁得及，惹衣伤手尽从伊。

卷 739\_49【残牡丹】

李建勋

肠断题诗如执别，芳茵愁更绕阑铺。风飘金蕊看全落，

露滴檀英又暂苏。失意婕妤妆渐薄，背身妃子病难扶。  
回看池馆春休也，又是迢迢看画图。

卷 739\_50【春雨二首】

李建勋

春霖未免妨游赏，唯到诗家自有情。花径不通新草合，  
兰舟初动曲池平。净缘高树莓苔色，饥集虚廊燕雀声。  
闲忆昔年为客处，闷留山馆阻行行。

萧萧春雨密还疏，景象三时固不如，寒入远林莺翅重，  
暖抽新麦土膏虚。细蒙台榭微兼日，潜涨涟漪欲动鱼。  
唯称乖慵多睡者，掩门中酒览闲书。

卷 739\_51【醉中惜花更书与诸从事】

李建勋

公退寻芳已是迟，莫因他事更来稀。未经旬日唯忧落，  
算有开时不合归。歌榭宴余风袅袅，闲园吟散雨霏霏。  
高楼鼓绝重门闭，长为抛回恨解衣。

卷 739\_52【和判官喜雨】

李建勋

去祷山川尚未还，云雷寻作远声寒。人情便似秋登悦，  
天色休劳夜起看。高槛气浓藏柳郭，小庭流拥没花坛。  
须知太守重墙内，心极农夫望处欢。

卷 739\_53【离阙下日感恩】

李建勋

二年尘冒处中台，喜得南归退不才。即路敢期皇子送，  
出关犹有御书来。未知天地恩何报，翻对江山思莫开。  
斜日苇汀凝立处，远波微颺翠如苔。

卷 739\_54【细雨遥怀故人】

李建勋

江云未散东风暖，溟蒙正在高楼见。细柳缘堤少过人，  
平芜隔水时飞燕。我有近诗谁与和，忆君狂醉愁难破。  
昨夜南窗不得眠，闲阶点滴回灯坐。

卷 739\_55【春水】

李建勋

万派争流雨过时，晚来春静更逶迤。轻鸥散绕夫差国，  
远树微分夏禹祠。青岸渐平濡柳带，旧溪应暖负莼丝。  
风鬟倚楫谁家子，愁看鸳鸯望所之。

卷 739\_56【蝶】

李建勋

粉蝶翩翩若有期，南园长是到春归。闲依柳带参差起，  
困傍桃花独自飞。潜被燕惊还散乱，偶因人逐入帘帏。  
晚来欲雨东风急，回看池塘影渐稀。

卷 739\_57【中春写怀寄沈彬员外】

李建勋

省从骑竹学讴吟，便殢光阴役此心。寓目不能闲一日，  
闭门长胜得千金。窗悬夜雨残灯在，庭掩春风落絮深。  
唯有故人同此兴，近来何事懒相寻。

卷 739\_58【钟山寺避暑勉二三子】

李建勋

楼台虽少景何深，满地青苔胜布金。松影晚留僧共坐，  
水声闲与客同寻。清凉会拟归莲社，沈湎终须弃竹林。  
长爱寄吟经案上，石窗秋霁向千岑。

卷 739\_59【道林寺】

李建勋

虽向钟峰数寺连，就中奇胜出其间。不教幽树妨闲地，  
别著高窗向远山。莲沼水从双涧入，客堂僧自九华还。  
无因得结香灯社，空向王门玷玉班。

卷 739\_60【和致仕沈郎中】

李建勋

欲谋休退尚因循，且向东溪种白蘋。谬应星辰居四辅，  
终期冠褐作闲人。城中隔日趋朝懒，楚外千峰入梦频。  
残照晚庭沈醉醒，静吟斜倚老松身。

卷 739\_61 【醉中咏梅花】

李建勋

十月清霜尚未寒，雪英重叠已如抟。还悲独咏东园里，  
老作南州刺史看。北客见皆惊节气，郡僚痴欲望杯盘。  
交亲罕至长安远，一醉如泥岂自欢。

卷 739\_62 【闲出书怀】

李建勋

闲游何用问东西，寓兴皆非有所期。断酒只携僧共去，  
看山从听马行迟。溪田雨涨禾生耳，原野莺啼黍熟时。  
应有交亲长笑我，独轻人事鬓将衰。

卷 739\_63 【寺居陆处士相访，感怀却寄二三友人】

李建勋

湘寺闲居亦半年，就中昨夜好潸然。人归远岫疏钟后，  
雪打高杉古屋前。投足正逢他国乱，冥心未解祖师禅。  
炉烟向冷孤灯下，唯有寒吟到曙天。

卷 739\_64【春雪】

李建勋

随风竟日势漫漫，特地繁于故岁看。幽榭冻黏花屋重，  
短檐斜湿燕巢寒。闲听不寐诗魂爽，净吃无厌酒肺干。  
莫道便为桑麦药，亦胜焦涸到春残。

卷 739\_65【惜花】

李建勋

淡淡西园日又垂，一尊何忍负芳枝。莫言风雨长相促，  
直是晴明得几时。心破只愁莺践落，眼穿唯怕客来迟。  
年年使我成狂叟，肠断红笺几首诗。

卷 739\_66【梅花寄所亲】

李建勋

一气才新物未知，每惭青律与先吹。雪霜迷素犹嫌早，  
桃杏虽红且后时。云鬓自黏飘处粉，玉鞭谁指出墙枝。  
老夫多病无风味，只向尊前咏旧诗。

卷 739\_67【登升元阁】

李建勋

登高始觉太虚宽，白雪须知唱和难。云渡琐窗金榜湿，  
月移珠箔水精寒。九天星象帘前见，六代城池直下观。  
唯有上层人未到，金乌飞过拂阑干。

卷 739\_68【雪有作】

李建勋

霏霏奕奕满寒空，况是难逢值腊中。未白已堪张宴会，  
渐繁偏好去帘栊。庭莎易集看盈地，池柳难装旋逐风。  
长爱清华入诗句，预愁迟日放消融。

卷 739\_69【宫词】

李建勋

自远凝旒守上阳，舞衣顿减旧朝香。帘垂粉阁春将尽，  
门掩梨花日渐长。草色深浓封辇路，水声低咽转宫墙。  
君王一去不回驾，皓齿青蛾空断肠。

卷 739\_70【晚春送牡丹】

李建勋

携觞邀客绕朱阑，肠断残春送牡丹。风雨数来留不得，  
离披将谢忍重看。氛氲兰麝香初减，零落云霞色渐干。  
借问少年能几许，不许推酒厌杯盘。

卷 739\_71【岁暮晚泊，望庐山不见，因怀岳僧呈察判】

李建勋

贪程只为看庐阜，及到停舟恨颇浓。云暗半空藏万仞，  
雪迷双瀑在中峰。林端莫辨曾游路，鸟际微闻向暮钟。  
长愧昔年招我入，共寻香社见芙蓉。

卷 739\_72【重台莲】

李建勋

斜倚秋风绝比伦，千英和露染难匀。自为祥瑞生南国，  
谁把丹青寄北人。明月几宵同绿水，牡丹无路出红尘。  
怜伊不算多时立，赢得馨香暗上身。

卷 739\_73 【迎神】

李建勋

搯蛮鼉，吟塞笛，女巫结束分行立。空中再拜神且来，  
满奠椒浆齐献揖。阴风窸窣吹纸钱，妖巫瞑目传神言。  
与君降福为丰年，莫教赛祀亏常筵。

卷 739\_74 【春词】

李建勋

日高闲步下堂阶，细草春莎没绣鞋。  
折得玫瑰花一朵，凭君簪向凤凰钗。

卷 739\_75 【独夜作】

李建勋

佳人一去无消息，梦觉香残愁复入。  
空庭悄悄月如霜，独倚阑干伴花立。

卷 739\_76 【竹】

李建勋

琼节高吹宿凤枝，风流交我立忘归。  
最怜瑟瑟斜阳下，花影相和满客衣。

卷 739\_77 【清明日】

李建勋

他皆携酒寻芳去，我独关门好静眠。  
唯有杨花似相觅，因风时复到床前。

卷 739\_78 【宫词】

李建勋

宫门长闭舞衣闲，略识君王鬓便斑。  
却羡落花春不管，御沟流得到人间。

卷 739\_79【送喻炼师归茅山】

李建勋

休粮知几载，脸色似桃红。半醉离城去，单衣行雪中。  
水声茅洞晓，云影石房空。莫学秦时客，音书便不通。

卷 739\_80【和元宗元日大雪登楼】

李建勋

纷纷忽降当元会，著物轻明似月华。狂洒玉墀初散絮，  
密黏宫树未妨花。迴封双阙千寻峭，冷压南山万仞斜。  
宁意传来中使出，御题先赐老僧家。

卷 739\_81【游栖霞寺】

李建勋

养花天气近平分，瘦马来敲白下门。晓色未开山意远，  
春容犹淡月华昏。琅琊冷落存遗迹，篱舍稀疏带旧村。  
此地几经人聚散，只今王谢独名存。

卷 739\_82【答汤悦】

李建勋

司空犹不作，那敢作司徒。幸有山翁号，如何不见呼？

卷 739\_83【金山】

李建勋

不嗟白发曾游此，不叹征帆无了期。  
尽日凭阑谁会我，只悲不见韩垂诗。

卷 739\_84【送李冠（冠善吹中管）】

李建勋

匀如春涧长流水，怨似秋枝欲断蝉。  
可惜人间容易听，清声不到御楼前。

卷 739\_85【游宋兴寺东岩】

李建勋

几年不到东岩下，旧住僧亡屋亦无。  
寒日萧条何物在，朽松经烧石池枯。

卷 739\_86【批周宗书后】

李建勋

偶罢阿衡来典郡，固无闲物可应官。  
凭君为报群胥道，莫作循州刺史看。

卷 739\_87【题信果观壁】

李建勋

春来涨水流而活，晓色西山势似行。  
玉洞主人经劫在，携竿步步就长生。

卷 739\_88【送八分书与友人，继以诗】

李建勋

跢跢为诗跢跢书，不封将去寄仙都。  
仙翁拍手应相笑，得似秦朝次仲无？

卷 739\_89【句】

李建勋

桃花流水须长信，不学刘郎去又来。  
粟多未必全为计，师老须防有伏兵。  
遍寻云壑重题石，欲下山门更倚松。

## 卷七百四十

### 卷 740\_1【蟠溪怀古】

孟宾于

良哉吕尚父，深隐始归周。钓石千年在，春风一水流。  
松根盘藓石，花影卧沙鸥。谁更怀韬术，追思古渡头。

### 卷 740\_2【怀连上旧居】

孟宾于

闲思连上景难齐，树绕仙乡路绕溪。明月夜舟渔父唱，  
春风平野鹧鸪啼。城边寄信归云外，花下倾杯到日西。  
更忆海阳垂钓侣，昔年相遇草萋萋。

### 卷 740\_3【公子行】

孟宾于

锦衣红夺彩霞明，侵晓春游向野庭。

· 全唐诗 ·

---

不识农夫辛苦力，骄骢蹋烂麦青春。

卷 740\_4【湘江亭】

孟宾于

独宿大中年里寺，樊笼得出事无心。  
寒山梦觉一声磬，霜叶满林秋正深。

卷 740\_5【题梅仙馆】

孟宾于

仙界路遥云缥缈，古坛风冷叶萧骚。  
后来岂合言淹滞，一尉升腾道最高。

卷 740\_6【题颜氏亭宇】

孟宾于

园林萧洒闻来久，欲访因循二十秋。  
今日开襟吟不尽，碧山重叠水长流。

卷 740\_7【晚眺】

孟宾于

倚杖残秋里，吟中四顾频。  
西风天际雁，落日渡头人。  
草色衰平野，山阴敛暮尘。  
却寻苔径去，明月照村邻。

卷 740\_8【献主司】

孟宾于

那堪雨后更闻蝉，溪隔重湖路七千。  
忆昔故园杨柳岸，全家送上渡头船。

卷 740\_9【句】

孟宾于

远树连沙静，闲舟入浦迟。  
帘垂群吏散，苔长讼庭闲。  
去年曾折处，今日又垂条。

早知落处随疏雨，悔得开时顺暖风。

千家帘幕春空在，几处楼台月自明。

腊雪化为流水去，春风吹出好山来。

昔日声尘喧洛下，近年诗句满江南。

匝地人家凭槛见，远山秋色卷帘看。

蟾宫空手下，泽国更谁来。

水国二亲应探榜，龙门三月又伤春。

仙鸟却回空说梦，清朝未达自嫌身。

失意从他桃李春，嵩阳经过歇行尘。

云僧不见城中事，问是今年第几人。

因逢日者教重应，忍被云僧劝却归。

卷 740\_10【九日陪董内召登高】

廖匡图

祝融峰下逢佳节，相对那能不怆神。烟里共寻幽涧菊，

樽前俱是异乡人。遥山带日应连越，孤雁来时想别秦。  
自古登高尽惆怅，茱萸休笑泪盈巾。

卷 740\_11【赠泉陵上人】

廖匡图

暂把枯藤倚碧根，禅堂初创楚江滨。直疑松小难留鹤，  
未信山低住得云。草接寺桥牛笛近，日衔村树鸟行分。  
每来共忆曾游处，万壑泉声绝顶闻。

卷 740\_12【和人赠沈彬】

廖匡图

冥鸿迹在烟霞上，燕雀休夸大厦巢。名利最为浮世重，  
古今能有几人抛。逼真但使心无著，混俗何妨手强抄。  
深喜卜居连岳色，水边竹下得论交。

卷 740\_13【松】

廖匡图

曾于西晋封中散，又向东吴作大夫。浓翠自知千古在，

· 全唐诗 ·

---

清声谁道四时无。枝柯偃后龙蛇老，根脚盘来爪距粗。  
直待素秋摇落日，始将凡木斗荣枯。

卷 740\_14【句】

廖匡图

正悲世上事无限，细看水中尘更多。

卷 740\_15【中秋月】

廖凝

九十日秋色，今宵已半分。孤光含列宿，四面绝纤云。  
众木排疏影，寒流叠细纹。遥遥望丹桂，心绪正纷纷。

卷 740\_16【闻蝉】

廖凝

一声初应候，万木已西风。偏感异乡客，先于离塞鸿。  
日斜金谷静，雨过石城空。此处不堪听，萧条千古同。

卷 740\_17【彭泽解印】

廖凝

五斗徒劳谩折腰，三年两鬓为谁焦。  
今朝官满重归去，还挈来时旧酒瓢。

卷 740\_18【句】

廖凝

满汀沔不散，一局黑全输。  
猎回千帐雪，探密大河冰。  
落尽最高树，始知松柏青。  
饭僧春岭蕨，醒酒雪潭鱼。  
风清竹阁留僧宿，雨湿莎庭放吏衙。  
红踑躅繁金殿暖，碧芙蓉笑水宫秋。

卷 740\_19【赠廖凝（时凝居南岳）】

韦鼎

君与白云邻，生涯久忍贫。姓名高雅道，寰海许何人。  
岳气秋来早，亭寒果落新。几回吟石畔，孤鹤自相亲。

卷 740\_20【寄庐山白上人】

左偃

潦倒门前客，闲眠岁又残。连天数峰雪，终日与谁看。  
万丈高松古，千寻落水寒。仍闻有新作，懒寄入长安。

卷 740\_21【寄韩侍郎】

左偃

谋身谋隐两无成，拙计深惭负耦耕。渐老可堪怀故国，  
多愁翻觉厌浮生。言诗幸遇明公许，守朴甘遭俗者轻。  
今日况闻搜草泽，独悲憔悴卧升平。

卷 740\_22 【汉宫词】

左偃

寒烛照清夜，笙歌隔薛墙。一从飞燕入，便不见君王。

卷 740\_23 【送君去】

左偃

关河月未晓，行子心已急。佳人无一言，独背残灯泣。

卷 740\_24 【秋晚野望】

左偃

倚筇聊一望，何处是秦川？草色初晴路，鸿声欲暮天。

卷 740\_25 【郊原晚望怀李秘书】

左偃

归鸟入平野，寒云在远村。徒令睇望久，不复见王孙。

卷 740\_26 【言怀别同志】

左偃

渐老将谁托，劳生每自惭。何当重携手，风雨满江南。

卷 740\_27 【江上晚泊】

左偃

寒云淡淡天无际，片帆落处沙鸥起。  
水阔风高日复斜，扁舟独宿芦花里。

卷 740\_28 【寄鉴上人】

左偃

一从携手阻戈鋌，屈指如今已十年。  
长记二林同宿夜，竹斋听雨共忘眠。

卷 740\_29【送人】

左偃

一茎两茎华发生，千枝万枝梨花白。  
春色江南独未归，今朝又送还乡客。

卷 740\_30【句】

左偃

胡笳闻欲死，汉月望还生。  
日华离碧海，云影散青霄。

## 第七百四十一卷

### 卷 741\_1 【景阳台怀古】

陈旼

景阳六朝地，运极自依依。一会皆同是，到头谁论非。  
酒浓沈远虑，花好失前机。见此尤宜戒，正当家国肥。

### 卷 741\_2 【石城怀古】

刘洞

石城古岸头，一望思悠悠。几许六朝事，不禁江水流。

### 卷 741\_3 【句】

刘洞

千里长江皆渡马，十年养士得何人。

· 全唐诗 ·

---

翻忆潘郎章奏内，愔愔日暮好沾巾。

百骸同草木，万象入心灵。

卷 741\_4 【旅怀】

江为

迢迢江汉路，秋色又堪惊。半夜闻鸿雁，多年别弟兄。  
高风云影断，微雨菊花明。欲寄东归信，裴回无限情。

卷 741\_5 【江行】

江为

越信隔年稀，孤舟几梦归。月寒花露重，江晚水烟微。  
峰直帆相望，沙空鸟自飞。何时洞庭上，春雨满蓑衣。

卷 741\_6 【登润州城】

江为

天末江城晚，登临客望迷。春潮平岛屿，残雨隔虹霓。  
鸟与孤帆远，烟和独树低。乡山何处是，目断广陵西。

卷 741\_7 【岳阳楼】

江为

倚楼高望极，展转念前途。晚叶红残楚，秋江碧入吴。  
云中来雁急，天末去帆孤。明月谁同我，悠悠上帝都。

卷 741\_8 【送客】

江为

明月孤舟远，吟髭镊更华。天形围泽国，秋色露人家。  
水馆萤交影，霜洲橘委花。何当寻旧隐，泉石好生涯。

卷 741\_9 【临刑诗】

江为

街鼓侵人急，西倾日欲斜。黄泉无旅店，今夜宿谁家。

卷 741\_10 【塞下曲】

江为

万里黄云冻不飞，碛烟烽火夜深微。

· 全唐诗 ·

---

胡儿移帐寒笳绝，雪路时闻探马归。

卷 741\_11 【隋堤柳】

江为

锦缆龙舟万里来，醉乡繁盛忽尘埃。  
空余两岸千株柳，雨叶风花作恨媒。

卷 741\_12 【句】

江为

吟登萧寺旃檀阁，醉倚王家玳瑁筵。  
远远朝宗出白云，方圆随处性长存。

卷 741\_13 【咏鹰（越归南唐，初投鄂帅张宣，久不见知，以鹰诗诮之）】

高越

雪爪星眸世所稀，摩天专待振毛衣。  
虞人莫谩张罗网，未肯平原浅草飞。

## 第七百四十二卷

### 卷 742\_1 【惜花】

张泌

蝶散莺啼尚数枝，日斜风定更离披。  
看多记得伤心事，金谷楼前委地时。

### 卷 742\_2 【寄人】

张泌

别梦依依到谢家，小廊回合曲阑斜。  
多情只有春庭月，犹为离人照落花。

酷怜风月为多情，还到春时别恨生。  
倚柱寻思倍惆怅，一场春梦不分明。

卷 742\_3 【边上】

张泌

戍楼吹角起征鸿，猎猎寒旌背晚风。千里暮烟愁不尽，  
一川秋草恨无穷。山河惨澹关城闭，人物萧条市井空。  
只此旅魂招未得，更堪回首夕阳中。

卷 742\_4 【长安道中早行】

张泌

客离孤馆一灯残，牢落星河欲曙天。鸡唱未沈函谷月，  
雁声新度灞陵烟。浮生已悟庄周蝶，壮志仍输祖逖鞭。  
何事悠悠策羸马，此中辛苦过流年。

卷 742\_5 【洞庭阻风】

张泌

空江浩荡景萧然，尽日菰蒲泊钓船。青草浪高三月渡，  
绿杨花扑一溪烟。情多莫举伤春目，愁极兼无买酒钱。  
犹有渔人数家住，不成村落夕阳边。

卷 742\_6 【春日旅泊桂州】

张泌

暖风芳草竟芊绵，多病多愁负少年。弱柳未胜寒食雨，  
好花争奈夕阳天。溪边物色堪图画，林畔莺声似管弦。  
独有离人开泪眼，强凭杯酒亦潜然。

卷 742\_7 【晚次（一作歇）湘源县】

张泌

烟郭遥闻向晚鸡，水平舟静浪声齐。高林带雨杨梅熟，  
曲岸笼云谢豹啼。二女庙荒汀树老，九疑山碧楚天低。  
湘南自古多离怨，莫动哀吟易惨凄。

卷 742\_8 【惆怅吟】

张泌

秋风丹叶动荒城，惨澹云遮日半明。昼梦却因惆怅得，  
晚愁多为别离生。江淹彩笔空留恨，壮叟玄谭未及情。  
千古怨魂销不得，一江寒浪若为平。

卷 742\_9 【秋晚过洞庭】

张泌

征帆初挂酒初酣，暮景离情两不堪。千里晚霞云梦北，  
一洲霜橘洞庭南。溪风送雨过秋寺，涧石惊龙落夜潭。  
莫把羁魂吊湘魄，九疑愁绝锁烟岚。

卷 742\_10 【题华严寺木塔】

张泌

六街晴色动秋光，雨霁凭高只易伤。一曲晚烟浮渭水，  
半桥斜日照咸阳。休将世路悲尘事，莫指云山认故乡。  
回首汉宫楼阁暮，数声钟鼓自微茫。

卷 742\_11 【经旧游】

张泌

暂到高唐晓又还，丁香结梦水潺潺。  
不知云雨归何处，历历空留十二山。

卷 742\_12 【碧户】

张泌

碧户扃鱼锁，兰窗掩镜台。落花疑怅望，归燕自裴回。  
咏絮知难敌，伤春不易裁。恨从芳草起，愁为晚风来。  
衣惹湘云薄，眉分楚岫开。香浓眠旧枕，梦好醉春杯。  
小障明金凤，幽屏点翠苔。宝箏横塞雁，怨笛落江梅。  
卓氏仍多酒，相如正富才。莫教琴上意，翻作鹤声哀。

卷 742\_13 【芍药】

张泌

香清粉澹怨残春，蝶翅蜂须恋蕊尘。闲倚晚风生怅望，  
静留迟日学因循。休将薜荔为青琐，好与玫瑰作近邻。  
零落若教随暮雨，又应愁杀别离人。

卷 742\_14 【春晚谣】

张泌

雨微微，烟霏霏，小庭半拆红蔷薇。钿箏斜倚画屏曲，  
零落几行金雁飞。萧关梦断无寻处，万叠春波起南浦。

凌乱杨花扑绣帘，晚窗时有流莺语。

卷 742\_15 【所思】

张泌

空塘水碧春雨微，东风散漫杨柳飞。依依南浦梦犹在，  
脉脉高唐云不归。江头日暮多芳草，极目伤心烟悄悄。  
隔江红杏一枝明，似玉佳人俯清沼。休向春台更回望，  
销魂自古因惆怅。银河碧海共无情，两处悠悠起风浪。

卷 742\_16 【春夕言怀】

张泌

风透疏帘月满庭，倚栏无事倍伤情。烟垂柳带纤腰软，  
露滴花房怨脸明。愁逐野云销不尽，情随春浪去难平。  
幽窗漫结相思梦，欲化西园蝶未成。

卷 742\_17 【春江雨】

张泌

雨溟溟，风泠泠，老松瘦竹临烟汀。空江冷落野云重，

村中鬼火微如星。夜惊溪上渔人起，滴沥篷声满愁耳。  
子规叫断独未眠，鼉岸春涛打船尾。

卷 742\_18 【送容州中丞赴镇】

张泌

交趾同星坐，龙泉佩斗文。烧香翠羽帐，看舞郁金香。  
鹞首冲泷浪，犀渠拂岭云。莫教铜柱北，只说马将军。

卷 742\_19 【赠韩道士】

张泌

日暮秋风吹野花，上清归客意无涯。桃源寂寂烟霞闭，  
天路悠悠星汉斜。还似世人生白发，定知仙骨变黄芽。  
东城南陌频相见，应是壶中别有家。

## 第七百四十三卷

### 卷 743\_1 【甘露寺】

孙鲂

寒暄皆有景，孤绝画难形。地拱千寻嶮，天垂四面青。  
昼灯笼雁塔，夜磬彻渔汀。最爱僧房好，波光满户庭。

### 卷 743\_2 【题金山寺】

孙鲂

万古波心寺，金山名目新。天多剩得月，地少不生尘。  
过檐妨僧定，惊涛溅佛身。谁言张处士，题后更无人。

### 卷 743\_3 【杨柳枝词五首】

孙鲂

灵和风暖太昌春，舞线摇丝向昔人。

何似晓来江雨后，一行如画隔遥津。

彭泽初栽五树时，只应闲看一枝垂。  
不知天意风流处，要与佳人学画眉。

暖傍离亭静拂桥，入流穿槛绿阴摇。  
不知落日谁相送，魂断千条与万条。

春来绿树遍天涯，未见垂杨未可夸。  
晴日万株烟一阵，闲坊兼是莫愁家。

十首当年有旧词，唱青歌翠几无遗。  
未曾得向行人道，不谓离情莫折伊。

卷 743\_4 【句】

孙鲂

游子未归去，野花愁破心。

划多灰渐冷，坐久席成痕。

结宇孤峰上，安禅巨浪间。

分开朝海浪，留住过江云。

划多灰杂苍虬迹，坐久烟消宝鸭香。

卷 743\_5 【入塞二首】

沈彬

欲为皇王服远戎，万人金甲鼓鼙中。阵云黯塞三边黑，  
兵血愁天一片红。半夜翻营旗搅月，深秋防戍剑磨风。  
谤书未及明君爇，卧骨将军已殁功。

苦战沙门卧箭痕，戍楼闲上望星文。生希国泽分偏将，  
死夺河源答圣君。鸢鹞败兵眠白草，马惊边鬼哭阴云。  
功多地远无人纪，汉阁笙歌日又曛。

卷 743\_6 【塞下三首】

沈彬

塞叶声悲秋欲霜，寒山数点下牛羊。映霞旅雁随疏雨，  
向碛行人带夕阳。边骑不来沙路失，国恩深后海城荒。  
胡儿向化新成长，犹自千回问汉王。

贵主和亲杀气沉，燕山闲猎鼓鼙音。旗分雪草偷边马，  
箭入寒云落塞禽。陇月尽牵乡思动，战衣谁寄泪痕深。  
金钗谩作封侯别，劈破佳人万里心。

· 全唐诗 ·

---

月冷榆关过雁行，将军寒笛老思乡。贰师骨恨千夫壮，  
李广魂飞一剑长。戍角就沙催落日，阴云分磧护飞霜。  
谁知汉武轻中国，闲夺天山草木荒。

卷 743\_7 【秋日】

沈彬

秋含砧杵捣斜阳，笛引西风颭气凉。薜荔惹烟笼蟋蟀，  
芰荷翻雨泼鸳鸯。当年酒贱何妨醉，今日时难不易狂。  
肠断旧游从一别，潘安惆怅满头霜。

卷 743\_8 【金陵杂题二首】

沈彬

王气生秦四百年，晋元东渡浪花船。正惭海内皆涂地，  
来保江南一片天。古树著行临远岸，暮山相亚出微烟。  
千征万战英雄尽，落日牛羊食野田。

暮潮声落草光沉，贾客来帆宿岸阴。一笛月明何处酒，  
满城秋色几家砧。时清曾恶桓温盛，山翠长牵谢傅心。  
今日到来何物在，碧烟和雨锁寒林。

卷 743\_9 【麻姑山】

沈彬

绀殿松萝太古山，仙人曾此话桑田。闲倾云液十分日，  
已过浮生一万年。花洞路中逢鹤信，水帘岩底见龙眠。  
我来游礼酬心愿，欲共怡神契自然。

卷 743\_10 【题苏仙山（郴州城东有山，为苏耽修真之所，名苏仙山）】

沈彬

眼穿林罅见郴州，井里交连侧局楸。味道不来闲处坐，  
劳生更欲几时休。苏仙宅古烟霞老，义帝坟荒草木愁。  
千古是非无处问，夕阳西去水东流。

卷 743\_11 【洪州解至长安，初举纳省卷梦仙谣】

沈彬

， 。玉殿大开从客入，  
金桃烂熟没人偷。凤惊宝扇频翻翅，龙惧金鞭不转头。

卷 743\_12 【忆仙谣（第二举）】

沈彬

白榆风飒九天秋，王母朝回宴玉楼。日月渐长双凤睡，  
桑田欲变六鳌愁。云翻箫管相随去，星触旌幢各自流。  
诗酒近来狂不得，骑龙却忆上清游。

卷 743\_13 【纳省卷赠为首刘象（第三举）】

沈彬

曾应大中天子举，四朝风月鬓萧疏。不随世祖重携剑，  
却为文皇再读书。十载战尘销旧业，满城春雨坏贫居。  
一枝何事于君借，仙桂年年幸有余。

卷 743\_14 【赠王定保】

沈彬

仙桂曾攀第一枝，薄游湘水阻佳期。皋桥已失齐眉愿，  
萧寺行逢落发师。废苑露寒兰寂寞，丹山云断凤参差。  
闻公已有平生约，谢绝女萝依兔丝。

卷 743\_15 【结客少年场行】

沈彬

重义轻生一剑知，白虹贯日报讎归。  
片心惆怅清平世，酒市无人问布衣。

卷 743\_16 【阳朔碧莲峰】

沈彬

陶潜彭泽五株柳，潘岳河阳一县花。  
两处争如阳朔好，碧莲峰里住人家。

卷 743\_17 【再过金陵】

沈彬

玉树歌终王气收，雁行高送石城秋。  
江山不管兴亡事，一任斜阳伴客愁。

卷 743\_18 【都门送别】

沈彬

岸柳萧疏野荻秋，都门行客莫回头。  
一条灞水清如剑，不为离人割断愁。

卷 743\_19 【吊边人】

沈彬

杀声沈后野风悲，汉月高时望不归。  
白骨已枯沙上草，家人犹自寄寒衣。

卷 743\_20 【句】

沈彬

尺素隐清辉，一毫分险阻。  
  
金翅动身摩日月，银河转浪洗乾坤。  
  
须知手笔安排定，不怕山河整顿难。

· 全唐诗 ·

---

九衢冠盖暗争路，四海干戈多异心。

地隈一水巡城转，天约群山附郭来。

数家鱼网疏云外，一岸残阳细雨中。

松欹晚影离坛草，钟撼秋声入殿风。

压低吴楚遥涵水，约破云霞独倚天。

半身落日离秦树，一路平芜入楚烟。

清占月中三峡水，丽偷云外十洲春。

幽鸟唤人穿竹去，野猿寻果出云来。

## 第七百四十四卷

### 卷 744\_1 【僻居谢何明府见访】

伍乔

公退琴堂动逸怀，闲披烟霭访微才。马嘶穷巷蛙声息，  
辙到衡门草色开。风引柳花当坐起，日将林影入庭来。  
满斋尘土一床藓，多谢从容水饭回。

### 卷 744\_2 【冬日道中（一作冬日送人）】

伍乔

去去天涯无定期，瘦童羸马共依依。暮烟江口客来绝，  
寒叶岭头人住稀。带雪野风吹旅思，入云山火照行衣。  
钓台吟阁沧洲在，应为初心未得归。

### 卷 744\_3 【僻居酬友人】

伍乔

僻居虽爱近林泉，幽径闲居碧藓连。向竹掩扉随鹤息，

就溪安石学僧禅。古琴带月音声亮，山果经霜气味全，  
多谢故交怜朴野，隔云时复寄佳篇。

卷 744\_4 【游西山龙泉禅寺（一作院）】

伍乔

叠献层峰坐可观，枕门流水更潺湲。晓钟声彻洞溪远，  
夏木影笼轩槛寒。幽径乍寻衣屨润，古堂频宿梦魂安。  
因嗟城郭营营事，不得长游空鬓残。

卷 744\_5 【宿灊山】

伍乔

一入仙山万虑宽，夜深宁厌倚虚栏。鹤和云影宿高木，  
人带月光登古坛。芝朮露浓溪坞白，薜萝风起殿廊寒。  
更陪羽客论真理，不觉初钟叩晓残。

卷 744\_6 【游西禅】

伍乔

远岫当轩列翠光，高僧一衲万缘忘。碧松影里地长润，

白藕花中水亦香。云自雨前生净石，鹤于钟后宿长廊。  
游人恋此吟终日，盛暑楼台早有凉。

卷 744\_7 【寄史处士】

伍乔

长羨闲居一水湄，吟情高古有谁知。石楼待月横琴久，  
渔浦经风下钓迟。僻坞落花多掩径，旧山残烧几侵篱。  
松门别后无消息，早晚重应蹑屐随。

卷 744\_8 【僻居秋思寄友人（一作故友）】

伍乔

门巷秋归更寂寥，雨余闲砌委兰苗。梦回月夜虫吟壁，  
病起茅斋药满瓢。泽国旧游关远思，竹林前会负佳招。  
身名未立犹辛苦，何许流年晚鬓凋。

卷 744\_9 【寄落星史虚白处士】

伍乔

白云峰下古溪头，曾与提壶烂熯游。登阁共看彭蠡水，

· 全唐诗 ·

---

围炉相忆杜陵秋。棋玄不厌通高品，句妙多容隔岁酬。  
别后相思时一望，暮山空碧水空流。

卷 744\_10 【九江旅夜寄山中故人】

伍乔

弱柳风高远漏沈，坐来难便息愁吟。江城雪尽寒犹在，  
客舍灯孤夜正深。尘土积年粘旅服，关山无处寄归心。  
此时遥羨闲眠侣，静掩云扉卧一林。

卷 744\_11 【闻杜牧赴阙】

伍乔

旧隐匡庐一草堂，今闻携策谒吾皇。峡云难卷从龙势，  
古剑终腾出土光。开翅定期归碧落，濯缨宁肯问沧浪。  
他时得意交知仰，莫忘裁诗寄钓乡。

卷 744\_12 【题西林寺水阁】

伍乔

竹翠苔花绕槛浓，此亭幽致讵曾逢。水分林下清泠派，

山峙云间峭峻峰。怪石夜光寒射烛，老杉秋韵冷和钟。  
不知来往留题客，谁约重寻莲社踪。

卷 744\_13 【林居喜崔三博远至】

伍乔

几日区区在远程，晚烟林径喜相迎。姿容虽有尘中色，  
巾屨犹多岳上清。野石静排为坐榻，溪茶深煮当飞觥。  
留连话与方经宿，又欲携书别我行。

卷 744\_14 【观华夷图】

伍乔

别手应难及此精，须知攒簇自心灵。始于毫末分诸国，  
渐见图中列四溟。关路欲伸通楚势，蜀山俄耸入秦青。  
笔端尽现寰区事，堪把长悬在户庭。

卷 744\_15 【庐山书堂送祝秀才还乡】

伍乔

束书辞我下重巖，相送同临楚岸边。归思几随千里水，

离情空寄一枝蝉。园林到日酒初熟，庭户开时月正圆。  
莫使蹉跎恋疏野，男儿酬志在当年。

卷 744\_16 【暮冬送何秀才毗陵】

伍乔

匹马嘶风去思长，素琴孤剑称戎装。路途多是过残岁，  
杯酒无辞到醉乡。云傍水村凝冷片，雪连山驿积寒光。  
毗陵城下饶嘉景，回日新诗应满堂。

卷 744\_17 【龙潭张道者】

伍乔

碧洞幽岩独息心，时人何路得相寻。养生不说凭诸药，  
适意惟闻在一琴。石径扫稀山藓合，竹轩开晚野云深。  
他年功就期飞去，应笑吾徒多苦吟。

卷 744\_18 【晚秋同何秀才溪上】

伍乔

闲步秋光思杳然，荷藜因共过林烟。期收野药寻幽路，

欲采溪菱上小船。云吐晚阴藏霁岫，柳含余霭咽残蝉。  
倒尊尽日忘归处，山磬数声敲暝天。

卷 744\_19 【送江少府授延陵后寄】

伍乔

五老云中勤学者，遇时能不困风尘。束书西上谒明主，  
捧檄南归慰老亲。别馆友朋留醉久，去程烟月入吟新。  
莫因官小慵之任，自古鸾栖有异人。

卷 744\_20 【观山水障子】

伍乔

功绩精妍世少伦，图时应倍用心神。不知草木承何异，  
但见江山长带春。云势似离岩底石，浪花如动岸边蘋。  
更疑独泛渔舟者，便是其中旧隐人。

卷 744\_21 【寄张学士洎】

伍乔

不知何处好消忧，公退携壶即上楼。职事久参侯伯幕，

· 全唐诗 ·

---

梦魂长绕帝王州。黄山向晚盈轩翠，黟水含春绕槛流。  
遥想玉堂多暇日，花时谁伴出城游？

卷 744\_22 【句】

伍乔

积霭沈诸壑，微阳在半峰。

## 第七百四十五卷

### 卷 745\_1 【塞下曲】

陈陶

边头能走马，猿臂李将军。射虎群胡伏，开弓绝塞闻。  
海山谙向背，攻守别风云。只为坑降罪，轻车未转勋。

望湖关下战，杂虏丧全师。鸟啄豺狼将，沙埋日月旗。  
牛羊奔赤狄，部落散燕耆。都护凌晨出，铭功瘞死尸。

### 卷 745\_2 【胡无人行】

陈陶

十万羽林儿，临洮破郅支。杀添胡地骨，降足汉营旗。  
塞阔牛羊散，兵休帐幕移。空流陇头水，呜咽向人悲。

### 卷 745\_3 【悲哉行】

陈陶

中岳仇先生，遗余饵松方。服之一千日，肢体生异香。

步履如风旋，天涯不赍粮。仍云为地仙，不得朝虚皇。  
狡兔有三穴，人生又何常。悲哉二廉士，饿死于首阳。

卷 745\_4 【涂山怀古】

陈陶

落拓书剑晚，清秋鹰正笼。涂山间来上，敬爱如登龙。  
览古觉神王，翛然天地空。东南更何有，一醉先王风。  
惟昔放勋世，阴晦彻成洪。皇图化鱼鳖，天道漂无踪。  
帝乃命舟楫，掇芳儒素中。高陈九州力，百道驱归东。  
旧物复光明，洪炉再埏熔。经门不私子，足知天下公。  
亮曰那并生，唐虞禅华虫。兹山朝万国，一赋寰海同。  
十载有区宇，秋毫皆帝功。垂衣不骄德，子桀如何聳。  
握发闻礼贤，菘茅见卑宫。凡夫色难事，神圣安能恭。  
道隐三千年，遗芳播笙镛。当时执圭处，佳气仍童童。  
海屿俨清庙，天人盛祗供。玄恩及花木，丹讖名崆峒。  
异代草泽臣，何由树勋庸。尧阶未曾识，谁信平生忠。  
恨不当际会，预为执鞭僮。劳歌下山去，怀德心无穷。

卷 745\_5 【游子吟】

陈陶

栖乌喜林曙，惊蓬伤岁阑。关河三尺雪，何处是天山。

朔风无重衣，仆马饥且寒。惨戚别妻子，迟回出门难。  
男儿值休明，岂是长泥蟠。何者为木偶，何人侍金銮。  
郁郁守贫贱，悠悠亦无端。进不图功名，退不处岩峦。  
穷通在何日，光景如跳丸。富贵苦不早，令人摧心肝。  
誓期春之阳，一振摩霄翰。

卷 745\_6 【怀仙吟二首】

陈陶

丹陵五牙客，昨日罗浮归。赤斧寻不得，烟霞空满衣。  
试于华阳问，果遇三茅知。采药向十洲，同行牧羊儿。  
十洲隔八海，浩渺不可期。空留双白鹤，巢在长松枝。

云溪古流水，春晚桃花香。忆与我师别，片帆归沧浪。  
沧浪在何许，相思泪如雨。黄鹤不复来，云深离别处。  
石渠泉泠泠，三见菖蒲生。日夜劳梦魂，随波注东溟。  
空怀别时惠，长读消魔经。

卷 745\_7 【海昌望月】

陈陶

何处无今夕，岂期在海头。贾客不爱月，婵娟闲沧洲。  
浩然伤岁华，独望湖边楼。烟岛青历历，蓝田白悠悠。

谁无破镜期，繫我信虚舟？谁无桂枝念，繫我方摧輶？  
始见弯环春，又逢团圆秋。莫厌绫扇夕，百年多银钩。  
金盘谁雕铸，玉窟难冥搜。重轮运时节，三五不自由。  
疑抛云上锅，欲搂天边球。孀居应寒冷，捣药青冥愁。  
兔子树下蹲，虾蟆池中游。如何名金波，不共水东流。  
天花辟膻腥，野云无边陬。蚌蛤乘大运，含珠相对酬。  
夜鹊思南乡，露华清东瓯。百宝安可覩，老龙锁深湫。  
究究如情人，盗者即仇讎。海涯上皎洁，九门更清幽。  
亭亭劝金尊，夜久喘吴牛。夷俗皆轻掷，北山思今游。  
雁声故乡来，客泪堕南洲。平生烟霞志，读书觅封侯。  
四海尚白身，岂无故乡羞。壤坎何足叹，壮如水中虬。  
猎猎谷底兰，摇摇波上鸥。中途丧资斧，两地生繁忧。  
一杯太阴君，鸛鹤岂无求。明日将片叶，三山东南浮。

卷 745\_8 【蒲门戍观海作】

陈陶

廓落溟涨晓，蒲门郁苍苍。登楼礼东君，旭日生扶桑。  
毫厘见蓬瀛，含吐金银光。草木露未晞，蜃楼气若藏。  
欲游蟠桃国，虑涉魑魅乡。徐市惑秦朝，何人在岩廊。  
惜哉千童子，葬骨于眇茫。恭闻槎客言，东池接天潢。  
即此聘牛女，日祈长寿方。灵津水清浅，余亦慕修航。

卷 745\_9 【番禺道中作】

陈陶

博罗程远近，海塞愁先入。瘴雨出虹蜺，蛮江渡山急。  
常闻岛夷俗，犀象满城邑。雁至草犹春，潮回橈半湿。  
丹丘凤凰隐，水庙蛟龙集。何处树能言，几乡珠是泣。  
千年赵佗国，霸气委原隰。龌龊笑终军，长缨祸先及。

卷 745\_10 【赠江西周大夫（一作赠周太史）】

陈陶

否极生大贤，九元降灵气。独立正始风，蔚然中兴瑞。  
渊伦照三古，磊落涵泾渭。真貌月悬秋，雄词雷出地。  
具瞻先皇宠，欲践东华贵。咫尺时不来，千秋鼎湖泪。  
因分三辅职，进领南平位。报政黄霸惭，提兵吕蒙醉。  
岁星临斗牛，水国嘉祥至。不独苍生苏，仍兼六骑喜。  
恭闻庙堂略，欲断匈奴臂。划释自宸衷，平戎在连帅。  
时康簪笏冗，世梗忠良议。丘壑非无人，松香有私志。  
三朝倚天剑，十万浮云骑。可使河曲清，群公信儿戏。  
沧溟用谦德，百谷走童稚。御众付深人，参筹须伟器。  
他年蓬荜贱，愿附鹓鸾翅。

卷 745\_11 【旅次铜山途中先寄温州韩使君】

陈陶

乱山沧海曲，中有横阳道。束马过铜梁，苔华坐堪老。  
鸱鸣高崖裂，熊斗深树倒。绝壑无坤维，重林失苍昊。  
跻攀寡俦侣，扶接念舆皂。俯仰栗嵌空，无因掇灵草。  
梯穷闻戍鼓，魂续赖丘祷。敞豁天地归，萦纡村落好。  
悠悠思蒋径，扰扰愧商皓。驰想永嘉侯，应伤此怀抱。

卷 745\_12 【种兰】

陈陶

种兰幽谷底，四远闻馨香。春风长养深，枝叶趁人长。  
智水润其根，仁锄护其芳。蒿藜不生地，恶鸟弓已藏。  
椒桂夹四隅，茅茨居中央。左邻桃花坞，右接莲子塘。  
一月薰手足，两月薰衣裳。三月薰肌骨，四月薰心肠。  
幽人饥如何，采兰充餽粮。幽人渴如何，酝兰为酒浆。  
地无青苗租，白日如散王。不尝仙人药，端坐红霞房。  
日夕望美人，佩花正煌煌。美人久不来，佩花徒生光。  
刈获及葳蕤，无令见雪霜。清芬信神鬼，一叶岂可忘。  
举头愧青天，鼓腹咏时康。下有贤公卿，上有圣明王。  
无阶答风雨，愿献兰一筐。

卷 745\_13 【草木言】

陈陶

何生我苍苍，何育我黄黄。草木无知识，幸君同三光。  
始自受姓名，葳蕤立衣裳。山河既分丽，齐首乳青阳。  
甘辛各有荣，好丑不相防。常忧刀斧劫，窃慕仁寿乡。  
愿天雨无暴，愿地风无狂。雨足因衰惫，风多因夭伤。  
在山不为桂，徒辱君高冈。在水不为莲，徒占君深塘。  
勿轻培塿阜，或有奇栋梁。勿轻蒙胧泽，或有奇馨香。  
涓毫可粗差，朝菌寿为长。拥肿若无取，大椿命为伤。  
婆娑不材生，苒苒向秋荒。幸遭薰风日，有得皆簸扬。  
所愧雨露恩，愿效幽微芳。希君频采择，勿使枯雪霜。

卷 745\_14 【题僧院紫竹】

陈陶

喜游蛟井寺，复见炎州竹。杳靄万丈间，啸风清独速。  
江南正霜霰，吐秀弄颀颕。似瑞惊坚贞，如魔试金粟。  
笋非孝子泣，文异湘灵哭。金碧谁与邻，萧森自成族。  
新闻赤帝种，子落毛人谷。远祖赐鸛鹏，遗芳遍南陆。  
对烟苏麻丑，夹涧篔簹伏。美誉动丹青，瑰姿艳秦蜀。  
因缘鹿苑识，想像蛇丘鬪。几叶别黄茅，何年依白足。  
龙树蛰一花，砌瑶扫云屋。色静曼仙花，名高给孤独。

青葱太子树，洒落观音目。法雨每沾濡，玉毫时照烛。  
离居鸾节变，住冷金颜缩。岂念葛陂荣，幸无祖父辱。  
光摇水精串，影送莲花轴。江鹜日相寻，野鹞时寄宿。  
幽香入茶灶，静翠直棋局。肯羨垣上蒿，自多篱下菊。  
从来道生一，况伴龟藏六。栖托讵星回，檀栾已云矗。  
霞杯传缥叶，羽管吹紫玉。久绝钓竿歌，聊裁竹枝曲。  
愧生黄金地，千秋为师绿。

卷 745\_15 【早发始兴】

陈陶

云里山已曙，舟中火初爇。绿浦待行桡，玄猿催落月。  
沿流信多美，况复秋风发。挂席借前期，晨鸡莫嘲哳。

卷 745\_16 【寄元孚道人】

陈陶

梵宇章句客，佩兰三十年。长乘碧云马，时策翰林鞭。  
曩事五岳游，金衣曳祥烟。高攀桐君手，左倚鸞鷖肩。  
哭玉秋雨中，摘星春风前。横翰截洪偃，凭几见广宣。  
尔来寤华胥，石壁孤云眠。龙降始得偈，龟老方巢莲。  
内殿无文僧，驹虞谁能牵。因之问楚水，吊屈几潺湲。

卷 745\_17 【和西江（一作江南）李助副使早登开元寺阁】

陈陶

虚豁登宝阁，三休极层构。独立天地间，烟云满襟袖。  
鳌荒初落日，剑野呈绮绣。秋槛祝融微，阴轩九江凑。  
拂檐皇姑舍，错落白榆秀。倚砌天竺祠，蛟龙蟠古甃。  
翛然观六合，一指齐宇宙。书剑忽若，青云日方昼。  
南朝空苍莽，楚泽稀耕耨。万事溺颓波，一航安可受。  
徒云寄麟泣，六五终难就。资斧念余生，湖光隐圭窦。  
早闻群黄鹤，飘举此江岫。陵谷空霭然，人樵已维馗。  
燕宫豸冠客，凭览发清奏。珠玉难嗣音，縱轅愧孤陋。

卷 745\_18 【将归钟陵留赠南海李尚书】

陈陶

楚国有田舍，炎州长梦归。怀恩似秋燕，屡绕玉堂飞。  
越酒岂不甘，海鱼宁无肥。山裘醉歌舞，事与初心违。  
晔晔文昌公，英灵世间稀。长江浩无际，龙蜃皆归依。  
贱子感一言，草茅发光辉。从来鸡瓮质，得假凤凰威。  
常欲讨玄珠，青云报巍巍。龙门竟多故，双泪别旂旒。

卷 745\_19 【宿岛径夷山舍】

陈陶

百里遵岛径，蓬征信邈回。暝依渔樵宿，似过黄金台。  
缺啮心未理，寥寥夜猿哀。山深石床冷，海近腥气来。  
主人意不浅，屡献流霞杯。对月抚长剑，愁襟纷莫开。  
九衢平如水，胡为涉崔嵬。一饭未遑饱，鹏图信悠哉。  
山涛谑细君，吾岂厌蓬莱。明发又驱马，客思一裴回。

卷 745\_20 【避世翁】

陈陶

海上一蓑笠，终年垂钓丝。沧洲有深意，冠盖何由知。  
直钩不营鱼，蜗室无妻儿。渴饮寒泉水，饥餐紫朮芝。  
鹤发披两肩，高怀如澄陂。尝闻仙老言，云是古鸱夷。  
石窦閤雷雨，金潭养蛟螭。乘槎上玉津，骑鹿游峨嵋。  
以人为语默，与世为雄雌。兹焉乃礪溪，豹变应须时。  
自古隐沦客，无非王者师。

卷 745\_21 【冬夜吟】

陈陶

黑夜天寒愁散玉，东皇海上张仙烛。侯家歌舞按梨园，

石氏宾寮醉金谷。鲁家襜褕暗披水，雪花灯下甘垂翅。  
散帙高编折桂枝，披纱密翳青云地。霜白溪松转斜盖，  
铜龙唤曙咽声细。八埏蝼蚁厌寒栖，早晚青旗引春帝。  
展转城乌啼紫天，曈曨千骑衙楼前。

卷 745\_22 【西川座上听金五云唱歌】

陈陶

蜀王殿上华筵开，五云歌从天上来。满堂罗绮悄无语，  
喉音止驻云裴回。管弦金石还依转，不随歌出灵和殿。  
白云飘飘席上闻，贯珠历历声中见。旧样钗篸浅淡衣，  
元和梳洗青黛眉。低丛小鬟腻髻委，碧牙镂掌山参差。  
曲终暂起更衣过，还向南行座头坐。低眉欲语谢贵侯，  
檀脸双双泪穿破。自言本是宫中嫔，武皇改号承恩新。  
中丞御史不足比，水殿一声愁杀人。武皇铸鼎登真篆，  
嫔御蒙恩免幽辱。茂陵弓箭不得亲，嫁与卑官到西蜀。  
卑官到官年未周，堂衡禄罢东西游。蜀江水急驻不得，  
复此萍蓬二十秋。今朝得侍王侯宴，不觉途中妾身贱。  
愿持卮酒更唱歌，歌是伊州第三遍。唱著右丞征戍词，  
更闻闺月添相思。如今声韵尚如在，何况宫中年少时。  
五云处处可怜许，明朝道向褒中去。须臾宴罢各东西，  
雨散云飞莫知处。

卷 745\_23 【飞龙引】

陈陶

有熊之君好神仙，餐霞炼石三千年。一旦黄龙下九天，  
骑龙枿枿升紫烟。万姓攀髯堕地，啼呼弓剑飘寒水。  
紫鸾八九堕玉笙，金镜空留照魑魅。羽幢褱褱银汉秋，  
六宫望断芙蓉愁。应龙下挥中园笑，泓泓水绕青苔洲。  
瑞风飒遫天光浅，瑶阙峨峨横露苑。沆漭楼头紫凤歌，  
三株树下青牛饭。鸿胧九阙相玉皇，钧天乐引金华郎。  
散花童子鹤衣短，投壶姹女蛾眉长。彤庭侍宴瑶池席，  
老兔春高桂宫白。蓬莱下国赐分珪，阿母金桃容小摘。  
仙流万緘虫篆春，三十六洞交风云。千年小兆一蝉蜕，  
丹台职亚扶桑君。金乌试浴青门水，下界蜉蝣几回死。

卷 745\_24 【谪仙词】

陈陶

牧龙丈人病高秋，群童击节星汉愁。瑶台凤辇不胜恨，  
太古一声龙白头。玉气兰光久摧折，上清鸡犬音书绝。  
蜺旌失手远于天，三岛空云对秋月。人间磊磊浮沔客，  
鸞鷖蜻蜓飞自隔。不应冠盖逐黄埃，长梦真君旧恩泽。

卷 745\_25 【步虚引（一作仙人词）】

陈陶

小隐山人十洲客，莓苔为衣双耳白。青编为我忽降书，  
暮雨虹蜺一千尺。赤城门闭六丁直，晓日已烧东海色。  
朝天半夜闻玉鸡，星斗离离碍龙翼。

卷 745\_26 【独摇手】

陈陶

汉宫新燕矜蛾眉，春台艳妆莲一枝。迎春侍宴瑶华池，  
游龙七盘娇欲飞。冶袖莺鸾拂朝曦，摩烟袅雪金碧遗。  
愁鸿连翩蚕曳丝，飒遫明珠掌中移。仙人龙凤云雨吹，  
朝哀暮愁引哑呶。鸳鸯翡翠承宴私，南山一笑君无辞。  
仙蛾泣月清露垂，六宫烧烛愁风欹。

卷 745\_27 【空城雀】

陈陶

古城蒙蒙花覆水，昔日住人今住鬼。野雀荒台遗子孙，  
千年饮啄枯桑根。不随海燕柏梁去，应无玉环衔报恩。

近村红栗香压枝，嗷嗷黄口诉朝饥。生来未见凤凰语，  
欲飞常怕蜘蛛丝。断肠四隅天四绝，清泉绿蒿无恐疑。

卷 745\_28 【鸡鸣曲】

陈陶

鸡声春晓上林中，一声惊落虾蟆宫。二声唤破枕边梦，  
三声行人烟海红。平旦慵将百雏语，蓬松锦绣当阳处。  
愧君饮食长相呼，为君昼鸣下高树。

卷 745\_29 【小笛弄（一作小弄莲）】

陈陶

一尺玲珑握中翠，仙娥月浦呼龙子。五夜流珠粲梦卿，  
九青鸾倚洪崖醉。丹穴饥儿笑风雨，娲皇碧玉星星语。  
蛇蝎愁闻骨髓寒，江山恨老眠秋雾。绮席鸳鸯冷朱翠，  
星流露兹谁驱使。江南一曲罢伶伦，芙蓉水殿春风起。

卷 745\_30 【将进酒】

陈陶

金尊莫倚青春健，龌龊浮生如走电。琴瑟盘倾从世珠，

· 全唐诗 ·

---

黄泥局泻流年箭。麻姑爪秃瞳子昏，东皇肉角生鱼鳞。  
灵鳌柱骨半枯朽，骊龙德悔愁耕人。周孔著龟久沦没，  
黄蒿谁认贤愚骨。兔苑词才去不还，兰亭水石空明月。  
姮娥弄箫香雨收，江滨迸瑟鱼龙愁。灵芝九折楚莲醉，  
翾风一叹梁庭秋。醪亚蛮觥奉君寿，玉山三献春红透。  
银鸭金鹅言待谁，隋家岳渎皇家有。珊瑚座上凌香云，  
凤 龙炙猩猩唇。芝兰此日不倾倒，南山白石皆贤人。  
文康调笑麒麟起，一曲飞龙寿天地。

卷 745\_31 【钱塘对酒曲】

陈陶

风天雁悲西陵愁，使君红旗弄涛头。东海神鱼骑未得，  
江天大笑闲悠悠。嵯峨吴山莫夸碧，河阳经年一宵白。  
南州彩凤为君生，古狱愁蛇待恩泽。三清羽童来何迟，  
十二玉楼胡蝶飞。炎荒翡翠九门去，辽东白鹤无归期。  
鸱夷公子休悲悄，六鳌如镜天始老。尊前事去月团圆，  
琥珀无情忆苏小。

卷 745\_32 【巫山高】

陈陶

玉峰青云十二枝，金母和云赐瑶姬。花宫磊砢楚宫外，

列仙八面星斗垂。秀色无双怨三峡，春风几梦襄王猎。  
青鸾不在懒吹箫，斑竹题诗寄江妾。飘飘丝散巴子天，  
苔裳玉辔红霞幡。归时白帝掩青琐，琼枝草草遗湘烟。

卷 745\_33 【赠别离】

陈陶

碧玉飞天星坠地，玉剑分风交合水。杨柳听歌莫向隅，  
鸡鸣一石留髡醉。蹄轮送客沟水东，月娥挥手崦嵫峰。  
蛮天列嶂俨相待，风官扫道迎游龙。天姥剪霞铺晓空，  
滢滢大帝开明宫。文鲸掉尾四海通，分明瀑布收灵桐。  
山妖水魅骑旋风，魇梦啗魂黄瘴中。借君朗鉴入崦嵫，  
灵光草照闲花红。

卷 745\_34 【关山月】

陈陶

昔年嫫姚护羌月，今照嫫姚双鬓雪。青冢曾无尺寸归，  
锦书多寄穷荒骨。百战金疮体沙碛，乡心一片悬秋碧。  
汉城应期破镜时，胡尘万里婵娟隔。度碛冲云朔风起，  
边笳欲晚生青珥。陇上横吹霜色刀，何年断得匈奴臂。

卷 745\_35 【殿前生桂树】

陈陶

仙娥玉宫秋夜明，桂枝拂槛参差琼。香风下天漏丁丁，  
牛渚翠梁横浅清，羽帐不眠恨吹笙。栖乌暗惊仙子落，  
步月鬢云堕金雀。蕙楼凉簟翠波空，银缕香寒凤凰薄。  
东海即为郎斟酌，绮疏长悬七星杓。

卷 745\_36 【古镜篇】

陈陶

紫皇玉镜蟾蜍字，堕地千年光不死。发匣身沈古井寒，  
悬台日照愁成水。海户山窗几梳绾，菱花开落何人见。  
野老曾耕太白星，神狐夜哭秋天片。下国青铜旋磨灭，  
回鸾万影成枯骨。会待搏风雨沓寥，长恐莓苔蚀明月。

卷 745\_37 【自归山】

陈陶

海岳南归远，天门北望深。暂为青琐客，难换白云心。  
富贵老闲事，猿猱思旧林。清平无乐志，尊酒有瑶琴。

卷 745\_38 【渡（一作济）浙江】

陈陶

适越一轻艘，凌兢截鹭涛。曙光金海近，晴雪玉峰高。  
静寇思投笔，伤时欲钓鳌。壮心殊未展，登涉漫劳劳。

卷 745\_39 【清源途中旅思】

陈陶

古木闽州道，驱羸落照间。投村碍野水，问店隔荒山。  
身事几时了，蓬飘何日闲。看花滞南国，乡月十湾环。

卷 745\_40 【南海送韦七使君赴象州任】

陈陶

一鹗韦公子，新恩颁郡符。岛夷通荔浦，龙节过苍梧。  
地理金城近，天涯玉树孤。圣朝朱绂贵，从此展雄图。

卷 745\_41 【送沈次鲁南游（一作卢垵石送沈次鲁）】

陈陶

高台赠君别，满握轩辕风。落日一挥手，金鹅云雨空。  
鳌洲石梁外，剑浦罗浮东。兹兴不可接，悠悠烟际鸿。

卷 745\_42 【南海石门戍怀古】

陈陶

汉家征百越，落地丧貔貅。大野朱旗没，长江赤血流。  
鬼神寻覆族，宫庙变荒丘。唯有朝台月，千年照戍楼。

卷 745\_43 【赋得池塘生春草】

陈陶

谢公遗咏处，池水夹通津。古往人何在，年来草自春。  
色宜波际绿，香异雨中新。今日青青意，空悲行路人。

卷 745\_44 【题居上人法华新院】

陈陶

浮名深般若，方寺设莲华。钟呗成僧国，湖山称法家。  
一尘多宝塔，千佛大牛车。能诱泥犁客，超然识聚沙。

卷 745\_45 【送秦炼师】

陈陶

紫府静沈沈，松轩思别吟。水流宁有意，云泛本无心。  
锦洞桃花远，青山竹叶深。不因时卖药，何路更相寻。

卷 745\_46 【哭宝月三藏大禅师】

陈陶

五峰习圣罢，乾竺化身归。帝子传真印，门人哭宝衣。  
一囊穷海没，三藏故园稀。无复天花落，悲风满铁围。

卷 745\_47 【湓城赠别】

陈陶

楚岸青枫树，长随送远心。九江春水阔，三峡暮云深。  
气调桓伊笛，才华蔡琰琴。迢迢嫁湘汉，谁不重黄金。

卷 745\_48 【赠别】

陈陶

海国一尺绮，冰壶万缕丝。以君西攀桂，赠此金莲枝。  
高鸟思茂林，穷鱼乐洿池。平生握中宝，无使岁寒移。

## 第七百四十六卷

### 卷 746\_1 【赠温州韩使君】

陈陶

康乐风流五百年，永嘉铃阁又登贤。严城鼓动鱼惊海，  
华屋尊开月下天。内使笔锋光案牍，鄢陵诗句满山川。  
今来谁似韩家贵，越绝麾幢雁影连。

### 卷 746\_2 【闲居寄太学卢景博士】

陈陶

无路青冥夺锦袍，耻随黄雀住蓬蒿。碧云梦后山风起，  
珠树诗成海月高。久滞鼎书求羽翼，未忘龙阙致波涛。  
闲来长得留侯癖，罗列楂梨校六韬。

### 卷 746\_3 【赠漳州张怡使君】

陈陶

旧德徐方天下闻，当年熊轼继清芬。井田异政光蛮竹，

· 全唐诗 ·

---

符节深恩隔瘴云。已见嘉祥生北户，尝嫌夷貊蠹南薰。  
几时征拜征西越，学著纓胡从使君。

卷 746\_4 【赠容南韦中丞】

陈陶

普宁都护军威重，九驿梯航压要津。十二铜鱼尊画戟，  
三千犀甲拥朱轮。风云已静西山寇，閭井全移上国春。  
不独来苏发歌咏，天涯半是泣珠人。

卷 746\_5 【投赠福建路罗中丞】

陈陶

越艳新谣不厌听，楼船高卧静南溟。未闻建水窥龙剑，  
应喜家山接女星。三捷楷模光典策，一生封爵笑丹青。  
皇恩几日西归去，玉树扶疏正满庭。

卷 746\_6 【赠江南李偕副使】

陈陶

世祿三朝压凤池，杜陵公子汉庭知。雷封始贺堂溪剑，

· 全唐诗 ·

---

花府寻邀玉树枝。几日坐谈诛叛逆，列城归美见歌诗。  
从军莫厌千场醉，即是金銮宠命时。

卷 746\_7 【贺容府韦中丞大府贤兄新除黔南经略】

陈陶

蓬瀛簪笏旧联行，紫极差池降宠章。列国山河分雁字，  
一门金玉尽龙骧。耿家符节朝中美，袁氏芝兰阃外香。  
烽戍悠悠限巴越，伫听歌咏两甘棠。

卷 746\_8 【和容南韦中丞题瑞亭白燕、白鼠、六眸龟、嘉莲】

陈陶

伏波恩信动南夷，交趾喧传四瑞诗。燕鼠孕灵褒上德，  
龟莲增耀答无私。回翔雪侣窥檐处，照映红巢出水时。  
尽写流传在轩槛，嘉祥从此百年知。

卷 746\_9 【题豫章西山香城寺】

陈陶

十地严宫礼竺皇，旃檀楼阁半天香。祇园树老梵声小，

· 全唐诗 ·

---

雪岭花香灯影长。霄汉落泉供月界，蓬壶灵鸟侍云房。  
何年七七金人降，金锡珠坛满上方。

卷 746\_10 【送江西周尚书赴滑台】

陈陶

楚谣襦袴整三千，喉舌新恩下九天。天角雄都分节钺，  
蛟龙旧国罢楼船。昆河已在兵钤内，棠树空留鹤岭前。  
多病无因酬一顾，鄱陵千骑去翩翩。

卷 746\_11 【闽中送任畹端公还京】

陈陶

燕台下榻玉为人，月桂曾输次第春。几日酬恩坐炎瘴，  
九秋高驾拂星辰。汉庭凤进鹓行喜，隋国珠还水府贫。  
多少嘉谟奏风俗，斗牛孤剑在平津。

卷 746\_12 【豫章江楼望西山有怀】

陈陶

水护星坛列太虚，烟霞十八上仙居。时人未识辽东鹤，

· 全唐诗 ·

---

吾祖曾传宝鼎书。终日章江催白鬓，何年丹灶见红蕖。  
桃花谷口春深浅，欲访先生赤鲤鱼。

卷 746\_13 【经徐稚墓】

陈陶

邾鄆妖兴炎汉衰，先生南国卧明夷。凤凰屡降玄纁礼，  
琼石终藏烈火诗。禁掖衣冠加宋鹊，湖山耕钓没尧时。  
千年垄树何人哭，寂寞苍苔内史碑。

卷 746\_14 【钟陵道中作】

陈陶

原隰经霜蕙草黄，塞鸿消息怨流芳。秋山落照见麋鹿，  
南国异花开雪霜。烟火近通槃瓠俗，水云深入武陵乡。  
曾逢啮缺话东海，长忆萧家青玉床。

卷 746\_15 【旅泊涂江】

陈陶

烟雨南江一叶微，松潭渔父夜相依。断沙雁起金精出，

· 全唐诗 ·

---

孤岭猿愁木客归。楚国柑橙劳梦想，丹陵霞鹤问音徽。  
无因得似沧溟叟，始忆离巢已倦飞。

卷 746\_16 【上建溪】

陈陶

崆峒一派泻苍烟，长揖丹丘逐水仙。云树杳冥通上界，  
峰峦回合下闽川。侵星愁过蛟龙国，采碧时逢婺女船。  
已判猿催鬓先白，几重滩濑在秋天。

卷 746\_17 【冬日暮旅泊庐陵】

陈陶

螺亭倚棹哭飘蓬，白浪欺船自向东。楚国蕙兰增怅望，  
番禺筐篚旅虚空。江城雪落千家梦，汀渚冰生一夕风。  
弃置侯鯖任羁束，不劳龟瓦问穷通。

卷 746\_18 【登宝历寺阁】

陈陶

金碧高层世界空，凭蛄长啸八蛮风。横轩水壮蛟龙府，

倚栋星开牛斗宫。三楚故墟残景北，六朝荒苑断山东。  
不堪怀古劳悲笑，安得鹏抃颡气中。

卷 746\_19 【寄兵部任畹郎中】

陈陶

常思剑浦越清尘，豆蔻花红十二春。昆玉已成廊庙器，  
涧松犹是薜萝身。虽同橘柚依南土，终愧魁罡近北辰。  
好向昌时荐遗逸，莫教千古吊灵均。

卷 746\_20 【赠江南从事张侍郎（一作御）】

陈陶

平南门馆凤凰毛，二十华轩立最高。几处谈天致云雨，  
早时文海得鲸鳌。姻联紫府萧窗贵，职称青钱绣服豪。  
江徼无虞才不展，衔杯终日咏离骚。

卷 746\_21 【剑池】

陈陶

秦帝南巡厌火精，苍黄埋剑故丰城。霸图缭戾金龙蛰，

· 全唐诗 ·

---

坤道扶摇紫气生。星斗卧来闲窟穴，雌雄飞去变澄泓。  
永怀惆怅中宵作，不见春雷发匣声。

卷 746\_22 【洛城见贺自真飞升】

陈陶

子晋鸾飞古洛川，金桃再熟贺郎仙。三清乐奏嵩丘下，  
五色云屯御苑前。朱顶舞低迎绛节，青鬟歌对驻香鞦。  
谁能白昼相悲泣，太极光阴亿万年。

卷 746\_23 【谪仙吟赠赵道士】

陈陶

汗漫东游黄鹤雏，缙云仙子住清都。三元麟凤推高座，  
六甲风雷闕小壶。日月暗资灵寿药，山河拟作化生符。  
若为失意居蓬岛，鳌足尘飞桑树枯。

卷 746\_24 【夜别温商梓州】

陈陶

凤凰城里花时别，玄武江边月下逢。客舍莫辞先买酒，

相门曾忝旧登龙。迎风骚屑千家竹，隔水悠扬午夜钟。  
明日又行西蜀去，不堪天际远山重。

卷 746\_25 【题赠高闲上人】

陈陶

檐卜花间客，轩辕席上珍。笔江秋菡萏，僧国瑞麒麟。  
内殿初招隐，曹溪得后尘。龙蛇惊粉署，花雨对金轮。  
白马方依汉，朱星又入秦。剧谈凌凿齿，清论倒波旬。  
拂石先天古，降龙旧国春。珠还合浦老，龙去玉州贫。  
鸳鹭输黄绢，场坛绕白蘋。鼎湖闲入梦，金阁静通神。  
海气成方丈，山泉落净巾。猕猴深爱月，鸥鸟不猜人。  
拂岳萧萧竹，垂空澹澹津。汉珠难觅对，荆璞本来真。  
伊傅多联璧，刘雷竞买邻。江边有国宝，时为鬪星辰。

卷 746\_26 【哭王赞府】

陈陶

白水流今古，青山送死生。驱驰三楚掾，倏忽一空名。  
金玉埋皋壤，芝兰哭弟兄。龙头孤后进，鹏翅失前程。  
愁变风云色，悲连鼓角声。落星辞圣代，寒梦闭佳城。  
伊昔来江邑，从容副国英。德逾栖棘美，公亚饮冰清。  
大厦亡孤直，群儒忆老成。白驹悲里巷，梁木恻簪缨。

陇遂添新草，珠还满旧籛。苍苍难可问，原上晚烟横。

卷 746\_27 【圣帝击壤歌四十声】

陈陶

百六承尧绪，艰难土运昌。太虚横彗孛，中野斗豺狼。  
帝曰更吾嗣，时哉忆圣唐。英星垂将校，神岳诞忠良。  
炼石医元气，屠鳌正昊苍。扫原铺一德，驱祲立三光。  
大道重苏息，真风再发扬。芟夷逾旧迹，神圣掩前王。  
郊酒酣寥廓，鸿恩受渺茫。地图龟负出，天诰凤衔将。  
杂贡来山峙，群夷入雁行。紫泥搜海岱，鸿笔富岩廊。  
鹰象敷宸极，寰瀛作瑞坊。泥丸封八表，金镜照中央。  
构殿基麟趾，开藩表凤翔。銮舆亲稼穡，朱幌务蚕桑。  
戎羯输天马，灵仙侍玉房。宫仪水蒐甲，门卫绿沈枪。  
陶铸超三古，车书混万方。时巡望虞舜，蒐狩法殷汤。  
化合讴谣满，年丰鬼蜮藏。政源归牧马，公法付神羊。  
宝鼎无灵应，金瓯肯破伤。封山昭茂绩，祠执答嘉祥。  
在昔宫闱僭，仍罹翠浞殃。牝鸡何讫诟，獬犬漫劾勤。  
苗祷三灵怒，桓偷九族亡。鲸鲵寻挂网，魑魅旋投荒。  
松柏霜逾翠，芝兰露更香。圣谟流祚远，仙系发源长。  
岛屿征徭薄，漪澜泛稻凉。鳧鱼餐餐啖，荷蓐足衣裳。  
寤寐华胥国，嬉游太素乡。鹰鹞飞接翼，忠孝住连墙。  
有叟能调鼎，无媒隐钓璜。乾坤资识量，江海入文章。  
野鹤思蓬阙，山麋忆庙堂。泥沙空淬砺，星斗屡低昂。  
历草何因见，衢尊岂暂忘。终随嘉橘赋，霄汉谒羲皇。

卷 746\_28 【续古二十九首】

陈陶

大尧登宝位，麟凤焕宸居。海曲沾恩泽，还生比目鱼。  
生值揖逊历，长歌东南春。钓鳌年三十，未见天子巡。  
轩辕承化日，群凤戏池台。大朴衰丧后，仲尼生不来。  
大道归孟门，萧兰日争长。想得巢居时，碧江应无浪。  
矻矻蓬舍下，慕君麒麟阁。笑杀王子乔，寥天乘白鹤。  
杳杳巫峡云，悠悠汉江水。愁杀几少年，春风相忆地。  
吴洲采芳客，桂棹木兰船。日晚欲有寄，裴回春风前。  
仙家风景晏，浮世年华速。邂逅汉武帝，蟠桃海东熟。  
南国珊瑚树，好裁天马鞭。鱼龙不解语，海曲空蝉娟。  
周穆恣游幸，横天驱八龙。宁知泰山下，日日望登封。  
秦国饶罗网，中原绝麟凤。万乘巡海回，鲍鱼空相送。

· 全唐诗 ·

---

秦家无庙略，遮虏续长城。万姓陇头死，中原荆棘生。  
秦作东海桥，中州鬼辛苦。纵得跨蓬莱，群仙亦飞去。  
隋炀弃中国，龙舟巡海涯。春风广陵苑，不见秦宫花。  
范子相句践，灭吴成大勋。虽然五湖去，终愧磻溪云。  
麟凤识翔蛰，圣贤明卷舒。哀哉嵇叔夜，智不及鷄鷩。  
战地三尺骨，将军一身贵。自古若吊冤，落花少于泪。  
楚国千里旱，土龙日已多。九谷竟枯死，好云闲嵯峨。  
汉家三殿色，恩泽若飘风。今日黄金屋，明朝长信宫。  
南园杏花发，北渚梅花落。吴女妒西施，容华日消铄。  
山鸡理毛羽，自言胜乌鸢。一朝逢鸞鷟，羞死南海边。  
秦家卷衣贵，本是倡家子。金殿一承恩，貂蝉满乡里。  
魏宫薛家女，秀色倾三殿。武帝鼎湖归，一身似秋扇。  
婵娟越机里，织得双栖凤。慰此殊世花，金梭忽停弄。  
学古三十载，犹依白云居。每览班超传，令人慵读书。

· 全唐诗 ·

---

雄剑久濩落，夜吟秋风起。不是懒为龙，此非延平水。  
朝为杨柳色，暮作芙蓉好。春风若有情，江山相逐老。  
景龙临太极，五凤当庭舞。谁信壁间梭，升天作云雨。  
曾梦诸侯笑，康囚议脱枷。千根池底藕，一朵火中花。

卷 746\_29 【永嘉赠别】

陈陶

芳草温阳客，归心浙水西。临风青桂楫，几日白蘋溪。

卷 746\_30 【有所思（一作长相思）】

陈陶

欲唱玄云曲，知音复谁是。采掇情未来，临池画春水。

卷 746\_31 【吴苑思】

陈陶

今人地藏古人骨，古人花为今人发。

江南何处葬西施，谢豹空闻采香月。

卷 746\_32 【古意】

陈陶

麻姑井边一株杏，花开不如古时红。  
西邻蔡家十岁女，年年二月卖东风。

卷 746\_33 【朝元引四首】

陈陶

帝烛荧煌下九天，蓬莱宫晓玉炉烟。  
无央鸾凤随金母，来贺熏风一万年。

正殿云开露冕旒，下方珠翠压鳌头。  
天鸡唱罢南山晓，春色光辉十二楼。

万宇灵祥拥帝居，东华元老荐屠苏。  
龙池遥望非烟拜，五色瞳矐在玉壶。

宝祚河宫一向清，龟鱼天篆益分明。  
近臣谁献登封草，五岳齐呼万岁声。

卷 746\_34 【宿天竺寺】

陈陶

一宵何期此灵境，五粒松香金地冷。  
西僧示我高隐心，月在中峰葛洪井。

卷 746\_35 【赋得古莲塘】

陈陶

阖闾宫娃能采莲，明珠作佩龙为船。  
三千巧笑不复见，江头废苑花年年。

卷 746\_36 【双桂咏】

陈陶

青冥结根易倾倒，沃洲山中双树好。  
琉璃宫殿无斧声，石上萧萧伴僧老。

卷 746\_37 【夏日怀天台】

陈陶

竹斋睡余柘浆清，麟凤诱我劳此生。  
勿忆天台掩书坐，涧云起尽红峥嵘。

卷 746\_38 【临风叹】

陈陶

芙蓉楼中饮君酒，骊驹结言春杨柳。  
豫章花落不见归，一望东风堪白首。

卷 746\_39 【春日行】

陈陶

鶗鴂初鸣洲渚满，龙蛇洗鳞春水暖。  
病多欲问山寺僧，湖上人传石桥断。

卷 746\_40 【春归去】

陈陶

九十春光在何处，古人今人留不住。  
年年白眼向黔娄，唯放蛭蝻飞上树。

卷 746\_41 【蜀葵咏】

陈陶

绿衣宛地红倡倡，熏风似舞诸女郎。  
南邻荡子妇无赖，锦机春夜成文章。

卷 746\_42 【南昌道中】

陈陶

古道夤缘蔓黄葛，桓伊冢西春水阔。  
村翁莫倚横浦罾，一半鱼虾属鸕獺。

卷 746\_43 【子规思】

陈陶

春山杜鹃来几日，夜啼南家复北家。  
野人听此坐惆怅，恐畏踏落东园花。

卷 746\_44 【吴兴秋思二首】

陈陶

不是苕溪厌看月，天涯有程云树凉。  
何意汀洲剩风雨，白蘋今日似潇湘。

日夕鯢鱼梦南国，苕阳水高迷渡头。  
故山秋风忆归去，白云又被王孙留。

卷 746\_45 【闽川梦归】

陈陶

千里潺湲建溪路，梦魂一夕西归去。  
龙舸欲上巴兽滩，越王金鸡报天曙。

卷 746\_46 【竹十一首】

陈陶

不厌东溪绿玉君，天坛双凤有时闻。  
一峰晓似朝仙处，青节森森倚绛云。

万枝朝露学潇湘，杳霭孤亭白石凉。  
谁道乖龙不得雨，春雷入地马鞭狂。

啸入新篁一里行，万竿如瓮锁龙泓。  
惊巢翡翠无寻处，闲倚云根刻姓名。

青岚帚亚思吾祖，绿润偏多忆蔡邕。  
长听南园风雨夜，恐生鳞甲尽为龙。

迸玉闲抽上钓矶，翠苗番次脱霞衣。  
山童泥乞青骢马，骑过春泉掣手飞。

须题内史琅玕坞，几醉山阳瑟瑟村。  
剩养万茎将扫俗，莫教凡鸟闹云门。

一溪云母间灵花，似到封侯逸士家。  
谁识雌雄九成律，子乔丹井在深涯。

燕燕雏时紫米香，野溪羞色过东墙。

· 全唐诗 ·

---

诸儿莫拗成蹊笋，从结高笼养凤凰。

一节呼龙万里秋，数茎垂海六鳌愁。  
更须瀑布峰前种，云里阑干过子猷。

丘壑谁堪话碧鲜，静寻春谱认婵娟。  
会当小杀青瑶简，图写龟鱼把上天。

玄圃千春闭玉丛，湛阳一祖碧云空。  
不须骚屑愁江岛，今日南枝在国风。

卷 746\_47 【钟陵秋夜】

陈陶

洪崖岭上秋月明，野客枕底章江清。  
蓬壶宫阙不可梦，一一入楼归雁声。

卷 746\_48 【江上逢故人】

陈陶

十年蓬转金陵道，长哭青云身不早。  
故乡逢尽白头人，清江颜色何曾老。

卷 746\_49 【水调词十首】

陈陶

黠虏迢迢未肯和，五陵年少重横戈。  
谁家不结空闺恨，玉箸阑干妾最多。

羽管慵调怨别离，西园新月伴愁眉。  
容华不分随年去，独有妆楼明镜知。

忆钱良人玉塞行，梨花三见换啼莺。  
边场岂得胜闺阁，莫逞雕弓过一生。

惆怅江南早雁飞，年年辛苦寄寒衣。  
征人岂不思乡国，只是皇恩未放归。

水阁莲开燕引雏，朝朝攀折望金吾。  
闻道碛西春不到，花时还忆故园无。

自从清野戍辽东，舞袖香销罗幌空。  
几度长安发梅柳，节旄零落不成功。

长夜孤眠倦锦衾，秦楼霜月苦边心。  
征衣一倍装绵厚，犹虑交河雪冻深。

瀚海长征古别离，华山归马是何时。

仍闻万乘尊犹屈，装束千娇嫁郢支。

沙塞依稀落日边，寒宵魂梦怯山川。  
离居渐觉笙歌懒，君逐嫖姚已十年。

万里轮台音信稀，传闻移帐护金微。  
会须麟阁留踪迹，不斩天骄莫议归。

卷 746\_50 【送谢山人归江夏】

陈陶

黄鹤春风二千里，山人佳期碧江水。  
携琴一醉杨柳堤，日暮龙沙白云起。

卷 746\_51 【闲居杂兴五首】

陈陶

虞韶九奏音犹在，只是巴童自弃遗。  
闲卧清秋忆师旷，好风摇动古松枝。

一顾成周力有余，白云闲钓五溪鱼。  
中原莫道无麟凤，自是皇家结网疏。

长爱真人王子乔，五松山月伴吹箫。  
从他浮世悲生死，独驾苍鳞入九霄。

越里娃童锦作襦，艳歌声压郢中姝。  
无人说向张京兆，一曲江南十斛珠。

云堆西望贼连营，分阨何当举义兵。  
莫道羔裘无壮节，古来成事尽书生。

卷 746\_52 【泉州刺桐花咏兼呈赵使君】

陈陶

仿佛三株植世间，风光满地赤城闲。  
无因秉烛看奇树，长伴刘公醉玉山。

海曲春深满郡霞，越人多种刺桐花。  
可怜虎竹西楼色，锦帐三千阿母家。

石氏金园无此艳，南都旧赋乏灵材。  
只因赤帝宫中树，丹凤新衔出世来。

猗猗小艳夹通衢，晴日熏风笑越姝。  
只是红芳移不得，刺桐屏障满中都。

不胜攀折怅年华，红树南看见天涯。

故国春风归去尽，何人堪寄一枝花。

赤帝常闻海上游，三千幢盖拥炎州。  
今来树似离宫色，红翠斜欹十二楼。

卷 746\_53 【投赠福建桂常侍二首】

陈陶

后来台席更何人，都护朝天拜近臣。  
长笑当时汉卿士，等闲恩泽画麒麟。

匝地歌钟镇海隅，城池鞅掌旧名都。  
不知珠履三千外，更许侯嬴寄食无。

卷 746\_54 【陇西行四首】

陈陶

汉主东封报太平，无人金阙议边兵。  
纵饶夺得林胡塞，碛地桑麻种不生。

誓扫匈奴不顾身，五千貂锦丧胡尘。  
可怜无定河边骨，犹是春闺梦里人。

· 全唐诗 ·

---

陇戍三看塞草青，楼烦新替护羌兵。  
同来死者伤离别，一夜孤魂哭旧营。

黠虏生擒未有涯，黑山营阵识龙蛇。  
自从贵主和亲后，一半胡风似汉家。

卷 746\_55 【答莲花妓】

陈陶

近来诗思清于水，老去风情薄似云。  
已向升天得门户，锦衾深愧卓文君。

卷 746\_56 【镜道中吹箫】

陈陶

金栏白的善簪差，双凤夜伴江南栖。  
十洲人听玉楼晓，空向千山桃杏枝。

卷 746\_57 【赠野老】

陈陶

何年种芝白云里，人传先生老莱子。

· 全唐诗 ·

---

消磨世上名利心，澹若岩间一流水。

卷 746\_58 【酬元亨（一作孚）上人】

陈陶

一衲净居云梦合，秋来诗思祝融高。  
何因知我津涯阔，远寄东溟六巨鳌。

卷 746\_59 【题徐稚湖亭】

陈陶

伏龙山横洲渚地，人如白蘋自生死。  
洪崖成道二千年，唯有徐君播青史。

卷 746\_60 【鄱阳秋夕】

陈陶

忆昔鄱阳旅游日，曾听南家争捣衣。  
今夜重开旧砧杵，当时还见雁南飞。

卷 746\_61 【飞龙引】

陈陶

长洲茂苑朝夕池，映日含风结细漪。坐当伏槛红莲披，  
雕轩洞户青蘋吹。轻幌芳烟郁金馥，绮檐花簾桃李枝。  
苔苔翡翠但相逐，桂树鸳鸯恒并宿。

卷 746\_62 【句】

陈陶

蝉声将月短，草色与秋长。  
比屋歌黄竹，何人撼白榆。  
好看如镜夜，莫笑似弓时。  
江湖水清浅，不足掉鲸尾。  
饮水狼子瘦，思日鹧鸪寒。  
一鼎雄雌金液火，十年寒暑鹿麕裘。  
寄语东流任斑鬓，向隅终守铁梭飞。

· 全唐诗 ·

---

乾坤见了文章懒，龙虎成来印绶疏。

近来世上无徐庶，谁向桑麻识卧龙。

## 第七百四十七卷

### 卷 747\_1 【春日作】

李中

和气来无象，物情还暗新。乾坤一夕雨，草木万方春。  
染水烟光媚，催花鸟语频。高台旷望处，歌咏属诗人。

### 卷 747\_2 【寒江暮泊寄左偃】

李中

维舟芦荻岸，离恨若为宽。烟火人家远，汀洲暮雨寒。  
天涯孤梦去，篷底一灯残。不是凭骚雅，相思写亦难。

### 卷 747\_3 【喜春雨有寄】

李中

青春终日雨，公子莫思晴。任阻西园会，且观南亩耕。

最怜滋垄麦，不恨湿林莺。父老应相贺，丰年兆已成。

卷 747\_4 【魏夫人坛】

李中

仙坛遗迹在，苔合落花明。绛节何年返，白云终日生。  
旋新芳草色，依旧偃松声。欲问希夷事，音尘隔上清。

卷 747\_5 【访洞神宫邵道者不遇】

李中

闲来仙观问希夷，云满星坛水满池。  
羽客不知何处去，洞前花落立多时。

卷 747\_6 【寄赠致仕沈彬郎中】

李中

鹤氅换朝服，逍遥云水乡。有时乘一叶，载酒入三湘。  
尘梦年来息，诗魔老亦狂。莼羹与鲈脍，秋兴最宜长。

卷 747\_7 【赠别】

李中

行杯酌罢歌声歇，不觉前汀月又生。  
自是离人魂易断，落花芳草本无情。

卷 747\_8 【送刘恭游庐山兼寄令上人】

李中

松桂烟霞蔽梵宫，诗流闲去访支公。  
石堂磬断相逢夜，五老月生溪影空。

卷 747\_9 【宿庐山白云峰重道者院】

李中

绝顶松堂喜暂游，一宵玄论接浮丘。云开碧落星河近，  
月出沧溟世界秋。尘里年光何急急，梦中强弱自悠悠。  
他时书剑酬恩了，愿逐鸾车看十洲。

卷 747\_10 【海上从事秋日书怀】

李中

悠悠旅宦役尘埃，旧业那堪信未回。千里梦随残月断，  
一声蝉送早秋来。壶倾浊酒终难醉，匣锁青萍久不开。  
唯有搜吟遣怀抱，凉风时复上高台。

卷 747\_11 【访蔡文庆处士留题】

李中

幽人栖息处，一到涤尘心。藓色花阴阔，棋声竹径深。  
篱根眠野鹿，池面戏江禽。多谢相留宿，开樽拂素琴。

卷 747\_12 【寄庐岳鉴上人】

李中

岳寺栖瓶锡，常人亲亦难。病披青衲重，晚剃白髭寒。  
烘壁茶烟暗，填沟木叶干。昔年皆礼谒，频到碧云端。

卷 747\_13 【书小斋壁】

李中

其谁肯见寻，冷淡少知音。尘土侵闲榻，烟波隔故林。  
竹风醒晚醉，窗月伴秋吟。道在唯求己，明时岂陆沈。

卷 747\_14 【怀王道者】

李中

闲思王道者，逸格世难群。何处眠青嶂，从来爱白云。  
酒沽应独醉，药熟许谁分。正作趋名计，如何得见君。

卷 747\_15 【桃花】

李中

只应红杏是知音，灼灼偏宜间竹阴。几树半开金谷晓，  
一溪齐绽武陵深。艳舒百叶时皆重，子熟千年事莫寻。  
谁步宋墙明月下，好香和影上衣襟。

卷 747\_16 【思旧游有感】

李中

长忆衔杯处，酩酊尚未阑。江南正烟雨，楼上恰春寒。  
好树藏莺密，平芜彻野宽。如今无处觅，音信隔波澜。

卷 747\_17 【依韵和智谦上人送李相公赴昭武军】

李中

暂别庙堂上，雄藩去豁情。秋风生雁渚，晚雾湿龙旌。  
吟里过侯服，梦中归帝城。下车军庶乐，千里月华清。

卷 747\_18 【姑苏怀古】

李中

阖闾兴霸日，繁盛复风流。歌舞一场梦，烟波千古愁。  
樵人归野径，渔笛起扁舟。触目牵伤感，将行又驻留。

苏台踪迹在，旷望向江滨。往事谁堪问，连空草自春。  
花疑西子脸，涛想伍胥神。吟尽情难尽，斜阳照路尘。

卷 747\_19 【赠史虚白】

李中

致主嘉谋尚未伸，慨然深志与谁论。唤回古意琴开匣，  
陶出真情酒满樽。明月过溪吟钓艇，落花堆席睡僧轩。  
九重梦卜时终在，莫向深云独闭门。

卷 747\_20 【赠蒯亮处士】

李中

著得新书义更幽，负琴何处不遨游。玄宫寄宿月华冷，  
羽客伴吟松韵秋。满户烟霞思紫阁，一帆风雨忆沧洲。  
吾君侧席求贤切，未可悬瓢枕碧流。

卷 747\_21 【春夕偶作】

李中

早是春愁触目生，那堪春夕酒初醒。  
贯珠声罢人归去，半落桃花月在庭。

卷 747\_22 【子规】

李中

暮春滴血一声声，花落年年不忍听。  
带月莫啼江畔树，酒醒游子在离亭。

卷 747\_23 【书王秀才壁】

李中

茅舍何寥落，门庭长绿芜。贫来卖书剑，病起忆江湖。  
对枕暮山碧，伴吟凉月孤。前贤多晚达，莫叹有霜须。

卷 747\_24 【春日途中作】

李中

干禄趋名者，迢迢别故林。春风短亭路，芳草异乡心。  
雨过江山出，莺啼村落深。未知将雅道，何处谢知音。

卷 747\_25 【依韵和蠡泽王去微秀才见寄】

李中

咫尺风骚客，难谐面继酬。相思对烟雨，一雁下汀洲。  
花影谁家坞，笛声何处楼。支筇朗吟罢，搔首独迟留。

卷 747\_26 【送孙孔二秀才游庐山】

李中

庐山多胜景，偏称二君游。松径苍苔合，花阴碧涧流。  
倾壶同坐石，搜句共登楼。莫学天台客，逢山即驻留。

卷 747\_27 【春日野望怀故人】

李中

野外登临望，苍苍烟景昏。暖风医病草，甘雨洗荒村。  
云散天边野，潮回岛上痕。故人不可见，倚杖役吟魂。

卷 747\_28 【游玄真观】

李中

闲吟游古观，静虑相神仙。上景非难度，阴功不易全。  
醮坛松作盖，丹井藓成钱。浩浩红尘里，谁来叩自然。

卷 747\_29 【剑客】

李中

恩酬期必报，岂是辄轻生。神剑冲霄去，谁为平不平。

卷 747\_30 【鹤】

李中

警露精神异，冲天羽翼新。千年一归日，谁识令威身。

卷 747\_31 【送致仕沈彬郎中游茅山】

李中

挂却朝冠披鹤氅，羽人相伴恣遨游。忽因风月思茅岭，

· 全唐诗 ·

---

便挈琴樽上叶舟。野寺宿时魂梦冷，海门吟处水云秋。  
华阳洞府年光永，莫向仙乡拟驻留。

卷 747\_32 【题庐山东寺远大师影堂】

李中

远公遗迹在东林，往事名存动苦吟。杉桧已依灵塔老，  
烟霞空锁影堂深。入帘轻吹催香印，落石幽泉杂磬音。  
十八贤人消息断，莲池千载月沈沈。

卷 747\_33 【庭苇】

李中

品格清于竹，诗家景最幽。从栽向池沼，长似在汀洲。  
玩好招溪叟，栖堪待野鸥。影疏当夕照，花乱正深秋。  
韵细堪清耳，根牢好系舟。故溪高岸上，冷淡有谁游。

卷 747\_34 【寄左偃】

李中

每病风骚路，荒凉人莫游。惟君还似我，成癖未能休。

舍寐缘孤月，忘形为九秋。垂名如不朽，那恨雪生头。

卷 747\_35 【宿山店书怀寄东林令图上人】

李中

一宿山前店，旅情安可穷。猿声乡梦后，月影竹窗中。  
南楚征途阔，东吴旧业空。虎溪莲社客，应笑此飘蓬。

卷 747\_36 【途中闻子规】

李中

春残杜宇愁，越客思悠悠。雨歇孤村里，花飞远水头。  
微风声渐咽，高树血应流。因此频回首，家山隔几州。

卷 747\_37 【春日书怀】

李中

千峰雪尽鸟声春，日永孤吟野水滨。  
霄汉路岐升未得，花时空拂满衣尘。

卷 747\_38 【所思代人】

李中

巫峡云深湘水遥，更无消息梦空劳。  
梦回深夜不成寐，起立闲庭花月高。

卷 747\_39 【春晚过明氏闲居】

李中

寥寥陋巷独扃门，自乐清虚不厌贫。数局棋中消永日，  
一樽酒里送残春。雨催绿藓铺三径，风送飞花入四邻。  
羨尔朗吟无外事，沧洲何必去垂纶。

卷 747\_40 【赠重安寂道者】

李中

寒松肌骨鹤心情，混俗陶陶隐姓名。白发只闻悲短景，  
红尘谁解信长生。壶中日月存心近，岛外烟霞入梦清。  
每许相亲应计分，琴余常见话蓬瀛。

卷 747\_41 【江边吟】

李中

风暖汀洲吟兴生，远山如画雨新晴。残阳影里水东注，  
芳草烟中人独行。闪闪酒帘招醉客，深深绿树隐啼莺。  
盘桓渔舍忘归去，云静高空月又明。

卷 747\_42 【献张义方常侍】

李中

雄飞看是逼岩廊，逸思常闻不暂忘。公署静眠思水石，  
古屏闲展看潇湘。老来酒病虽然减，秋杪诗魔更是狂。  
乘兴有时招羽客，横琴移月启茅堂。

卷 747\_43 【赠永真（一作贞）杜翱少府】

李中

蓝袍竹简佐琴堂，县僻人稀觉日长。爱静不嫌官况冷，  
苦吟从听鬓毛苍。闲寻野寺听秋水，寄睡僧窗到夕阳。  
蹇蹇会应霄汉去，渔竿休更恋沧浪。

卷 747\_44 【献中书韩舍人】

李中

丹墀朝退后，静院即冥搜。尽日卷帘坐，前峰当槛秋。  
烹茶留野客，展画看沧洲。见说东林夜，寻常秉烛游。

卷 747\_45 【献徐舍人】

李中

清名喧四海，何止并南金。奥学群英伏，多才万乘钦。  
秩参金殿峻，步历紫微深。顾问承中旨，丝纶演帝心。  
褒雄饶义路，贾马避词林。下直无他事，开门对远岑。  
轩窗来晚吹，池沼歇秋霖。藓点生棋石，茶烟过竹阴。  
希夷元已达，躁竞岂能侵。羽客闲陪饮，诗人伴静吟。  
自惭为滞物，多幸辱虚襟。此日重遭遇，心期出陆沈。

卷 747\_46 【新秋有感】

李中

门巷凉秋至，高梧一叶惊。渐添衾篔爽，顿觉梦魂清。  
暗促莲开艳，乍催蝉发声。雨降炎气减，竹引冷烟生。

· 全唐诗 ·

---

戍客添归思，行人怯远程。未逢征雁下，渐听夜砧鸣。  
张翰思鲈兴，班姬咏扇情。音尘两难问，蛩砌月空明。

卷 747\_47 【秋雨】

李中

竟日散如丝，吟看半掩扉。秋声在梧叶，润气遍书帏。  
曲涧泉承去，危檐燕带归。寒蛩悲旅壁，乱藓滑渔矶。  
爽欲除幽篔，凉须换熟衣。疏篷谁梦断，荒径独游稀。  
偏称江湖景，不妨鸥鹭飞。最怜为瑞处，南亩稻苗肥。

卷 747\_48 【寄庐山白大师】

李中

长忆寻师处，东林寓泊时。一秋同看月，无夜不论诗。  
泉美茶香异，堂深磬韵迟。鹿驯眠藓径，猿苦叫霜枝。  
别后音尘隔，年来鬓发衰。趋名方汲汲，未果再游期。

卷 747\_49 【访龙光智谦上人】

李中

忽起寻师兴，穿云不觉劳。相留看山雪，尽日论风骚。

竹影摇禅榻，茶烟上毳袍。梦魂曾去否，旧国阻波涛。

卷 747\_50 【送仙客】

李中

危言危行是男儿，倚伏相牵岂足悲。  
莫向汀洲时独立，悠悠斜日照江蓠。

卷 747\_51 【祀风师迎神曲】

李中

太皞御气，勾芒肇功。苍龙青旗，爰候祥风。  
律以和应， 以感通。鼎俎修螽，时惟礼崇。

卷 747\_52 【柳二首】

李中

春来无树不青青，似共东风别有情。  
闲忆旧居湓水畔，数枝烟雨属啼莺。

最爱青青水国中，莫愁门外间花红。

纤纤无力胜春色，撼起啼莺恨晚风。

卷 747\_53 【送庐阜僧归山阳】

李中

山阳旧社终经梦，容易言归不可留。瓶贮瀑泉离五老，  
锡摇江雨上孤舟。鱼行细浪分沙觜，雁逆高风下苇洲。  
遥想枚皋宅边寺，不知凉月共谁游。

卷 747\_54 【投所知】

李中

孤琴尘翳剑慵磨，自顾泥蟠欲奈何。千里交亲消息断，  
一庭风雨梦魂多。题桥未展相如志，叩角谁怜甯戚歌。  
唯赖明公怜道在，敢携蓑笠钓烟波。

卷 747\_55 【寄左偃】

李中

萧条陋巷绿苔侵，何事君心似我心。贫户懒开元爱静，  
病身才起便思吟。闲留好鸟庭柯密，暗养鸣蛩砌草深。

况是清朝重文物，无愁当路少知音。

卷 747\_56 【游北山洞神宫】

李中

闷见尘中光景促，仙乡来礼紫阳君。人居淡寂应难老，  
道在虚无不可闻。松桧稳栖三岛鹤，楼台闲锁九霄云。  
羨师向此朝星斗，一炷清香午夜焚。

卷 747\_57 【思简寂观旧游寄重道者】

李中

闲忆当年游物外，羽人曾许驻仙乡。溪头烘药烟霞暖，  
花下围棋日月长。偷摘蟠桃思曼倩，化成蝴蝶学蒙庄。  
俗缘未断归浮世，空望林泉意欲狂。

卷 747\_58 【云】

李中

悠悠离洞壑，冉冉上天津。捧日终为异，从龙自有因。  
高行四海雨，暖拂万山春。静与霞相近，闲将鹤最亲。

帝乡归莫问，楚殿梦曾频。白向封中起，碧从诗里新。  
冷容横钓浦，轻缕绊蟾轮。不滞浓还淡，无心卷复伸。  
非烟聊拟议，干吕在逡巡。会作五般色，为祥覆紫宸。

卷 747\_59 【徐司徒池亭】

李中

亭榭跨池塘，泓澄入座凉。扶疏皆竹柏，冷淡似潇湘。  
萍嫩铺波面，苔深锁岸傍。朝回游不厌，僧到赏难忘。  
最称收残雨，偏宜带夕阳。吟堪期谢朓，醉好命嵇康。  
奢侈心难及，清虚趣最长。月明垂钓兴，何必忆沧浪。

卷 747\_60 【赋得江边草】

李中

岸春芳草合，几处思缠绵。向暮江蓠雨，初晴杜若烟。  
静宜幽鹭立，远称碧波连。送别王孙处，萋萋南浦边。

卷 747\_61 【江行夜泊】

李中

扁舟倦行役，寂寂宿江干。半夜风雷过，一天星斗寒。

潮平沙觜没，霜苦雁声残。渔父何疏逸，扣舷歌未阑。

卷 747\_62 【访山叟留题】

李中

策杖寻幽客，相携入竹扃。野云生晚砌，病鹤立秋庭。  
茶美睡心爽，琴清尘虑醒。轮蹄应少到，门巷草青青。

卷 747\_63 【江行晚泊寄湓城知友】

李中

孤舟相忆久，何处倍关情。野渡帆初落，秋风蝉一声。  
江浮残照阔，云散乱山横。渐去湓城远，那堪新月生。

卷 747\_64 【秋夕书怀】

李中

功名未立诚非晚，骨肉分飞又入秋。  
枕上不堪残梦断，壁蛩窗月夜悠悠。

卷 747\_65 【感兴】

李中

渔休渭水兴周日，龙起南阳相蜀时。  
不遇文王与先主，经天才业拟何为！

卷 747\_66 【舟中望九华山】

李中

排空苍翠异，辍棹看崔嵬。一面雨初歇，九峰云正开。  
当时思水石，便欲上楼台。隐去心难遂，吟余首懒回。  
僧休传紫阁，屏歇写天台。中有忘机者，逍遥不可陪。

卷 747\_67 【渔父】

李中

烟冷暮江滨，高歌散诞身。移舟过蓼岸，待月正丝纶。  
亦与樵翁约，同游酒市春。白头云水上，不识独醒人。

卷 747\_68 【赠上都紫极宫刘日新先生】

李中

道德吾君重，含贞本去华。因知炼神骨，何必在烟霞。  
棋散庭花落，诗成海月斜。瀛洲旧仙侣，应许寄丹砂。

卷 747\_69 【勉同志】

李中

读书与磨剑，旦夕但忘疲。恍若功名立，那愁变化迟。  
尘从侵砚席，苔任满庭墀。明代搜扬切，升沈莫问龟。

卷 747\_70 【寄刘钧秀才】

李中

掩户当春昼，知君志在诗。闲花半落处，幽客未来时。  
野鸟穿莎径，江云过竹篱。会须明月夜，与子水边期。

卷 747\_71 【离亭前思有寄】

李中

酒醒江亭客，缠绵恨别离。笙歌筵散后，风月夜长时。  
耿耿看灯暗，悠悠结梦迟。若无骚雅分，何计达相思。

卷 747\_72 【赠上都先业大师】

李中

懒向人前著紫衣，虚堂闲倚一条藜。虽承雨露居龙阙，  
终忆烟霞梦虎溪。睡起晓窗风淅淅，病来深院草萋萋。  
有时乘兴寻师去，煮茗同吟到日西。

卷 747\_73 【思九江旧居三首】

李中

结茅曾在碧江隈，多病贫身养拙来。雨歇汀洲垂钓去，  
月当门巷访僧回。静临窗下开琴匣，闷向床头泼酒醅。  
游宦等闲千里隔，空余魂梦到渔台。

门前烟水似潇湘，放旷优游兴味长。虚阁静眠听远浪，

· 全唐诗 ·

---

扁舟闲上泛残阳。鹤翘碧藓庭除冷，竹引清风枕簟凉。  
犬吠疏篱明月上，邻翁携酒到茅堂。

无机终日狎沙鸥，得意高吟景且幽。槛底江流偏称月，  
檐前山朵最宜秋。遥村处处吹横笛，曲岸家家系小舟。  
别后再游心未遂，设屏惟画白蘋洲。

卷 747\_74 【赠东林白大师】

李中

虎溪久驻灵踪，禅外诗魔尚浓。卷宿吟销永日，  
移床坐对千峰。苍苔冷锁幽径，微风闲坐古松。  
自说年来老病，出门渐觉疏慵。

卷 747\_75 【春晓】

李中

残烛犹存月尚明，几家帟幌梦魂惊。  
星河渐没行人动，历历林梢百舌声。

卷 747\_76 【听郑羽人弹琴】

李中

仙乡景已清，仙子启琴声。秋月空山寂，淳风一夜生。  
莎间虫罢响，松顶鹤初惊。因感浮华世，谁怜太古情。

卷 747\_77 【秋夕书事寄友人】

李中

信断关河远，相思秋夜深。砌蛩声咽咽，檐月影沈沈。  
未遂青云志，那堪素发侵。吟余成不寐，彻曙四邻砧。

卷 747\_78 【秋日途中】

李中

竹林已萧索，客思正如飏。旧业吴江外，新蝉楚驿头。  
遥天疏雨过，列岫乱云收。今夕谁家宿，孤吟月色秋。

卷 747\_79 【秋夜吟寄左偃】

李中

与君诗兴素来狂，况入清秋夜景长。溪阁共谁看好月，  
莎阶应独听寒螿。卷中新句诚堪喜，身外浮名不足忙。  
会约垂名继前哲，任他玄发尽如霜。

卷 747\_80 【竹】

李中

森森移得自山庄，植向空庭野兴长。便有好风来枕簟，  
更无闲梦到潇湘。荫来砌藓经疏雨，引下溪禽带夕阳。  
闲约羽人同赏处，安排棋局就清凉。

卷 747\_81 【怀庐岳旧游寄刘钧因感鉴上人】

李中

昔年庐岳闲游日，乘兴因寻物外僧。寄宿爱听松叶雨，  
论诗惟对竹窗灯。各拘片禄寻分别，高谢浮名竟未能。  
一念支公安可见，影堂何处暮云凝。

卷 747\_82 【依韵酬智谦上人见寄】

李中

性拙才非逸，同心友亦稀。风昏秋病眼，霜湿夜吟衣。  
莺谷期犹负，兰陔养不违。吾师惠佳句，胜得楚金归。

卷 747\_83 【落花】

李中

年年三月暮，无计惜残红。酷恨西园雨，生憎南陌风。  
片随流水远，色逐断霞空。怅望丛林下，悠悠饮兴穷。

卷 747\_84 【题柳】

李中

折向离亭畔，春光满手生。群花岂无艳，柔质自多情。  
夹岸笼溪月，兼风撼野莺。隋堤三月暮，飞絮想纵横。

卷 747\_85 【赠谦明上人】

李中

虽寄上都眠竹寺，逸情终忆白云端。闲登钟阜林泉晚，  
梦去沃洲风雨寒。新试茶经煎有兴，旧婴诗病舍终难。  
常闻秋夕多无寐，月在高台独凭栏。

卷 747\_86 【书蔡隐士壁】

李中

病后霜髭出，衡门寂寞中。蠹侵书帙损，尘覆酒樽空。  
池暗菰蒲雨，径香兰蕙风。幽闲已得趣，不见卜穷通。

卷 747\_87 【赠钟尊师游茅山】

李中

筇杖担琴背俗尘，路寻茅岭有谁群。仙翁物外应相遇，  
灵药壶中必许分。香入肌肤花洞酒，冷侵魂梦石床云。  
伊予亦有朝修志，异日遨游愿见君。

卷 747\_88 【访徐长史留题水阁】

李中

君家池阁静，一到且淹留。坐听蒹葭雨，如看岛屿秋。  
杯盘深有趣，吟笑迥忘忧。更爱幽奇处，双双下野鸥。

卷 747\_89 【夕阳】

李中

影未沈山水面红，遥天雨过促征鸿。  
魂销举子不回首，闲照槐花驿路中。

卷 747\_90 【鸂鶒】

李中

流品是鸳鸯，翻飞云水乡。风高离极浦，烟暝下方塘。  
比鹭行藏别，穿荷羽翼香。双双浴轻浪，谁见在潇湘。

卷 747\_91 【所思】

李中

离思春来切，谁能慰寂寥。花飞寒食过，云重楚山遥。  
耿耿梦徒往，悠悠鬓易凋。那堪对明月，独立水边桥。

## 第七百四十八卷

### 卷 748\_1 【春闺辞二首】

李中

卷帘迟日暖，睡起思沈沈。辽海音尘远，春风旅馆深。  
疏篁留鸟语，曲砌转花阴。寄语长征客，流年不易禁。

不得辽阳信，春心何以安。鸟啼窗树晓，梦断碧烟残。  
绿鉴开还懒，红颜驻且难。相思谁可诉，时取旧书看。

### 卷 748\_2 【腊中作】

李中

冬至虽云远，浑疑朔漠中。劲风吹大野，密雪翳高空。  
泉冻如顽石，人藏类蛰虫。豪家应不觉，兽炭满炉红。

卷 748\_3 【海城秋日书怀寄胸山孙明府】

李中

槐柳蝉声起渡头，海城孤客思悠悠。青云展志知何日，  
皓月牵吟又入秋。鉴里渐生潘岳鬓，风前犹著卜商裘。  
鸣琴良宰挥毫士，应笑蹉跎身未酬。

卷 748\_4 【题柴司徒亭假山】

李中

叠石峨峨象翠微，远山魂梦便应稀。从教藓长添峰色，  
好引泉来作瀑飞。萤影夜攒疑烧起，茶烟朝出认云归。  
知君创得兹幽致，公退吟看到落晖。

卷 748\_5 【都下寒食夜作】

李中

香尘未歇暝烟收，城满笙歌事胜游。  
自是离人睡长早，千家帘卷月当楼。

卷 748\_6 【客中春思】

李中

又听黄鸟绵蛮，目断家乡未还。  
春水引将客梦，悠悠绕遍关山。

卷 748\_7 【所思】

李中

门掩残花寂寂，帘垂斜月悠悠。  
纵有一庭萱草，何曾与我忘忧。

卷 748\_8 【江馆秋思因成自勉】

李中

江边候馆幽，汀鸟暝烟收。客思虽悲月，诗魔又爱秋。  
声名都是幻，穷达未能忧。散逸怜渔父，波中漾小舟。

卷 748\_9 【赠胸山杨宰】

李中

讼闲征赋毕，吏散卷帘时。听雨入秋竹，留僧覆旧棋。  
得诗书落叶，煮茗汲寒池。化俗功成后，烟霄会有期。

卷 748\_10 【庐山】

李中

控压浔阳景，崔嵬古及今。势雄超地表，翠盛接天心。  
溢浦春烟列，星湾晚景沈。图经宜细览，题咏卒难任。  
靖节门遥对，庾公楼俯临。参差含积雪，隐映见归禽。  
峭拔推双剑，清虚数二林。白莲池宛在，翠辇事难寻。  
天近星河冷，龙归洞穴深。谷春攒锦绣，石润叠琼琳。  
玄鹤传仙拜，青猿伴客吟。泉通九江远，云出几州阴。  
冬有灵汤溢，夏无炎暑侵。他年如遂隐，五老是知音。

卷 748\_11 【送孙霁书记赴寿阳辟命】

李中

辟命羨君赴，其如怆别情。酒阑汀树晚，帆展野风生。

淮静寒烟敛，村遥夜火明。醉沈胸岭梦，吟达寿春城。  
旧友摇鞭接，元戎扫榻迎。雪晴莲幕启，云散桂山横。  
王粲从军画，陈琳草檄名。知君提健笔，重振此嘉声。

卷 748\_12 【听蝉寄胸山孙明府】

李中

忽听新蝉发，客情其奈何。西风起槐柳，故国阻烟波。  
笙笛悲犹少，巴猿恨未多。不知陶靖节，还动此心么。

卷 748\_13 【秋江夜泊寄刘钧正字】

李中

闲忆诗人思倍劳，维舟清夜泥风骚。鱼龙不动澄江远，  
云雾皆收皎月高。潮满钓舟迷浦屿，霜繁野树叫猿猱。  
此时吟苦君知否，双鬓从他有二毛。

卷 748\_14 【赠胸山孙明府】

李中

县庭无事似山斋，满砌青青旋长苔。闲抚素琴曹吏散，

· 全唐诗 ·

---

自烹新茗海僧来。买将病鹤劳心养，移得闲花用意栽。  
几度访君留我醉，瓮香皆值酒新开。

卷 748\_15 【赠海上书记张济员外】

李中

鹏霄休叹志难伸，贫病虽萦道且存。阮瑀不能专笔砚，  
嵇康唯要乐琴尊。春风满院空欹枕，芳草侵阶独闭门。  
剑有尘埃书有蠹，昔年心事共谁论？

卷 748\_16 【对竹】

李中

懒穿幽径冲鸣鸟，忍踏清阴损翠苔。  
不似闭门欹枕听，秋声如雨入轩来。

卷 748\_17 【送胸山孙明府赴寿阳幕府辟命】

李中

堪羨元戎虚右席，便承纶綍起金台。菊丛憔悴陶潜去，  
莲幕光辉阮瑀来。好向尊壘陈妙画，定应书檄播雄才。

预愁别后相思处，月入闲窗远梦回。

卷 748\_18 【经废宅】

李中

一梦奢华去不还，断墙花发岂堪看。  
玉纤素绠知何处，金井梧枯碧藜寒。

卷 748\_19 【溪边吟】

李中

鸂鶒双飞下碧流，蓼花蘋穗正含秋。  
茜裙二八采莲去，笑冲微雨上兰舟。

卷 748\_20 【得故人消息】

李中

多难分离久，相思每泪垂。梦归残月晓，信到落花时。  
未必乖良会，何当有后期。那堪楼上望，烟水接天涯。

卷 748\_21 【芳草】

李中

二月正绵绵，离情被尔牵。四郊初过雨，万里正铺烟。  
眷恋残花惹，留连醉客眠。飘香是杜若，最忆楚江边。

卷 748\_22 【江南春】

李中

千家事胜游，景物可忘忧。水国楼台晚，春郊烟雨收。  
鸕鸕啼竹树，杜若媚汀洲。永巷歌声远，王孙会莫愁。

卷 748\_23 【悼亡】

李中

巷深芳草细，门静绿杨低。室迩人何处，花残月又西。  
武陵期已负，巫峡梦终迷。独立销魂久，双双好鸟啼。

卷 748\_24 【春晏寄从弟德润】

李中

相思禁烟近，楼上动吟魂。水国春寒在，人家暮雨昏。  
朱桥通竹树，香径匝兰荪。安得吾宗会，高歌醉一尊。

卷 748\_25 【赠致仕沈彬郎中】

李中

自言婚嫁毕，尘事不关心。老去诗魔在，春来酒病深。  
山翁期采药，海月伴鸣琴。多谢维舟处，相留接静吟。

卷 748\_26 【忆溪居】

李中

竹轩临水静无尘，别后鳧鹭入梦频。  
杜若菰蒲烟雨歇，一溪春色属何人。

卷 748\_27 【登下蔡县楼】

李中

长涯烟水又含秋，吏散时时独上楼。  
信断兰台乡国远，依稀王粲在荆州。

卷 748\_28 【下蔡春偶作】

李中

旅馆飘飘类断蓬，悠悠心绪有谁同。一宵风雨花飞后，  
万里乡关梦自通。多难不堪容鬓改，沃愁惟怕酒杯空。  
采兰扇枕何时遂，洗虑焚香叩上穹。

卷 748\_29 【再游洞神宫怀邵羽人有感】

李中

重向烟萝省旧游，因寻遗迹想浮丘。峰头鹤去三清远，  
坛畔月明千古秋。泉落小池清复咽，云从高峤起还收。  
自惭未得冲虚术，白发无情渐满头。

卷 748\_30 【秋雨二首】

李中

飘洒当穷巷，苔深落叶铺。送寒来客馆，滴梦在庭梧。  
逼砌蛩声断，侵窗竹影孤。遥思渔叟兴，蓑笠在江湖。

竟日声萧飒，兼风不暂阑。竹窗秋睡美，荻浦夜渔寒。  
地僻苔生易，林疏鸟宿难。谁知苦吟者，坐听一灯残。

卷 748\_31 【经古观有感】

李中

古观寥寥枕碧溪，偶思前事立残晖。漆园化蝶名空在，  
柱史犹龙去不归。丹井泉枯苔锁合，醮坛松折鹤来稀。  
回头因叹浮生事，梦里光阴疾若飞。

卷 748\_32 【吉水春暮访蔡文庆处士留题】

李中

无事无忧鬓任苍，浊醪闲酌送韶光。溟蒙雨过池塘暖，  
狼藉花飞砚席香。好古未尝疏典册，悬图时要看潇湘。

恋君清话难留处，归路迢迢又夕阳。

卷 748\_33 【烈祖孝高挽歌二首】

李中

谁解叩乾关，音容去不还。位方尊北极，寿忽殒南山。  
凤辇应难问，龙髯不可攀。千秋遗恨处，云物锁桥山。

仙驭归何处，苍苍问且难。华夷喧道德，陵垄葬衣冠。  
御水穿城咽，宫花泣露寒。九疑消息断，空望白云端。

卷 748\_34 【赠海上观音院文依上人】

李中

烟霞海边寺，高卧出门慵。白日少来客，清风生古松。  
虚窗从燕入，坏屐任苔封。几度陪师话，相留到暮钟。

卷 748\_35 【秋夕病中作】

李中

卧病当秋夕，悠悠枕上情。不堪抛月色，无计避虫声。

煎药惟忧涩，停灯又怕明。晓临清鉴里，应有白髭生。

卷 748\_36 【寄黄鹔秀才】

李中

长忆狂游日，惜春心恰同。预愁花片落，不遣酒壶空。  
草软眠难舍，莺娇听莫穷。如今千里隔，搔首对秋风。

卷 748\_37 【春日书怀寄胸山孙明府】

李中

一作边城客，闲门两度春。莺花深院雨，书剑满床尘。  
紫阁期终负，青云道未伸。犹怜陶靖节，诗酒每相亲。

卷 748\_38 【柴司徒宅牡丹】

李中

暮春栏槛有佳期，公子开颜乍拆时。翠幄密笼莺未识，  
好香难掩蝶先知。愿陪妓女争调乐，欲赏宾朋预课诗。  
只恐却随云雨去，隔年还是动相思。

卷 748\_39 【赠王道士】

李中

混俗从教鬓似银，世人无分得相亲。  
槎流海上波涛阔，酒满壶中天地春。  
功就不看丹灶火，性闲时拂玉琴尘。  
仙家变化谁能测，只恐洪崖是此身。

卷 748\_40 【春闺辞二首】

李中

尘昏菱鉴懒修容，双脸桃花落尽红。  
玉塞梦归残烛在，晓莺窗外啭梧桐。

边无音信暗消魂，茜袖香裙积泪痕。  
海燕归来门半掩，悠悠花落又黄昏。

卷 748\_41 【暮春怀故人】

李中

池馆寂寥三月尽，落花重叠盖莓苔。  
惜春眷恋不忍扫，感物心情无计开。  
梦断美人沈信息，目穿长路倚楼台。

琅玕绣段安可得，流水浮云共不回。

卷 748\_42 【秋日登润州城楼】

李中

虚楼一望极封疆，积雨晴来野景长。水接海门铺远色，  
稻连京口发秋香。鸣蝉历历空相续，归鸟翩翩自著行。  
吟罢倚栏深有思，清风留我到斜阳。

卷 748\_43 【晚春客次偶吟】

李中

暂驻征轮野店间，悠悠时节又春残。落花风急宿醒解，  
芳草雨昏春梦寒。惭逐利名头易白，欲眠云水志犹难。  
却怜村寺僧相引，闲上虚楼共倚栏。

卷 748\_44 【对雨寄胸山林番明府】

李中

竟日如丝不暂停，莎阶闲听滴秋声。斜飘虚阁琴书润，  
冷逼幽窗梦寐清。开户只添搜句味，看山还阻上楼情。

遥知公退琴堂静，坐对萧骚饮兴生。

卷 748\_45 【落花】

李中

残红引动诗魔，怀古牵情奈何。半落铜台月晓，  
乱飘金谷风多。悠悠旋逐流水，片片轻粘短莎。  
谁见长门深锁，黄昏细雨相和。

卷 748\_46 【燕】

李中

豪家五色泥香，衔得营巢太忙。  
喧觉佳人昼梦，双双犹在雕梁。

卷 748\_47 【莺】

李中

羽毛特异诸禽，出谷堪听好音。  
薄暮欲栖何处，雨昏杨柳深深。

卷 748\_48 【宿山中寺】

李中

寄宿深山寺，惟逢老病僧。风吹几世树，云暗暮秋灯。  
瞑目忘尘虑，谈空入上乘。明晨返名路，何计恋南能。

卷 748\_49 【海上载笔依韵酬左偃见寄】

李中

都城分别后，海峤梦魂迷。吟兴疏烟月，边情起鼓鼙。  
戍旗风飏小，营柳雾笼低。草檄无余刃，难将阮瑀齐。

卷 748\_50 【春晚招鲁从事】

李中

衮衮利名役，常嗟聚会稀。有心游好景，无术驻残晖。  
南陌草争茂，西园花乱飞。期君举杯酒，不醉莫言归。

卷 748\_51 【和易秀才春日见寄】

李中

每恨多流落，吾徒不易亲。相逢千里客，共醉百花春。  
小槛山当面，闲阶柳拂尘。何时卜西上，明月桂枝新。

卷 748\_52 【送黄（一作王）秀才】

李中

雨余飞絮乱，相别思难任。酒罢河桥晚，帆开烟水深。  
蟾宫须展志，渔艇莫牵心。岐路从兹远，双鱼信勿沈。

卷 748\_53 【庭竹】

李中

偶自山僧院，移归傍砌栽。好风终日起，幽鸟有时来。  
筛月牵诗兴，笼烟伴酒杯。南窗睡轻起，萧飒雨声回。

卷 748\_54 【送戴秀才】

李中

已是殊乡客，送君重惨然。河桥乍分首，槐柳正鸣蝉。  
短棹离幽浦，孤帆触远烟。清朝重文物，变化莫迁延。

卷 748\_55 【病中（一作起）作】

李中

闲斋病初起，心绪复悠悠。开篋群书蠹，听蝉满树秋。  
诗魔还渐动，药债未能酬。为忆前山色，扶持上小楼。

卷 748\_56 【离家】

李中

送别人归春日斜，独鞭羸马指天涯。  
月生江上乡心动，投宿匆忙近酒家。

卷 748\_57 【村行】

李中

极目青青垄麦齐，野塘波阔下凫鹭。  
阳乌景暖林桑密，独立闲听戴胜啼。

卷 748\_58 【献乔侍郎】

李中

位望谁能并，当年志已伸。人间传凤藻，天上演龙纶。  
贾马才无敌，褒雄誉益臻。除奸深系念，致主迥忘身。  
谏疏纵横上，危言果敢陈。忠贞虽贯世，消长岂由人。  
慷慨辞朝阙，迢遥涉路尘。千山明夕照，孤棹渡长津。  
杜宇声方切，江蓠色正新。卷舒唯合道，喜愠不劳神。  
禅客陪清论，渔翁作近邻。静吟穷野景，狂醉养天真。  
格论思名士，舆情渴直臣。九霄恩复降，比户意皆忻。  
却入鸳鸯序，终身顾问频。漏残丹禁晓，日暖玉墀春。  
鉴物心如水，忧时鬓若银。惟期康庶事，永要叙彝伦。  
贵贱知无间，孤寒必许亲。几多沈滞者，拭目望陶钧。

卷 748\_59 【献中书张舍人】

李中

仙桂从攀后，人间播大名。飞腾谐素志，霄汉是前程。  
持宪威声振，司言品秩清。帘开春酒醒，月上草麻成。  
丹陛凌晨对，青云逐步生。照人裴玉莹，鉴物宪陂明。  
下直无他事，闲游恣逸情。林僧开户接，溪叟扫苔迎。  
煮茗山房冷，垂纶野艇轻。神清宜放旷，诗苦益纵横。  
余刃时皆仰，嘉谋众伫行。四方观启沃，毕竟念孤平。

卷 748\_60 【海上和郎骞员外赴倅职】

李中

宋玉逢秋何起悲，新恩委寄好开眉。班升鸳鹭频经岁，  
任佐龚黄必暂时。乍对烟霞吟海峤，应思蘋蓼梦江湄。  
一朝凤诏重征入，鹏化那教尺鷃知。

卷 748\_61 【又送赴关】

李中

心似白云归帝乡，暂停良画别龚黄。烟波乍晓浮兰棹，

魂梦先飞近御香。一路伴吟汀草绿，几程清思水风凉。  
想应敷对忠言后，不放乡云离太阳。

卷 748\_62 【书郭判官幽斋壁】

李中

不妨公退尚清虚，创得幽斋兴有余。要引好风清户牖，  
旋栽新竹满庭除。倾壶待客花开后，煮茗留僧月上初。  
更有野情堪爱处，石床苔藓似匡庐。

卷 748\_63 【石棋局献时宰】

李中

得从岳叟诚堪重，却献皋夔事更宜。公退启枰书院静，  
日斜收子竹阴移。适情岂待樵柯烂，罢局还应履齿隳。  
预想幽窗风雨夜，一灯闲照覆图时。

卷 748\_64 【海城秋夕寄怀舍弟】

李中

鸟栖庭树夜悠悠，枕上谁知泪暗流。千里梦魂迷旧业，

一城砧杵捣残秋。窗间寂寂灯犹在，帘外萧萧雨未休。  
早晚莱衣同著去，免悲流落在边州。

卷 748\_65 【和夏侯秀才春日见寄】

李中

绵蛮黄鸟不堪听，触目离愁怕酒醒。云散碧山当晚槛，  
雨催青藓匝春庭。寻芳懒向桃花坞，垂钓空思杜若汀。  
昼梦不成吟有兴，挥毫书在枕边屏。

卷 748\_66 【送夏侯秀才】

李中

江村摇落暮蝉鸣，执手临岐动别情。古岸相看残照在，  
片帆难驻好风生。牵吟一路逢山色，醒睡长汀对月明。  
况是清朝至公在，预知乔木定迁莺。

卷 748\_67 【江南重会友人感旧二首】

李中

江南重会面，聊话十年心。共立黄花畔，空惊素发侵。

斜阳浮远水，归鸟下疏林。牵动诗魔处，凉风村落砧。

长江落照天，物景似当年。忆昔携村酒，相将上钓船。  
狂歌红蓼岸，惊起白鸥眠。今日趋名急，临风一黯然。

卷 748\_68 【己未岁冬捧宣头离下蔡】

李中

诏下如春煦，巢南志不违。空将感恩泪，滴尽冒寒衣。  
覆载元容善，形骸果得归。无心惭季路，负米覲亲闱。

卷 748\_69 【哭舍弟二首】

李中

鸿雁离群后，成行忆日存。谁知归故里，只得奠吟魂。  
虫蠹书盈篋，人稀草拥门。从兹长恻后，独自奉晨昏。

浮生多天枉，惟尔最堪悲。同气未归日，慈亲临老时。  
旧诗传海峤，新家枕江湄。遗稚呜呜处，黄昏绕繡帷。

卷 748\_70 【书情寄诗友】

李中

默默谁知我，裴回野水边。诗情长若旧，吾事更无先。  
芳草人稀地，残阳雁过天。静思吟友外，此意复谁怜。

卷 748\_71 【读蜀志】

李中

鼎分天地日，先主力元微。鱼水从相得，山河遂有归。  
任贤无间忌，报国尽神机。草昧争雄者，君臣似此稀。

卷 748\_72 【献张拾遗】

李中

官资清贵近丹墀，性格孤高世所稀。金殿日开亲凤扆，  
古屏时展看渔矶。酒醒虚阁秋帘卷，吟对疏篁夕鸟归。  
献替频陈忠誉播，鹏霄万里展雄飞。

卷 748\_73 【献中书汤舍人】

李中

庆云呈瑞为明时，演畅丝纶在紫微。銮殿对时亲舜日，  
鲤庭过处著莱衣。闲寻竹寺听啼鸟，吟倚江楼恋落晖。  
隔座银屏看是设，一门清贵古今稀。

卷 748\_74 【海上太守新创东亭】

李中

使君心智杳难同，选胜开亭景莫穷。高敞轩窗迎海月，  
预栽花木待春风。静披典籍堪师古，醉拥笙歌不碍公。  
满径苔纹疏雨后，入檐山色夕阳中。偏宜下榻延徐孺，  
最称登门礼孔融。事简岂妨频赏玩，况当为政有余功。

卷 748\_75 【宫词二首】

李中

门锁帘垂月影斜，翠华咫尺隔天涯。  
香铺罗幌不成梦，背壁银缸落尽花。

· 全唐诗 ·

---

金波寒透水精帘，烧尽沈檀手自添。  
风递笙歌门已掩，翠华何处夜厌厌。

卷 748\_76 【采莲女】

李中

晚凉含笑上兰舟，波底红妆影欲浮。  
陌上少年休植足，荷香深处不回头。

卷 748\_77 【钟陵春思】

李中

沉沉楼影月当午，冉冉风香花正开。  
芳草迢迢满南陌，王孙何处不归来。

卷 748\_78 【赠夏秀才】

李中

轩车紫陌竞寻春，独掩衡门病起身。步月怕伤三径藓，  
取琴因拂一床尘。明时傥有丹枝分，青鉴从他素发新。  
况是青云知己在，原思生计莫忧贫。

卷 748\_79 【夏日书依上人壁】

李中

门外尘飞暑气浓，院中萧索似山中。  
最怜煮茗相留处，疏竹当轩一榻风。

卷 748\_80 【下蔡春暮旅怀】

李中

柳过春霖絮乱飞，旅中怀抱独凄凄。月生淮上云初散，  
家在江南梦去迷。发白每惭清鉴启，心孤长怯子规啼。  
拜恩为养慈亲急，愿向明朝捧紫泥。

卷 748\_81 【捧宣头许归侍养】

李中

泥书捧处圣恩新，许觐庭闱养二亲。  
蝼蚁至微宁足数，未知何处答穹旻。

卷 748\_82 【途中作】

李中

烟波涉历指家林，欲到家林惧却深。  
得信慈亲痾瘵减，当时宽勉采兰心。

卷 748\_83 【都下再会友人】

李中

谁言多难后，重会喜淹留。欲话关河梦，先惊鬓发秋。  
浮云空冉冉，远水自悠悠。多谢开青眼，携壶共上楼。

## 第七百四十九卷

### 卷 749\_1 【登毗陵青山楼】

李中

高楼闲上对晴空，豁目开襟半日中。千里吴山清不断，  
一边辽海浸无穷。人生歌笑开花雾，世界兴亡落叶风。  
吟罢倚栏何限意，回头城郭暮烟笼。

### 卷 749\_2 【晋陵罢任寓居，依韵和陈锐秀才见寄】

李中

掩门三径莓苔绿，车马谁来陋巷间。卧弃琴书公干病，  
笑迎风月步兵闲。当秋每谢蛩清耳，渐老多惭酒借颜。  
济物未能伸一术，敢于明代爱青山。

### 卷 749\_3 【春苔】

李中

春霖催得锁烟浓，竹院莎斋径小通。

谁爱落花风味处，莫愁门巷衬残红。

卷 749\_4 【夏云】

李中

如峰形状在西郊，未见从龙上沅寥。  
多谢好风吹起后，化为甘雨济田苗。

卷 749\_5 【书夏秀才幽居壁】

李中

永巷苔深户半开，床头书剑积尘埃。  
最怜小槛疏篁晚，幽鸟双双何处来？

卷 749\_6 【红花】

李中

红花颜色掩千花，任是猩猩血未加。  
染出轻罗莫相贵，古人崇俭诫奢华。

卷 749\_7 【安福县秋吟寄陈锐秘书】

李中

县庭事简得余功，诗兴秋来不可穷。卧听寒蛩莎砌月，  
行冲落叶水村风。愁髭渐去人前白，醉面犹怜鉴里红。  
苦恨交亲多契阔，未知良会几时同。

卷 749\_8 【新喻县酬王仲华少府见贻】

李中

事简开樽有逸情，共忻官舍月华清。每惭花欠河阳景，  
长愧琴无单父声。未泰黎元惭旷职，纵行谦直是虚名。  
与君尽力行公道，敢向昌朝俟陟明。

卷 749\_9 【暮春有感寄宋维员外】

李中

杜宇声中老病心，此心无计驻光阴。西园雨过好花尽，  
南陌人稀芳草深。喧梦却嫌莺语老，伴吟惟怕月轮沈。  
明年才候东风至，结驷期君预去寻。

卷 749\_10 【题吉水县厅前新栽小松】

李中

鬪开幽涧藓苔斑，移得孤根植砌前。影小未遮官舍月，  
翠浓犹带旧山烟。群花解笑香宁久，众木虽高节不坚。  
输我婆娑栏槛内，晚风萧飒学幽泉。

卷 749\_11 【赠（一作贻）念《法华经》绶上人】

李中

五更初起扫松堂，瞑目先焚一炷香。  
念彻莲经谁得见，千峰岩外晓苍苍。

卷 749\_12 【秋日途中】

李中

信步腾腾野岩边，离家都为利名牵。  
疏林一路斜阳里，飒飒西风满耳蝉。

卷 749\_13 【宿韦校书幽居】

李中

溪上高眠与鹤闲，开樽留我待柴关。  
园林月白秋霖歇，一夜泉声似故山。

卷 749\_14 【依韵和友人秋夕见寄】

李中

夕风庭叶落，谁见此时情？不作关河梦，空闻砧杵声。  
会须求至理，何必叹无成。好约高僧宿，同看海月生。

卷 749\_15 【吉水作尉酬高援秀才见赠】

李中

佐邑惭无术，敢言贫与清。风骚谁是主，烟月自关情。  
卷箔当山色，开窗就竹声。怜君惠嘉句，资我欲垂名。

卷 749\_16 【送智雄上人】

李中

忽起游方念，飘然不可留。未知携一锡，乘兴向何州。  
古岸春云散，遥天晚雨收。想应重会面，风月又清秋。

卷 749\_17 【览友人卷】

李中

新诗开卷处，造化竭精英。雪霁楚山碧，月高湘水清。  
初吟尘虑息，再味古风生。自此寰区内，喧腾二雅名。

卷 749\_18 【送人南游】

李中

浪迹天涯去，南荒必动情。草青虞帝庙，云暗夜郎城。  
越鸟惊乡梦，蛮风解宿醒。早思归故里，华发等闲生。

卷 749\_19 【晋陵县夏日作】

李中

事简公庭静，开帘暑气中。依经煎绿茗，入竹就清风。  
至论招禅客，忘机忆钓翁。晚凉安枕簟，海月出墙东。

卷 749\_20 【邮亭早起】

李中

邮舍残灯在，村林鸡唱频。星河吟里晓，川陆望中春。  
旧友青云贵，殊乡素发新。悠悠念行计，难更驻征轮。

卷 749\_21 【客中寒食】

李中

旅次经寒食，思乡泪湿巾。音书天外断，桃李雨中春。  
欲饮都无绪，唯吟似有因。输他郊郭外，多少踏青人。

卷 749\_22 【旅馆秋夕】

李中

寥寥山馆里，独坐酒初醒。旧业多年别，秋霖一夜听。  
砌蛩声渐息，窗烛影犹停。早晚无他事，休如泛水萍。

卷 749\_23 【宿青溪米处士幽居】

李中

寄宿溪光里，夜凉高士家。养风窗外竹，叫月水中蛙。  
静虑同搜句，清神旋煮茶。唯忧晓鸡唱，尘里事如麻。

卷 749\_24 【维舟秋浦，逢故人张矩同泊】

李中

卸帆清夜碧江滨，冉冉凉风动白蘋。波上正吟新月月，  
岸头恰见故乡人。共惊别后霜侵鬓，互说年来疾逼身。  
且饮一壶销百恨，会须遭遇识通津。

卷 749\_25 【代别】

李中

明日鸣鞭天一涯，悠悠此夕怯分离。红楼有恨金波转，  
翠黛无言玉箸垂。浮蚁不能迷远意，回纹从此寄相思。  
花时定是慵开鉴，独向春风忍扫眉。

卷 749\_26 【悼怀王丧妃】

李中

花绽花开事可惊，暂来浮世返蓬瀛。楚宫梦断云空在，  
洛浦神归月自明。香解返魂成浪语，胶能续断是虚名。  
音容寂寞春牢落，谁会楼中独立情。

卷 749\_27 【酒醒】

李中

睡觉花阴芳草软，不知明月出墙东。  
杯盘狼藉人何处，聚散空惊似梦中。

卷 749\_28 【送虞道士】

李中

烟霞聚散通三岛，星斗分明在一壶。  
笑说余杭沽酒去，蔡家重要会麻姑。

卷 749\_29 【怀旧夜吟寄赵杞】

李中

长笛声中海月飞，桃花零落满庭墀。魂销事去无寻处，  
酒醒孤吟不寐时。萱草岂能忘积恨，尺书谁与达相思。  
悠悠方寸何因解，明日江楼望渺弥。

卷 749\_30 【宿临江驿】

李中

候馆寥寥辍棹过，酒醒无奈旅愁何。雨昏郊郭行人少，  
苇暗汀洲宿雁多。干禄已悲凋发鬓，结茅终愧负烟萝。  
篇章早晚逢知己，苦志忘形自有魔。

卷 749\_31 【途中柳】

李中

翠色晴来近，长亭路去遥。无人折烟缕，落日拂溪桥。

卷 749\_32 【隔墙花】

李中

颜色尤难近，馨香不易通。朱门金锁隔，空使怨春风。

卷 749\_33 【广陵寒食夜】

李中

广陵寒食夜，豪贵足佳期。紫陌人归后，红楼月上时。  
绮罗香未歇，丝竹韵犹迟。明日踏青兴，输他轻薄儿。

卷 749\_34 【寄庐山庄隐士】

李中

烟萝拥竹关，物外自求安。逼枕溪声近，当檐岳色寒。

药苗应自采，琴调对谁弹？待了浮名后，依君共挂冠。

卷 749\_35 【吉水寄阎侍御（时公调官瀑川）】

李中

何处怀君切，令人欲白头。偶寻花外寺，独立水边楼。  
不得论休戚，何因校献酬。吟余兴难尽，风笛起渔舟。

卷 749\_36 【送张惟贞少府之江阴】

李中

相送烟汀畔，酒阑登小舟。离京梅雨歇，到邑早蝉秋。  
俗必期康济，诗谁互唱酬。晚凉诸吏散，海月入虚楼。

卷 749\_37 【钟陵禁烟寄从弟】

李中

落絮飞花日又西，踏青无侣草萋萋。  
交亲书断竟不到，忍听黄昏杜宇啼。

卷 749\_38 【夜泊江渚】

李中

水乡明月上晴空，汀岛香生杜若风。  
不是当年独醒客，且沽村酒待渔翁。

卷 749\_39 【吉水县依韵酬华松秀才见寄】

李中

官况萧条在水村，吏归无事好论文。枕欹独听残春雨，  
梦去空寻五老云。竹径每怜和藓步，禽声偏爱隔花闻。  
诗情冷淡知音少，独喜江皋得见君。

卷 749\_40 【贻庐山清溪观王尊师】

李中

霞帔星冠复杖藜，积年修炼住灵溪。松轩睡觉冷云起，  
石磴坐来春日西。采药每寻岩径远，弹琴常到月轮低。  
鼎中龙虎功成后，海上三山去不迷。

卷 749\_41 【王昭君】

李中

蛾眉翻自累，万里陷穷边。滴泪胡风起，宽心汉月圆。  
飞尘长翳日，白草自连天。谁贡和亲策，千秋污简编。

卷 749\_42 【送姚端先辈归宁】

李中

知君归觐省，称意涉通津。解缆汀洲晓，张帆烟水春。  
牵吟芳草远，貰酒乱花新。拜庆庭闱处，蟾枝香满身。

卷 749\_43 【江村晚秋作】

李中

高秋水村路，隔岸见人家。好是经霜叶，红于带露花。  
临罾鱼易得，就店酒难赊。吟兴胡能尽，风清日又斜。

卷 749\_44 【蛩】

李中

月冷莎庭夜已深，百虫声外有清音。  
诗情正苦无眠处，愧尔阶前相伴吟。

卷 749\_45 【感秋书事】

李中

宦途憔悴雪生头，家计相牵未得休。  
红蓼白蘋消息断，旧溪烟月负渔舟。

卷 749\_46 【访庐山归章禅伯】

李中

沈沈石室疏钟后，寂寂莎池片月明。  
多少学徒求妙法，要于言下悟无生。

卷 749\_47 【庐山栖隐洞谭先生院留题】

李中

坛畔归云冷湿襟，拂苔移石坐花阴。  
偶然醒得庄周梦，始觉玄门兴味深。

卷 749\_48 【江行值暴风雨】

李中

风狂雨暗舟人惧，自委神明志不邪。  
投得苇湾波浪息，岸头烟火近人家。

卷 749\_49 【杪秋夕吟怀寄宋维先辈】

李中

江岛穷秋木叶稀，月高何处捣寒衣。  
苦嗟不见登龙客，此夜悠悠一梦飞。

卷 749\_50 【七夕】

李中

星河耿耿正新秋，丝竹千家列彩楼。  
可惜穿针方有兴，纤纤初月苦难留。

卷 749\_51 【吉水作尉时酬阎侍御见寄】

李中

谬佐驱鸡任，常思赋鵬人。未谐林下约，空感病来身。  
锁径青苔老，铺阶红叶新。相思不可见，犹喜得书频。

卷 749\_52 【清溪逢张惟贞秀才】

李中

洞隐红霞外，房开碧嶂根。昔年同炼句，几夜共听猿。  
考古书千卷，忘忧酒一樽。如今归建业，雅道喜重论。

卷 749\_53 【送阎侍御归阙】

李中

羨君乘紫诏，归路指通津。鼓棹烟波暖，还京雨露新。  
趋朝丹禁晓，耸轡九衢春。自愧湮沈者，随轩未有因。

卷 749\_54 【甲子岁罢吉水县过钟陵时暮春维舟江渚谒柴太尉席上作】

李中

公侯延驻暂踟蹰，况值风光三月初。乱落杯盘花片小，  
静笼池阁柳阴疏。舟维南浦程虽阻，饮预西园兴有余。  
却笑田家门下客，当时容易叹车鱼。

卷 749\_55 【海上春夕旅怀寄左偃】

李中

柳过清明絮乱飞，感时怀旧思凄凄。月生楼阁云初散，  
家在汀洲梦去迷。发白每惭清鉴启，酒醒长怯子规啼。  
北山高卧风骚客，安得同吟复杖藜。

卷 749\_56 【江次维舟登古寺】

李中

辍棹因过古梵宫，荒凉门径锁苔茸。绿阴满地前朝树，  
清韵含风后殿钟。童子纵慵眠坏榻，老僧耽话指诸峰。  
吟余却返来时路，回首盘桓尚驻筇。

卷 749\_57 【春日招宋维先辈】

李中

瓮中竹叶今朝熟，鉴里桃花昨日开。  
为报广寒攀桂客，莫辞相访共衔杯。

卷 749\_58 【吹笛儿】

李中

陇头休听月明中，妙竹嘉音际会逢。  
见尔樽前吹一曲，令人重忆许云封。

卷 749\_59 【所思】

李中

解珮当时在洛滨，悠悠疑是梦中身。  
自从物外无消息，花谢莺啼近十春。

卷 749\_60 【吉水县酬夏侯秀才见寄】

李中

启鉴悠悠两鬓苍，病来心绪易凄凉。  
知音不到吟还懒，锁印开帘又夕阳。

卷 749\_61 【和友人喜雪】

李中

腊雪频频降，成堆不可除。伴吟花莫并，销瘴药何如。  
谢女诗成处，袁安睡起初。深迷樵子径，冷逼旅人居。  
惹砌催樽俎，飘窗入簿书。最宜楼上望，散乱满空虚。

卷 749\_62 【感事呈所知】

李中

竞爱松筠翠，皆怜桃李芳。如求济世广，桑柘愿商量。

卷 749\_63 【送汪涛】

李中

知君别家后，不免泪沾襟。芳草千里路，夕阳孤客心。  
花飞当野渡，猿叫在烟岑。霄汉知音在，何须恨陆沈。

卷 749\_64 【言志寄刘钧秀才】

李中

童稚亲儒墨，时平喜道存。酬身指书剑，赋命委乾坤。  
秋爽鼓琴兴，月清搜句魂。与君同此志，终待至公论。

卷 749\_65 【访澄上人】

李中

寻师来静境，神骨觉清凉。一饷逢秋雨，相留坐竹堂。

石渠堆败叶，莎砌咽寒蛩。话到南能旨，怡然万虑忘。

卷 749\_66 【经古寺】

李中

殿宇半隳摧，门临野水开。云凝何代树，草蔽此时台。  
绕塔堆黄叶，沿阶积绿苔。踟蹰日将暮，栖鸟入巢来。

卷 749\_67 【送王道士游东海】

李中

巨浸常牵梦，云游岂觉劳。遥空收晚雨，虚阁看秋涛。  
必若思三岛，应须钓六鳌。如通十洲去，谁信碧天高。

卷 749\_68 【贻青阳宰】

李中

征赋常登限，名山管最多。吏闲民讼少，时得访烟萝。

卷 749\_69 【哭故主人陈太师】

李中

十年孤迹寄侯门，入室升堂忝厚恩。游遍春郊随茜旆，  
饮残秋月待金尊。车鱼郑重知难报，吐握周旋不可论。  
长恸裴回逝川上，白杨萧飒又黄昏。

卷 749\_70 【秋江夜泊寄刘钧】

李中

万里江山敛暮烟，旅情当此独悠然。沙汀月冷帆初卸，  
苇岸风多人未眠。已听渔翁歌别浦，更堪边雁过遥天。  
与君共俟酬身了，结侣波中寄钓船。

## 第七百五十卷

### 卷 750\_1 【和浔阳宰感旧绝句五首】

李中

追感古今情不已，竹轩闲取史书看。  
欲亲往哲无因见，空树临风襟袖寒。

浔阳物景真难及，练泻澄江最好看。  
曾上虚楼吟倚槛，五峰擎雪照人寒。

园林春媚千花发，烂熳如将画障看。  
惟爱松筠多冷淡，青青偏称雪霜寒。

知君百里鸣琴处，公退千山尽日看。  
政化有同风偃草，更将余力拯孤寒。

昔岁寻芳忻得侣，江堤物景尽情看。  
就中吟恋垂杨下，撼起啼莺晚吹寒。

卷 750\_2 【哭柴郎中】

李中

昔岁遭逢在海城，曾容孤迹奉双旌。酒边不厌笙歌盛，  
花下只愁风雨生。棋接山亭松影晚，吟陪月榭露华清。  
音尘自此无因问，泪洒川波夕照明。

卷 750\_3 【访章禅老】

李中

比寻禅客叩禅机，澄却心如月在池。  
松下偶然醒一梦，却成无语问吾师。

卷 750\_4 【泊秋浦】

李中

苇岸风高宿雁惊，维舟特地起乡情。  
渔儿隔水吹横笛，半夜空江月正明。

卷 750\_5 【闲居言怀】

李中

未达难随众，从他俗所憎。闲听九秋雨，远忆四明僧。  
病后倦吟啸，贫来疏友朋。寂寥元合道，未必是无能。

卷 750\_6 【舟次彭泽】

李中

飘泛经彭泽，扁舟思莫穷。无人秋浪晚，一岸蓼花风。  
乡里梦渐远，交亲书未通。今宵见圆月，难坐冷光中。

卷 750\_7 【宿钟山知觉院】

李中

宿投林下寺，中夜觉神清。磬罢僧初定，山空月又生。  
笼灯吐冷艳，岩树起寒声。待晓红尘里，依前冒远程。

卷 750\_8 【游茅山二首】

李中

绿藓深迎步，红霞烂满衣。洞天应不远，鸾鹤向人飞。

茅许仙踪在，烟霞一境清。夷希何许叩，松径月空明。

卷 750\_9 【鹤】

李中

九皋羽翼下晴空，万里心难驻玉笼。清露滴时翘藓径，  
白云开处唳松风。归当华表千年后，怨在瑶琴别操中。  
好共灵龟作俦侣，十洲三岛逐仙翁。

卷 750\_10 【暮春吟怀寄姚端先辈】

李中

无奈诗魔旦夕生，更堪芳草满长汀。故人还爽花前约，  
新月又生江上亭。庄梦断时灯欲烬，蜀魂啼处酒初醒。  
何时得见登龙客，隔却千山万仞青。

卷 750\_11 【送圆（一作图）上人归庐山】

李中

莲宫旧隐尘埃外，策杖临风拂袖还。踏雪独寻青嶂下，  
听猿重入白云间。萧骚红树当门老，斑驳苍苔锁径闲。  
预想松轩夜禅处，虎溪圆月照空山。

卷 750\_12 【送相里秀才之匡山国子监】

李中

气秀情闲杳莫群，庐山游去志求文。已能探虎穷骚雅，  
又欲囊萤就典坟。目豁乍窥千里浪，梦寒初宿五峰云。  
业成早赴春闱约，要使嘉名海内闻。

卷 750\_13 【渔父二首】

李中

偶向芦花深处行，溪光山色晚来晴。  
渔家开户相迎接，稚子争窥犬吠声。

雪鬓衰髯白布袍，笑携赆鲤换村醪。

殷勤留我宿溪上，钓艇归来明月高。

卷 750\_14 【旅次闻砧】

李中

砧杵谁家夜捣衣，金风淅淅露微微。  
月中独坐不成寐，旧业经年未得归。

卷 750\_15 【寄杨先生】

李中

仙翁别后无信，应共烟霞卜邻。莫把壶中秘诀，  
轻传尘里游人。浮生日月自急，上境莺花正春。  
安得一招琴酒，与君共泛天津。

卷 750\_16 【对酒招陈昭用】

李中

花开叶落堪悲，似水年光暗移。身世都如梦役，  
是非空使神疲。良图有分终在，所欲无劳妄思。  
幸有一壶清酒，且来闲语希夷。

卷 750\_17 【旅夜闻笛】

李中

长笛起谁家，秋凉夜漏赊。一声来枕上，孤客在天涯。  
木末风微动，窗前月渐斜。暗牵诗思苦，不独落梅花。

卷 750\_18 【送绍明上人之毗陵】

李中

忽起毗陵念，飘然不可留。听蝉离古寺，携锡上扁舟。  
月出沙汀冷，风高苇岸秋。回期端的否，千里路悠悠。

卷 750\_19 【再到山阳寻故人不遇二首】

李中

维舟登野岸，因访故人居。乱后知何处，荆榛匝弊庐。  
欲问当年事，耕人都不知。空余堤上柳，依旧自垂丝。

卷 750\_20 【寄庐山简寂观重道者】

李中

忆昔采芝庐岳顶，清宫常接绛霄人。玉书闲展石楼晓，  
瑶瑟醉弹琪树春。惟恨仙桃迟结实，不忧沧海易成尘。  
似醒一梦归凡世，空向彤霞寄梦频。

卷 750\_21 【思湓渚旧居】

李中

昔岁曾居湓水头，草堂吟啸兴何幽。迎僧常踏竹间藓，  
爱月独登溪上楼。寒翠入檐岚岫晓，冷声萦枕野泉秋。  
从拘宦路无由到，昨夜分明梦去游。

卷 750\_22 【思胸阳春游感旧寄柴司徒五首】

李中

王孙昔日甚相亲，共赏西园正媚春。  
醉卧如茵芳草上，觉来花月影笼身。  
  
烟铺芳草正绵绵，藉草传杯似列仙。

· 全唐诗 ·

---

暂辍笙歌且联句，含毫花下破香笺。

南陌风和舞蝶狂，惜春公子恋斜阳。  
高歌饮罢将回辔，衣上花兼百草香。

春郊饮散暮烟收，却引丝簧上翠楼。  
红袖歌长金翠乱，银蟾飞出海东头。

昔年常接五陵狂，洪饮花间数十场。  
别后或惊如梦觉，音尘难问水茫茫。

卷 750\_23 【泉】

李中

潺潺青嶂底，来处一何长。漱石苔痕滑，侵松鹤梦凉。  
泛花穿竹坞，泻月下莲塘。想得归何处，天涯助渺茫。

卷 750\_24 【题徐五教池亭】

李中

多士池塘好，尘中景恐无。年来养鸥鹭，梦不去江湖。  
泉脉通深涧，风声起短芦。惊鱼跳藻荇，戏蝶上菰蒲。  
泛泛容渔艇，闲闲载酒壶。涨痕山雨过，翠积岸苔铺。

花影沈波底，烟光入座隅。晓香怜杜若，夜浸爱蟾蜍。  
步逸心难厌，看吟兴不辜。凭君命奇笔，为我写成图。

卷 750\_25 【遥赋义兴潜泉】

李中

见说灵泉好，潺湲兴莫穷。谁当秋霁后，独听月明中。  
溅石苔花润，随流木叶红。何当化霖雨，济物显殊功。

卷 750\_26 【和毗陵尉曹昭用见寄】

李中

决狱多余暇，冥搜万象空。卷帘疏雨后，锁印夕阳中。  
还往多名士，编题尚古风。宦途知此味，能有几人同。

卷 750\_27 【梅花】

李中

群木方憎雪，开花长在先。流莺与舞蝶，不见许因缘。

卷 750\_28 【舟次吉水逢蔡文庆秀才】

李中

别后音尘断，相逢又共吟。雪霜今日鬓，烟月旧时心。  
舣棹夕阳在，听鸿秋色深。一尊开口笑，不必话升沈。

卷 750\_29 【新喻县偶寄彭仁正字】

李中

经年离象魏，孤宦在南荒。酒醒公斋冷，雨多归梦长。  
志难酬国泽，术欠致民康。吾子应相笑，区区道未光。

卷 750\_30 【和彭正字喜雪见寄】

李中

千门忻应瑞，偏称上楼看。密洒虚窗晓，狂飘大野寒。  
园深宜竹树，帘卷洽杯盘。已作丰年兆，黎民意尽安。

卷 750\_31 【海上和柴军使清明书事】

李中

清明时节好烟光，英杰高吟兴味长。捧日即应还禁卫，  
当春何惜醉胸阳。千山过雨难藏翠，百卉临风不藉香。  
却是旅人凄屑甚，夜来魂梦到家乡。

卷 750\_32 【壬申岁承命之任浚阳再过庐山国学感旧寄刘钧明府】

李中

三十年前共苦辛，囊萤曾寄此烟岑。读书灯暗嫌云重，  
搜句石平怜藓深。各历宦途悲聚散，几看时辈或浮沈。  
再来物景还依旧，风冷松高猿狖吟。

卷 750\_33 【留题胡参卿秀才幽居】

李中

竹荫庭除藓色浓，道心安逸寂寥中。扣门时有栖禅客，  
洒酒多招采药翁。江近好听菱芡雨，径香偏爱蕙兰风。  
我惭名宦犹拘束，脱屣心情未得同。

卷 750\_34 【放鹭鸶】

李中

池塘多谢久淹留，长得霜翎放自由。  
好去蒹葭深处宿，月明应认旧江秋。

卷 750\_35 【柳絮】

李中

年年二月暮，散乱杂飞花。雨过微风起，狂飘千万家。

卷 750\_36 【早春】

李中

一种和风至，千花未放妍。草心并柳眼，长是被恩先。

卷 750\_37 【春云】

李中

阴去为膏泽，晴来媚晓空。无心亦无滞，舒卷在东风。

卷 750\_38 【送姚端秀才游毗陵】

李中

毗陵嘉景太湖边，才子经游称少年。风弄青帘沽酒市，  
月明红袖采莲船。若耶罨画应相似，越岫吴峰尽接连。  
此去高吟须早返，广寒丹桂莫迁延。

卷 750\_39 【和胸阳载笔鲁裕见寄】

李中

燕台多事每开颜，相许论交淡薄间。饮兴共怜芳草岸，  
吟情同爱夕阳山。露浓小径蛩声咽，月冷空庭竹影闲。  
何事此时攀忆甚，与君俱是别乡关。

卷 750\_40 【叙吟二首】

李中

往哲搜罗妙入神，隋珠和璧未为珍。  
而今所得惭难继，谬向平生著苦辛。  
  
成僻成魔二雅中，每逢知己是亨通。

言之无罪终难厌，欲把风骚继古风。

卷 750\_41 【贻毗陵正勤禅院奉长老】

李中

随缘驻瓶锡，心已悟无生。默坐烟霞散，闲观水月明。  
竹深风倍冷，堂迥磬偏清。愿作传灯者，忘言学净名。

卷 750\_42 【冬日（一作中）书怀寄惟真大师】

李中

自别吾师后，风骚道甚孤。雪霜侵鬓发，音信隔江湖。  
扰扰悲时世，悠悠役梦途。向公期尽节，多病怕倾壶。  
贱迹虽惭滞，幽情忍使辜。诗成天外句，棋覆夜中图。  
落壁灯花碎，飘窗雪片粗。煮茶烧栗兴，早晚复围炉。

卷 750\_43 【献中书潘舍人】

李中

运叶半千数，天钟许国臣。鹏霄开羽翼，凤阙演丝纶。  
顾问当清夜，从容向紫宸。立言成雅诰，正意叙彝伦。

· 全唐诗 ·

---

朴素偕前哲，馨香越搢绅。褒辞光万代，优旨重千钧。  
公退谁堪接，清闲道是邻。世间身属幻，物外意通津。  
吊往兼春梦，文高赋复新。琴弹三峡水，屏画十洲春。  
庭冷铺苔色，池寒浸月轮。竹风来枕簟，药气上衣巾。  
茶谱传溪叟，棋经受羽人。清虚虽得趣，献替不妨陈。  
杞梓呈才后，神仙入侍频。孤寒皆有赖，中外亦同忻。  
有士曾多难，无门得望尘。忙忙罹险阻，往往耗精神。  
寻果巢枝愿，终全负米身。遭逢敦孝治，蹇蹇值通津。  
最庆清朝禄，还沾白发亲。甘柔心既遂，虚薄报何因。  
远宦联绵历，卑栖夙夜勤。良时空爱惜，末路每悲辛。  
骨立驹犹病，颜凋女尚贫。而今谐顾遇，尺蠖愿求伸。

## 第七百五十一卷

### 卷 751\_1 【早春左省寓直】

徐铉

旭景鸾台上，微云象阙间。时清政事少，日永直官闲。  
远籁飞箫管，零冰响珮环。终军年二十，默坐叩玄关。

### 卷 751\_2 【寒食宿陈公塘上】

徐铉

垂杨界官道，茅屋倚高坡。月下春塘水，风中牧竖歌。  
折花闲立久，对酒远情多。今夜孤亭梦，悠扬奈尔何。

### 卷 751\_3 【将去广陵别史员外南斋】

徐铉

家声曾与金张辈，官署今居何宋间。起得高斋临静曲，

种成奇树学他山。鸳鸯终日同醒醉，萝薜常时共往还。  
贱子今朝独南去，不堪回首望清闲。

卷 751\_4 【将过江题白沙馆】

徐铉

少长在维扬，依然认故乡。金陵佳丽地，不道少风光。  
稍望吴台远，行登楚塞长。殷勤语江岭，归梦莫相妨。

卷 751\_5 【登甘露寺北望】

徐铉

京口潮来曲岸平，海门风起浪花生。人行沙上见日影，  
舟过江中闻橹声。芳草远迷扬子渡，宿烟深映广陵城。  
游人乡思应如橘，相望须含两地情。

卷 751\_6 【山路花】

徐铉

不共垂杨映绮寮，倚山临路自娇饶。游人过去知香远，  
谷鸟飞来见影摇。半隔烟岚遥隐隐，可堪风雨暮萧萧。

城中春色还如此，几处笙歌按舞腰。

卷 751\_7 【京口江际弄水】

徐铉

退公求静独临川，扬子江南二月天。百尺翠屏甘露阁，  
数帆晴日海门船。波澄瀨石寒如玉，草接汀蘋绿似烟。  
安得乘槎更东去，十洲风外弄潺湲。

卷 751\_8 【早春旬假独直寄江舍人】

徐铉

省署皆归沐，西垣公事稀。咏诗前砌立，听漏向申归。  
远思风醒酒，余寒雨湿衣。春光已堪探，芝盖共谁飞？

卷 751\_9 【从驾东幸呈诸公】

徐铉

吴公台下旧京城，曾掩衡门过十春。别后不知新景象，  
信来空问故交亲。宦游京口无高兴，习隐钟山限俗尘。  
今日喜为华表鹤，况陪鹓鹭免迷津。

卷 751\_10 【重游木兰亭】

徐铉

缭绕长堤带碧浔，昔年游此尚青衿。兰桡破浪城阴直，  
玉勒穿花苑树深。宦路尘埃成久别，仙家风景有谁寻？  
那知年长多情后，重凭栏干一独吟。

卷 751\_11 【赋得彩燕】

徐铉

缕彩成飞燕，迎和启蛰时。翠翘生玉指，绣羽拂文楣。  
讵费衔泥力，无劳剪爪期。化工今在此，翻怪社来迟。

卷 751\_12 【送魏舍人仲甫为蕲州判官】

徐铉

从事蕲春兴自长，蕲人应识紫薇郎。山资足后抛名路，  
莼菜秋来忆故乡。以道卷舒犹自适，临戎谈笑固无妨。  
如闻郡阁吹横笛，时望青溪忆野王。

卷 751\_13 【题殷舍人宅木芙蓉】

徐铉

怜君庭下木芙蓉，袅袅纤枝淡淡红。晓吐芳心零宿露，  
晚摇娇影媚清风。似含情态愁秋雨，暗减馨香借菊丛。  
默饮数杯应未称，不知歌管与谁同？

卷 751\_14 【送史馆高员外使岭南】

徐铉

东观时闲暇，还修喻蜀书。双旌驰县道，百越从轺车。  
桂蠹晨餐罢，贪泉访古初。春江多好景，莫使醉吟疏。

卷 751\_15 【春日紫岩山期客不至】

徐铉

郊外春华好，人家带碧溪。浅莎藏鸭戏，轻霭隔鸡啼。  
掩映红桃谷，夤缘翠柳堤。王孙竟不至，芳草自萋萋。

卷 751\_16 【宿蒋帝庙，明日游山南诸寺】

徐铉

便返城闉尚未甘，更从山北到山南。花枝似雪春虽半，  
桂魄如眉日始三。松盖遮门寒黯黯，柳丝妨路翠毵毵。  
登临莫怪偏留恋，游宦多年事事谙。

卷 751\_17 【赋得有所思】

徐铉

所思何在杳难寻，路远山长水复深。衰草满庭空伫立，  
清风吹袂更长吟。忘情好醉青田酒，寄恨宜调绿绮琴。  
落日鲜云偏聚散，可能知我独伤心。

卷 751\_18 【赠王贞素先生】

徐铉

先生尝已佩真形，绀发朱颜骨气清。道秘未传鸿宝术，  
院深时听步虚声。辽东几度悲城郭，吴市终应变姓名。  
三十六天皆有籍，他年何处问归程。

卷 751\_19 【春夜月】

徐铉

幽人春望本多情，况是花繁月正明。  
竟夕无言亦无寐，绕阶芳草影随行。

卷 751\_20 【爱敬寺有老僧尝游长安言秦雍间事历历可听...示同行客】

徐铉

白首栖禅者，尝谈灞浐游。能令过江客，偏起失乡愁。  
室倚桃花崦，门临杜若洲。城中无此景，将子剩淹留。

卷 751\_21 【游蒋山题辛夷花寄陈奉礼（本约陈同游，不至）】

徐铉

今岁游山已恨迟，山中仍喜见辛夷。簪纓且免全为累，  
桃李犹堪别作期。晴后日高偏照灼，晚来风急渐离披。  
山郎不作同行伴，折得何由寄所思。

卷 751\_22 【和殷舍人萧员外春雪】

徐铉

万里春阴乍履端，广庭风起玉尘干。梅花岭上连天白，  
蕙草阶前特地寒。晴去便为经岁别，兴来何惜彻宵看。  
此时鸳侣皆闲暇，赠答诗成禁漏残。

卷 751\_23 【寄蕲州高郎中】

徐铉

贾傅栖迟楚泽东，兰皋三度换秋风。纷纷世事来无尽，  
黯黯离魂去不通，直道未能胜社鼠，孤飞徒自叹冥鸿。  
知君多少思乡恨，并在山城一笛中。

卷 751\_24 【寄和州韩舍人】

徐铉

急景駸駸度，遥怀处处生。风头乍寒暖，天色半阴晴。  
久别魂空断，终年道不行。殷勤云上雁，为过历阳城。

卷 751\_25 【从兄龙武将军没于边戍，过旧营宅作】

徐铉

前年都尉没边城，帐下何人领旧兵。徼外瘴烟沉鼓角，  
山前秋日照铭旌。笙歌却返乌衣巷，部曲皆还细柳营。  
今日园林过寒食，马蹄犹拟入门行。

卷 751\_26 【景阳台怀古】

徐铉

后主忘家不悔，江南异代长春。  
今日景阳台上，闲人何用伤神。

卷 751\_27 【春分日】

徐铉

仲春初四日，春色正中分。绿野徘徊月，晴天断续云。  
燕飞犹个个，花落已纷纷。思妇高楼晚，歌声不可闻。

卷 751\_28 【寄驾部郎中】

徐铉

贱子乖慵性，频为省直牵。交亲每相见，多在相门前。  
君独疏名路，为郎过十年。炎风久成别，南望思悠然。

卷 751\_29 【和王庶子寄题兄长建州廉使新亭】

徐铉

谢守高斋结构新，一方风景万家情。群贤讵减山阴会，  
远俗初闻正始声。水槛片云长不去，讼庭纤草转应生。  
阿连诗句偏多思，遥想池塘昼梦成。

卷 751\_30 【谢文靖墓下作（时闽岭用师，契丹陷梁宋）】

徐铉

越徼稽天讨，周京乱虏尘。苍生何可奈，江表更无人。  
岂惮寻荒垄，犹思认后身。春风白杨里，独步泪沾巾。

## 第七百五十二卷

### 卷 752\_1 【观人读《春秋》】

徐铉

日觉儒风薄，谁将霸道羞。乱臣无所惧，何用读春秋。

### 卷 752\_2 【秋日雨中与萧赞善访殷舍人于翰林座中作】

徐铉

野出西垣步步迟，秋光如水雨如丝。铜龙楼下逢闲客，  
红药阶前访旧知。乱点乍滋承露处，碎声因想滴蓬时。  
银台钥入须归去，不惜余欢尽酒卮。

### 卷 752\_3 【送和州张员外为江都令】

徐铉

经年相望隔重湖，一旦相逢在上都。塞诏官班聊慰否，

埋轮意气尚存无。由来圣代怜才子，始觉清风激懦夫。  
若向西冈寻胜赏，旧题名处为踌躇。

卷 752\_4 【和明道人宿山寺】

徐铉

闻道经行处，山前与水阳。磬声深小院，灯影迥高房。  
落宿依楼角，归云拥殿廊。羨师闲未得，早起逐班行。

卷 752\_5 【晚归】

徐铉

暑服道情出，烟街薄暮还。风清飘短袖，马健弄连环。  
水静闻归橹，霞明见远山。过从本无事，从此涉旬间。

卷 752\_6 【月真歌（月真，广陵妓女，翰林殷舍人所录。携之垂访。筵上赠此）】

徐铉

扬州胜地多丽人，其间丽者名月真。月真初年十四五，  
能弹琵琶善歌舞。风前弱柳一枝春，花里娇莺百般语。

扬州帝京多名贤，其间贤者殷德川。德川初秉纶闱笔，  
职近名高常罕出。花前月下或游从，一见月真如旧识。  
闲庭深院资贤宅，宅门严峻无凡客。垂帘偶坐唯月真，  
调弄琵琶郎为拍。殷郎一旦过江去，镜中懒作孤鸾舞。  
朝云暮雨镇相随，石头城下还相遇。二月三月江南春，  
满城蒙蒙起香尘。隔墙试听歌一曲，乃是资贤宅里人。  
绿窗绣幌天将晓，残烛依依香袅袅。离肠却恨苦多情，  
软障薰笼空悄悄。殷郎去冬入翰林，九霄官署转深沉。  
人间想望不可见，唯向月真存旧心。我惭闾茸何为者，  
长感余光每相假。陋巷萧条正掩扉，相携访我衡茅下。  
我本山人愚且贞，歌筵歌席常无情。自从一见月真后，  
至今赢得颠狂名。殷郎月真听我语，少壮光阴能几许。  
良辰美景数追随，莫教长说相思苦。

卷 752\_7 【走笔送义兴令赵宣辅】

徐铉

闻君孤棹泛荆溪，陇首云随别恨飞。  
杜牧旧居凭买取，他年藜杖愿同归。

卷 752\_8 【天阙山绝句】

徐铉

散诞爱山客，凄凉怀古心。寒风天阙晚，尽日倚轩吟。

卷 752\_9 【除夜】

徐铉

寒灯耿耿漏迟迟，送故迎新了不欺。往事并随残曆日，  
春风宁识旧容仪。预惭岁酒难先饮，更对乡雠羨小儿。  
吟罢明朝赠知己，便须题作去年诗。

卷 752\_10 【寄钟谟】

徐铉

看看潘鬓二毛生，昨日林梢又转莺。欲对春风忘世虑，  
敢言尊酒召时英。假中西阁应无事，筵上南威幸有情。  
不得车公终不乐，已教红袖出门迎。

卷 752\_11 【正初答钟郎中见招】

徐铉

高斋迟景雪初晴，风拂乔枝待早莺。南省郎官名籍籍，  
东邻妓女字英英。流年倏忽成陈事，春物依稀有旧情。  
新岁相思自过访，不烦虚左远相迎。

卷 752\_12 【闻雁寄故人】

徐铉

久作他乡客，深惭薄宦非。不知云上雁，何得每年归。  
夜静声弥怨，天空影更微。往年离别泪，今夕重沾衣。

卷 752\_13 【江舍人宅筵上有妓唱和州韩舍人歌辞，因以寄】

徐铉

良宵丝竹偶成欢，中有佳人俯翠鬟。白雪飘飘传乐府，  
阮郎憔悴在人间。清风朗月长相忆，佩蕙纫兰早晚还。  
深夜酒空筵欲散，向隅惆怅鬓堪斑。

卷 752\_14 【寒食日作】

徐铉

厨冷烟初禁，门闲日更斜。东风不好事，吹落满庭花。  
过社纷纷燕，新晴淡淡霞。京都盛游观，谁访子云家。

卷 752\_15 【贺殷游二舍人入翰林、江给事拜中丞】

徐铉

清晨待漏独徘徊，霄汉悬心不易裁。阁老深严归翰苑，  
夕郎威望拜霜台。青绫对覆蓬壶晚，赤棒前驱道路开。  
犹有西垣厅记在，莫忘同草紫泥来。

卷 752\_16 【欧阳太监雨中视决堤因堕水明日见于省中因戏之】

徐铉

闻道张晨盖，徘徊石首东。浚川非伯禹，落水异三公。  
衣湿仍愁雨，冠敝更怯风。今朝复相见，疑是葛仙翁。

卷 752\_17 【送吴郎中为宣州推官知泾县】

徐铉

征虏亭边月，鸡鸣伴客行。可怜何水部，今事谢宣城。  
风物聊供赏，班资莫系情。同心不同载，留滞为浮名。

卷 752\_18 【寄舒州杜员外】

徐铉

信到得君书，知君已下车。粉闱情在否，莲幕兴何如。  
人望征贤入，余思从子居。灞山真隐地，凭为卜茅庐。

卷 752\_19 【九月十一日寄陈郎中】

徐铉

我多吏事君多病，寂绝过从又几旬。  
前日龙山烟景好，风前落帽是何人？

卷 752\_20 【和司门郎中陈彦】

徐铉

衡门寂寂逢迎少，不见仙郎向五旬。  
莫问龙山前日事，菊花开却为闲人。

卷 752\_21 【赋得捣衣】

徐铉

江上多离别，居人夜捣衣。拂砧知露滴，促杵恐霜飞。  
漏转声频断，愁多力自微。裁缝依梦见，腰带定应非。

卷 752\_22 【九月三十夜雨寄故人】

徐铉

独听空阶雨，方知秋事悲。寂寥旬假日，萧飒夜长时。  
别念纷纷起，寒更故故迟。情人如不醉，定是两相思。

卷 752\_23 【寄抚州钟郎中（时王师败绩于闽中，谩在建州）】

徐铉

去载分襟后，寻闻在建安。封疆正多事，尊俎若为欢。  
都护空遗镞，明君欲舞干。绕朝时不用，非是杀身难。

卷 752\_24 【送欧阳太监游庐山】

徐铉

家家门外庐山路，唯有夫君乞假游。案牍乍抛公署晚，  
林泉已近暑天秋。海潮尽处逢陶石，江月圆时上庾楼。  
此去萧然好长往，人间何事不悠悠。

卷 752\_25 【立秋后一日与朱舍人同直】

徐铉

一宿秋风未觉凉，数声宫漏日犹长。  
林泉无计消残暑，虚向华池费稻粱。

卷 752\_26 【赋得霍将军辞第】

徐铉

汉将承恩久，图勋肯顾私。匈奴犹未灭，安用以家为。  
郢匠虽闻诏，衡门竟不移。宁烦张老颂，无待晏婴辞。  
甲乙人徒费，亲邻我自持。悠悠千载下，长作帅臣师。

卷 752\_27 【和元帅书记萧郎中观习水师】

徐铉

元帅楼船出治兵，落星山外火旗明。千帆日助江陵势，  
万里风驰下濑声。杀气晓严波上鹳，凯歌遥骇海边鲸。  
仲宣一作从军咏，回顾儒衣自不平。

卷 752\_28 【秋日卢龙村舍】

徐铉

置却人间事，闲从野老游。树声村店晚，草色古城秋。  
独鸟飞天外，闲云度陇头。姓名君莫问，山木与虚舟。

卷 752\_29 【和萧郎中小雪日作】

徐铉

征西府里日西斜，独试新炉自煮茶。篱菊尽来低覆水，  
塞鸿飞去远连霞。寂寥小雪闲中过，斑驳轻霜鬓上加。  
算得流年无奈处，莫将诗句祝苍华。

卷 752\_30 【中书相公谿亭闲宴依韵】

徐铉

雨霁秋光晚，亭虚野兴回。沙鸥掠岸去，溪水上阶来。  
客傲风敲帻，筵香菊在杯。东山长许醉，何事忆天台。

卷 752\_31 【寄饶州王郎中效李白体】

徐铉

珍重王光嗣，交情尚在不。芜城连宅住，楚塞并车游。  
别后官三改，年来岁六周。银钩无一字，何以缓离愁。

卷 752\_32 【寄歙州吕判官】

徐铉

任公郡占好山川，溪水萦回路屈盘。南国自来推胜境，  
故人此地作郎官。风光适意须留恋，禄秩资贫且喜欢。  
莫忆班行重回首，是非多处是长安。

卷 752\_33 【宣威苗将军贬官后重经故宅】

徐铉

蒋山南望近西坊，亭馆依然锁院墙。天子未尝过细柳，  
将军寻已戍敦煌。敲倾怪石山无色，零落圆荷水不香。  
为将为儒皆寂寞，门前愁杀马中郎。

卷 752\_34 【附池州薛郎中书因寄歙州张员外】

徐铉

新安从事旧台郎，直气多才不可忘。一旦江山驰别梦，  
几年簪绂共周行。岐分出处何方是，情共穷通此义长。  
因附邻州寄消息，接舆今日信为狂。

卷 752\_35 【寄江都路员外】

徐铉

吾兄失意在东都，闻说襟怀任所如。已纵乖慵为傲吏，  
有何关键制豪胥。县斋晓闭多移病，南亩秋荒忆遂初。  
知道故人相忆否，嵇康不得懒修书。

卷 752\_36 【张员外好茅山风景，求为句容令，作此送】

徐铉

句曲山前县，依依数舍程。还同适勾漏，非是厌承明。  
柳谷供诗景，华阳契道情。金门容傲吏，官满且还城。

卷 752\_37 【送应之道人归江西】

徐铉

曾骑竹马傍洪厓，二十余年变物华。客梦等闲过驿阁，  
归帆遥羨指龙沙。名垂小篆矜垂露，诗作吴吟对绮霞。  
岁暮定知回未得，信来凭为寄梅花。

卷 752\_38 【送元帅书记高郎中出为婺源建威军使】

徐铉

寒风萧瑟楚江南，记室戎装挂锦帆。倚马未曾妨笑傲，  
斩牲先要厉威严。危言昔日尝无隐，壮节今来信不凡。  
惟有杯盘思上国，酒醪甜淡菜蔬甘。

卷 752\_39 【游方山宿李道士房】

徐铉

从来未面李先生，借我西窗卧月明。  
二十三家同愿识，素骡何日暂还城。

卷 752\_40 【题画石山】

徐铉

彼美嶮岩石，谁施黼藻功。回岩明照地，绝壁烂临空。  
锦段鲜须濯，罗屏展易穷。不因秋藓绿，非假晚霞红。  
羽客藏书洞，樵人取箭风。灵踪理难问，仙路去何通。  
返驾归尘里，留情向此中。回瞻画图畔，遥羨面山翁。

卷 752\_41 【临石步港】

徐铉

埼岸堕萦带，微风起细涟。绿阴三月后，倒影乱峰前。  
吹浪游鳞小，黏苔碎石圆。会将腰下组，换取钓鱼船。

卷 752\_42 【病题二首】

徐铉

性灵慵懒百无能，唯被朝参遣夙兴。圣主优容恩未答，  
丹经疏阔病相陵。脾伤对客偏愁酒，眼暗看书每愧灯。  
进与时乖不知退，可怜身计谩腾腾。

人间多事本难论，况是人间懒慢人。不解养生何怪病，  
已能知命敢辞贫。向空咄咄烦书字，举世滔滔莫问津。  
金马门前君识否，东方曼倩是前身。

卷 752\_43 【寄江州萧给事】

徐铉

夕郎忧国不忧身，今向天涯作逐臣。魂梦暗驰龙阙曙，  
啸吟闲绕虎谿春。朝车载酒过山寺，谏纸题诗寄野人。  
惆怅懦夫何足道，自离群后已同尘。

卷 752\_44 【和江州江中丞见寄】

徐铉

贾傅南迁久，江关道路遥。北来空见雁，西去不如潮。

鼠穴依城社，鸿飞在沕寥。高低各有处，不拟更相招。

卷 752\_45 【和钟郎中送朱先辈还京垂寄】

徐铉

分司洗马无人问，辞客殷勤辍棹歌。苍藓满庭行径小，  
高梧临槛雨声多。春愁尽付千杯酒，乡思遥闻一曲歌。  
且共胜游消永日，西冈风物近如何？

卷 752\_46 【送郝郎中为浙西判官】

徐铉

大藩从事本优贤，幕府仍当北固前。花绕楼台山倚郭，  
寺临江海水连天。恐君到即忘归日，忆我游曾历二年。  
若许他时作闲伴，殷勤为买钓鱼船。

卷 752\_47 【翰林游舍人清明日入院中途见过余明日...因寄游君】

徐铉

榆柳开新焰，梨花发故枝。辘轳隘城市，圭组坐曹司。  
独对芝泥检，遥怜白马儿。禁林还视草，气味两相知。

卷 752\_48 【陪王庶子游后湖涵虚阁】

徐铉

悬圃清虚乍过秋，看山寻水上兹楼。轻鸥的的飞难没，  
红叶纷纷晚更稠。风卷微云分远岫，浪摇晴日照中洲。  
跻攀况有承华客，如在南皮奉胜游。

卷 752\_49 【柳枝辞十二首】

徐铉

把酒凭君唱柳枝，也从丝管递相随。  
逢春只合朝朝醉，记取秋风落叶时。

南园日暮起春风，吹散杨花雪满空。  
不惜杨花飞也得，愁君老尽脸边红。

陌上朱门柳映花，帘钩半卷绿阴斜。  
凭郎暂驻青骢马，此是钱塘小小家。

夹岸朱栏柳映楼，绿波平幔带花流。  
歌声不出长条密，忽地风回见彩舟。

老大逢春总恨春，绿杨阴里最愁人。

旧游一别无因见，嫩叶如眉处处新。

蒙蒙堤畔柳含烟，疑是阳和二月天。  
醉里不知时节改，漫随儿女打秋千。

水阁春来乍减寒，晓妆初罢倚栏干。  
长条乱拂春波动，不许佳人照影看。

柳岸烟昏醉里归，不知深处有芳菲。  
重来已见花飘尽，唯有黄莺啜树飞。

此去仙源不是遥，垂杨深处有朱桥。  
共君同过朱桥去，索映垂杨听洞箫。

暂别扬州十度春，不知光景属何人。  
一帆归客千条柳，肠断东风扬子津。

仙乐春来按舞腰，清声偏似傍娇饶。  
应缘莺舌多情赖，长向双成说翠条。  
凤笙临槛不能吹，舞袖当筵亦自疑。  
唯有美人多意绪，解依芳态画双眉。

卷 752\_50 【贬官泰州出城作】

徐铉

浮名浮利信悠悠，四海干戈痛主忧。三谏不从为逐客，

一身无累似虚舟。满朝权贵皆曾忤，绕郭林泉已遍游。  
惟有恋恩终不改，半程犹自望城楼。

卷 752\_51 【过江】

徐铉

别路知何极，离肠有所思。登舫望城远，摇橹过江迟。  
断岸烟中失，长天水际垂。此心非橘柚，不为两乡移。

卷 752\_52 【经东都太子桥】

徐铉

纶闱放逐知何道，桂苑风流且暂归。  
莫问升迁桥上客，身谋疏拙旧心违。

## 第七百五十三卷

### 卷 753\_1 【赠维扬故人】

徐铉

东京少长认维桑，书剑谁教入帝乡。一事无成空放逐，  
故人相见重凄凉。楼台寂寞官河晚，人物稀疏驿路长。  
莫怪临风惆怅久，十年春色忆维扬。

### 卷 753\_2 【泰州道中却寄东京故人】

徐铉

风紧雨凄凄，川回岸渐低。吴州林外近，隋苑雾中迷。  
聚散纷如此，悲欢岂易齐。料君残酒醒，还听子规啼。

### 卷 753\_3 【得浙西郝判官书未及报闻燕王移镇京口...田书记消息】

徐铉

秋风海上久离居，曾得刘公一纸书。淡水心情长若此，

银钩踪迹更无如。尝忧座侧飞鸢鸟，未暇江中觅鲤鱼。  
今日京吴建朱邸，问君谁共曳长裾。

卷 753\_4 【赠陶使君求梨】

徐铉

昨宵宴罢醉如泥，惟忆张公大谷梨。白玉花繁曾缀处，  
黄金色嫩乍成时。冷侵肺腑醒偏早，香惹衣襟歇倍迟。  
今旦中山方酒渴，唯应此物最相宜。

卷 753\_5 【陈觉放还至泰州，以诗见寄，作此答之】

徐铉

朱云曾为汉家忧，不怕交亲作世仇。壮气未平空咄咄，  
狂言无验信悠悠。今朝我作伤弓鸟，却羨君为不系舟。  
劳寄新诗平宿憾，此生心气贯清秋。

卷 753\_6 【王三十七自京垂访，作此送之】

徐铉

失乡迁客在天涯，门掩苔垣向水斜。只就鳞鸿求远信，  
敢言车马访贫家。烟生柳岸将垂缕，雪压梅园半是花。

惆怅明朝尊酒散，梦魂相送到京华。

卷 753\_7 【陶使君挽歌二首】

徐铉

太守今何在，行春去不归。筵空收管吹，郊迥俨骖騑。  
营外星才落，园中露已稀。伤心梁上燕，犹解向人飞。

始忆花前宴，笙歌醉夕阳。那堪城外送，哀挽逐归舡。  
铃阁朝犹闭，风亭日已荒。唯余迁客泪，沾酒后池傍。

卷 753\_8 【雪中作】

徐铉

赋分多情客，经年去国心。疏钟寒郭晚，密雪水亭深。  
影迥鸿投渚，声愁雀噪林。他乡一尊酒，独坐不成斟。

卷 753\_9 【赋得风光草际浮】

徐铉

宿露依芳草，春郊古陌旁。风轻不尽偃，日早未晞阳。

耿耿依平远，离离入望长。映空无定彩，飘径有余光。  
颺若荷珠乱，纷如爝火扬。诗人多感物，凝思绕池塘。

卷 753\_10 【寒食成判官垂访因赠】

徐铉

常年寒食在京华，今岁清明在海涯。远巷蹋歌深夜月，  
隔墙吹管数枝花。鸳鸯得路音尘阔，鸿雁分飞道里赊。  
不是多情成二十，断无人解访贫家。

卷 753\_11 【送客至城西，望图山，因寄浙西府中】

徐铉

牧叟邹生笑语同，莫嗟江上听秋风。  
君看逐客思乡处，犹在图山更向东。

卷 753\_12 【送写真成处士入京】

徐铉

传神踪迹本来高，泽畔形容愧彩毫。  
京邑功臣多伫望，凌烟阁上莫辞劳。

卷 753\_13 【九日雨中】

徐铉

茱萸房重雨霏微，去国逢秋此恨稀。目极暂登台上望，  
心遥长向梦中归。荃蘼路远愁霜早，兄弟乡遥羨雁飞。  
唯有多情一枝菊，满杯颜色自依依。

卷 753\_14 【寄外甥苗武仲】

徐铉

放逐今来涨海边，亲情多在凤台前。且将聚散为闲事，  
须信华枯是偶然。蝉噪疏林村倚郭，鸟飞残照水连天。  
此中唯欠韩康伯，共对秋风咏数篇。

卷 753\_15 【寄从兄宪兼示二弟】

徐铉

别路吴将楚，离忧弟与兄。断云惊晚吹，秋色满孤城。  
信远鸿初下，乡遥月共明。一枝栖未稳，回首望三京。

卷 753\_16 【附书与钟郎中因寄京妓越宾】

徐铉

暮春桥下手封书，寄向江南问越姑。  
不道诸郎少欢笑，经年相别忆侬无？

卷 753\_17 【代钟答】

徐铉

一幅轻绡寄海滨，越姑长感昔时恩。  
欲知别后情多少，点点凭君看泪痕。

卷 753\_18 【亚元舍人不替深知猥贻佳作三篇清绝不敢轻...庶资一笑耳】

徐铉

海陵城里春正月，海畔朝阳照残雪。城中有客独登楼，  
遥望天边白银阙。白银阙下何英英，雕鞍绣毂趋承明。  
阊门晓辟旌旗影，玉墀风细佩环声。此处追飞皆俊彦，  
当年何事容疵贱。怀铅昼坐紫微宫，焚香夜直明光殿。  
王言简静官司闲，朋好殷勤多往还。新亭风景如东洛，

邛岭林泉似北山。光阴暗度杯盂里，职业未妨谈笑间。  
有时邀宾复携妓，造门不问都非是。酣歌叫笑惊四邻，  
赋笔纵横动千字。任他银箭转更筹，不怕金吾司夜吏。  
可怜诸贵贤且才，时情物望两无猜。伊余独禀狂狷性，  
褊量多言仍薄命。吞舟可漏岂无恩，负乘自贻非不幸。  
一朝削迹为迁客，旦暮青云千里隔。离鸿别雁各分飞，  
折柳攀花两无色。卢龙渡口问迷津，瓜步山前送暮春。  
白沙江上曾行路，青林花落何纷纷。汉皇昔幸回中道，  
极目牛羊卧芳草。旧宅重游尽隙荒，故人相见多衰老。  
禅智寺，山光桥，风瑟瑟兮雨萧萧。行杯已醒残梦断，  
征途未极离魂消。海陵郡中陶太守，相逢本是随行旧。  
乍申拜起已开眉，却问辛勤还执手。精庐水榭最清幽，  
一税征车聊驻留。闭门思过谢来客，知恩省分宽离忧。  
郡斋胜境有后池，山亭菌阁互参差。有时虚左来相召，  
举白飞觞任所为。多才太守能挝鼓，醉送金船间歌舞。  
酒酣耳热眼生花，暂似京华欢会处。归来旅馆还端居，  
清风朗月夜窗虚。駸駸流景岁云暮，天涯望断故人书。  
春来凭槛方叹息，仰头忽见南来翼。足系红笺堕我前，  
引颈长鸣如有言。开缄试读相思字，乃是多情乔亚元。  
短韵三篇皆丽绝，小梅寄意情偏切。金兰投分一何坚，  
银钩置袖终难灭。醉后狂言何足奇，感君知己不相遗。  
长卿曾作美人赋，玄成今有责躬诗。报章欲托还京信，  
笔拙纸穷情未尽。珍重芸香陈子乔，亦解贻书远相问。  
宁须买药疗羸愁，只恨无书消鄙吝。游处当时靡不同，  
欢娱今日两成空。天子尚应怜贾谊，时人未要嘲扬雄。  
曲终笔阁缄封已，翩翩驿骑行尘起。寄向中朝谢故人，  
为说相思意如此。

卷 753\_19 【送蒯司录归京（亮）】

徐铉

早年闻有蒯先生，二十余年道不行。抵掌曾论天下事，  
折腰犹悟俗人情。老还上国欢娱少，贫聚归资结束轻。  
迁客临流倍惆怅，冷风黄叶满山城。

卷 753\_20 【闻查建州陷贼寄钟郎中（谩即查从事也）】

徐铉

闻道将军轻壮图，螺江城下委犀渠。旌旗零落沉荒服，  
簪履萧条返故居。皓首应全苏武节，故人谁得李陵书。  
自怜放逐无长策，空使卢谿泪满裾。

卷 753\_21 【还过东都，留守周公筵上赠座客】

徐铉

贾生三载在长沙，故友相思道路赊。已分终年甘寂寞，  
岂知今日返京华。麟符上相恩偏厚，隋苑留欢日欲斜。  
明旦江头倍惆怅，远山芳草映残霞。

卷 753\_22 【送杨郎中唐员外奉使湖南】

徐铉

江边微雨柳条新，握节含香二使臣。两绶对悬云梦日，  
方舟齐泛洞庭春。今朝草木逢新律，昨日山川满战尘。  
同是多情怀古客，不妨为赋吊灵均。

卷 753\_23 【表弟包颖见寄（此子侍亲在饶州，累年卧疾）】

徐铉

常思帝里奉交亲，别后光阴屈指频。兰佩却归纶阁下，  
荆枝犹寄楚江滨。十程山水劳幽梦，满院烟花醉别人。  
料得此生强健在，会须重赏昔年春。

卷 753\_24 【寄萧给事（萧江西致仕）】

徐铉

危言危行古时人，归向西山卧白云。买宅尚寻徐处士，  
餐霞终访许真君。容颜别后应如故，诗咏年来更不闻。  
今日城中春又至，落梅愁绪共纷纷。

卷 753\_25 【赋石奉送钟德林少尹员外】

徐铉

我爱他山石，中含绝代珍。烟披寒落落，沙浅静磷磷。  
翠色辞文陛，清声出泗滨。扁舟载归去，知是泛槎人。

## 第七百五十四卷

### 卷 754\_1 【赠泰州掾令狐克己】

徐铉

念子才多命且奇，乱中抛掷少年时。深藏七泽衣如雪，  
却见中朝鬓似丝。旧德在人终远大，扁舟为吏莫推辞。  
孤芳自爱凌霜处，咏取文公白菊诗。

### 卷 754\_2 【送荻栽与秀才朱观】

徐铉

羨子清吟处，茅斋面碧流。解憎莲艳俗，唯欠荻花幽。  
鹭立低枝晚，风惊折叶秋。赠君须种取，不必树忘忧。

### 卷 754\_3 【使浙西先寄献燕王侍中】

徐铉

京江风静喜乘流，极目遥瞻万岁楼。喜气茱萸甘露晚，

· 全唐诗 ·

---

水烟波淡海门秋。五年不见鸾台长，明日将陪兔苑游。  
欲问平台门下吏，相君还许吐茵不。

卷 754\_4 【常州驿中喜雨】

徐铉

飒飒旱天雨，凉风一夕回。远寻南亩去，细入驿亭来。  
蓑唱牛初牧，渔歌棹正开。盈庭顿无事，归思酌金罍。

卷 754\_5 【驿中七夕】

徐铉

七夕雨初霁，行人正忆家。江天望河汉，水馆折莲花。  
独坐凉何甚，微吟月易斜。今年不乞巧，钝拙转堪嗟。

卷 754\_6 【赠浙西顾推官】

徐铉

盛府宾寮八十余，闭门高卧兴无如。梁王苑里相逢早，  
润浦城中得信疏。狼藉杯盘重会面，风流才调一如初。  
愿君百岁犹强健，他日相寻隐土庐。

卷 754\_7 【赠浙西妓亚仙（筵上作）】

徐铉

翠黛嚬如怨，朱颜醉更春。占将南国貌，恼杀别家人。  
粉汗沾巡盏，花钿逐舞茵。明朝绮窗下，离恨两殷勤。

卷 754\_8 【回至瓜洲献侍中】

徐铉

紫微垣里旧宾从，来向吴门谒府公。奉使谬持严助节，  
登门初识鲁王宫。笙歌隐隐违离后，烟水茫茫怅望中。  
日暮瓜洲江北岸，两行清泪滴西风。

卷 754\_9 【邵伯埭下寄高邮陈郎中】

徐铉

故人相别动经年，候馆相逢倍惨然。顾我饮冰难辍棹，  
感君扶病为开筵。河湾水浅翘秋鹭，柳岸风微噪暮蝉。  
欲识酒醒魂断处，谢公祠畔客亭前。

卷 754\_10 【谪居舒州，累得韩高二舍人书，作此寄之】

徐铉

三峰烟霭碧临溪，中有骚人理钓丝。会友少于分袂日，  
谪居多却在朝时。丹心历历吾终信，俗虑悠悠尔不知。  
珍重韩君与高子，殷勤书札寄相思。

卷 754\_11 【和张先辈见寄二首】

徐铉

去国离群掷岁华，病容憔悴愧丹砂。溪连舍下衣长润，  
山带城边日易斜。几处垂钩依野岸，有时披褐到邻家。  
故人书札频相慰，谁道西京道路赊。

清时沦放在山州，邛竹纱巾处处游。野日苍茫悲鵬舍，  
水风阴湿弊貂裘。鸡鸣候旦宁辞晦，松节凌霜几换秋。  
两首新诗千里道，感君情分独知丘。

卷 754\_12 【印秀才至舒州见寻，别后寄诗依韵和】

徐铉

羈游白社身虽屈，高步辞场道不卑。投分共为知我者，

相寻多愧谪居时。离怀耿耿年来梦，厚意勤勤别后诗。  
今日溪边正相忆，雪晴山秀柳丝垂。

卷 754\_13 【行园树】

徐铉

松节凌霜久，蓬根逐吹频。群生各有性，桃李但争春。

卷 754\_14 【题雷公井】

徐铉

掩霭愚公谷，萧寥羽客家。俗人知处所，应为有桃花。

卷 754\_15 【送彭秀才】

徐铉

贾生去国已三年，短褐闲行皖水边。尽日野云生舍下，  
有时京信到门前。无人与和投湘赋，愧子来浮访戴船。  
满袖新诗好回去，莫随骚客醉林泉。

卷 754\_16 【移饶州别周使君】

徐铉

正怜东道感贤侯，何幸南冠脱楚囚。睨伯台前收别宴，  
乔公亭下舣行舟。四年去国身将老，百郡征兵主尚忧。  
更向鄱阳湖上去，青衫憔悴泪交流。

卷 754\_17 【避难东归，依韵和黄秀才见寄】

徐铉

戚戚逢人问所之，东流相送向京畿。自甘逐客纫兰佩，  
不料平民著战衣。树带荒村春冷落，江澄霁色雾霏微。  
时危道丧无才术，空手徘徊不忍归。

卷 754\_18 【酬郭先辈】

徐铉

太原郭夫子，行高文炳蔚。弱龄负世誉，一举游月窟。  
仙籍第三人，时人故称屈。昔余吏西省，倾盖名籍籍。  
及我窜群舒，向风心郁郁。归来暮江上，云雾一披拂。  
雷雨不下施，犹作池中物。念君介然气，感时思奋发。

示我数篇文，与古争驰突。彩褥粲英华，理深刮肌骨。  
古诗尤精奥，史论皆宏拔。举此措诸民，何忧民不活。  
吁嗟吾道薄，与世长迂阔。顾我徒有心，数奇身正绌。  
论兵属少年，经国须儒术。夫子无自轻，苍生正愁疾。

卷 754\_19 【和集贤钟郎中】

徐铉

石渠册府神仙署，当用明朝第一人。腰下别悬新印绶，  
座中皆是故交亲。龙池树色供清景，浴殿香风接近邻。  
从此翻飞应更远，遍寻三十六天春。

卷 754\_20 【送刘山阳】

徐铉

旧族知名士，朱衣宰楚城。所嗟吾道薄，岂是主恩轻。  
战鼓何时息，儒冠独自行。此心多感激，相送若为情。

卷 754\_21 【题伏龟山北隅】

徐铉

兹山信岑寂，阴崖积苍翠。水石何必多，宛有千岩意。

孰知近人境，旦暮含佳气。池影摇轻风，林光澹新霁。  
支颐藉芳草，自足忘世事。未得归去来，聊为宴居地。

卷 754\_22 【送黄梅江明府（江前为江下令，有善政。令更宰小邑，赋诗留别，作此和之）】

徐铉

封疆多难正经纶，台阁如何不用君。江上又劳为小邑，  
篋中徒自有雄文。书生胆气人谁信，远俗歌谣主不闻。  
一首新诗无限意，再三吟味向秋云。

卷 754\_23 【咏梅子真送郭先辈】

徐铉

忠臣本爱君，仁人本爱民。宁知贵与贱，岂计名与身。  
梅生为一尉，献疏来君门。君门深万里，金虎重千钧。  
向永且不用，况复论子真。拂衣遂长往，高节邈无邻。  
至今仙籍中，谓之梅真人。郭生负逸气，百代继遗尘。  
进退生自知，得丧吾不陈。斯民苟有幸，期子一朝伸。

卷 754\_24 【和萧郎中午日见寄】

徐铉

细雨轻风采药时，褰帘隐几更何为。岂知泽畔纫兰客，  
来赴城中角黍期。多罪静思如剉蘖，赦书才听似含饴。  
谢公制胜常闲暇，愿接西州敌手棋。

卷 754\_25 【送黄秀才姑孰辟命】

徐铉

世乱离情苦，家贫色养难。水云孤棹去，风雨暮春寒。  
幕府才方急，骚人泪未干。何时王道泰，万里看鹏抃。

卷 754\_26 【送王四十五归东都】

徐铉

海内兵方起，离筵泪易垂。怜君负米去，惜此落花时。  
想忆看来信，相宽指后期。殷勤手中柳，此是向南枝。

卷 754\_27 【和太常萧少卿近郊马上偶吟】

徐铉

田园经雨绿分畦，飞盖闲行九里堤。拂袖清风尘不起，  
满川芳草路如迷。林开始觉晴天迥，潮上初惊浦岸齐。  
怪得仙郎诗句好，断霞残照远山西。

卷 754\_28 【又和】

徐铉

抱瓮何人灌药畦，金衔为尔驻平堤。村桥野店景无限，  
绿水晴天思欲迷。横笛乍随轻吹断，归帆疑与远山齐。  
凤城回望真堪画，万户千门蒋峽西。

卷 754\_29 【抛球乐辞二首】

徐铉

歌舞送飞球，金觥碧玉筹。管弦桃李月，帘幕凤凰楼。  
一笑千场醉，浮生任白头。

灼灼传花枝，纷纷度画旗。不知红烛下，照见彩球飞。

借势因期克，巫山暮雨归。

卷 754\_30 【离歌辞五首】

徐铉

莫折红芳树，但知尽意看。狂风幸无意，那忍折教残。  
朝日城南路，旌旗照绿芜。使君何处去，桑下觅罗敷。  
事与年俱往，情将分共深。莫惊容鬓改，只是旧时心。  
暂别劳相送，佳期愿莫违。朱颜不须老，留取待郎归。  
拂匣收珠佩，回灯拭薄妆。莫嫌春夜短，匹似楚襄王。

卷 754\_31 【梦游三首】

徐铉

魂梦悠扬不奈何，夜来还在故人家。香蒙蜡烛时时暗，  
户映屏风故故斜。檀的慢调银字管，云鬟低缀折枝花。  
天明又作人间别，洞口春深道路赊。  
绣幌银屏杳霭间，若非魂梦到应难。窗前人静偏宜夜，

· 全唐诗 ·

---

户内春浓不识寒。蘸甲递觞纤似玉，含词忍笑赋于檀。  
锦书若要知名字，满县花开不姓潘。

南国佳人字玉儿，芙蓉双脸远山眉。仙郎有约长相忆，  
阿母何猜不得知。梦里行云还倏忽，暗中携手乍疑迟。  
因思别后闲窗下，织得回文几首诗。

卷 754\_32 【和萧少卿见庆新居】

徐铉

湘浦怀沙已不疑，京城赐第岂前期。鼓声到晚知坊远，  
山色来多与静宜。簪屨尚应怜故物，稻粱空自愧华池。  
新诗问我偏饶思，还念鹪鷯得一枝。

卷 754\_33 【又和】

徐铉

惊蓬偶驻知多幸，断雁重联愜素期。当户小山如旧识，  
上墙幽藓最相宜。清风不去因栽竹，隙地无多也凿池。  
更喜良邻有嘉树，绿阴分得近南枝。

卷 754\_34 【送勋道人之建安】

徐铉

下国兵方起，君家义独闻。若为轻世利，归去卧溪云。  
挂席冲岚翠，携筇破藓纹。离情似霜叶，江上正纷纷。

卷 754\_35 【送许郎中歙州判官兼黟县】

徐铉

尝闻黟县似桃源，况是优游冠玳筵。遗爱非遥应卧理，  
祖风犹在好寻仙。朝衣旧识熏香史，禄米初营种秫田。  
大抵宦游须自适，莫辞离别二三年。

卷 754\_36 【送彭秀才南游】

徐铉

问君孤棹去何之，玉笥春风楚水西。山上断云分翠霭，  
林间晴雪入澄溪。琴心酒趣神相会，道士仙童手共携。  
他日时清更随计，莫如刘阮洞中迷。

卷 754\_37 【和明上人除夜见寄】

徐铉

酌酒围炉久，愁襟默自增。长年逢岁暮，多病见兵兴。  
夜色开庭燎，寒威入砚冰。汤师无别念，吟坐一灯凝。

卷 754\_38 【正初和鄂州边郎中见寄】

徐铉

潦倒含香客，凄凉赋鵬人。未能全卷舌，终拟学垂纶。  
故友睽离久，音书问讯频。相思俱老大，又见一年新。

卷 754\_39 【送刘司直出宰】

徐铉

之子有雄文，风标秀不群。低飞从墨绶，逸志在青云。  
柳色临流动，春光到县分。贤人多静理，未爽醉醺醺。

卷 754\_40 【送从兄赴临川幕】

徐铉

梁王籍宠就东藩，还召邹枚坐兔园。今日好论天下事，  
昔年同受主人恩。石头城下春潮满，金柅亭边绿树繁。  
唯有音书慰离别，一杯相送别无言。

卷 754\_41 【送龚员外赴江州幕】

徐铉

烦君更上筑金台，世难民劳藉俊才。自有声名驰羽檄，  
不妨谈笑奉尊罍。元规楼迥清风满，匡俗山春画障开。  
莫忘故人离别恨，海潮回处寄书来。

卷 754\_42 【送朱先辈尉庐陵】

徐铉

我重朱夫子，依然见古人。成名无愧色，得禄及慈亲。  
莫叹官资屈，宁论活计贫。平生心气在，终任静边尘。

卷 754\_43 【送钟德林郎中学士赴东府诗·得酒】

徐铉

酌此杯中物，茱萸满把秋。今朝将送别，他日是忘忧。  
世乱方多事，年加易得愁。政成频一醉，亦未减风流。

## 第七百五十五卷

### 卷 755\_1 【送陈先生之洪井寄萧少卿】

徐铉

闻君仙袂指洪厓，我忆情人别路赊。知有欢娱游楚泽，  
更无书札到京华。云开驿阁连江静，春满西山倚汉斜。  
此处相逢应见问，为言搔首望龙沙。

### 卷 755\_2 【送龚明府九江归宁】

徐铉

茂宰隳官去，扁舟著彩衣。湓城春酒熟，匡阜野花稀。  
解缆垂杨绿，开帆宿鹭飞。一朝吾道泰，还逐落潮归。

### 卷 755\_3 【和江西萧少卿见寄二首】

徐铉

亡羊岐路愧司南，二纪穷通聚散三。老去何妨从笑傲，

病来看欲懒朝参。离肠似线常忧断，世态如汤不可探。  
珍重加餐省思虑，时时斟酒压山岚。

身遥上国三千里，名在朝中二十春。金印不须辞入幕，  
麻衣曾此叹迷津。卷舒由我真齐物，忧喜忘心即养神。  
世路风波自翻覆，虚舟无计得沉沦。

卷 755\_4 【送薛少卿赴青阳】

徐铉

我爱陶靖节，吏隐从弦歌。我爱费征君，高卧归九华。  
清风激颓波，来者无以加。我志两不遂，漂沦浩无涯。  
数奇时且乱，此图今愈赊。贤哉薛夫子，高举凌晨霞。  
安民即是道，投足皆为家。功名与权位，悠悠何用夸。  
携朋出远郊，酌酒藉平沙。云收远天静，江阔片帆斜。  
离怀与企羨，南望长咨嗟。

卷 755\_5 【送高起居之泾县】

徐铉

右史罢朝归，之官句水湄。别我行千里，送君倾一卮。  
酒罢长叹息，此叹君应悲。乱中吾道薄，卿族旧人稀。  
胡为佩铜墨，去此白玉墀。吏事岂所堪，民病何可医。

藏用清其心，此外慎勿为。县郭有佳境，千峰溪水西。  
云树杳回合，岩峦互蔽亏。弹琴坐其中，世事吾不知。  
时时寄书札，以慰长相思。

卷 755\_6 【宿茅山寄舍弟】

徐铉

茅许禀灵气，一家同上宾。仙山空有庙，举世更无人。  
独往诚违俗，浮名亦累真。当年各自勉，云洞镇长春。

卷 755\_7 【晚憩白鹤庙寄句容张少府】

徐铉

日入林初静，山空暑更寒。泉鸣细岩窦，鹤唳眇云端。  
拂榻安棋局，焚香戴道冠。望君殊不见，终夕凭栏干。

卷 755\_8 【题紫阳观】

徐铉

南朝名士富仙才，追步东卿遂不回。丹井自深桐暗老，  
祠宫长在鹤频来。岩边桂树攀仍倚，洞口桃花落复开。  
惆怅霓裳太平事，一函真迹锁昭台。

卷 755\_9 【赠奚道士（含象）】

徐铉

先生曾有洞天期，犹傍天坛摘紫芝。处世自能心混沌，  
全真谁见德支离。玉霄尘闭人长在，全鼎功成俗未知。  
他日飙轮谒茅许，愿同鸡犬去相随。

卷 755\_10 【题碧岩亭赠孙尊师】

徐铉

绝境何人识，高亭万象含。凭轩临树杪，送目极天南。  
积霭生泉洞，归云锁石龕。丹霞披翠献，白鸟带晴岚。  
仙去留虚室，龙归涨碧潭。幽岩君独爱，玄味我曾耽。  
世上愁何限，人间事久谙。终须脱羈鞅，来此会空谈。

卷 755\_11 【题白鹤庙】

徐铉

平生心事向玄关，一入仙乡似旧山。白鹤唳空晴眇眇，  
丹沙流涧暮潺潺。尝嗟多病嫌中药，拟问真经乞小还。  
满洞烟霞互陵乱，何峰台榭是萧闲。

卷 755\_12 【步虚词五首】

徐铉

气为還元正，心由抱一灵。凝神归罔象，飞步入青冥。  
整服乘三素，旋纲蹑九星。琼章开后学，稽首奉真经。

天帝黄金阙，真人紫锦书。霓裳纷蔽景，羽服迥凌虚。  
白鹤能为使，班麟解驾车。灵符终愿借，转共世情疏。

圣主过幽谷，虚皇在蕊宫。五千宗物母，七字秘神童。  
世上金壶远，人间玉龕空。唯余养身法，修此与天通。

何处求玄解，人间有洞天。勤行皆是道，谪下尚为仙。  
蔽景乘朱凤，排虚驾紫烟。不嫌园吏傲，愿在玉宸前。

三素霏霏远，盟威凜凜寒。火铃空灭没，星斗晓阑干。  
佩响流虚殿，炉烟在醮坛。萧寥不可极，骖驾上云端。

卷 755\_13 【留题仙观】

徐铉

瑶坛醮罢晚云开，羽客分飞俗士回。  
为报移文不须勒，未曾游处待重来。

卷 755\_14 【和陈洗马山庄新泉】

徐铉

已开山馆待抽簪，更要岩泉欲洗心。常被松声迷细韵，  
忽流花片落高岑。便疏浅濑穿莎径，始有清光映竹林。  
何日煎茶酝香酒，沙边同听暝猿吟。

卷 755\_15 【奉和七夕应令】

徐铉

今宵星汉共晶光，应笑罗敷嫁侍郎。斗柄易倾离恨促，  
河流不尽后期长。静闻天籁疑鸣佩，醉折荷花想艳妆。  
谁见宣猷堂上宴，一篇清韵振金铛。

卷 755\_16 【又和八日】

徐铉

微云疏雨淡新秋，晓梦依稀十二楼。故作别离应有以，  
拟延更漏共无由。那教人世长多恨，未必天仙不解愁。  
博望苑中残酒醒，香风佳气独迟留。

卷 755\_17 【和印先辈及第后献座主朱舍人郊居之作】

徐铉

成名郊外掩柴扉，树影蝉声共息机。积雨暗封青藓径，  
好风轻透白练衣。嘉鱼始赋人争诵，荆玉频收国自肥。  
独坐公厅正烦暑，喜吟新咏见玄微。

卷 755\_18 【和致仕张尚书新创道院】

徐铉

梓泽成新致，金丹有旧情。挂冠朝睡足，隐几暮江清。  
药圃分轻绿，松窗起细声。养高宁厌病，默坐对诸生。

卷 755\_19 【和尉迟赞善秋暮僻居】

徐铉

登高节物最堪怜，小岭疏林对槛前。轻吹断时云缥缈，  
夕阳明处水澄鲜。江城秋早催寒事，望苑朝稀足晏眠。  
庭有菊花尊有酒，若方陶令愧前贤。

卷 755\_20 【和陈赞善致仕还京口】

徐铉

海门山下一渔舟，中有高人未白头。已驾安车归故里，  
尚通闰籍在龙楼。泉声漱玉窗前落，江色和烟槛外流。  
今日君臣厚终始，不须辛苦画双牛。

卷 755\_21 【京使回自临川，得从兄书寄诗，依韵和】

徐铉

珍重还京使，殷勤话故人。别离长挂梦，宠禄不关身。  
趣向今成道，声华旧绝尘。莫嗟客鬓老，诗句逐时新。

卷 755\_22 【陪郑王相公赋筵前垂冰，应教依韵】

徐铉

窗外虚明雪乍晴，檐前垂霰尽成冰。长廊瓦叠行行密，  
晚院风高寸寸增。玉指乍拈簪尚愧，金阶时坠磬难胜。  
晨餐堪醒曹参酒，自恨空肠病不能。

卷 755\_23 【送礼部潘尚书致仕还建安】

徐铉

名遂功成累复轻，鲈鱼因起旧乡情。履声初下金华省，  
帆影看离石首城。化剑津头寻故老，同亭会上问仙卿。  
冥鸿高举真难事，相送何须泪满缨。

卷 755\_24 【和尉迟赞善病中见寄】

徐铉

仙郎移病暑天过，却似冥鸿避罽罗。昼梦乍惊风动竹，  
夜吟时觉露沾莎。情亲稍喜贫居近，性懒犹嫌上直多。  
望苑恩深期勿药，青云岐路未蹉跎。

卷 755\_25 【池州陈使君见示游齐山诗因寄】

徐铉

往岁曾游弄水亭，齐峰浓翠暮轩横。哀猿出槛心虽喜，  
伤鸟闻弦势易惊。病后簪缨殊寡兴，老来泉石倍关情。  
今朝池口风波静，遥贺山前有颂声。

卷 755\_26 【再领制诰和王明府见贺】

徐铉

蹇步还依列宿边，拱辰重认旧云天。自嗟多难飘零困，  
不似当年胆气全。鸡树晚花疏向日，龙池轻浪细含烟。  
从来不解为身计，一叶悠悠任大川。

卷 755\_27 【送高舍人使岭南】

徐铉

西掖官曹近，南溟道路遥。使星将渡汉，仙棹乍乘潮。  
柳映灵和折，梅依大庾飘。江帆风淅淅，山馆雨萧萧。  
陆贾真迂阔，终童久寂寥。送君何限意，把酒一长谣。

卷 755\_28 【和王明府见寄】

徐铉

时情世难消吾道，薄宦流年危此身。莫叹京华同寂寞，  
曾经兵革共漂沦。对山开户唯求静，貰酒留宾不道贫。  
善政空多尚淹屈，不知谁是解忧民。

卷 755\_29 【和方泰州见寄】

徐铉

逐客凄凄重入京，旧愁新恨两难胜。云收楚塞千山雪，  
风结秦淮一尺冰。置醴筵空情岂尽，投湘文就思如凝。  
更残月落知孤坐，遥望船窗一点星。

卷 755\_30 【文献太子挽歌词五首】

徐铉

国有承祧重，人知秉哲尊。清风来望苑，遗烈在东藩。  
此日升缙岭，何因到寝门。天高不可问，烟霭共昏昏。

夏启吾君子，周储上帝宾。音容一飘忽，功业自纷纶。  
露泣承华月，风惊丽正尘。空余商岭客，行泪下宜春。

出处成交让，经纶有大功。泪碑瓜步北，棠树蒜山东。  
百揆方时叙，重离遂不融。故臣偏感咽，曾是叹三穷。

甲观光阴促，园陵天地长。箫笳咽无韵，宾御哭相将。  
盛烈传彝鼎，遗文被乐章。君臣知己分，零泪乱无行。

彩仗清晨出，非同齿胄时。愁烟锁平甸，朔吹绕寒枝。

楚客来何补，缙山去莫追。回瞻飞盖处，掩袂不胜悲。

卷 755\_31 【送王员外宰德安】

徐铉

家世朱门贵，官资粉署优。今为百里长，应好五峰游。  
柳影连彭泽，湖光接庾楼。承明须再入，官满莫淹留。

卷 755\_32 【以端溪砚酬张员外水精珠兼和来篇】

徐铉

请以端溪润，酬君水玉明。方圆虽异器，功用信俱呈。  
自得山川秀，能分日月精。巾箱各珍重，所贵在交情。

卷 755\_33 【奉使九华山，中途遇青阳薛郎中】

徐铉

故人相别动相思，此地相逢岂素期。九子峰前闲未得，  
五溪桥上坐多时。甘泉从幸余知忝，宣室征还子未迟。  
且饮一杯消别恨，野花风起渐离披。

卷 755\_34 【奉命南使经彭泽】

徐铉

远使程途未一分，离心常要醉醺醺。  
那堪彭泽门前立，黄菊萧疏不见君。

卷 755\_35 【南都遇前嘉鱼刘令，言游闽岭，作此与之】

徐铉

我持使节经韶石，君作闲游过武夷。两地山光成独赏，  
隔年乡思暗相知。洪厓坛上长岑寂，孺子亭前自别离。  
珍重分岐一杯酒，强加餐饭数吟诗。

卷 755\_36 【阁皂山】

徐铉

殿影高低云掩映，松阴缭绕步徘徊。  
从今莫厌簪裾累，不是乘轺不得来。

卷 755\_37 【玉笥山留题】

徐铉

仙乡会应远，王事知何极。征传莫辞劳，玉峰聊一息。  
形骸已销散，心想都凝寂。真气自清虚，非关好松石。  
九仙皆积学，洞壑多遗迹。游子归去来，胡为但征役。

卷 755\_38 【庐陵别朱观先辈】

徐铉

桂籍知名有几人，翻飞相续上青云。解怜才子宁唯我，  
远作卑官尚见君。岭外独持严助节，宫中谁荐长卿文。  
新诗试为重高咏，朝汉台前不可闻。

卷 755\_39 【文彧少卿文山郎中交好深至二纪已余睽别...留题此诗】

徐铉

孙家虚座吊诸孤，张叟僧房见手书。二纪欢游今若此，  
满衣零泪欲何如。腰间金印从如斗，镜里霜华已满梳。  
珍重远公应笑我，尘心唯此未能除。

卷 755\_40 【朱处士相与有山水之愿见送至南康作此以别之】

徐铉

怜君送我至南康，更忆梅花庾岭芳。  
多少仙山共游在，愿君百岁尚康强。

卷 755\_41 【清明日清远峡作】

徐铉

岭外春过半，途中火又新。殷勤清远峡，留恋北归人。

卷 755\_42 【回至南康题紫极宫里道士房】

徐铉

王事信靡盬，饮冰安足辞。胡为拥征传，乃至天南陲。  
天南非我乡，留滞忽逾时。还经羽人家，豁若云雾披。  
何以宽吾怀，老庄有微词。达士无不可，至人岂偏为。  
客愁勿复道，为君吟此诗。

卷 755\_43 【和歙州陈使君见寄】

徐铉

新安风景好，时令肃辕门。身贵心弥下，功多口不言。  
韬铃家法在，儒雅素风存。簪履陪游盛，乡间俗化敦。  
临窗山色秀，绕郭水声喧。织络文章丽，矜严道义尊。  
楼台秋月静，京庾晚云屯。晓吹传衙鼓，晴阳展信幡。  
一篇贻友好，千里倍心论。未见归驺动，空能役梦魂。

卷 755\_44 【和贾员外骞见赠玉蕊花栽】

徐铉

琼瑶一簇带花来，便断苍苔手自栽。  
喜见唐昌旧颜色，为君判病酌金罍。

卷 755\_45 【光穆皇后挽歌三首】

徐铉

仙驭期难改，坤仪道自光。闕宫新表德，沙麓旧膺祥。  
素帟尧门掩，凝笳毕陌长。东风惨陵树，无复见亲桑。

永乐留虚位，长陵启夕扉。返虞严吉仗，复土掩空衣。  
功业投三母，光灵极四妃。唯应彤史在，不与露花晞。

隐隐闾门路，烟云晓更愁。空瞻金辂出，非是濯龙游。  
德感人伦正，风行内职修。还随偶物化，同此思轩丘。

卷 755\_46 【严相公宅牡丹】

徐铉

但是豪家重牡丹，争如丞相阁前看。凤楼日暖开偏早，  
鸡树阴浓谢更难。数朵已应迷国艳，一枝何幸上尘冠。  
不知更许凭栏否，烂熳春光未肯残。

卷 755\_47 【侍宴赋得归雁】

徐铉

夜静群动息，翩翩一雁归。清音天际远，寒影月中微。  
何处云同宿，长空雪共飞。阳和常借便，免与素心违。

卷 755\_48 【又赋早春书事】

徐铉

苑里芳华早，皇家胜事多。弓声达春气，弈思养天和。

暖酒红炉火，浮舟绿水波。雪晴农事起，击壤听赓歌。

卷 755\_49 【依韵和令公大王蔷薇诗】

徐铉

绿树成阴后，群芳稍歇时。谁将新濯锦，挂向最长枝。  
卷箔香先入，凭栏影任移。赏频嫌酒渴，吟苦怕霜髭。  
架迥笼云幄，庭虚展绣帷。有情萦舞袖，无力冒游丝。  
嫩蕊莺偷采，柔条柳伴垂。荀池波自照，梁苑客尝窥。  
玉李寻皆谢，金桃亦暗衰。花中应独贵，庭下故开迟。  
委艳妆苔砌，分华借槿篱。低昂匀灼烁，浓淡叠参差。  
幸植王宫里，仍逢宰府知。芳心向谁许，醉态不能支。  
芍药天教避，玫瑰众共嗤。光明烘昼景，润膩裊轻斯。  
丽似期神女，珍如重卫姬。君王偏属咏，七子尽搜奇。

卷 755\_50 【和门下殷侍郎新茶二十韵】

徐铉

暖吹入春园，新芽竞粲然。才教鹰觜拆，未放雪花妍。  
荷杖青林下，携筐旭景前。孕灵资雨露，钟秀自山川。  
碾后香弥远，烹来色更鲜。名随土地贵，味逐水泉迁。  
力藉流黄暖，形模紫笋圆。正当钻柳火，遥想涌金泉。  
任道时新物，须依古法煎。轻瓯浮绿乳，孤灶散余烟。

· 全唐诗 ·

---

甘荠非予匹，宫槐让我先。竹孤空冉冉，荷弱谩田田。  
解渴消残酒，清神感夜眠。十浆何足馈，百榼尽堪捐。  
采擷唯忧晚，营求不计钱。任公因焙显，陆氏有经传。  
爱甚真成癖，尝多合得仙。亭台虚静处，风月艳阳天。  
自可临泉石，何妨杂管弦。东山似蒙顶，愿得从诸贤。

卷 755\_51 【春雪应制】

徐铉

繁阴连曙景，瑞雪洒芳辰。势密犹疑腊，风和始觉春。  
萦林开玉蕊，飘座裊香尘。欲识宸心悦，云谣慰兆人。

卷 755\_52 【进雪诗】

徐铉

欲使新正识有年，故飘轻絮伴春还。近看琼树笼银阙，  
远想瑶池带玉关。润逐麝麝铺绿野，暖随杯酒上朱颜。  
朝来花萼楼中宴，数曲赓歌雅颂间。

卷 755\_53 【自题山亭三首】

徐铉

簪组非无累，园林未是归。世喧长不到，何必故山薇。

小舫行乘月，高斋卧看山。退公聊自足，争敢望长闲。  
跂石仍临水，披襟复挂冠。机心忘未得，棋局与鱼竿。

卷 755\_54 【和陈表用员外求酒】

徐铉

暑天频雨亦频晴，帘外闲云重复轻。  
珍重一壶酬绝唱，向风遥想醉吟声。

卷 755\_55 【奉和右省仆射西亭高卧作】

徐铉

院静苍苔积，庭幽怪石欹。蝉声当槛急，虹影向檐垂。  
昼漏犹怜永，丛兰未觉衰。疏篁巢翡翠，折苇覆鸂鶒。  
对酒襟怀旷，围棋旨趣迟。景皆随所尚，物各遂其宜。  
道与时相会，才非世所羁。赋诗贻座客，秋事尔何悲。

卷 755\_56 【忆新淦觞池寄孟宾于员外】

徐铉

往年淦水驻行轩，引得清流似月圆。自有谿光还碧甃，

· 全唐诗 ·

---

不劳人力递金船。润滋苔藓欺茵席，声入杉松当管弦。  
珍重诗人频管领，莫教尘土咽潺潺。

卷 755\_57 【右省仆射后湖亭闲宴，铉以宿直先归，赋诗留献】

徐铉

湖上一阳生，虚亭启高宴。枫林烟际出，白鸟波心见。  
主人忘贵达，座客容疵贱。独惭残照催，归宿明光殿。

## 第七百五十六卷

### 卷 756\_1 【送孟宾于员外还新淦】

徐铉

暂来城阙不从容，却佩银鱼隐玉峰。双涧水边敲醉石，  
九仙台下听风松。题诗翠壁称逋客，采药春畦狎老农。  
野鹤乘轩云出岫，不知何日再相逢。

### 卷 756\_2 【孟君别后相续寄书，作此酬之】

徐铉

多病怯烦暑，短才忧近职。跂足北窗风，遥怀浩无极。  
故人易成别，诗句空相忆。尺素寄天涯，淦江秋水色。

### 卷 756\_3 【纳后夕侍宴】

徐铉

天上轩星正，云间湛露垂。礼容过渭水，宴喜胜瑶池。

· 全唐诗 ·

---

彩雾笼花烛，升龙肃羽仪。君臣欢乐日，文物盛明时。  
帘卷银河转，香凝玉漏迟。华封倾祝意，觞酒与声诗。

时平物茂岁功成，重翟排云到玉京。  
四海未知春色至，今宵先入九重城。

银烛金炉禁漏移，月轮初照万年枝。  
造舟已似文王事，卜世应同八百期。

汉主承乾帝道光，天家花烛宴昭阳。  
六衣盛礼如金屋，彩笔分题似柏梁。

卷 756\_4 【北苑侍宴杂咏诗·竹】

徐铉

劲节生宫苑，虚心奉豫游。自然名价重，不羨渭川侯。

卷 756\_5 【北苑侍宴杂咏诗·松】

徐铉

细韵风中远，寒青雪后浓。繁阴堪避雨，效用待东封。

卷 756\_6 【北苑侍宴杂咏诗·水】

徐铉

碧草垂低岸，东风起细波。横汾从游宴，何谢到天河。

卷 756\_7 【北苑侍宴杂咏诗·风】

徐铉

昨朝才解冻，今日又开花。帝力无人识，谁知玩物华。

卷 756\_8 【北苑侍宴杂咏诗·菊】

徐铉

细丽披金彩，氛氲散远馨。泛杯频奉赐，缘解制颓龄。

卷 756\_9 【柳枝词十首】

徐铉

金马辞臣赋小诗，梨园弟子唱新词。

君恩还似东风意，先入灵和蜀柳枝。

百草千花共待春，绿杨颜色最惊人。  
天边雨露年年在，上苑芳华岁岁新。

长爱龙池二月时，毵毵金线弄春姿。  
假饶叶落枝空后，更有梨园笛里吹。

绿水成文柳带摇，东风初到不鸣条。  
龙舟欲过偏留恋，万缕轻丝拂御桥。

百尺长条婉曲尘，诗题不尽画难真。  
凭君折向人间种，还似君恩处处春。

风暖云开晚照明，翠条深映凤凰城。  
人间欲识灵和态，听取新词玉管声。

醉折垂杨唱柳枝，金城三月走金羈。  
年年为爱新条好，不觉苍华也似丝。

新春花柳竞芳姿，偏爱垂杨拂地枝。  
天子遍教词客赋，宫中要唱洞箫词。

凝碧池头蘸翠涟，凤凰楼畔簇晴烟。  
新词欲咏知难咏，说与双成入管弦。

侍从甘泉与未央，移舟偏要近垂杨。

樱桃未绽梅花老，折得柔条百尺长。

卷 756\_10 【奉和宫傅相公怀旧见寄四十韵】

徐铉

谢傅功成德望全，鸾台初下正萧然。抟风乍息三千里，  
感旧重怀四十年。西掖新官同贾马，南朝兴运似开天。  
文辞职业分工拙，流辈班资让后先。每愧陋容劳刻画，  
长惭顽石费雕镌。晨趋纶掖吟春永，夕会精庐待月圆。  
立马有时同草诏，联镳几处共成篇。闲歌柳叶翻新曲，  
醉咏桃花促绮筵。少壮况逢时世好，经过宁虑岁华迁。  
云龙得路须腾跃，社栎非材合弃捐。再谒湘江犹是幸，  
两还宣室竟何缘。已知瑕玷劳磨莹，又得官司重接连。  
听漏分宵趋建礼，从游同召赴甘泉。云开闾阖分台殿，  
风过华林度管弦。行止不离宫仗影，衣裾尝惹御炉烟。  
师资稷契论中礼，依止山公典小铨。多谢天波垂赤管，  
敢教晨景过华砖。翺飞附骥方经远，巨楫垂风遂济川。  
玉烛调时钧轴正，台阶平处德星悬。岩廊礼绝威容肃，  
布素情深友好偏。长拟营巢安大厦，忽惊操钺领中权。  
吴门日丽龙衔节，京口沙晴鹤画船。盖代名高方赫赫，  
恋恩心切更乾乾。袁安辞气忠仍恳，吴汉精诚直且专。  
却许丘明师纪传，更容疏广奉周旋。朱门自得施行马，  
厚禄何妨食万钱。密疏尚应劳献替，清谈唯见论空玄。  
东山妓乐供闲步，北牖风凉足晏眠。玄武湖边林隐见，  
五城桥下棹洄沿。曾移苑树开红药，新凿家池种白莲。

不遣前驹妨野逸，别寻逋客互招延。棋枰寂静陈虚阁，  
诗笔沉吟劈彩笺。往事偶来春梦里，闲愁因动落花前。  
青云旧侣嗟谁在，白首亲情倍见怜。尽日凝思殊怅望，  
一章追叙信精研。韶颜莫与年争竞，世虑须凭道节宣。  
幸喜书生为将相，定由阴德致神仙。羊公剩有登临兴，  
尚子都无嫁娶牵。退象天山镇浮竞，起为霖雨润原田。  
从容自保君臣契，何必扁舟始是贤。

卷 756\_11 【右省仆射相公垂览和诗，复贻长句，辄次来韵】

徐铉

西院春归道思深，披衣闲听暝猿吟。铺陈政事留黄阁，  
偃息神机在素琴。玉柄暂时疏末座，瑶华频复惠清音。  
开晴便作东山约，共赏烟霞放旷心。

卷 756\_12 【九日落星山登高】

徐铉

秋暮天高稻穞成，落星山上会诸宾。黄花泛酒依流俗，  
白发满头思古人。岩影晚看云出岫，湖光遥见客垂纶。  
风烟不改年长度，终待林泉老此身。

卷 756\_13 【十日和张少监】

徐铉

重阳高会古平台，吟遍秋光始下来。黄菊后期香未减，  
新诗捧得眼还开。每因佳节知身老，却忆前欢似梦回。  
且喜清时屡行乐，是非名利尽悠哉。

卷 756\_14 【御筵送邓王】

徐铉

禁里秋光似水清，林烟池影共离情。暂移黄阁只三载，  
却望紫垣都数程。满座清风天子送。随车甘雨郡人迎。  
绮霞阁上诗题在，从此还应有颂声。

卷 756\_15 【和张少监晚菊】

徐铉

忆共庭兰倚砌栽，柔条轻吹独依隈。自知佳节终堪赏，  
为惜流光未忍开。采撷也须盈掌握，馨香还解满尊罍。  
今朝旬假犹无事，更好登临泛一杯。

卷 756\_16 【送冯侍郎】

徐铉

闻君竹马戏毗陵，谁道观风自六卿。今日声明光旧物，  
共看旌旆拥书生。斩蛟桥下溪烟碧，射虎亭边草路清。  
应念筵中倍离恨，老来偏重十年兄。

卷 756\_17 【又绝句寄题毗陵驿】

徐铉

曾持使节驻毗陵，长与州人有旧情。  
为向驿桥风月道，舍人髭鬓白千茎。

卷 756\_18 【陈侍郎宅观花烛】

徐铉

今夜银河万里秋，人言织女嫁牵牛。佩声寥亮和金奏，  
烛影荧煌映玉钩。座客亦从天子赐，更筹须为主人留。  
世间盛事君知否，朝下鸾台夕凤楼。

卷 756\_19 【送萧尚书致仕归庐陵】

徐铉

江海分飞二十春，重论前事不堪闻。主忧臣辱谁非我，  
曲突徙薪唯有君。金紫满身皆外物，雪霜垂领便离群。  
鹤归华表望不尽，玉笥山头多白云。

卷 756\_20 【赋得秋江晚照】

徐铉

落日照平流，晴空万里秋。轻明动枫叶，点的乱沙鸥。  
罾网鱼梁静，笞簞稻穗收。不教行乐倦，冉冉下城楼。

卷 756\_21 【奉和子龙大监与舍弟赠答之什】

徐铉

石渠东观两优贤，明主知臣岂偶然。鸳鹭分行皆接武，  
金兰同好共忘年。怀恩未遂林泉约，窃位空惭组绶悬。  
多少深情知不尽，好音相慰强成篇。

卷 756\_22 【史馆庭梅见其毫末历载三十今已半枯...伏惟垂览】

徐铉

东观婆娑树，曾怜甲坼时。繁英共攀折，芳岁几推移。  
往事皆陈迹，清香亦暗衰。相看宜自喜，双鬓合垂丝。

卷 756\_23 【太傅相公深感庭梅再成绝唱曲垂借示倍认知怜...攀和】

徐铉

禁省繁华地，含芳自一时。雪英开复落，红药植还移。  
静想分今昔，频吟叹盛衰。多情共如此，争免鬓成丝。

卷 756\_24 【太傅相公以庭梅二篇许舍弟同赋再迁藻思...庶申感谢】

徐铉

旧眷终无替，流光自足悲。攀条感花萼，和曲许埙篪。  
前会成春梦，何人更已知。缘情聊借喻，争敢道言诗。

卷 756\_25 【和钟大监泛舟同游见示】

徐铉

潮沟横趣北山阿，一月三游未是多。老去交亲难暂舍，  
闲中滋味更无过。溪桥树映行人渡，村径风飘牧竖歌。  
孤棹乱流偏有兴，满川晴日弄微波。

卷 756\_26 【又和游光睦院】

徐铉

寺门山水际，清浅照孱颜。客棹晚维岸，僧房犹掩关。  
日华穿竹静，云影过阶闲。箕踞一长啸，忘怀物我间。

卷 756\_27 【和张少监舟中望蒋山】

徐铉

谿路向还背，前山高复重。纷披红叶树，间断白云峰。  
尽日慵移棹，何年醉倚松。自知闲未得，不敢笑周顒。

卷 756\_28 【茱萸诗】

徐铉

万物庆西成，茱萸独擅名。芳排红结小，香透夹衣轻。  
宿露沾犹重，朝阳照更明。长和菊花酒，高宴奉西清。

卷 756\_29 【奉和御制茱萸】

徐铉

台畔西风御果新，芳香精彩丽萧辰。柔条细叶妆治好，  
紫蒂红芳点缀匀。几朵得陪天上宴，千株长作洞中春。  
今朝圣藻偏流咏，黄菊无由更敢邻。

卷 756\_30 【蒙恩赐酒旨令醉，进诗以谢】

徐铉

明光殿里夜迢迢，多病逢秋自寂寥。蜡炬乍传丹凤诏，  
御题初认白云谣。今宵幸识衢尊味，明日知停入閤朝。  
为感君恩判一醉，不烦辛苦解金貂。

卷 756\_31 【秋日泛舟赋蘋花】

徐铉

素艳拥行舟，清香覆碧流。远烟分的的，轻浪泛悠悠。  
雨歇平湖满，风凉运渚秋。今朝流咏处，即是白蘋洲。

卷 756\_32 【题梁王旧园】

徐铉

梁王旧馆枕潮沟，共引垂藤系小舟。树倚荒台风淅淅，  
草埋敲石雨修修。门前不见邹枚醉，池上时闻雁鹭愁。  
节士逢秋多感激，不须频向此中游。

卷 756\_33 【奉酬度支陈员外】

徐铉

古来贤达士，驰骛唯群书。非礼誓弗习，违道无与居。  
儒家若迂阔，遂将世情疏。吾友嗣世德，古风蔼有余。  
幸遇汉文皇，握兰佩金鱼。俯视长沙赋，凄凄将焉如。

卷 756\_34 【明道人归西林，求题院额，作此送之】

徐铉

昔从岐阳狩，簪纓满翠微。十年劳我梦，今日送师归。  
曳尾龟应乐，乘轩鹤谩肥。含情题小篆，将去挂岩扉。

卷 756\_35 【送宣州丘判官】

徐铉

宪署游从阻，平台道路赊。喜君驰后乘，于此会仙槎。  
缓酌迟飞盖，微吟望绮霞。相迎在春渚，暂别莫咨嗟。

卷 756\_36 【北使还襄邑道中作】

徐铉

九月三十日，独行梁宋道。河流激似飞，林叶翻如扫。  
程遥苦昼短，野迥知寒早。还家亦不闲，要且还家了。

卷 756\_37 【禁中新月】

徐铉

今夕拜新月，沈沈禁署中。玉绳疏间彩，金掌静无风。  
节换知身老，时平见岁功。吟看北墀暝，兰烬坠微红。

卷 756\_38 【观吉王从谦花烛】

徐铉

王门嘉礼万人观，况是新承置醴欢。花烛喧闾丞相府，  
星辰摇动远游冠。歌声暂阕闻宫漏，云影初开见露盘。  
帝里佳期频赋颂，长留故事在金銮。

卷 756\_39 【棋赌赋诗输刘起居（奂）】

徐铉

刻烛知无取，争先素未精。本图忘物我，何必计输赢。  
赌墅终规利，焚囊亦近名。不如相视笑，高咏两三声。

卷 756\_40 【春尽日游后湖赠刘起居】

徐铉

今朝湖上送春归，万顷澄波照白髭。  
笑折残花劝君酒，金丹成熟是何时？

卷 756\_41 【送察院李侍御使庐陵因寄孟员外】

徐铉

绣衣乘驿急如星，山水何妨寄野情。  
肯向九仙台下歇，闲听孟叟醉吟声。

卷 756\_42 【后湖访古各赋一题得西邸】

徐铉

南朝藩阃地，八友旧招寻。事往山光在，春晴草色深。  
曲池鱼自乐，丛桂鸟频吟。今日中兴运，犹怀翰墨林。

卷 756\_43 【送德迈道人之豫章】

徐铉

禅灵桥畔落残花，桥上离情对日斜。顾我乘轩惭组绶，  
羨师飞锡指烟霞。楼中西岭真君宅，门外南州处士家。  
莫道空谈便无事，碧云诗思更无涯。

卷 756\_44 【送陈秘监归泉州】

徐铉

风满潮沟木叶飞，水边行客驻骖騑。三朝恩泽冯唐老，  
万里乡关贺监归。世路穷通前事远，半生谈笑此心违。  
离歌不识高堂庆，特地令人泪满衣。

卷 756\_45 【又听《霓裳羽衣曲》送陈君】

徐铉

清商一曲远人行，桃叶津头月正明。  
此是开元太平曲，莫教偏作别离声。

卷 756\_46 【又题白鹭洲江鸥送陈君】

徐铉

白鹭洲边江路斜，轻鸥接翼满平沙。吾徒来送远行客，  
停舟为尔长叹息。酒旗渔艇两无猜，月影芦花镇相得。  
离筵一曲怨复清，满座销魂鸟不惊。人生不及水禽乐，  
安用虚名上麟阁。同心携手今如此，金鼎丹砂何寂寞。  
天涯后会眇难期，从此又应添白髭。愿君不忘分飞处，  
长保翩翩洁白姿。

卷 756\_47 【哭刑部侍郎乔公诗】

徐铉

举世重文雅，夫君更质真。曾嗟混鸡鹤，终日异淄磷。  
词赋离骚客，封章谏诤臣。襟怀道家侣，标格古时人。  
逸老诚云福，遗形未免贫。求文空得草，埋玉遂为尘。  
静想忘年契，冥思接武晨。连宵洽杯酒，分日掌丝纶。  
蠹简书陈事，遗孤托世亲。前贤同此叹，非我独沾巾。

## 第七百五十七卷

### 卷 757\_1 【送程德琳郎中学士（得远山）】

徐锴

瓜步妖氛灭，昆冈草树青。终朝空望极，今日送君行。  
报政秋云静，微吟晓月生。楼中长可见，特用灭离情。

### 卷 757\_2 【太傅相公以东观庭梅西垣旧植昔陪盛赏...伏愧斐然】

徐锴

静对含章树，闲思共有时。香随荀令在，根异武昌移。  
物性虽摇落，人心岂变衰。唱酬胜笛曲，来往韵朱丝。

### 卷 757\_3 【太傅相公与家兄梅花酬唱许缀末篇再赐新诗...伏惟采览】

徐锴

重叹梅花落，非关塞笛悲。论文叨接萼，末曲愧吹篴。

枝逐清风动，香因白雪知。陶钧敷左悌，更赋邵公诗。

卷 757\_4 【同家兄哭乔侍郎】

徐锴

诸公长者郑当时，事事无心性坦夷。但是登临皆有作，  
未尝相见不伸眉。生前适意无过酒，身后遗言只要诗。  
三日笑谈成理命，一篇投吊尚应知。

卷 757\_5 【秋词】

徐锴

井梧纷堕砌，寒雁远横空。雨久莓苔紫，霜浓薜荔红。

卷 757\_6 【和徐鼎臣见寄】

包颖

平生中表最情亲，浮世那堪聚散频。谢朓却吟归省阁，  
刘桢犹自卧漳滨。旧游半似前生事，要路多逢后进人。  
且喜新吟报强健，明年相望杏园春。

卷 757\_7 【贻耀州将】

钟谔

翩翩归尽塞垣鸿，隐隐惊开蛰户虫。渭北离愁春色里，  
江南家事战尘中。还同逐客纫兰佩，谁听缿囚奏土风。  
多谢贤侯振吾道，免令搔首泣途穷。

卷 757\_8 【献周世宗】

钟谔

三年耀武群雄服，一日回銮万国春。  
南北通欢永无事，谢恩归去老陪臣。

卷 757\_9 【代京妓越宾答徐铉】

钟谔

一幅轻绡寄海滨，越姑长感昔时恩。  
欲知别后情多少，点点凭君看泪痕。

卷 757\_10 【寄麻姑仙坛道士】

查文徽

别后相思鹤信稀，郡楼南望远峰迷。人归仙洞云连地，  
花落春林水满溪。白发只应悲镜镊，丹砂犹待寄刀圭。  
方平车驾今何在，常苦尘中日易西。

卷 757\_11 【赠韩定辞】

马彧

燧林芳草绵绵思，尽日相携陟丽谯。  
别后巉嵒山上望，羨君时复见王乔。

卷 757\_12 【答马彧】

韩定辞

崇霞台上神仙客，学辨痴龙艺最多。  
盛德好将银管述，丽词堪与雪儿歌。

卷 757\_13 【题杨克俭池馆】

何昌龄

经旬因雨不重来，门有蛛丝径有苔。  
再向白莲亭上望，不知花木为谁开。

卷 757\_14 【献江淮郡守卢公】

李羽

塞诏东来淝水滨，时情惟望秉陶钧。  
将军一阵为功业，忍见沙场百战人。

卷 757\_15 【南山池】

梁藻

翡翠戏翻荷叶雨，鹭鸶飞破竹林烟。  
时沽村酒临轩酌，拟摘新茶靠石煎。

卷 757\_16 【嘲庐山道士】

陈沆

啖肉先生欲上升，黄云踏破紫云崩。  
龙腰鹤背无多力，传与麻姑借大鹏。

卷 757\_17 【句】

陈沆

罢却儿女戏，放他花木生。  
扫地云粘帚，耕山鸟怕牛。  
点入旱云千国仰，力浮尘世一毫轻。

卷 757\_18 【赠织锦人】

李询

札札机声晓复晡，眼穿力尽竟何如。  
美人一曲成千赐，心里犹嫌花样疏。

卷 757\_19 【题金山】

韩垂

灵山一峰秀，岌然殊众山。盘根大江底，插影浮云间。  
雷霆常间作，风雨时往还。象外悬清影，千载长跻攀。

卷 757\_20 【后湖】

朱存

雷轰叠鼓火翻旗，三异翩翩试水师。  
惊起黑龙眠不得，狂风猛雨不多时。

卷 757\_21 【和徐舍人九月十一日见寄】

陈彦

衡门寂寂逢迎少，不见仙郎向五旬。  
莫问龙山前日事，菊花开却为闲人。

卷 757\_22 【登游齐山】

许坚

星使南驰入楚重，此山偏得驻行踪。  
落花满地月华冷，寂寞旧山三四峰。

卷 757\_23 【游溧阳下山寺】

许坚

地枕吴溪与越峰，前朝恩锡灵泉额。竹林晴见雁塔高，  
石室曾栖几禅伯。荒碑字没秋苔深，古池香泛荷花白。  
客有经年说别林，落日啼猿情脉脉。

卷 757\_24 【题幽栖观】

许坚

仙翁上升去，丹井寄晴壑。山色接天台，湖光照寥廓。  
玉洞绝无人，老桧犹栖鹤。我欲掣青蛇，他时冲碧落。

卷 757\_25 【上舍人徐铉】

许坚

几宵烟月锁楼台，欲寄侯门荐下才。  
满面尘埃人不识，谩随流水出山来。

卷 757\_26 【题茅山观】

许坚

常恨清风千载郁，洞天令得恣游遨。松楸古色玉坛静，  
鸾鹤不来青汉高。茅氏井寒丹已化，玄宗碑断梦仍劳。  
分明有个长生路，休向红尘叹二毛。

卷 757\_27 【建州节帅更代，筵上献诗】

王感化

旌旗赴天台，溪山晓色开。万家悲更喜，迎佛送如来。

卷 757\_28 【奉元宗命咏苑中白野鹄】

王感化

碧岩深洞恣游遨，天与芦花作羽毛。  
要识此来栖宿处，上林琼树一枝高。

卷 757\_29 【句】

王感化

草中误认将军虎，山上曾为道士羊。

卷 757\_30 【元宗钓鱼无获，进诗】

李家明

玉螯垂钩兴正浓，碧池春暖水溶溶。  
凡鳞不敢吞香饵，知是君王合钓龙。

卷 757\_31 【咏卧牛（元宗游后苑，登台，见牛晚卧美荫。家明曰：“臣不学，敢上绝句。”辅相皆惭）】

李家明

曾遭甯戚鞭敲角，又被田单火燎身。  
闲向斜阳嚼枯草，近来问喘为无人。

卷 757\_32 【题纸鸢止宋齐丘哭子】

李家明

安排唐祚革强吴，尽是先生作计谟。  
一个孩儿拚不得，让皇百口合何如？

卷 757\_33 【咏皖公山】

李家明

龙舟轻颭锦帆风，正值宸游望远空。  
回首皖公山色翠，影斜不到寿杯中。

卷 757\_34 【奉和圣制送邓王牧宣城】

汤悦

千里陵阳同陕服，凿门胙土寄亲贤。曙烟已别黄金殿，  
晚照重登白玉筵。江上浮光宜雨后，郡中远岫列窗前。  
天心待报期年政，留与工师播管弦。

卷 757\_35 【早春寄华下同志】

汤悦

正是花时节，思君寝复兴。市沽终不醉，春梦亦无凭。  
岳面悬清雨，河心走浊冰。东门一条路，离恨正相仍。

卷 757\_36 【鼎臣学士侍郎以东馆庭梅昔翰苑之毫末今复半枯...攀和】

汤悦

忆见萌芽日，还怜合抱时。旧欢如梦想，物态暗还移。  
素艳今无几，朱颜亦自衰。树将人共老，何暇更悲丝。

卷 757\_37 【再次前韵代梅答】

汤悦

托植经多稔，顷筐向盛时。枝条虽已故，情分不曾移。  
莫向阶前老，还同镜里衰。更应怜堕叶，残吹挂虫丝。

卷 757\_38 【鼎臣学士侍郎、楚金舍人学士以再伤...成四十字陈谢】

汤悦

人物同迁谢，重成念旧悲。连华得琼玖，合奏发埙篪。  
余枿虽无取，残芳尚获知。问君何所似，珍重杜秋诗。

卷 757\_39 【送钟员外（赋月）】

萧颯

丽汉金波满，当筵玉斝倾。因思频聚散，几复换亏盈。  
光彻离襟冷，声符别管清。那堪还目此，两地倚楼情。

卷 757\_40 【送德林郎中学士赴东府（得菊）】

萧颉

离情折杨柳，此别异春哉。含露东篱艳，泛香南浦杯。  
惜持行次赠，留插醉中回。暮齿如能制，玉山甘判瓌。

卷 757\_41 【送钟员外（赋竹）】

孙岷

万物中萧洒，修篁独逸群。贞姿曾冒雪，高节欲凌云。  
细韵风初发，浓烟日正曛。因题偏惜别，不可暂无君。

卷 757\_42 【送钟员外（赋松）】

谢仲宣

送人多折柳，唯我独吟松。若保岁寒在，何妨霜雪重。  
森梢逢静境，廓落见孤峰。还似君高节，亭亭鲜继踪。

卷 757\_43 【别诸同志（得新鸿）】

钟蒨

随阳来万里，点点度遥空。影落长江水，声悲半夜风。  
残秋辞绝漠，无定似惊蓬。我有离群恨，飘飘类此鸿。

卷 757\_44 【送德林郎中学士赴东府（得江）】

乔舜

掺袂向江头，朝宗势未休。何人乘桂楫，之子过扬州。  
飒飒翺沙雁，漂漂逐浪鸥。欲知离别恨，半是泪和流。

卷 757\_45 【送钟员外（赋风）】

王沂

静追蘋末兴，况复值萧条。猛势资新雁，寒声伴暮潮。  
过山云散乱，经树叶飘飘。今日烟江上，征帆望望遥。

卷 757\_46 【送德林郎中学士赴东府（得水）】

陈元裕

上善湛然秋，恩波洽帝猷。谩言生险浪，岂爽见安流。  
泛去星槎远，澄来月练浮。滔滔对离酌，入洛称仙舟。

## 第七百五十八卷

### 卷 758\_1 【宿山寺】

孟贯

溪山尽日行，方听远钟声。入院逢僧定，登楼见月生。  
露垂群木润，泉落一岩清。此景关吾事，通宵寐不成。

### 卷 758\_2 【赠栖隐洞谭先生】

孟贯

先生双鬓华，深谷卧云霞。不伐有巢树，多移无主花。  
石泉春酿酒，松火夜煎茶。因问山中事，如君有几家。

### 卷 758\_3 【归雁】

孟贯

春至衡阳雁，思归塞路长。汀洲齐奋翼，霄汉共成行。

雪尽翻风暖，寒收度月凉。直应到秋日，依旧返潇湘。

卷 758\_4 【春江送人】

孟贯

春江多去情，相去枕长汀。数雁别湓浦，片帆离洞庭。  
雨余沙草绿，云散岸峰青。谁共观明月，渔歌夜好听。

卷 758\_5 【过秦岭】

孟贯

古今传此岭，高下势峥嵘。安得青山路，化为平地行。  
苍苔留虎迹，碧树障溪声。欲过一回首，踟蹰无限情。

卷 758\_6 【送吴梦闾归闽】

孟贯

瓯闽在天末，此去整行衣。久客逢春尽，思家冒暑归。  
海云添晚景，山瘴灭晴晖。相忆吟偏苦，不堪书信稀。

卷 758\_7 【山中夏日】

孟贯

深山宜避暑，门户映岚光。夏木荫溪路，昼云埋石床。  
心源澄道静，衣葛蘸泉凉。算得红尘里，谁知此兴长。

卷 758\_8 【宿故人江居】

孟贯

渡口树冥冥，南山渐隐青。渔舟归旧浦，鸥鸟宿前汀。  
静榻悬灯坐，闲门对浪扃。相思频到此，几番醉还醒。

卷 758\_9 【寄伍乔】

孟贯

蹉跎春又晚，天末信来迟。长忆分携日，正当摇落时。  
独游饶旅恨，多事失归期。君看前溪树，山禽巢几枝。

卷 758\_10 【山中访人不遇】

孟贯

负琴兼杖藜，特地过岩西。已见竹轩闭，又闻山鸟啼。  
长松寒倚谷，细草暗连溪。久立无人事，烟霞归路迷。

卷 758\_11 【赠隐者】

孟贯

世路争名利，深山独结茅。安情自得所，非道岂相交。  
百尺松当户，千年鹤在巢。知君于此景，未欲等闲抛。

卷 758\_12 【寄暹上人】

孟贯

闻罢城中讲，来安顶上禅。夜灯明石室，清磬出岩泉。  
欲访惭多事，相思恨隔年。终期息尘虑，接话虎溪边。

卷 758\_13 【江边闲步】

孟贯

闲来南渡口，迢迢看江枫。一路波涛畔，数家芦苇中。  
远汀排晚树，深浦漾寒鸿。吟罢慵回首，此情谁与同。

卷 758\_14 【过王逸人园林】

孟贯

谷口何时住，烟霞一径深。水声离远洞，山色出疏林。  
雪彩从沾鬓，年光不计心。自言人少到，犹喜我来寻。

卷 758\_15 【寄李处士】

孟贯

僧话磻溪叟，平生重赤松。夜堂悲蟋蟀，秋水老芙蓉。  
吟坐倦垂钓，闲行多倚筇。闻名来已久，未得一相逢。

卷 758\_16 【夏日寄史处士】

孟贯

掩关苔满地，终日坐腾腾。暑气冷衣葛，暮云催烛灯。  
寂寥知得趣，疏懒似无能。还忆旧游否，何年别杜陵。

卷 758\_17 【夏日登瀑顶寺，因寄诸知己】

孟贯

曾于尘里望，此景在烟霄。岩静水声近，山深暑气遥。  
杖藜青石路，煮茗白云樵。寄语为郎者，谁能访寂寥。

卷 758\_18 【怀果上人】

孟贯

拥锡南游去，名香几处焚。别来无远信，多恐在深云。  
好月曾同步，幽香省共闻。相思不相见，林下叶纷纷。

卷 758\_19 【寄故园兄弟】

孟贯

久与乡关阻，风尘损旧衣。水思和月泛，山忆共僧归。  
林想添邻舍，溪应改钓矶。弟兄无苦事，不用别庭闱。

卷 758\_20 【早秋吟眺】

孟贯

新秋初雨后，独立对遥山。去鸟望中没，好云吟里还。  
长年惭道薄，明代取身闲。从有西征思，园林懒闭关。

卷 758\_21 【送江为归岭南】

孟贯

旧山临海色，归路到天涯。此别各多事，重逢是几时。  
江行晴望远，岭宿夜吟迟。珍重南方客，清风失所思。

卷 758\_22 【山中答友人】

孟贯

偶爱春山住，因循值暑时。风尘非所愿，泉石本相宜。  
坐久松阴转，吟余蝉韵移。自惭疏野甚，多失故人期。

卷 758\_23 【山斋早秋雨中】

孟贯

深居少往还，卷箔早秋间。雨洒吟蝉树，云藏啸狖山。  
炎蒸如便退，衣葛亦堪闲。静坐得无事，酒卮聊畅颜。

卷 758\_24 【送人游南越】

孟贯

子然南越去，替尔畏前程。见说路岐嶮，不通车马行。  
瘴烟迷海色，岭树带猿声。独向山家宿，多应乡思生。

卷 758\_25 【酬东溪史处士】

孟贯

咫尺东溪路，年来偶访迟。泉声迷夜雨，花片落空枝。  
石径逢僧出，山床见鹤移。贫斋有琴酒，曾许月圆期。

卷 758\_26 【秋江送客】

孟贯

秋风楚江上，送子话游遨。远水宿何处，孤舟春夜涛。  
浦云沈雁影，山月照猿啼。莫为饥寒苦，便成名利劳。

卷 758\_27 【寄山中高逸人】

孟贯

烟霞多放旷，吟啸是寻常。猿共摘山果，僧邻住石房。  
蹑云双屐冷，采药一身香。我忆相逢夜，松潭月色凉。

卷 758\_28 【怀友人】

孟贯

浮世况多事，飘流每叹君。路岐何处去，消息几时闻。  
吟里落秋叶，望中生暮云。孤怀谁慰我，夕鸟自成群。

卷 758\_29 【送人归别业】

孟贯

别业五湖上，春残去路赊。还寻旧山水，重到故人家。  
门径掩芳草，园林落异花。君知钓矶在，犹喜有生涯。

卷 758\_30 【冬日登江楼】

孟贯

高楼临古岸，野步晚来登。江水因寒落，山云为雪凝。  
远村虽入望，危槛不堪凭。亲老未归去，乡愁徒自兴。

卷 758\_31 【寄张山人】

孟贯

草堂南涧边，有客啸云烟。扫叶林风后，拾薪山雨前。  
野桥通竹径，流水入芝田。琴月相亲夜，更深恋不眠。

## 第七百五十九卷

### 卷 759\_1 【杜鹃花】

成彦雄

杜鹃花与鸟，怨艳两何賒。疑是口中血，滴成枝上花。  
一声寒食夜，数朵野僧家。谢豹出不出，日迟迟又斜。

### 卷 759\_2 【江上枫】

成彦雄

江枫自蓊郁，不竞松筠力。一叶落渔家，残阳带秋色。

### 卷 759\_3 【夜夜曲】

成彦雄

自从君去夜，锦幌孤兰麝。敲枕对银缸，秦筝绿窗下。

卷 759\_4 【村行】

成彦雄

暧暧村烟暮，牧童出深坞。骑牛不顾人，吹笛寻山去。

卷 759\_5 【煎茶】

成彦雄

岳寺春深睡起时，虎跑泉畔思迟迟。  
蜀茶倩个云僧碾，自拾枯松三四枝。

卷 759\_6 【松】

成彦雄

大夫名价古今闻，盘屈孤贞更出群。  
将谓岭头闲得了，夕阳犹挂数枝云。

卷 759\_7 【新燕】

成彦雄

才离海岛宿江滨，应梦笙歌作近邻。

减省雕梁并头语，画堂中有未归人。

卷 759\_8 【会友不至】

成彦雄

王孙还是负佳期，玉马追游日渐西。  
独上郊原人不见，鹧鸪飞过落花溪。

卷 759\_9 【惜花】

成彦雄

忘餐为恋满枝红，锦障频移护晚风。  
客散酒酣归未得，栏边独立月明中。

卷 759\_10 【中秋月】

成彦雄

王母妆成镜未收，倚栏人在水精楼。  
笙歌莫占清光尽，留与溪翁一钓舟。

卷 759\_11 【暮春日宴溪亭】

成彦雄

寒食寻芳游不足，溪亭还醉绿杨烟。  
谁家花落临流树，数片残红到槛前。

卷 759\_12 【晓】

成彦雄

列宿回元朝北极，爽神晞露滴楼台。  
佳人卷箔临阶砌，笑指庭花昨夜开。

卷 759\_13 【夕】

成彦雄

台榭沈沈禁漏初，麝烟红蜡透虾须。  
雕笼鹦鹉将栖宿，不许鸦鬟转轳轳。

卷 759\_14 【露】

成彦雄

银河昨夜降醍醐，洒遍坤维万象苏。  
疑是鲛人曾泣处，满池荷叶捧真珠。

卷 759\_15 【游紫阳宫】

成彦雄

古殿烟霞簇画屏，直疑踪迹到蓬瀛。  
碧桃满地眠花鹿，深院松窗捣药声。

卷 759\_16 【除夜】

成彦雄

铜龙看却送春来，莫惜颠狂酒百杯。  
吟鬓就中专拟白，那堪更被二更催。

卷 759\_17 【元日】

成彦雄

戴星先捧祝尧觞，镜里堪惊两鬓霜。  
好是灯前偷失笑，屠苏应不得先尝。

卷 759\_18 【寒夜吟】

成彦雄

洞房脉脉寒宵永，烛影香消金凤冷。  
猗儿睡麤唤不醒，满窗扑落银蟾影。

卷 759\_19 【柳枝辞九首】

成彦雄

轻笼小径近谁家，玉马追风翠影斜。  
爱把长条恼公子，惹他头上海棠花。

鹅黄剪出小花钿，缀上芳枝色转鲜。  
饮散无人收拾得，月明阶下伴秋千。

东君爱惜与先春，草泽无人处也新。  
委嘱露华并细雨，莫教迟日惹风尘。

句践初迎西子年，琉璃为帚扫溪烟。  
至今不改当时色，留与王孙系酒船。

绿杨移傍小亭栽，便拥秣烟拨不开。  
谁把金刀为删掠，放教明月入窗来。

远接关河高接云，雨余洗出半天津。  
牡丹不用相轻薄，自有清阴覆得人。

掩映莺花媚有余，风流才调比应无。  
朝朝奉御临池上，不羨青松拜大夫。

王孙宴罢曲江池，折取春光伴醉归。  
怪得美人争斗乞，要他秣翠染罗衣。

残照林梢袅数枝，能招醉客上金堤。  
马娇如练纓如火，瑟瑟阴中步步嘶。

卷 759\_20 【句】

成彦雄

莎草放茵深护砌，海榴喷火巧横墙。

· 全唐诗 ·

---

纹鳞引子跳银海，紫燕呼雏语画梁。

## 第七百六十卷

### 卷 760\_1 【寄禅月大师】

周庠

昨日尘游到几家，就中偏省近宣麻。水田铺座时移画，  
金地谭空说尽沙。傍竹欲添犀浦石，栽松更碾味江茶。  
有时捻得休公卷，倚柱闲吟见落霞。

### 卷 760\_2 【寄禅月大师】

张格

龙华咫尺断来音，日夕空驰咏德心。禅月字清师号别，  
寿春诗古帝恩深。画成罗汉惊三界，书似张颠直万金。  
莫倚名高忘故旧，晓晴闲步一相寻。

### 卷 760\_3 【赠禅月大师】

王锴

长爱吾师性自然，天心白月水中莲。神通力遍恒沙外，

· 全唐诗 ·

---

诗句名高八米前。寻访不闻朝振锡，修行唯说夜安禅。  
太平时节俱无事，莫惜时来话草玄。

卷 760\_4 【奉诏赋蜀主降唐】

牛希济

满城文武欲朝天，不觉邻师犯塞烟。唐主再悬新日月，  
蜀王难保旧山川。非干将相扶持拙，自是君臣数尽年。  
古往今来亦如此，几曾欢笑几潜然。

卷 760\_5 【蜀驮引】

冯涓

昂藏大步蚕丛国，曲颈微伸高九尺。  
卓女窥窗莫我知，严仙据案何曾识。

自古皆传蜀道难，尔何能过拔蛇山。  
忽惊登得鸡翁磧，又恐碍著鹿头关。

卷 760\_6 【句】

冯涓

不随俗物皆成土，只待良时却补天。

釜鱼化作池中物，木履浮为天际船。

卷 760\_7 【从幸秦川赋鸷兽诗】

李浩弼

岩下年年自寝讹，生灵餐尽意如何。  
爪牙众后民随减，溪壑深来骨已多。  
天子纪纲犹被弄，客人穷独固难过。  
长途莫怪无人迹，尽被山王棱杀他。

卷 760\_8 【批子弟理旧居状】

杨玠

四邻侵我我从伊，毕竟须思未有时。  
试上含元殿基望，秋风秋草正离离。

卷 760\_9 【登慈恩寺塔】

杨玠

紫云楼下曲江平，鸦噪残阳麦陇青。  
莫上慈恩最高处，不堪看又不堪听。

卷 760\_10 【遣歌妓】

杨玠

垂老无端用意乖，谁知道侣厌清斋。  
如今又采蘼芜去，辜负张君绣鞞鞋。

卷 760\_11 【和题剑门】

韩昭

闭关防老寇，孰敢振威棱。险固疑天设，山河自古凭。  
三川奚所赖，双剑最堪矜。鸟道微通处，烟霞锁百层。

卷 760\_12 【从幸秦川过白卫献诗】

韩昭

吾王巡狩为安边，此去秦亭尚数千。夜照路岐山店火，  
晓通消息戍瓶烟。为云巫峡虽神女，跨凤秦楼是谪仙。  
八骏似龙人似虎，何愁飞过大漫天。

卷 760\_13 【记皂江堕水事】

杨鼎夫

青城山峭皂江寒，欲度当时作等闲。棹逆狂风趋近岸，  
舟逢怪石碎前湾。手携弱杖仓皇处，命出洪涛顷刻间。  
今日深恩无以报，令人羞记雀衔环。

卷 760\_14 【题张道隐太山祠画龙】

蒋贻恭

世人空解竞丹青，惟子通玄得墨灵。应有鬼神看下笔，  
岂无风雨助成形。威疑喷浪归沧海，势欲拿云上杳冥。  
静闭绿堂深夜后，晓来帘幕似闻腥。

卷 760\_15 【咏蚕】

蒋贻恭

辛勤得茧不盈筐，灯下缫丝恨更长。  
著处不知来处苦，但贪衣上绣鸳鸯。

卷 760\_16 【渔父歌三首】

李珣

水接衡门十里余，信船归去卧看书。  
轻爵禄，慕玄虚，莫道渔人只为鱼。

避世垂纶不记年，官高争得似君闲。  
倾白酒，对青山，笑指柴门待月还。

棹警鸥飞水溅袍，影侵潭面柳垂绦。  
终日醉，绝尘劳，曾见钱塘八月涛。

卷 760\_17 【感秃鹫潜吟】

顾夔

昔日曾看瑞应图，万般祥瑞不如无。  
摩诃池上分明见，仔细看来是那鹈。

卷 760\_18 【与杜光庭】

张令问

试问朝中为宰相，何如林下作神仙。  
一壶美酒一炉药，饱听松风白昼眠。